

Sam-Zagame

Namba 1ni Zagame Avontafere

1

Knare avu'ava'ma nehaza vahe'ene havi avu'ava'ma nehaza vahe'mofo zagamere

¹ Kefo avu'ava'ma nehaza vahe'mokizmi kea amage'ontege, kumi'ma nehaza vahe'mokizmi zamage ontege, mani'ne'za Anumzamofoma kiza zokago kema hunentaza vahe'enema nomaniza vahe'mo'za asomu eri'za muse hugahaze. ² Ra Anumzamofu kasegema avesi avesi hunenteno, masane haninema agesa are'are'ma ana kasegegu'ma nehia vahe'mo'a, ³ tinkenare me'nea zafamo'ma kna fatgo'are raga'a knare huno renentegeni, ani'na'amo'a harari osu tretre huno meankna huno, maka zama hania zamo'a knare zanke hugahie. ⁴ Hagi kefo zamavu'zamava'ma nehaza vahe'mo'za anara osugahazanki, zaho'mo witi hona'a eri hareno viankna hugahaze. ⁵ E'ina hu'negu kefo avu'ava'ma nehaza vahe'mota Anumzamo'ma keagama refkohu trate'ma mani'neni keagama refko huramantesigeta anankeaga agatenoresageno, kumi'ma nehaza vahe'mo'zanena fatgo zamavu'zamava'ma nehaza vahe'kevufina omanigahaze. ⁶ Na'ankure fatgo avu'ava'ma nehaza vahe'mokizmia Ra Anumzamo'a kegava huzmantegahianki, kefo avu'ava'ma nehaza vahe'mo'za haviza hu'za fanane hugahaze.

2

Ra Anumzamo'ma huhamprinte'nea kini ne'mofo naneke

¹ Na'a agafare ama mopafima me'nea kumatamimpi vahe'mo'za hara hunakura oku'a nanekea retro nehazage'za, vahe'mo'za nena'a fore osia nanekea oku'a retro hu'za vano nehaze? ² Hagi Ra Anumzamo'ma masavema freno huhamprinte'nea kini ne'mofone, Anumzamofonena hara huznantenakura ama mopafi kini vahetamimo'za retrotra nehazageno, kva vahe'mo'zanena ome eritrua nehaze. ³ Ana hute'za anage nehaze, tagri'ma nofi'ma rerantena'a zana rukampru nehuta, kegavama huneranta'a zana zanatretra fru huta manisune hu'za nehaze.

⁴ Monafima kini tra'are'ma mani'nea kini ne'mo'a zamagiza neregeno, Ra Anumzamo'a kiza zokago ke hunezmante. ⁵ Ana nehuno arimpahé zampinti kea hunezmino, rimpa akahe ke huno zamazeri koro nehuno amanage hugahie, ⁶ Nagra'ni'a Saioni ruotge agonanire kini ne'ni'a azeri oti'noe. ⁷ Ra Anumzamo'ma trakema anaki namiankea zmasamigahue, Ra Anumzamo'a amanage huno nasmie, Kagra nenamofoga maninke'na, menina nagra kavre'na negafa'za hue. (Hibru 1:5-5) ⁸ Nantahigege'na ama mopafi kumatmina kami'nena erisanti haresankeno, maka mopamo'a kagri'za segahie. ⁹ Kazampina aini azompaka'a erinenka vahera kegava hunezmantenka, mopa kavo rufuzafupeankna hunka, ana vahetmina ana azompareti rufuzafupegehane. (Rev-Hufo

hu'nea naneke 2:27) ¹⁰ E'ina hu'negu menina kini vahetmimota knare antahi'za e'nerinkeno, ama mopafi kva vahe'mota tamavumro kea antahiho. ¹¹ Ra Anumzamofona koro hunteta agoraga'a mani'neta eri'zana erinenteta, tamahirahi nere'na koro hunteta agoraga'a mani'neta musena hiho. ¹² Aru arimpa ahesigeno'a tamahe fanane hanigi, nemofona agihene, agona hene hiho. Na'ankure teve anefakna huno arimpama he'zamo'a, ame huno ruhagna hugahie. Agripima frakisu'za vahe'mo'za muse hugahaze.

3

Deviti'ma nemofo Absalomunku koro'ma freno umani'neni hu'nea naneke

¹ Ra Anumzamoka ha' vahenimo'za ome ra hu'za hara hunantazanki ko! Rama'a vahe'mo'za oti'za hara renantaze! ² Rama'a nagrikura hu'za, Anumzamo'a agura ovazigahie hu'za nehaze. ³ Hianagi kagra Ra Anumzamoka maka kaziga hankoni'gna hunka manigaginantenka, ra nagia nenaminka naza hanke'na hara zamagate'neroe. ⁴ Hagi Ra Anumzamo'ma nzama hinogu'ma krafage hu'na ke'zatugeno'a, ruotge agona'aretira antahinami'ne. ⁵ Navura mase so'e hute'na onetue, na'ankure Ra Anumzamo'a kegava hunenante. ⁶ Hanki rama'a 10tauseni'a ha' vahe'mo'zama maka kazigati'ma eme navazagi kagisazana, nagra korora zamagrikura osugahue. ⁷ Ra Anumzamoka, otio! Nagri Anumzamoka nagu'vazio! Ha' vahe'ni'aramina zamerage rupro hunka nezmahenka, kefo avu'ava'ma nehia vahera zamave rutafrinka zamaho. ⁸ Vahe'ma

agu'vazi zana Ra Anumzamofompi me'ne. Hagi kagri asomu'mo'a, kagri vahepi megahie.

4

Zavenama nehaza vahe zagame Deviti asunte'nea zagamere

¹ Anumzanimoka kema hanugenka fatgo navu'navani'a refko hunka negenka antahinamio! Knafima mani'nogenka kagra naza hu'nane. Kasunku hunantenka nunamu'ni'a antahinamio. ² Hagi ama vahe'mota nama'a zupa ra nagima nenamiza zana eri rukrahe huta, agafa'a omne'zantera nazeri nagazea nehaze? Nama'a zupa nena raga ore nanekea avesinenteta havi nanekea nevararize? ³ Hianagi antahio, Ra Anumzamo'a agri'ma nevaririza vahera zamazeri ruotge huno agrarega zamavarenenteno, nagrama nunamuma hanuveno'a antahi namigahie. ⁴ Krimpama nehena kumira osuo, tafeka'are masenenka kea osu mani'nenka kagu'afi antahintahia huo. ⁵ Ofa fatgo hunka Kresramana nevunka, Ra Anumzamofonte kamentinti huo. ⁶ Rama'a hu'za, iza knare'zana taveri hugahie? hu'za nehaze. Hanki Ra Anumzamoka atregeno kavugosafinti masamo'a remsa huranteno. ⁷ Kagra tusi'a muse'za nagu'afina ante avitenantankeno witine kasefa wainima vasagazageno rama'a hige'zama musema nehazama'a agatere'ne. ⁸ Narimpa fru hu'na korora osu'na masegahue. Na'ankure Ra Anumzamoka naza hanke'na hazenkea e'ori knare hu'na nemanue.

5

Konkempinti'ma hu zagame Deviti'ma kre'nea zagamere

¹ Ra Anumzamoka, nunamu keni'a antahinaminka, knazampima mani'ne'nama kragima neruana, nenagenka antahinamio. ² Kagra nagri kini ne' mani'nenka, nagri Anumza mani'nananki, zavi krafage'nia kagesa antenka antahio. Na'ankure nagra kagritega nunamuna nehue. ³ Ra Anumzamoka nanterama segenka nagerura nentahine, maka nanterana Kresramanama vu'zana retro huntete'na kenonama hunantesanku tusiza hu'na nagesa nente'na kavegantete'na nemanue. ⁴ Na'ankure kagra kefo avu'avazanku muse osu Anumza mani'nanankino, kefo avu'avazamo'a kagri tavaontera erava'o osugahie. ⁵ Hagi zamavufaga rama nehaza vahe'mo'za kagri kavuga o'otigahaze. Hagi kefo avu'a'ma nehaza vahera kavresra hunka zamagote nezmantane. ⁶ Kagra havigema nehaza vahera nezmahane. Ha'ma huno vahe'ma ahefri zanku'ma tusi aga'manetea vahe'ene, knare agerupinti'ma masavenkema huno vahe'ma revatgama nehia vahe'enena, Ra Anumzamoka kavresa hunka zamagote'nezmantane. ⁷ Hianagi vagaore kasunku'zamo'a rankrerfa hu'neanki'na amne nonka'afina marerige, ruotge mono nonka'ama me'nerega navugosa hunte'na korora hunegante'na keprihu'na monora hugantegahue. ⁸ Ra Anumzamoka fatgo kavukavazampi navrenka vuo, na'ankure ha' vahe'niaramimoza nazeri haviza hu'za nehazanki, navrenkama

nevana kana eri fatgo huo. ⁹ Na'ankure nagri ha' vahe'mokizmi zamagipina tamage nanekea omnegeno, zamagu'afina vahe'ma azeri haviza hu'zamo avite'ne. Hagi zamananke nofimo'za, vahe'ma asenezmantaza mati kerigna higeno, vahe'ma masavema huno havi kampima avreno vu nanekemo'a, zamagefu'nafina avite'ne. ¹⁰ Anumzamoka keaga huzmantenka hazenke zamio, zamatrege'za zamagri kefo antahintahizamo, hazenkefina zamavareno ufreno. Hazenke zamavu'zmavamo'a marerige'za ha'regantazanki, zamahe natitrege'za kagri tava'ontera omaniho. ¹¹ Hianagi kagripima eme fra'manekiza vahera zamatrege'za muse hiho. Anama nehu'za zagamema hu'za musena nehanagenka, kegava huzmanto. Kagriku'ma kavesinegantaza vahera kazana rusutenka turunara huzmantege'za kagri turunapi mani'ne'za musenkasea hiho. ¹² Na'ankure tamage hunka Ra Anumzamoka fatgo avu'ava'ma nehia vahera kagra asomu hunezmantenka, knare kavukavazanu hankonuma hiaza hunka maka kaziga anteso hunezmantenka kegava hunezmantane.

6

8'a nofi me'nea zavena nehe'za hu zagame Deviti'ma hunte'nea zagamere

¹ Ra Anumzamoka kasima vazizampintira kea onasuge, karimpa ahezampintira nazeri fatgoa osuo. ² Ra Anumzamoka hankaveni'a omneanki kasunku hunantenka naza nehunka, zaferinanimi'a omne amanehianki naza huo.

³ Ra Anumzamoka, nagu' namemo'a tusi kna navenesianki, inankna zupa naza hugahane?
⁴ Ra Anumzamoka rukrahe hunka naza nehunka, vagaore kavesizanka'agu nentahinka nagu'vazio. ⁵ Fri'za vahe'mo'za fri'nazafintira antahi'nogamizanki, iza zagamera huno fri vahe kumapintira kagri kagia husga hugahie?
⁶ Kragri'ma ruvavama huazamo nanankena segeno, maka kenagera navunumo'a tafeni'afina tiru nemaregeno, zavi'ma atoazamo'a pilonimo'a pasupanegie. ⁷ Zavi'ma atoazamo navumo'a zoregeno, ha' vahe'nimo'zama hazazamo hige'na zavi'ma atoazamo navumofona hankave'a omane. ⁸ Ra Anumzamo'a zavi krafage'ni'a antahianki, kefo avu'ava'ma nehaza vahe'mota rukrahe huta natreta viho.
⁹ Asunku hunantenogu'ma krafama huana Ra Anumzamo'a nentahino, nunamuma huana nentahie. ¹⁰ Ana maka ha' vahe'nimo'za tusi zamagaze nehanige'za antahintahi hakare nehu'za, havi zamagi e'neri'za, ame huno zamagaze nehina rukrahe hu'za vugahaze.

7

Benjameni nagapinti ne' Kusi zagame, Deviti kre'nea naneke

¹ Ra Anumzana nagri Anumzamoka, kagripi fra nekuanki, nahenaku'ma navrarizama ne-esagenka nagu'vazinka naza huo. ² Ana'ma osnankeno'a laionimo'ma nehiaza hu'za nahe'za tagna taganu vazisageno mago vahe'mo'e huno eme naza huno nagura ovazigahie. ³ Ra Anumzana nagri Anumzamoka, nagrama

vahe'ma zamazeri haviza huge, nzampima hazenke'zama mege, ⁴ hazenke'a omne vahe kefo avu'ava huntege, agafa'a omne zante ha' vahe'ni'amofa feno rohumare'na erige'ma hu'nenuana geno'a, ⁵ zamatrege'za ha' vahe'nimo'za narotgo hu'za nazeri'za zamaga kanonu kugusopafi nahetrenage'na ra nagigura nagesa ontahi'na frineno. ⁶ Ra Anumzamoka krimpa hezmantenka otinka, ha' vahe'niaramina kasi vazizana eri zamaveri huo. Otinka zamarimpama ahenenantaza ha' vaheni'a fatgo kavukva hunka refko huzmantenka knazana zamio. ⁷ Atrege'za maka vahera emeri atru hu'za manigagisagenka, kagra manisga hunka mani'nenka kegava huzmanto. ⁸ Ra Anumzana maka vahe'ma refko nehia Anumzamo nagrira refko huno keana, nagra fatgo hu'noe. Fatgo navu'nava'ene knare navu'nava hugeno, hazenke zani'a omane'neanki, marerisa Anumzamoka nagrira refko hunanto. ⁹ Fatgo Anumzamoka kagra vahe'mofa antahintahine, tumo'enena negana Anumza mani'nananki, atregeno kefo zamavu'zmavama nehaza vahe'mokizmi kefo zamavu'zmava'mo'a vaganerena, fatgo avu'ava'ma nehaza vahera zamaza huge'za hankaveti'za maniho. ¹⁰ Marerifa Anumzana agra hankoni'agino, agra tumo'amo'ma fatgoma hu'nea vahera zamagu'nevazie. ¹¹ Anumzamo'a fatgo huno keaga refko nehia Anumzankino, maka kna arimpa ahenezmante. ¹² Hanki mago vahe'mo'ma agu'ama rukrahe osigeno'a, Anumzamo'a kazima'a kume neganeno, ati'a refagigino karina negreno retrorara nehie.

¹³ Vahe'ma ahe fri ha' zama'a retro hunenteno, teve nefa'ane kevea'aramina retro hunente.

¹⁴ Kefo zamavu'zmava'zama nehaza vahe'mo'za kefo avu'ava zamo zamagu'afina avitege'za, a'nemo'za zamu'ene hazaza hu'za hazenke avu'ava zana zamu'ene hu'za krunagama hu'za kasenentaze. ¹⁵ Hagi iza'o vahe'moma taminogu'ma kerima kafintenimo'a, agra'a ana kerima kafintenia kerifi tamigahie.

¹⁶ Vahe'ma hazenkema hunte'nia hazenkemo'a rukrahe huno agri asenire ne-enigeno, vahe'ma azeri haviza hunaku retro'ma hania havizamo'a ete rukrahe huno agri kokovite egahie. ¹⁷ Fatgo avu'ava zama'agura Ra Anumzamofona susu hunente'na, muse zagame hu'na Ra Anumzana Marerifa Anumzamofona agia erisga hugahue.

8

Zavena neheno hu zagame Deviti kre'nea naneke

¹ Ra Anumzana, tagri Anumzamoka maka ama mopafina Kagri kagimo'a mareri agatere'ne! Himamu masaka'amo'a, monaramina agatereno onagamu'a me'ne. ² Ne'one

mofavreramine, amima nenaza mofavreramina rempi huzminke'za hankaveka'agura huama nehanageno, ha' vahe'kamo'za mago kea nosazageno, ha'ma renerantaza vahe'mofonena kezmia omane'ne. ³ Tro'ma hunte'nana

monaramimpima kesga huna koama, ikane ofuramima tro hunka noma'are'ma ante'terema hu'nana kazanko avoma nege'na, ⁴ amanahu nagesa nentahue, nankna hu zaga vahera mani'nonkenka tusi antahintahi hunerantenka,

vahera amnezaga mani'nonanagi kegava hunerantane? ⁵ Hianagi monafima mani'naza ankeroramina zamazeri antesga hunka tro hunezmantenka, mopafi vahera osi'a ante fenkma atrenka tro hunezmantenka masazanu'ene ragima amizanu'ene fetorira antaninte'nane. ⁶ Maka zama tro'ma hu'nana zantmimofo kegava hinogu kva azeri otinentenka, maka zana agri kvafi atrankeno agra kegava hu'ne. ⁷ Maka sipisipi afu kevramine, bulimakao afu kevramine, afi zaga kafane, ⁸ monaramimpima hareza vanoma nehaza namaramine, hagerimpi nozameramine, hagerimpima vanoma nehaza zagaraminena maka agri kavafinke atrenka kegava huo hunka ami'nane. ⁹ Ra Anumzana tagri Ra Anumzamoka, maka ama mopafina kagimo'a mareri agatere'ne!

9

Deviti'a Ra Anumzamofa agi erisaga hu zagame kre'nea zagamere

¹ Ra Anumzamofona mika nagu'areti hu'na susu hunente'na agi'a erisga nehu'na, hentofa zama tro'ma hu'nea zamofa agenkea eri ama hugahue. ² Marerirfa Anumzamoka, muse nehu'na zagame hu'na kagia erisga hugahue. ³ Hagi ha' vahe'nimo'zama rukrahe'ma hanu'za, kagri kavuga traka hu'za frigahaze. ⁴ Na'ankure kagra kema refko hu trate mani'nenka fatgo hunka keaga refko nehunka, nagrira fatgo hunka refko hunenantane. ⁵ Krimpama ahenezmantenka ama mopafi vahera kea

nezmasunka, kefo avu'ava'ma nehaza vahera zamahe frinkeno zamagimo'a fanene nehie. ⁶ Ha' vahera zamazeri haviza hunka nevunka, rankumazmia tra'zama tasgi hutreankna hunka vatitrakeno vahe'mo'za mago'enena zamagesa antahi nozmize. ⁷ Hianagi Ra Anumzama kini tra'are'ma manivava huno nevia Anumzamo'a, fatgo huno keagama refko hanigura retro nehie. ⁸ Fatgo avu'ava huno ama mopafi vahera refko hunezmanteno, fatgo huno vahetmina kegava huzmantegahie. ⁹ Hagi Ra Anumzamo'a zamazeri havizama nehaza zamunte omne vahe'mokizmi fraki havegazmi mani'neanki'za hazenke knafina anampinka ome frakiza manigahaze. ¹⁰ Kagri kagima antahi'naza vahe'mo'za kagrite zamentinti nehazanki, kagrama zamaza huogu'ma kantahima negaza vahera, Ra Anumzamoka kamefira hunozamine. ¹¹ Ra Anumzamo'a Saioni kumatera (Jerusalemi) kini tra'are manisga huno mani'neanki, zagame hunka agi'a erisga nehunka, maka zama hu'nea zamofa agenkea maka ama mopafi vahetmina zamasamio. ¹² Na'ankure vahe'ma zamahe frizare'ma, nona huno nezamahea Anumzamo'a knafima maniza vahera antahi nezmiankino, hazenke'ma zamiza vahe'mo'zama krafagema hanazana, ana krafage zamia antahi amnea osugahie. ¹³ Ra Anumzamoka kasunku hunanto, zamavaresrama hunenantaza vahe'mo'za nazeri haviza nehazagenka, kasunku hunantenka, fri kahanteti'ma navresgama hu'nana Anumza mani'nane. ¹⁴ Saioni (Jerusalemi) mofa'nemofa kuma kafantera zagamera hu'na nagu'ma

vazi'nana zankura musena hugahue. ¹⁵ Ama mopafi vahe'mo'za zamagrama kafinte'naza kerifi neramisageno, zamagrama eri aka'ma hunte'naza kukompi ufregahaze. ¹⁶ Ra Anumzamo'a fatgoma huno keagama refkoma huno, agra'a avu'avara eriamana nehigeno, kefo avu'ava'ma nehaza vahe'mo'za zamagrama haza kefo zamavu'zmavazamo rukrahe huno zamazeri havizana nehie. ¹⁷ Hagi ama mopafima kefo avu'ava'ma nehaza vahe'mo'za, ete rukrahe hu'za fri vahe kumapi vanageno, Anumzamofoma zamagama akaninentaza vahe'mo'zanena ana zanke hugahaze. ¹⁸ Hianagi keonke zanku'ma upa'ma nehaza vahera, Ra Anumzamo'a agera akaniozmante'na, zamunte omne vahe'mo'zama amuhama nehaza zamo'a, fananea osugahie. ¹⁹ Ra Anumzamoka otio! Atregeno vahe'mo'a hara azerino agate'orena, atregeno ama mopafi vahe'mo'za keagare kavuga eotiho. ²⁰ Ra Anumzamoka zamazeri koro huo! Zamatrege'za ama mopafi vahe'mo'za amne vahetafa mani'none hu'za antahiho.

10

Tazama hanigu hanuna nunamu zagamere

¹ Ra Anumzamoka nahigenka afetera otinka mani'nane? Knazampima mani'nogenka nahigenka frakinka mani'nane? ² Kefo avu'ava'ma nehaza vahe'mo'za zamavufagara hu'za zamunte omne vahera zamazeri haviza hunaku nezmavaririzanki zamatrege'za zamagrama hanaza hazanke zamo zamazeri haviza hino. ³ Na'ankure kefo zamavu'zmava'ma nehaza

vahe'mo'za, zamavufagamofu aveszankura
 zamavufagara nehu'za, zamagri'ama zamazama
 hania zankuke nentahi'za, Ra Anumzamofona
 huhaviza hunente'za zamefira hunemize. ⁴ Kefo
 avu'ava'ma nehia vahe'mo'a avufgara nehuno,
 Anumzamofonkura nohakeno, Anumzana
 omanine huno antahintahi'afina agesa nentahie.
⁵ Hianagi ana vahe'mo'ma maka zama hia zamo'a,
 knare nehigeno kagrama azeri havizama hanana
 zamo'ma avegama ante'neazana nonkeno,
 ha' vahe'zmia kiza zokago ke hunezmante.
⁶ Hagi agu'afina amanage huno agesa nentahie,
 mago zamo'a nazeri kazara osugahie nehuno,
 maka zupa muse huvava hu'na nevanugeno
 hazenke zana navatera omegahie nehie. ⁷ Hagi
 agipina kazusi kene, vahe'ma revatgama
 hu kene, vahe'ma azeri havizama hu kemo
 avitegeno, agefu'nafina hazenkema hu kene,
 kefo avu'avazama hu kemo avite'ne. ⁸ Hagi kuma
 tava'onte kafona anteno mani'nenno hazenke'a
 omane vahera ahe nefrino, oku'a frakino
 mani'nenno azanavama antega vahe'ma azeri
 havizama hania zanku nehake. ⁹ Laionimo'ma
 trampima kafoma anteno mani'nenno zagagafama
 ame huno azeriaza huno, frakino mani'nenno
 zamagra'ama zamazama hugama osaza vahera
 kukozmifi zamazerite'za zamavazu hu'za
 nevaze. ¹⁰ Hankavezmima omane vahe'ma
 evazageno'a, hanavezmima me'nea vahe'mo'za
 zamahe'za rehapatinetraze. Na'ankure kefo
 avu'ava'ma nehaza vahera hanavezmimo'a ra
 hu'nege'za anara nehaze. ¹¹ Ana kefo avu'ava'ma
 nehia vahe'mo'a, agu'afina amanage huno
 agesa nentahie, nagrama hua navunavara

Anumzamo'a agenekanino, avua nonkeankino, onagegahie huno nehie. ¹² Ra Anumzamoka otio! Anumzamoka vahe'mo'zama zamazeri havizama nehazage'za, knazampima nemaniza vahera kagerakani ozmantenka, kazana erisga hunka zamaza huo. ¹³ Na'a higeno kefo avu'ava'ma nehia vahe'mo'a Anumzamoka amagena hunegamino, havi avu'ava'ma hua zantera nona osugahie huno agesa nentahie? ¹⁴ Hianagi Ra Anumzamoka hazenkema e'neri'za knazampima maniza vahera kenka antahinka nehanankinka, hazenkema zamiza vahera kagra'a kazanuti nona huzmantegahane. Zamagra'ama zamazama hugama osu'naza vahe'mo'za kagrite zamentintia nehaze. Kagra megusa mofavrerami zamazahu Anumza mani'nane. ¹⁵ Kefo avu'ava'ma nehuno vahe'ma azeri havizama nehia vahe'mofo azana ruhanentaginka, kefo avu'ava nehaza zantera zamarotgo hunka zamahehna huo. ¹⁶ Hagi Ra Anumzamofu mopafintira fanane hugahazanagi, Ra Anumzana mani vava kini mani'ne. ¹⁷ Ra Anumzamoka anteramiza nemaniza vahe'mokizmi zamavesizana negenka, zamagu'a zamazeri hanavenetinka krafa kezmi kagesa antenka nentahinka, ¹⁸ megusa mofavreramine vahe'mo'zama zamazeri havizama nehaza vahetega antenka zamahora nekane. E'ina'ma hanke'za ama mopafi vahe'mo'za koro nehu'za, mago'anena vahera zamazeri korora osugahaze.

11

*Deviti'ma zagamate vugota hu'nea ne'
kremi'nea zagamere*

¹ Nagra Ra Anumzamofompinka frakina nemanuanki, nahigenka nagrikura namamo'za zamagu'vazinaku hare'za agonarega frazankna hunka korora nefrane hunka nehane. ² Na'ankure kefo avu'ava'ma nehaza vahe'mo'zama fraki'za mani'ne'za, fatgo vahera zamahenaku atizamifi keve erinte'za eri negrize. ³ Hagi kasegema amage anteno fatgo avu'ava'ma hu'zama omanesigeno'a, fatgo vahe'mo'za na'a hugahaze. ⁴ Hagi Ra Anumzamo'a Agra'a ruotage mono nOMPI monafina kini tra'are mani'nenO, avua omege emege nehuno, Agra'a avurgareti vahera rezagneno nezamage. ⁵ Hagi Ra Anumzamo'a fatgo vahera refko huno nezamage. Hianagi havi zamavu'zmavama nehu'za, vahe'ma hazenkema nezamiza vahera tusi avesra hunezmante. ⁶ Hagi ana nehuno kefo avu'ava'ma nehaza vahe'ma hazenkema zamisiana monafinti amuhu teve tankanuzA herafi atrenigeno ko'arianka huno eramino zamahegahiankino, e'i miza zamia erigahaze. ⁷ Hagi Ra Anumzamo'a fatgo avu'ava nehia Anumza mani'neankino, fatgo avu'ava zanku ave'nesie. Hanki fatgo avu'ava'ma nehaza vahe'mo'zage, Agri avufina kegahaze.

12

*Hazenke'ma fore'ma hanige'za hanaza zagame
Deviti kre'nea zagamere*

¹ Ra Anumzamoka nazahuo, na'ankure fatgo vahera omanitfa higeno, kema antahino amage antega vahera ama mopafina omani'naze. ² Hagi mika vahe'mo'za havige vaheke nemani'za, tare zamagu'areti masavenkea nehu'za vahera

rezamavataga nehaze. ³ Ra Anumzamo Agrake havigema nehaza vahe'mofo zamagira ruhamunegino, zamavufaga rama nehaza zamaganefu'na ruhamunenkie. ⁴ Zamagra ana vahe'mo'za hu'za, tagra tavufga rankema hanuna zamo vahera zmagateregahunanki, iza tagrira kva vahetia manigahie hu'za nehaze. ⁵ Na'ankure kefo vahe'mo'za zamunte omane vahera zamazeri haviza nehu'za, kna nezamizanki'na, Nagra kegava huzmante'nuge'za havi vahe'mo'za zamazeri havizana osugahaze huno Ra Anumzamo'a hu'ne. ⁶ Ra Anumzamofonane'kemo'a, agru hu'neankino silvama 7ni'a zupa tevefi kreno eri agru hiankna huno agrunentake hu'ne. ⁷ Ra Anumzamoka, havi zamavu zamava'ma nehaza vahe'mo'zama zamazeri havizama hu'zankura zamagu'vazinka maka knafina kegava huzamante vava huo. ⁸ Hagi kefo avu'avazamo'ma vahepima ome rama nehige'za kefozama nehaza vahe'mo'za zamavufaga ra huza vano nehaze.

13

Hazenke knafima zamazama hanigu hanaza nunamu zagame Deviti hu'nea zagamere

¹ Ra Anumzamoka nama'a knafi kagera kaninantegahane? Ana maka kna kaganera kaninantegahampi? Nama'a knafi kamefira hunaminka onagegosane? Ra Anumzamoka za'za knafi kagera kaninantane. Za'za kna kamefira hunaminka onagane. ² Nagra za'zate nasuzampina nemanugeno nagu'namemo'a knazampina manino nevie. Nahigenka

natranke'za ha' vahe'nimo'za nazeri havizama haza zankura zamavufaga rana nehaze?
³ Rukrahe hunka nenagenka Ra Anumzana nagri Anumzamoka kenona hunanto. Ru mase'nurega frinugi, navurga eri hari hunka hanavea namige'na, ofri kasefa hu'na mani'nenno.
⁴ Hagi ha' vahe'nimo'za amanage hugahaze, tagra hara hugateronkeno'e hu'za musena hugahaze. ⁵ Hianagi nagra vagaore kavesi zanka'agu namentintia nehu'na, nagra nagu'ma nevazina zanku musena nehue. ⁶ Nagra Ra Anumzamofonku zagamera hugahue. Na'ankure Agra knare'zana rama'a hunante'ne.

14

Neginagi avu'ava huno havi avu'ava'ma nehia zamofo zagame Deviti kre'nea zagamere

¹ Hagi neginagi vahe'mo'za zamagrama zamagu'afima antahi'zana Anumzana omanine nehaze. Hagi zamagra havizantfa hu'nazanki'za kasrino haviza hu'nea zamavu zamava nehu'za, havi vaheke manizageno magore huno knare vahera omani'ne. ² Hagi Ra Anumzamo'a monafinka mani'nenno, kema antahi ama'ma hu vahe'mo'zama Anumzamofonku'ma antahimiza amagama nentaza vahe'ma mani'nenagura kefenkatreno ama mopafina nege. ³ Hianagi mika vahe'mo'za rukrahe hu'za zamagena hunemiza, kefo vaheke mani'naze. Hagi magomo'e huno knare avu'vazana osu'neanki, mika vahe'mo'za kefo vaheke mani'naze. ⁴ Hagi kefo zamavu zamava'ma nehaza, bretima nenazaza hu'za nagri vahera zamazeri havizama nehu'za,

Ra Anumzamofona nunamuna hu'za antahi nonkazafi? ⁵ Hianagi ana vahe'mo'za tusi'a koro hugahaze, na'ankure Anumzamo'a fatgo vahe'ene manigahie. ⁶ Hagi zamunte'ma omane vahe'mo'zama antahintahima retro'ma nehaza zana, havi zamavu'zamava'ma nehaza vahe'mo'za huhaviza nehazanagi, Ra Anumzamo zamunte omane vahe'mokizmi frakino zamagu'vazi kumazamia mani'ne. ⁷ Hagi nagrama antahuana, agu'vazi zana Saioni agonaregati egahiankino, Israeli vahera zamagu'vazigahie. Hagi Ra Anumzamo'ma naga'amofa maka'zama eri knarema hanigeno'a, Jekopu naga'mo'za musenkase nehanageno, Israeli vahe'mo'za tusi muse hugahaze.

15

Saionima nemaniza vahe'mofonku huno Deviti asunte'nea zagamere

¹ Ra Anumzamoka, iza kagri mono nompina manigara hu'ne? Iza ruotgema hu'nea agona ka'arera manigara hu'ne? ² Iza'o hazenkema nosuno fatgo avu'ava'ma nehuno, agu'aretima huno tamage kema nehuno, ³ vahe'mofa azeri haviza hu kea nosuno, vahe'mofa huhaviza hunenteno, tavaoma'are'ma nemanimofoma havigema hunonteno, ⁴ kefo avu'ava'ma nehia vahe'ma amagena hunemino, Ra Anumzamofoma amagema nentaza vahe antahine'zamino, knazampina unefreno'a, huvempama hu'nea zanku agesa nentahino runotagreno, ⁵ zagoma ami'nerema, rama'a zagoma ante agofetu'ma huno eme

zamizanku'ma nontahino, zamagri'ma zamaza
 huno hazenke'a omane vahe'ma zamazeri haviza
 hinogu'ma masavema hu'za zagoma amiza
 zagoma e'noria vahe'mo'a, oti hankanavetino
 manigahie.

16

Deviti asunte'nea zagamere

¹ Ra Anumzamoka nagu'vazio, na'ankure
 kagripinka mani'nena nagra nagura nevazue.
² Hagi Ra Anumzamofonkura nagra hu'na,
 mika knare zama e'neruana kagritegati ne-
 e. ³ Hagi Anumzamofu vahe'ma amafima
 mani'naza vahera knare vahe mani'nazage'na,
 zamagranema mani'zankura nagra musena
 nehue. ⁴ Hagi havi anumzama nevaririza
 vahe'mo'za, rama'a zamasu zampi manigahaze.
 Hagi nagra ana havi anumzante'ma tima
 tagitre ofama huogu'ma, korama eri'za eme
 namisazana erina ofa huontege, ana havi
 anumzantamimofu zamagirera huamara
 osugahue. ⁵ Hagi Ra Anumzamoka nagrama
 erisanti hare'nua zane, tintafeni'a Kagrake
 mani'nenka, henkama manisua zani'a eri
 knare hugahane. ⁶ Hagi mopa'ma nami'nana
 mopamo'a, knare hu'nege'na musena nehu'na,
 hentofa zantamina erisanti neharoe. ⁷ Nagra
 nazeri fatgoma nehia Ra Anumzamofona agi'a
 erintesaga hugahue. Na'ankure hanimpinena
 ana nanekemo'a nagu'afi me'neno rempi
 hunenamie. ⁸ Nagra antahi'noe, Ra Anumzamo'a
 mika knafina nigrane nemanino hanavea
 nenamiankina, mago zankura korora hu'na

antria osugahue. ⁹ E'ina hu'negu nagu'areti hu'na muse nehuankino, musezamo nagripina avinetege'na knare hu'na nemanue. ¹⁰ Na'ankure kagra natrenanke'na fri'na fri vahe kumapina uomanige, atrenankeno ruotagama hu'nea vahekamo'a frino onkasarigahie. ¹¹ Hagi kagra nomani'zamofa kana naveri nehankeno, kagri tava'ontera musezamo'a avineteankina tamaga kaziga kzantega mani'nena musena huvava hugahue.

17

Deviti nunamumofa naneke

¹ Ra Anumzamoka mani fatgo hu'na mani'nuegu kantahinegoanki nunamuni'a antahinamio. Hagi nzama huogu'ma krafagama nehu'na, nagra regavatga nosuanki nunamuni'a antahinamio. ² Hagi kagra mani'nantegatira nazahunka refko hunantenka, nazeri knare huo. Na'ankure kagrake knare'ma hu'naza vahera zamagenka refakoa nehane. ³ Hagi kagra hanimpina antahizani'a refako hunka negenka, nagu'amofona renahenka negane. Hianagi mago kumira nagripina kenka erifore nosane. Hagi kegaganifina mago kefo kea omanesie hu'na nehue. ⁴ Hagi kagri kasegema amagama nentoa zamo nazahige'na, haframa nehaza vahe'mokizmia namage'na hunezamue. ⁵ Mika zupa kagri kanteke nevugeno, nagamo'a kririno havifina vuno enora nosie. ⁶ Ra Anumzamoka kagritega kezana netuanki antahinamio. Ra Anumzamoka kagesa antenka nunamu ken'i'a antahinamio.

⁷ Hagi vagaore kavesi zanka'a hentofaza hunka eri ama huo. Ha' vahezamigu'ma koroma nehaza vahera, Kagra hanave kazanu zamagu nevazina ne' mani'nane. ⁸ Hagi Kagra kavurgama kegavama nehanankna hunka kegava hunantenka, kagekonanu refitenanto. ⁹ Kefo avu'ava'ma nehaza vahe'mo'za nazeri haviza huza nehazagenka nagu'nevazinka, ha' vahe'nimo'za nahenaku'ma navazagi kaginagenka nagu'nevazine. ¹⁰ Hagi zamagra mago vahekura zamasunkura hunozamante'za, zamavufaga ra hu nanekege nehaze. ¹¹ Hagi kama nevuge'za zamagra navaririza nevu'za, mopafi nahetrenaku navazagi kagine'za, zamavu ante'za mani'naze. ¹² Zamagra laionimo zagagafa aheno tapage hunaku eme krino maniaza nehu'za, agaho laionimo zagagafa ahenaku frakino maniaza hu'naze. ¹³ Hagi Ra Anumzamoka otinka ha' vahe'nia ha' huzamantenka zamahe mopafi zamatro. Kagra'a bainati kazinknonteti kefo vahepintira hara hunka nagu'vazio. ¹⁴ Hagi Ra Anumzamoka ama mopafi zama erisantima harenaku'ma tusizama nehaza vahe zamazampintira hanave kazanuti nagu'vazio. Ana nehunka miko knaza zamimofa avamente antenka mizana zamio. Ana nehunka zamagripintima fore hu anante nante hanaza vahera knazana zaminka vugahane. ¹⁵ Na'ankure nagra fatgo hu'na knare hu'noankina, henkama otinu'na kagri kavufina negage'na musena hugahue.

Ra Anumzamo Soli azampinti agu'vazi'nea zanku Deviti'a muse zagame hu'nea zagamere

¹ Ra Anumzamoka nagra navesigantoe, nagri hanavea Kagrake mani'nane. ² Ra Anumzamo'a ra haveni'ane, vihuni'a mani'nenonagura nevaziankina, agripinka frakugeno hankoni'a mani'nenonagura nevazie. Ra Anumzamo'a nagri hankone hankavenine nazahu have mani'nenon, fraki kumani'a mani'ne. ³ Nagra Ra Anumzamofonku nunamu hu'na antahigogeno, ha' vahe'nimofozampintira naza hu'neanki'na, Ra Anumzamofona ra aginemina agi'a hentesga hugahue. ⁴ Nofi'mo nazeri kagiankna huno fri'zamo'a nazeri kanegigeno, ti hageno refiteankna huno hazenkezamo'a refitenante'ne. ⁵ Hagi fri'zamo'a nofikna huno anaki nenantegenon, fri'zamo'a krifumozagagafa azeriankna huno naze'nerie. ⁶ Hagi nagra narimpa natazane knazanifi mani'nena Ra Anumzamofona krafage hunentogenon, Agra ra mononoma'afinti ana krafageni'a agesa antenontanahi'ne. ⁷ Hagi mopamo'a imi e'nerigenon, toretore nehigenon, agonamofotramo'a kazakaza hu'ne. Na'ankure Ra Anumzamofona arimpa ahenegenenanara hu'ne. ⁸ Hagi agonagampintira toki nehigenon, agipintira maka'zamatefanene hu tevemo hagana hagana nehigenon, tevetankanu'zamo ankanuferami ankanuferami hu'ne. ⁹ Hagi Agra mona kafana erinagino neegenon, agagusamofofenka kaziga haninentake hampo me'ne. ¹⁰ Hagi serafimie nehaza ankeromofogofetu harenonene-eno, zaho'mofogagekonare mani'nenonharenon evu'ne. ¹¹ Hagi

haninu agra'a azeri ano nevazino, koma neria hamponteti Agra'a azeri ano vazinte'ne. ¹² Hagi masazama'amo'a ana hampona rupapa huno nevigeno, komopa komo'a nehigeno, tevemo'a teragareno vuno eno huno erami'ne. ¹³ Hagi marerifa Ra Anumzamo monafinkati kema nehigeno'a, agerumo'a tusi'a monage hiaza hu'ne. Hagi kema nehigeno'a, tevemo'a ankanuferamino vuno eno nehigeno, komopa komo'a hu'ne. ¹⁴ Hagi Agra keve'aramina ahetreho ha' vahe'a zamahe panani nehuno, tusi'a masa'areti kopasinamo ru marave marave hiaza huno zamahe savri hu'ne. ¹⁵ Hagi Ra Anumzamoka kasimu'ma nentankeno'a, hagerimo'a apapa huno vuno eno higeno mopa fore nehigeno, tusi'a keru fore higeno, mopama azeri'nea tra'mo'a amate me'ne. ¹⁶ Hagi Ra Anumzamo'a monafinka mani'nenno azana antefenka atreno, hagerimo nazeri nakri'za nehigeno naza huno navre'ne. ¹⁷ Hagi hanavenentake ha' vahe'mo'zama nahe'zama nehazageno'a, Agra naza nehuno zamavaresrama hunantaza vahepinti'enena naza hu'ne. Na'ankure ha' vahe'nimo'za hanavenentake hu'za nagri nagatere'nazagu anara hu'ne. ¹⁸ Ha' vahenimo'za hanaveni'ama omnea knafi hara eme hunante'nazanagi, Ra Anumzamo'a naza hu'ne. ¹⁹ Hago Agra navareno nagu'vazinia kumapi ome nantene. Na'ankure Agra nagria muse hunante'negu anara hu'ne. ²⁰ Hagi Ra Anumzamo'ma knare'ma hunante'neana, nagrama fatgo navunava'ma hu'noa zante nona huno mizani'a nami'ne. Nazamo'a agru higena mago hazenke'ma

osu'noa zante, nona huno mizana nami'ne.
²¹ Na'ankure nagra Ra Anumzamofona kasege'a amage nentena, nagra havi navu'navara hu'na Anumzamofona otre'nogu huno anara hu'ne.
²² Nagra kasegea mika amage nentena, magore hu'na tra ke'a ruotagre'noe. ²³ Nagra kumira nosuna, Ra Anumzamofa avufina kumi'ma huzankura kegava hu'na mani'noe. ²⁴ Ana hu'negu Ra Anumzamo'a knare navu'nava'ma hunore nona huno mizana nami'ne. Na'ankure Agrama keana nagri nzampina hazenke'zana omneno agru hu'negu huno, anara hu'ne.
²⁵ Hagi manifatgoma huza maniza vahera, fatgo kavukva hunezamantenka, hazenkezmima omne vahera knare kavukva hunezmantane. ²⁶ Hagi agruma hu'nea zamavu zamava'ma nehaza vahera, agru hu'nea kavukava hunezmantenka, fatgoma osu zamavuzamava nehaza vahera, fatgo kavukva hunka, ana avu'avazantera nona hunezmantane. ²⁷ Hagi zamavufagama anteramiza maniza vahera zamazeri antesaga nehunka, zamavufagama antemareriza vahera zamazeri fenkami netrane. ²⁸ Hagi Ra Anumzamoka Kagra tavira rekru hunenantenka, hanizana nagripintira eri netrane. ²⁹ Hagi Anumzanimoka Kagra nzahankena hanave ha' vaheni'a nezamahe'na, Kagra nzahankena ranra kuma kagina takaure'na nevue. ³⁰ Anumzamofa avu'avamo'a knare hu'ne. Ra Anumzamoka ke'mo'a tamage ke me'ne. Hagi Agra hankogna hu'nege'za vahe'mo'za agripinka ome franekize.
³¹ E'ina hunanku ina Anumzamo kagri knara huno Ra Anumzana mani'ne? Magore huno ra

anumzana omani'neanki, tagri Anumzamoka Kagrake hanavenentake havetia mani'nenka, kva hunerantane. ³² Hagi magoke Anumzamo agrake hanavea nenamino, fatgo kantera knare huno navareno nevie. ³³ Hagi Agra nagiamofona azeri hanavetige'na dia afumo'zama nehazaza hu'na agona morusapina vano nehu'na, tarakara nosue. ³⁴ Hagi Ra Anumzamo'a ha'ma hu'zana rempi hunenamino, hanave namige'na bronsireti tro hu'naza hanavenentake atia erigrinkenke nehue. ³⁵ Hagi Ra Anumzamoka Kagra nagu'vazi hanko nenaminka, tamaga kazanu nazerisga hankena, hara hu'na vahe'mokizmi zamavurera nagine vahera mani'noe. ³⁶ Hagi nagamo'ma krarizankura Kagra ranka varinantanke'na traka osu nevue. ³⁷ Hagi nagra ha' vaheni'a zamarotago hu'na ome zamazeneri'na, zamarotago huge'na otre'noanki, zamarotago huvava hu'na miko zamia eri haviza nehu'na zamahe vagare'noe. ³⁸ Hagi nagra zamahe'na rehapatuge'za, nagafi ufrinte efrinte hu'za oratigara osu'naze. ³⁹ Hagi ha' vaheni'anema ha'ma hanua hanavea Kagra nenaminka, ha' vaheni'a zamatranke'za nagafi eme kepri hunante'naze. ⁴⁰ Hagi Kagra ha' vaheni'a zamazeri koro hanke'za, zamefira rukrahe hu'za onke fre'za vazage'na, zamavesrama hunenantaza vahera mika zamahe vagare'noe. ⁴¹ Hagi zamazama hanaza vaheku kezati'nazanagi, magomo'e huno zamaza osige'za, Ra Anumzamofonku taza huo hu'za hazanagi, zamaza osu'ne. ⁴² Hagi nagra ha' huzmante'na zamahe kasopoge'za, zahomo kugusopa eri hareno vuno eno

hiankna hu'za miko kokantega umani emani hu'naze. Hagi ha' vaheni'a ha' huzmantena zamahena rehapatuge'za, kampi hapa kna hu'naze. ⁴³ Hagi Kagra ha'ma renenantazagenka, nagu'vazinka nzamahankena ha' vaheni'a hara huzamagatere'noe. Hagi Kagra kva vahera huhampri'nantake'na kumatamina kegava hu'noge'za, zamage'na antahina osu'noa vahe'mo'zanena nagri nagoraga manine'za erizani'a eri'naze. ⁴⁴ Hagi nagri nagenkema miko kaziga vahe'mo'zama nentahiza, zamanogu nehu'za nagri nagafi anterami'za mani'naze. ⁴⁵ Hagi ha' vahe'nimokizmia miko hanavezamia vagarege'za zamahirahiku nehu'za, fra'ma nekiza vihu'zamia atre'za nagrite e'naze. ⁴⁶ Hagi kasefa huno mani'nea Ra Anumzana nagri fraki havenia mani'neanki'na, agi'a ahentesga nehu'na, nagu'ma vazi'nea Anumzamofogagi'a ahentesga hugahue. ⁴⁷ Hagi ama ana Anumzamo, nagri'ma nazeri haviza hu'naza vahera nona huno zamazeri haviza nehuno, ru kazigati vahera zamavarenamige'za nagri nagafina mani'naze. ⁴⁸ Ha' vahe'ni'mo'zama nahenaku nehazageno'a naguvazi'ne. Hagi hazenke vahe'mo'zama nazeri havizama hu'za nehazagenka Kagra nagu'vazi'nane. ⁴⁹ E'ina hu'nanku, maka kumapi vahepintira nagra muse zagamera hu'na Ra Anumzamoka kagia erisga hugahue. ⁵⁰ Hagi Kagra kinima nazeri oti'nana ne'kamo'na hanavea nenaminkena hara azeri agatenerogenka, Kagra masavema frenka huhampri nante'nana ne'mo'na kavesinenantenka Deviti'nane nagripinti'ma

fore'ma hania vahera kavesi rante vava
hugahane.

19

*Anumzamofu hanavema erinte ama hu zagame
Deviti'ma asunte'nea zagamere*

¹ Hagi monamo'a Anumzamofu hankave'a erinte ama nehigeno, monafima me'nea zantamimo'a Agri erizankama'a erinte ama hu'ne. ² Hagi magoke magoke knamo'a Anumzamofoku hu'ama nehigeno, maka kenagemo'a Agri antahi'zama'a erinte ama nehaze. ³ Hagi masane haninemokea kegaga neha'anagi, zanagerura ontahigahaze. ⁴ Naneke zaimo'a mopane mopane vuno eno hu'ne. Hagi zagemofo nonkumara Anumzamo'a monafi retro hunte'ne. ⁵ Hagi anampinkatira zagemo'a aravema hunaku hu'nea ne'mo atiramino eaza huno ne-eno, agare zokago nerea ne'mo agarenaku muse nehia kna nehie. ⁶ Hagi zagemo'a mopamofona mago kazigati hanatino mago kaziga unefreankino, mago zamo'a agri amuhofintira frakigara osu'ne. ⁷ Hagi Ra Anumzamofu kasegemo'a fatgo hu'nenno kasefa tasimu neramie. Hagi Ra Anumzamofu kemo'a, knare antahi'za me'neankino antahizama'a omne vahera azeri ante fatgo huno knare antahi'za nezamie. ⁸ Hagi Ra Anumzamofu kasegemo'a knare zantfa hu'neankino, tagu'afina musezanente. Hagi Ra Anumzamofu kasegemo'a, agru hu'neankino vahe'mofu avua eri hari nehuno, ama' antahiza nemie. ⁹ Hagi Ra Anumzamofonku'ma kore'ma huntezamo'a

agru hu'neankino mevava hugahie. Hagi Ra Anumzamofu kemo'a tamage ke me'neankino, makazana fatgo huno refako nehie. ¹⁰ Hagi ana ke'amo'a, rama'a golima kre'za eri agruma hu'naza golimofu mizama'a agaterene. Hagi ana ke'amofu haga'amo'a tume rima'amofu haga'a agaterene. ¹¹ Hagi ana kekamo'a eri'za vahekamo'na havi avu'ava'ma huzanku koro kea nenasmino, ana nanekeka'ama amage'ma antaza vahera knare museza nezmie. ¹² Hagi inankna hu'na nagripima me'nea kefozana kena antahina hugahue? Ra Anumzamoka kagrake oku'ama frakino nagripima me'nea kumini'a atrenantenka nazeri agru huo. ¹³ Hagi havizama hugahuanki hu'na antahine'nama hu kumipina natrege'na uofra'neni, hagi atrege'no kumi'mo'a nazeri nagatereno navareno ovuno. Hagi natrege'na kumimpintira fru hu'na mani'neni. ¹⁴ Hagi Ra Anumzamoka atrege'no kenimo'ene nagu'afima antahintahima nehua zamo'a kagri kavufina knare huno me'neni musena hunanto. Kagra Ra Anumzamoka fraki have mani'nenka, nagu'vazi ne' mani'neni.

20

Deviti asunte'nea zagamere

¹ Hagi hazenkefima ufresankeno'a, Ra Anumzamo'a kagu vazigahie. Jekopu Anumzamo'a kegava hugante'nie. ² Hagi Agra mono noma'afi mani'neni kza nehuno, Jerusalemi kumateti kza hu'zana atrenigeno egahie. ³ Hagi mika ne'za ofama hananana, antahi'negamino tevefima kre fanene hu ofama

hananana, antahi muse hanie. ⁴ Hagi Agra kagri'ma kvesinia zana negamino, nazano tro'ma hunaku keagama retro hanana zana amane hugantenigeno knare zanke hugahie. ⁵ Hagi Kagrama ha'ma agatere'nanketa tagra musenkase huta kaninereta, Anumzantimofogo agire kraufefana erisaga hugahune. Ra Anumzamo agrake mika nunamuma hanazana antahiramisie. ⁶ Hagi menina nagra antahi'noe, Ra Anumzamo'a monafinka ruotge kuma'afi mani'neni, Agra'ama huhampri'nante'nea kini ne'mo'na nunamuni'a antahinenamino kenona hunanteno, tamaga azanteti hanave'a eri ante ama huno naza huno navregahie. ⁷ Hagi mago'a vahe'mo'za hosi afuzmine karisi zmimofogo hanavegu antahinezamize. Hianagi tagra Ra Anumzana tagri Anumzamofonte tamentintia nehune. ⁸ Hagi mago'a vahe'mo'za evuramiza haviza hugahazanagi, tagra oti'neta hankavenentake huta manigahune. ⁹ Ra Anumzamoka aza hunka kini nera agu'nevazinka, taza huoguma krafagema nehanunkenka, krafa ketia antahiramio.

21

Ra Anumzamo'ma azama hu'nea zanku Deviti'a muse hunenteno hu'nea zagamere

¹ Ra Anumzamoka, kagrama kini ne'mofoma hankavema nemina zanku, agra tusi muse nehuno, azama hankeno ha' vahe'ama ha'ma huzmagatere'nea zankura tusiza huno kagrikura musenkasea hunegante. ² Agri'ma agu'afima avesiazana amne neminka, nazankuro

kantahigea zana, i'ora osunka amne nemine.
³ Kagra tamagerfa hunka kini nera asomu hunentenka, knare zantfa hu'nea golireti tro hu'naza kini fetori anuntera antani nentane.
⁴ Kini nemo'ma kantahigeno za'zate kasefa hu'na manisanuema higenka, Kagra hu izo hunka asimura neminka, kna'a eri zaza hankeno mani vava nehie. ⁵ Kagra kini nera aza hankeno, ha' vahe'a hara huzmagaterege'za agrira ragia ami'naze. Kagraka'a ra agima eri'zane hanavenena ami'nane. ⁶ Tamagerfa hunka mevava asomura hunentenka, tavaonkare avrentankeno muse huno Kagrane nemanie. ⁷ E'ina hu'negu kini ne'mo'a, Ra Anumzamofonku antahi amuhara nehuno, Marerisa Anumzamofona vagaore avesizanku nentahino, antria nosuno oti hankavetigahie.
⁸ Ra Anumzamoka hankavenentakema hu'nea tamaga kaziga kzanteti ha' vaheka'a hara hunezmantenka, kagri'ma zamavesrama hunegantaza ha' vaheka'a zamazeri haviza hugahane. ⁹ Kagrama efore'ma hanana knazupa, kagri ha' vahera Kagri tevenefake tevemo teno eri fanane hugahie. Ra Anumzamoka tusi krimpa ahenezmantenka tevefi zamahe fanene hugahane. Ana nehanigeno Anumzamofa tevemo'a ana vahera teno eri fanane hugahie.
¹⁰ Ana vahepintima fore hu anante anante'ma hu'za ama mopafima mani'naza vahera, ama mopafintira zamahe vagaresnanke'za, ama mopafina omanigahaze. ¹¹ Kagrira ana vahe'mo'za kazeri haviza hunaku kea anaki'naze. Hianagi ana kezamimo'a, amne zankna hugahie.

¹² Na'ankure Kagra keveka'a atifima erintenka zamahenaku'ma eri karisnanke'za, koro atre'za fregahaze. ¹³ Ra Anumzamoka kagri hankavegu kagia ahentesga nehune. Ana nehuta kagri hihamugu zagamera huta kagia ahentesga nehune.

22

Knazampima mani'neta hanuna zagame Deviti asunte'nea zagamere

¹ Anumzanimoke Anumzanimoke, na'a higenka kamefira hunenamime? Nazama huoguma kragima nerugenka, nahigenka naza osu afetera nemanine? (Matiu 27:46, Maki 15:34)

² Anumzanimoka kagritega manigasa osuna mika knafina zagene haninena kagritega zavi krafagea nehuanagi, kagra antahi nonamine.

³ Ana hu'neanagi kagra ruotage hu'nana Anumzankinka kini trakare mani'nanke'za Israeli vahe'mo'za kagia erihentesga neheze.

⁴ Korapara tagri tagehe'za Kagrite zamentintima hazagenka, zamagu'vazinka ete zamavare'nane.

⁵ Kagritega zavi krafa hazagenka nentahinka, zamagu'vazi'nane. Ana nehanke'za kagrite zamentintia nehu'za zamagazegura osu'naze.

⁶ Hianagi nagra vaheknara osu'na hagirfagna vahe mani'noanki'za, maka kea nenasu'za zamefi hunenamize.

⁷ Maka vahe'mo'zama nenage'za, ki'za zokago ke hunenante'za, zamagefu'na hakana hunenami'za zamagena neru'za, ⁸ zamagra amanage hu'za nehaze, Ra Anumzamofonte amuhara nehuno amentintia nehianki, atrenkeno Ra Anumzamo aguravazino,

Agra aza hino hu'za nehaze. (Matiu 27:39, 43. Maki 15:29. Luku 23:35) ⁹ Ana hu'neanagi kagrake'za naza hanke'na antanimofu arimpafintira so'e hu'na atirami'noe. Ana nehunka osi'ma manine'na antanimofu amima nenoa knafina naza hankena namentintia kagriteru hu'noe. ¹⁰ Antanimo'ma kasenante'nea knareti'ma eno menima ama knare'ma egenka, kagra kegava hunenantenka, kagra nagri Anumza mani'nane. ¹¹ Nagrira natrenka afetera omanio, na'ankure knazamo'a tavaonte me'neankino, mago vahe'mo'e huno naza hugara osu'ne. ¹² Rama'a ha' vahe'mo'za ve bulimakao afu'mo'za nehazaza hu'za manikagi nante'naze. Ana vahe'mokizmi hankavemo'a Basani kazigama nemaniza ve bulimakao afutamimofu hankavezmimo'ma nehiaza huza mani kaginate'naze. ¹³ Nagri ha' vahe'mo'za laionimo agira aka huno mago'a zagagafa aheno nenaku krafa nehuno rotago nehiaza hu'za, nahenaku narotago nehaze. ¹⁴ Tima eri tagi atregeno'ma hiaza huno hankavenimo'a omanegeno, zaferinanimu'a avazu hu'ne. Ana higeno tumoni'amo'a kragefe masavemo nehiaza huno nagu'afina ze'ze huno pakepake hu'ne. ¹⁵ Zagere ante hagege hu'nea mopa kavomo tako hiankna huno hankavenimo'a omnegeno, nagefunamo'a navagu'nafare marerino antrako hu'ne. Ana higenka Anumzamoka kagra frio hunka natranke'na kugusopafina mase'noe. ¹⁶ Kramo hiaza hu'za ha' vahe'nimo'za mani kanegizageno kefo vahe'mo'za navazagi kagi'naze. Nazampine,

nagiafinena rerapone'naze. ¹⁷ Ana hazagena ana maka zaferinani'a hampri'na ke'noe. Hagi ha' vahe'nimo'za uruha nenage'za zamagu muse nehu'za orevumi arevumi hu'naze. ¹⁸ Ana nehu'za ana vahe'mo'za nagri kukena refko hu'za eri zamente hu'za eneri'za, nagri kukena erinaku satu zokago re'naze. (Matiu 27:35. Maki 15:24. Luku 23:34. Jon 19:24.) ¹⁹ Hianagi kagra Ra Anumzamoka nagrira natrenka afetera omanio. Na'ankure kagra nagri hanave mani'nananki ame hunka enka eme naza huo. ²⁰ Nagu'vazinka naza huge'za vahe'mo'za kazintetira nahe ofriho. Kagra naza huge'za, knare'ma hu'na mani'nofintira kagna vahe'mo'za nahe ofriho. ²¹ Laionimo'ma naheno nezama nehifintira naza nehunka, afi bulimakao afumo'ma pazivema nare'zama nefintira naza hunka nagu'vazio.

²² Nafu nagnahe'mokizmia Kagri kagia huama hu'na nezamasami'na, atruma hu'za mono'ma hanaza vahe amu'nompi oti'na kagia ahentesga hugahue. (Hibru 2:12) ²³ Hagi izagato Ra Anumzamofonku'ma koro'ma nehanamota, Agri agia ahentesga hiho. Ana maka Jekopu agehe'mota Agri agi'a ahentesga huta monora huntaho. Israeli agehe'mota Ra Anumzamofonku koro hunenteta, Agri agorga maniho. ²⁴ Iza'zo zamatafima mani'ne'za zamagra'ama zamazama huga'ma nosaza vahera, Ra Anumzamo'a amefira hunozamie. Ana nehuno zamagritera ke amnea huno frara nokianki, iza'o aza hinogu'ma nunamuma huno zavi krafama huno antahigea vahera, nunamu'a antahimino aza nehie. ²⁵ Hanki Ra Anumzamoka kagri

vahe'mo'zama mono'ma hunaku'ma eme atru'ma hanafina, Kagra muse zanka'a nagu'afina ante avite'nanke'na kagri kagia ahentesga hugahue. Kagriku'ma koroma nehaza vahe zamavufi, ko'ma huvempama hu'na hugahuema hu'na hu'noa zantamina ana maka huvagaregahue. ²⁶ Zamunte'ma omane vahe'mo'za ne'zana nezamu hugahaze. Ra Anumzamofonku'ma nehakesaza vahe'mo'za, Agri agia ahentesga hugahaze. Anama hanaza vahera Anumzamo'a vagaore museza antezmanteke'za, musena hu'za vugahaze. ²⁷ Ama mopafima maka kazigama mani'naza vahe'mo'za Ra Anumzamoka kagrira antahi negami'za rukrahe hu'za kagritega egahaze. Ana nehanage'za ama mopafima mani'naza maka vahe'mo'za nagate nofite hu'za Kagri kagiafi zamarena eme re'za monora hugantegahaze. ²⁸ Na'ankure Ra Anumzamo'a Agra'a kinia manino, maka ama mopafi vahera kegava hu'ne. ²⁹ Maka feno vahe'mo'za, ne'zana nene'za Ra Anumzamofona monora huntegahaze. Ana nehanage'za ana zanke hu'za frisaza vahe'ma mani'naza vahe'mo'za e'za, Ra Anumzamofu avuga zamarena eme re'za monora huntegahaze. ³⁰ Henkama fore'ma hu'za mani'zama vanaza vahe'mo'za Ra Anumzamoka kagri eri'zana eri'za nevanage'za, mofavretimo'za kaguvazama eri fore'ma hu'nana zamofu agenkea antahigahaze. ³¹ Hagi ana fatgo avu'avazama hu'nea zana nezmarrera rimpafima mani'naza mofavre nagamokizmia nezamasamisnage'za, maka'zama eri fore'ma hu'nea zamofu agenkea antahigahaze.

23

Knare sipisipi kva ne'mofo zagamere

¹ Ra Anumzamo'a kva vaheni'a mani'neanki'na, mago zankura atupara osugahue. ² Ana hu'neankino afovage huno tretre'ma hu'nea trazampi nantege'na mani fru nehue. Ana nehuno kaza osu tintega navareno vige'na, tina ne'noe. ³ Agra hanaveni'a ete eri kasefa nehuno, Agra'a agigu nentahino navareno fatgo avu'avazamofo kantera nevie. ⁴ Ana nehu'na knazamo'ma rehanima hige'na, hanimpi neviankna hugahuanagi, anankna zamo'ma eme nazeri havizama hu'zankura korora osugahue. Na'ankure Ra Anumzamoka sipisipi kva vahe'mo'zama e'nerizankna azompaka'ane, sipisipima runeharizankna knonka'a eri'nenka nagrane mani'nanke'na ana zama negogeno'a, narimpamo'a fru nehie. ⁵ Ha' vahe'nimofo zamavuga, ra ne'zana retro hunenantane. Ana nehunka nasenifina masave taginka fre nenantenka, huhampri nantankeno, kapufinti'ma avite'noma herafiramiaza huno musezamo'a nagu'afintira aviteno varehineramie. ⁶ Tamagerfa huno Ra Anumzamomofo knare avu'ava zamo'ene agri avesi'zamo'a ofri'nama kasefa hu'na ama mopafima manisua kna'afina, namage navararino vano hugahie. Ana nehanige'na Ra Anumzamomofo mono nompi maka zupa manivava hugahue.

24

Marerisa kinimofo zagame Deviti asunte'nea zagamere

¹ Ama mopa Ra Anumzamofu suza megeno, ama mopafima maka'zama me'nea zantamimo'a agri zanke megeno, maka vahe'mo'zanena agri vaheke mani'naze. ² Na'ankure agra ama mopamofu tra'ama amefenkame tami'nea hagerimofu agofetu tro hunenteno, timofu agofetu mopa tro hunte'ne. ³ Ina vahe'mo Ra Anumzamofu agonafina marerigahie? Ina vahe'mo Ra Anumzamofu ruotage mono nompina ome otigahie? ⁴ Hagi agu'amo'ene azamo'enema agru nehanigeno, havi anumzante'ma mono'ma hunonteno havigema nosania vahemo anampina vugahie. ⁵ E'inahu vahe'mo Ra Anumzamofontegatira asomura erigahie. Anumzamo'a agu'vazino nevreno, fatgo vahe mani'ne huno huntegahie. ⁶ E'inahu vahe'mo Anumzamofonkura nehakeno monora hunenteno, Jekopu Anumzamofu tvaontera urava'o nehie.

⁷ Kuma kahantamimota anagita ru hagro nehinkeno, korapa'ma me'naza kahamota anagita ru hagaro nehinkeno, hankave'ane kini ne'mo'a efreno. ⁸ Hagi ana hankave kinia iza'e? E'i agra Ra Anumzana hihamu'ane hankanave Anumzankino, Agra hankavetino hara hugaterega Anumza mani'ne. ⁹ Kuma kahamota anagita ruhagro hiho, ana nehanageta korapa kahamota, anagita ru hagaro hiho. Ana nehinkeno hankave'ane kini ne'mo'a efreno. ¹⁰ Hagi ana hankave kinia

iza'e? Ra Anumzana hankavenentake Anumzamo agrake ugagota kinia mani'ne.

25

Ra Anumzamo'ma kegava hurantesia zanku Deviti asunte'nea zagamere

¹ Ra Anumzamoka kagrite nagu namena eri'na e'na ama nunamuna nehue. ² Kagra nagri Anumza mani'nanke'na, kagrite namentintia nehue. Kagra natrege'na nagazegura osaneno. Hanki ha' vaheni'a zamatrege'za, hara hu nagate'nere'za musena osiho. ³ Kagrite'ma amuha nehu'za zamentintima nehaza vahera zmatresnanke'za, zamagazegura osugahaze. Hianagi kagri'ma ha'ma renegantaza vahe'mo'za, osuga zamavu zamava'ma hu'naza zanku zamagesa nentahi'za zamagazegura hugahaze. ⁴ Ra Anumzamoka knare kavukva zana naveri nehunka, Kagri'ma kavaririnoa kana rempi hunamio. ⁵ Tamage nanekeka'afi kegava hunka navrenka nevunka, anankema amage'ma antesnua zana rempi hunamio. Na'ankure kagra nagri Anumza mani'nenka, nagu'vazinka ete nenavrane. Ana nehanku maka knafina Kagrama nazama hananku, amuhara nehue. ⁶ Ra Anumzamoka kasunku zanku'ene vagaore kavesi zankura kageraokanio. Na'ankure ana kavukva zana korapa knareti hume enka, meninena ana kavukvara nehane. ⁷ Ra Anumzamoka, ko'ma mofavrema mani'nenama hu'noa kumi'ene kefo avu'ava zani'a, vagaore kavesizanku kagesa nentahinka kumini'a atrenanto. Na'ankure Ra Anumzana Kagra kasunku Anumza

mani'nane. ⁸ Ra Anumzamo'a knare hu'нено fatgo hu'neankino, kumi'ma nehaza vahera rempi huzamige'za, agri avesi'zana amage nentaze. ⁹ Zamavufgama anteramiza maniza vahera, fatgo avu'ava huno kegava huzmanteno zamavareno nevuno, Agra'a avu'ava zana rempi hunezamie. ¹⁰ Ra Anumzamofu kasegene trakenema amage'ma nentaza vahera, agra vagaore avesi zanteti zamavesi nezamanteno, hugahue huno'ma huzmante'nea ke'are oti'нено anaza nehia Anumza mani'ne. ¹¹ Ra Anumzamoka, nagri kumira rama'a me'neanagi kagri kagimofu knare zanku kagesa nentahinka, muse hugantoanki kumini'a eri atrenanto. ¹² Iza'o Ra Anumzamofonku'ma koro'ma hunte'nesnia vahera, Agra'a huhampri'nesia kante vuo huno huntenigeno vugahie. ¹³ Ana vahe'mo'za knare nomani'zampi nemanisnage'za, zamagrama kase zamantesnaza vahe'mo'za ama mopa erisanti hare'za so'e hu'za manigahaze. ¹⁴ Ra Anumzamo'a agriku'ma koro nehu'za, agri agoragama nemaniza vahera, zamatrege'za agri rone'a nemanizageno, oku'a me'nea kasege'a eri ama huno nezamasamie. ¹⁵ Maka zupa nazama hanigu Ra Anumzamofonteke navua nentoe. Na'ankure nagri'ma nazeri traka'ma hunaku'ma hania kukompintira nazeri atregahie. ¹⁶ Ra Anumzamoka rukrahe hunka nenagenka, kasunkura hunanto. Na'ankure nasuzampi mani'noe. ¹⁷ Nagri nagu'afima me'nea knazamo'a ome ra huno nevie. Ana knafima manine'na antahintahi hakarema nehua zampintira, katufenka navre atro.

18 Knazamo nazeri havizama nehige'na, narimpa knafima mani'noa zana nenagenka, maka kumini'a eri atrenanto. 19 Nagri ha' vahera rama'a efore nehu'za, nagri'ma ha'ma renenante'za zamavesrama hunantaza zana kagra ko. 20 Kagra nagu'nevazinka kegava hunka navrenka vuo. Natrege'za nazeri nagaze osiho. Na'ankure Kagripi e'na eme franekue. 21 Fatgo avu'avazamo'ene, mani fatgoma huno mani avu'azamo kegava hunantegahie. Na'ankure nagra nazama hanankura kagriku amuhara nehue. 22 Anumzamoka maka Israeli vahe'ma mani'naza kna zampintira kasunku huzmantenka ete zamagu'vazinka zamavro.

26

Ke'a omane vahe'mo'ma hania nunamumofa zagamere

1 Ra Anumzamoka nagrira nenagenka fatgo vahe mani'nane hunka huo. Na'ankure nomaniza'nifina fatgo navu'nava'za hu'na e'noe. Ana nehu'na rukrahe osu hankaveti'na kagrite namentintia hu'noe. 2 Ra Anumzamoka nagrira renahenka nenagenka, nagu'ane antahintahi zani'a rezaganenka ko. 3 Na'ankure vagaore kavesi zamo'a navuga me'nege'na nege'na, maka zupa tamage nagu'areti hu'na kamagera ante vava nehue. 4 Nagra havigema nehaza vahe'enena vano nosu'na, tavre vahe'mofa amu'nompina nomanue. 5 Havi zamavu zamava'ma nehaza vahe'mo'zama atruma haza atrugura navesra hunezmante'na, havi zamavu zamava'ma nehaza vahe'ma manizafina

omanigahue. ⁶ Ra Anumzamoka nagri'ma hazenkeni'a omane'ne hu'na kaveri'ma hanuana timpí nazana sese nehu'na, Kresramanama vu itakarera neoe. ⁷ Ana nehu'na ranke hu'na muse zagamera hu'na Kagri kagia ahentesga nehu'na, mika knare'nare kagu'vazama hu'nana zankura, huama hu'na vahera zamasamigahue. ⁸ Ra Anumzamoka kagrama mani'nankeno, kagri masa zamo'ma me'nea mono nonka'agura navesi navesi nehie. ⁹ Hagi kumi'ma nehaza vahe'ma zamazeri havizama hanampina, nagrira nazeri haviza osuo. Ana nehunka vahe'ma zamahe'zama korama eri tagi netraza vahe'ma zamahe frisanpina, nahe ofrio. ¹⁰ Ana vahe zamazampina kefo avu'avazamo avinetegeno, tamaga kaziga zamazampina zagore'ma masave hu'za mago'aza eri'zamo avite'ne. ¹¹ Hianagi nagrani'a fatgo navu'nava zanke nehugu, kasunku hunantenka ete navro. ¹² Nagra agupo hu'nea mopare oti'noanki'na, kagri vahe kerfamo'zama atruma hanafina, kagri kagia ahentesga hugahue.

27

Ra Anumzamofoma humuse hunte nunamu zagame Deviti asunte'nea zagamere

¹ Ra Anumzamo'a nagri tavi mani'nenno, nagu'vazi ne' mani'neankina, nagra na'anuku korora hugahue? Ra Anumzamo'a nagrira hankave vihuni'a mani'neanki'na, na'anuku nagra nahirahikura hugahue? ² Hanki havi avu'ava zama nehaza vahe'mo'zama nazeri haviza hunaku erava'o nehanageno, ha'

vahe'nimo'za nahenaku egahazanagi, ana
 vahe'mo'za traka hu'za masegahaze. ³ Rama'a
 sondia vahe kerafamo'za nahenaku kafo eme
 ante'za navazagi kagigahazanagi, nagra korora
 osugahue. Ha' vahenimo'za hara agafa hu'za
 eme hunantegahazanagi, Ra Anumzamofonku
 amuhara hugahue. ⁴ Ra Anumzamofona mago
 zanku antahigesue, Knare nagrira natresanigena
 kasefa'ma hu'nama manisnua kna'afina, Agri
 nompina manivava nehu'na, knare avu'ava'a
 nege'na, musena hunente'na Agri mono nOMPI
 mani'nena kama naverima hanigura kegahue.
⁵ Hanki hazenke zama esania knafina, Agra'a
 navre franekino, Agra'a seli mono nOMPI
 navre frakigahie. Ana nehuno navresga
 huno onagamu'a have agofetu nantesige'na
 knare hu'na manigahue. ⁶ Anama hanige'na
 nagri'ma nazeri kagi'naza ha' vaheni'a naza
 hanige'na hara huzmagetenerena, ranke hu'na
 musenkase nehu'na, Ra Anumzamofono mono
 nOMPI ofa kresramna vugahue. Ana nehu'na
 zavena ahe'na zagamera Ra Anumzamofontega
 hugahue. ⁷ Ra Anumzamoka naza huogu'ma
 kagritegama nunamuma nehanugenka,
 kasunku hunantenka nunamuni'a antahinamio.
⁸ Nagu'amo'a agritega nunamu hunka agriku
 hako huno hige'na, nagra Ra Anumzamokarega
 nunamuna nehue. ⁹ Ra Anumzamoka kamefira
 hunaminka kavugosa rukrahera nehunka,
 eri'za vahekamo'na krimpa aheonanto.
 Na'ankure kagra ko'ma nagu'vazinka e'nana
 Anumza mani'nananki, kamefira hunaminka
 onatrenka, nagu'vazinka nazahuo. ¹⁰ Nenfa'ene

nenrera'enena zanamefira hunamigaha'anagi, Ra Anumzamo'a navareno kegava hunantegahie. ¹¹ Ra Anumzamoka Kagra'a kavukvara rempi hunamio. Ha' vaheni'amo'za kafonte'za mani'nazanki, kegava hunantenka navrenka knare huno fatgo hu'nea kantera vuo. ¹² Nagrira natrege'na ha' vahe'nimofo zamazampina va'nenkeno zamagri'ma zamavesi'niaza hu'za nazeri havizana osiho. Na'ankure ana vahe'mo'za nagrira havige hunante'za e'za nazeri koro nehaze. ¹³ Tamagerfa hu'na namentintima huana, henka'a Ra Anumzamofa knare'zana, nagrama mani'nama vanua knafina kegahue. ¹⁴ Ra Anumzamofonku avega antenka mani'nenka, oti hankavetinenka atregeno kagu'amo'a hankave enerisnigenka, Ra Anumzamo'ma kazama hanigu akohenka mani'nenka aveganto.

28

Ra Anumzamo'ma taza hanigu hanuna nunamune

¹ Ra Anumzamoka nagri fraki hankave haveni'a mani'nanku, kagritega kezanetuanki, kezankeni'a antahinamio. Na'ankure nagri kezankere'ma nonama osnanke'na, nagra vahe'mo'zama fri'za nevaza kumatega fri'na vugahue. ² Nagra Ruotage'ma hu'nea mono nonka'ama me'nea kaziga nazana erisga hu'na naza huogu nunamuna nehuanki, kezankeni'a antahinamio. ³ Kefo zamavuzmavama nehu'za, havizama nehu'za tava'o zamire'ma nemani'za vahe'enema zamagiteti haganentake naneke

nehazanagi, zamarimpafina havi avu'avamo'ma avitenege'zama havigema nehaza vahe'enena nazeri fenkamua otro. ⁴ Havi zamavu' zmava'ma nehu'za, kumimofo eri'zama eri'naza vahera, havi zamavu zmava'ma nehu'za kumi'ma hu'naza avamente antenka, mizana zamitere hunka zamazeri havizana huo. ⁵ Ana Ra Anumzamofu eri'zanku'ene, Ra Anumzamo'ma azampinti'ma tro'ma hu'nea zantaminkura antahi amne nehaze. Ana hu'nazankino zamazeri havizantfa hutresnige'za, mago'enena oti'za so'ea hu'za omanigahaze. ⁶ Ra Anumzamofona agi'a ahentesga hugahue. Na'ankure kasunku hunanto hu'nama kezatugeno'a, kezanke'ni'a antahinami'ne. ⁷ Ra Anumzamo'a hankveni'ane, hankoni'ane mani'ne. Ana hu'negeni nagu'amo'a agripi me'nege'na namentintia nehugeno, agra naza nehie. Ana nehigeno nagu'amo'a tusi muse nehianki'na, muse zagame nehu'na susu huntegahue. ⁸ Ra Anumzamo'a vea kevu'amofu hankavea agra'a nezmino, masavema freno huhamprinte'nea kini ne'mo'ma fra'ma nekino, agu'ma vazisnia kumara agrake mani'ne. ⁹ Ra Anumzamoka nagri vahere nehunka, fenozama hiaza hunka'ma erisinte'ma hare'nana vahera asomu hunezmantenka, zamaza huo. Ana nehunka sipisipi kva vahe'mo'ma nehiaza hunka, maka knafina kazampi zamavarentenka kegava huzmante vava hunka vuo.

29

Hazenke'ma esania knafima Ra Anumzamofu ageru'ma antahi'zamofu zagamere

¹ Monafima nemaniza maka ankeromota Ra Anumzamofa agia ahentesga hunenteta, agri agigu'ene hankave'agu'enena husga hunenteta muse hunteho. ² Ra Anumzamofoma so'e zantfama hu'nea agia ahentesga nehuta, ruotage'ma huno hankave nentake'ma hu'nea Anumzana monora hunteho. ³ Ra Anumzamofa agerumo'a hagerimofa agofetu'ma vuno eno nehigeno, hankavenentake Ra Anumzamofa ageru'mo'a hagerimofa agofetura monagema hiaza huno runagraseno vuno eno nehie. ⁴ Ra Anumzamofa agerumo'a hankavenentake higeno, konariri'amo'a avite'ne. ⁵ Hagi Ra Anumzamofa agerumo'a, sida zafaramina runagaza penetreno, Ra Anumzamo'a Lebanoni kokampima me'nea Sida zafaramina, ru futagi atre'ne. ⁶ Ana nehuno Lebanoni agonamofona higeno bulimakao anenta'mo'ma hiaza huno, takaure takaure nehigeno, Hemoni agonamofona higeno, afi agaho bulimakao afumo'ma hiaza huno takaunere. ⁷ Ra Anumzamofa agerumo'a kopsi'namo'ma hiaza huno rumarave marave nehigeno tevenefa rukru nehie. ⁸ Ra Anumzamofa agerumo'a hagege koka eri kanage nehigeno, Ra Anumzamofa agerumo'a, Kadesima me'nea ka'ma koka eri tore nehie. ⁹ Ra Anumzamo'ma ageru'ma nerigeno'a, dia afu'mo'za anopa anenta nentageno, zafa ani'namo'za harari hu'za mopafinke eneramize. Ana nehazage'za agri mono nompima mani'naza vahe'mo'za hu'za, Anumzamo'a hankavenentake hu'ne hu'za agia ahentesga nehaze. ¹⁰ Ra Anumzamo'a kini tra'are mani'nenno, ranra

hagerintamina kegava hu'ne. Ana hu'neankino agrake kinia mani'nenno kegava hu vava hugahie. ¹¹ Ra Anumzamo'a agra vahe'a hankavea nezamino, rimpa fruzanteti asomura huzmantesie.

30

Ra Anumzamofoma humusema hunteno'ma hu' nunamu zagamere

¹ Ra Anumzamoka kagra natranke'na fri vahe kumapina mani'noge'za nagri ha' vahe'mo'za ra zamagia e'neri'za nagefenkami otrazanki, kagra anampintira navre atirami'nanku, kagri kagia ahentesga hu'na rankagia kamigahue. ² Ra Anumzana nagri Anumzamoka, kagrama naza huogu'ma nunamuma hugenka, kagra nazeri kanamr40 'nane. ³ Ra Anumzamoka nagra fri'na matipi uramiza hu'noanagi, anampinti navre atirami'nane. Ana nehunka nazeri kasefa hanke'na, fri'na fri vahe kumapina uorami'na kasefa hu'na mani'noe. ⁴ Anumzamofa amage'ma nentza vahe'mota zagame huta Ra Anumzamofona husga hunenteta, ruotage'ma hu'nea zanku agia aheta humuse huntaho. ⁵ Na'ankure Ra Anumzamofa arimpa ahe'zamo'a zazatera meno ovugahie. Hianagi agri knare avu'avazamo'a, kasefa'ma huta manisuna kna'afina mevava huno vugahie. Hanima e'nigeta kenagera zavira ategahunanagi, nanterama ko'manetigeta musenkase hugahune. ⁶ Hagi nagra maka'zama ante'na knare'ma hu'nama mani'noa kna'afima nagesama antahi'noana, mago'zamo'a nagritera eno nazeri kazara

osugahie hu'na antahi'noe. ⁷ Ra Anumzamoka kagra knare kavukva hunantenka nazeri hankavetinke'na agonamo'ma oti hankavetiaza hu'na oti hankaveti'noe. Hianagi kagrama kavugosama rukrahe hunka kamefi'ma hunaminke'na, nagra koro hu'noe. ⁸ E'ina hu'negu Ra Anumzamoka naza huogu kagritega krafage nehu'na, kasunku'ma hunante'naku nunamuna nehue. ⁹ Hagi nagrama fri'na fri vahe kumapima uramina kasrinuana, iza zagamera huno Ra Anumzamoka'ma, knare kavukva'ma nehana zankura kagia ahentesga nehuno, musena hugantegahie? ¹⁰ Ra Anumzamoka nagrama nehuankea antahi'nenaminka, kasunkuma hunantenka naza huoguma nunamuma nehuana antahinaminka naza huo. ¹¹ Zavi'ma netoa zampintira nazeri muse hanke'na musena hu'na avo nehagoe. Ana nehunka nasunku kukenama hu'noa zana hate netrenka, kukenama hiaza hunka musezana eri hankre nantanke'na musenkase nehue. ¹² E'ina hu'negu nagra fruhu'na omanigahuanki, nagu'areti hu'na Ra Anumzana nagri Anumzamoka kagritega zagamera hu'na, maka zupa susu hugante vava hugahue.

31

Agu'vazinogu Deviti hu'nea nunamu zagamere

¹ Ra Anumzamoka kagripi franekuanki natrege'za magore hu'za nazeri nagazea osiho. Hanki fatgo kavukva zampinti nagu'vazio. ² Kagesa antenka nunamuni'a nentahinka, ame hunka nagu'vazio. Kagra fraki haveni'ane,

hankave vihuni'agna hunka mani'nananki'na, anampi fraki'na nagura vazigahue. ³ Ra Anumzamoka Kagra fraki haveni'ane, hankave vihuni'anena mani'nane. Kagri kagimo'ma knare haniazanku nentahinka nazeri fatgo hunka kegava hunanto. ⁴ Ha' vahe'nimo'zama nahenaku'ma krifuma anagi ante'nazafintira navare atiraminka nagu'vazio. Na'ankure kagra nagri fraki kumani'a mani'nane. ⁵ Kagri kazampi avamuni'a antoanki, Ra Anumzamoka nagu'vazio, na'ankure Kagra tamagege hu' Anumza mani'nane. ⁶ Kaza osu havi anumzante'ma mono'ma hunentaza vahera, tusi navresra hunezmantoe. Hianagi nagra Ra Anumzamokare namentintia nehu'na antahinegamue. ⁷ Nagra Ra Anumzamoka vagaore kavesizanka'agura musena hugahue. Na'ankure kagra knazani'a negenka natama eri'na vuazana antahinka kenka hu'nane. ⁸ Hagi kagra ha' vahe'ni'amokizmi zamazampina nevre onte'nananki, nagu'vazinke'na ra mopafi knare hu'na mani'noe. ⁹ Hagi Ra Anumzamoka kasunku hunanto. Na'ankure nagra knazampima mani'ne'na zavi'ma atoa zamo'a navumo'a pro nehigeno, navufgamo'enena ome haviza hie. ¹⁰ Maka kna nasuzampi nemani'na, knazampima mani'na vuazamo, higeno kafuni'amo'a atupa nehie. Kumi avu'avazampi mani'na vuazamo higeno hankaveni'a omnegeno, zaferinani'a omne amne nehie. ¹¹ Ha' vahe'nimo'za zamavaresra hunenantazageno, tava'onte'ma nemaniza vahe'mo'za nagefenkami netrazageno, ronenimo'zama kumapima nenage'za koro

nefrazē. ¹² Fri'nea vahe'ma zamagekaniaza hu'za zamagekani nentazage'na nagra tako hu'nea mopa kavogna hu'noe. ¹³ Rama'a vahe'mo'za huhaviza hunentaza naneke nentahi'na tusi koro hu'noe. Hagi zamagra nahe frinaku oku'a atru hu'za kea anaki'naze. ¹⁴ Hianagi Ra Anumzamoka kagrite namentintia nehu'na nagri Anumza kagra mani'nane hu'na nehue. ¹⁵ Nasimu'mo'a Kagri kazampi me'neanki, ha' vahe'niamo'zama nahenaku'ma nenavaririza vahe'mokizmi zamazampintira nagu'vazio. ¹⁶ Atregeno kavugosafinti masazamo'a eri'za vaheka'arera remasa nehina, huvempama hunka huhagerafinana keka'agu nentahinka kasunku hunantenka nzahuo. ¹⁷ Hanki Ra Anumzamoka kagripi nagra franekue. Hagi natrege'za ha' vahetmimo'za nazeri nagazea osiho. Fatgo kavu'kvaka'afinti nagu'vazio. Hagi kefo zamavu'zmava'ma nehaza vahera zamazeri zamagaze nehunka, zamagira ruhamunkige'za friza matipi maseho. ¹⁸ Havigema nehaza zamagefu'na erirava nehenka, fatgo zmavuzmava'ma nehaza vahe'ma huhaviza nehu'za zamavufaga ra kema nehaza zamagira eriravaho. ¹⁹ Ra Anumzamoka knare kavukvamo'a rankrerfa hu'neankinka, kagri'ma koro'ma hugante'za kagoraga'ama nemaniza vahera rama'a zmasimu ante vite'nezmantane. Hagi kagripima eme frakinaku'ma aza vahera knare kavukva zana antevite nezmantenka asomura hunezmantake'za maka vahe'mo'za nezamagaze. ²⁰ Ha' vahe'mo'zama zamahe'zama nehazagenka

Ra Anumzamoka zamazeri franekinka, zamagipinti'ma huhavizama nehazagenka zamazeri fra'nekine. ²¹ Ra Anumzamofona ra agi erisga hanue. Na'ankure ha' vahe'nimo'zama mani'noa rankumama avazagi kagizageno'a, Agra vagaore avesizama'areti nagu'vazi'ne. ²² Hagi antrima nehu'na amanage hu'noe, Ra Anumzana atre'na nagra ogama afete e'noe hu'na hu'noe. Hianagi naza huogu'ma krafagema huana antahinka naza hu'nane. ²³ Anumzamofona vahe'mota Ra Anumzamofona tamavesinteho. Na'ankure Ra Anumzamo'a Agri'ma avariri fatgoma nehaza vahera hazenkema erizankura kegava hunezmante'anagi, zamavufaga rama nehaza vahera zamazeri havizantfa nehie. ²⁴ Ra Anumzamofonte'ma amuha'ma nehaza vahe'mota korora osu hankavetita maniho.

32

Ra Anumzamofona vagaore avesi zanku Deviti asunte'nea zagamere

¹ Kema ontahi avu'ava zama'ama Anumzamo'ma atrenenteno, kumi'ama apasente'nia vahe'mo'a tusi muse hugahie. ² Hagi Ra Anumzamo'ma mago vahe'mofo kefo avu'ava'ama eritrenigeno, vahe'ma revatga hu avu'avazamo'ma agripima omnene'nia vahe'mo'a muse hugahie. ³ Hagi kumini'ama huama'ma osugeno'a, nagri navufgamo'ene zaferinamo'enena tusi nata negrige'na karagi ruvava nehue. ⁴ Na'ankure zagene haninena knazana nagrite ante'nankeno, tusi kna nave'nesie. Hagi zagemo'ma tima te hagege hiaza huno, hankavenimo'a hagege nehie.

⁵ Ana'ma hutege'na kumini'a refiote maka kagritega huama hu'noe. Ana nehu'na nagra anage hu'noe, Ra Anumzamofonte nagra keontahi navu'nava zani'a huama hugenka, kumini'a apase nantankeno mika kumi'ni'a vagare'ne. ⁶ E'ina hu'negu atrege'za Kagri kamage'ma nentaza vahe'mo'za knama me'nesire kagritega nunamuna hiho. Ana hanageno knazamo'ma tima hageazama huno esia zamo'a zamazeri onakrino. ⁷ Kagra fraki kumani'a mani'nanankinka, hazenke knafina nagu'nevazinke'na, ana zankura zagame nehu'na tusi musenkase nehue. ⁸ Hagi Ra Anumzamo'a huno, Nagra kegava hugante'nenana rempi hugamisugenka knare kantera vugahane. Nagra navunte'na negage'na antahintahia kamigahue. ⁹ Hagi antahintahizmi omne hosi afuro, miuri afu'ma aini atupa'ama zamagipi ante'neza nofi rente'za zamavazu hazage'za zamavariri'za vazanknara osiho. ¹⁰ Kefo avu'ava'ma nehaza vahera, rama'a knazamo zamazeri haviza nehanige'za zamasuzampi manigahaze. Hianagi Ra Anumzamofona vagaore avesizamo'a Agrite'ma zamentintima nehaza vahete megahie. ¹¹ Fatgo avu'ava'ma nehaza vahe'mota Ra Anumzamofonku muse nehinkeno, tamagu'amo'ma fatgoma hu'nenia vahe'mota ranke huta zagamera huta agi'a erisga hiho.

33

Muse zagame Deviti asunte'nea zagamere

¹ Fatgo avu'ava'ma nehaza vahe'mota zagamera huta Ra Anumzamofona musena hunteho. Na'ankure fatgo avu'ava'ma nehia vahe'mo'ma Ra Anumzamofona agima erisgama haniana knare hugahie. ² Hapu zavena neheta zagamera huta Ra Anumzamofona agia erisga nehuta, 10ni'a strini nofi'ma me'nea zavenagu'ma laeriema nehaza zavena neheta zagamera huta musena hiho. ³ Kasefa zagame huta agia erisga hiho. Knarezantfa huta zavena neheta ranke huta agi'a erisga huta musena hiho. ⁴ Na'ankure Ra Anumzamofonkea tamage naneke me'neankino, nazano hugahuema hu'nea zantamina Agra ana maka nehie. ⁵ Ra Anumzamo'a fatgo avu'avazane, mago zanke'ma huno maka zama refkohu avu'ava zanku'ene avenesigeno, ama mopafina Agri vagaore avesizamo avite'ne. ⁶ Ra Anumzamo'a ke higeno mona fore nehigeno, Agra ke higeno monafima me'nea hanafitamine zagene ikanena fore hu'ne. ⁷ Agra, Ra Anumzamo hagerina repapa higeno magokepina umareno moriri huno marerigeno, tinkerifima tima afinteanakna huno hagerina magokepi renatinte'ne. ⁸ Maka ama mopafima mani'naza vahe'mo'za Ra Anumzamofonku korora hunte'za agoraga'a maniho. Maka ama mopafi vahe'mo'za Agrira kesga hu'za monora hunte'za agorga maniho. ⁹ Na'ankure Agra ke nehigeno ama mopa fore hu'ne. Agra huno, efore huo huno higeno ama mopamo'a efore hu'no me'ne. ¹⁰ Ama mopafi vahe'mo'zama e'ina hugahune hu'zama antahintahima retro'ma haza antahintahia Ra Anumzamo'a zamahe savri nehuno, mika

zama hugahune hu'zama kema anakiza zana eri haviza nehie. ¹¹ Hianagi Ra Anumzamo'ma mago'zama hunaku'ma antahintahima retro'ma hu'nenia zamo'a mevava huno vugahie. Hugahue huno'ma hu'nenia zana Agra tamage huno fore'ma hu anante anante'ma hanigeno manino vania vahete'enena meno vugahie. ¹² Ra Anumzanku'ma tagri Anumzane hu'zama hanaza vahe'mo'za muse nehinkeno, Nagri fenozane huno'ma eri santimahare'nea vahe'mo'za muse hiho. ¹³ Monafinkatira Ra Anumzamo'a kefenka atreno ama mopafima mani'naza vahera maka nezamagie ¹⁴ Agrama nemaniam kumapintira kefenka ateno mika ama mopafima nemaniza vahera nezamage. ¹⁵ Agra vahe'mofo tumora trohunte'neankino, maka zama hu'na zana antahino keno nehie. ¹⁶ Hankavenentake sondia vahetmimo'za kini nera agura ovazi'nageno, harafa sondia ne'mo'a agra'a hanave'aretira kini nera agura ovazigahie ¹⁷ Hosi afu'mo'za naza hanage'na hara agateregahue hunka amuhara osuo. Na'ankure hosi afu'mofo hankavemo'a kaza huno kagura ovazigahie. ¹⁸ Hianagi Ra Anumzamo'a Agriku'ma koro'ma hu'za agoraga'ama nemaniza, vagaore avesizama'mofonte'ma amuha'ma nehaza vahete avua anteno nege. ¹⁹ Agra frizampintira zamagu'nevazino agatonto knafina zamatrege'za ne'zankura nofrize. ²⁰ Ra Anumzamofonku tagra avega anteta manineta amuhara nehunankino, Agrake'za hankotia mani'neankino, taza hugahie. ²¹ Agriku tagu'amo'a musena nehie, na'ankure tagra, Agri ruotge agifi tamentintia nehune. ²² Ra

Anumzamoka kagripi amuha zantia me'neanki, vagaore kavesi'zanteti maka knafina kegava hunka refiteranto.

34

Ha' vahe azampinti'ma agu'vazinia zamofo nunamune

¹ Maka kna nagra Ra Anumzamofona husga hunente'na, Agri agi'a hentesga huvava hugahue.

² Nagra Ra Anumzamofonku musena nehu'na navufga rana hugahuanki'za, vahe'mo'zama zamazeri havizama nehaza vahe'mo'za nentahi'za muse hugahaze. ³ Enketa Ra

Anumzamofa avu'avazama'a huama nehuta, agi'a husga huntamneno. ⁴ Ra Anumzamofontega nunamuna hugeno, nunamuni'a antahinamino koro'ma nehua zana eri amne hu'ne. ⁵ Ra

Anumzamofontegama zamavuma antete'za nemaniza vahe'mokizmi zamavugosafintira rumasa nehanige'za, muse nehanageno zamavugosafina zamagaze zamo'a refi'otegahie.

⁶ Amunte omne ne'ma amama mani'nea ne'mo'a nunamu higeno, Ra Anumzamo'a antahimino ana maka knazama'afintira agu'vazi'ne. ⁷ Ra

Anumzamofa ankeroma'amo'a Agri'ma koro'ma hunte'za agoraga'ama nemaniza vahera manigagino kegava hunezmanteno hazenke zampintira zamagu'nevazie. ⁸ Agra knare avu'ava

nehia ne' mani'neanki Ra Anumzamofona rehenka ko, Agripinkama frakino manisia vahe'mo'a muse hugahie. ⁹ Anumzamofa

amage'ma nentaza vahe'mota Ra Anumzamofona koro hunteta agoraga'a maniho. Na'ankure Agri'ma koro'ma hunte'za agoraga'ama

nemaniza vahe'mo'za mago zankura atupara nosaze. ¹⁰ Hankavenentake laionimo'a mago'a kna agakura hugahie. Hianagi Ra Anumzamofonte'ma amentintima himo'a, knare zantaminkura upara nosie. ¹¹ Mofavrenimota nagrite eta eme antahiho. Ra Anumzamofoma koroma hunteno agoraga'ama mani'zana rempi huramigahue. ¹² Izaga ofrinka zaza kna ama mopafina knare hunka manizankura kave'nesie? ¹³ E'ina hunaku'ma hanunka, kefo nanekene havi nanekema hu'zankura, kagira kegava huo. ¹⁴ Kefo kavukava'ma nehanazana atrenka knare kavukva huo. Arimpa fruma huno mani zankuke nehakenka, ana kavukavake huo. ¹⁵ Ra Anumzamo'a fatgo zamavu'zamavama nehaza vahete avua anteno kegava hunezmante. Agritegama krafagema hanageno'ma zamaza hanigu agesa anteteno nemanie. ¹⁶ Hianagi Ra Anumzamo'a kefo zamavu'zmava'ma nehaza vahera amefi hunezmino, ama mopafintira zamahe fanane hanige'za vahe'mo'za zamagesa ru'enena antahi ozamigahaze. ¹⁷ Fatgo zamavu'zmava'ma nehaza vahe'mo'zama Ra Anumzamofontegama krafagema nehazageno'a, Agra antahi nezmino maka hazenkefintira zamagu'nevazie. ¹⁸ Ranknazampima mani'naza vahera Ra Anumzamo'a tva'ozmire nemanino, vahe'mo'zama knazama zami'za zamagu'ama zamazeri havizama nehaza vahera, zamagu'nevazie. ¹⁹ Fatgo zamavu'zmava'ma nehaza vahe'mo'za rama'a hazenkefi ufretere hugahazanagi, Ra Anumzamo'a ana hazenkefintira zamaza huno zmagu'vazitere hugahie. ²⁰ Na'ankure Ra Anumzamo'a

fatgo avu'ava'ma nehia vahe'mofo zaferina kegava hunteghiankino mago zaferina'amo'a hara ontagigahie. ²¹ Kefo avu'ava'ma nehia vahera agrama nehania kefo avu'ava zamo'a ahenefrisigeno, fatgo avu'ava zanku'ma avresrama nehania vahera, ana avu'ava'zantera nona huno knazana amigahie. ²² Hianagi Ra Anumzamo'a eri'za vahe'a agu'vazigahie. Hanki Ra Anumzamofompima frakisia vahe'mo'a hazenkefina uofregahie.

35

Ra Anumzamo'a hankave Anumzane huno Deviti asunte'nea zagamere

¹ Ra Anumzamoka nagri'ma mago zamarimpama hunontaza vahera mago krimpa hunozmantenka, ha'ma renantaza vahera ha'rezmanto. ² Ha' kukenaka'a nehunka, hankoka'a erinka enka eme naza huo. ³ Navaririzama neaza vahera keveka'ane, karugru keveka'ane erisga hunka nezmahegena, kagu'vazigahue hunkama nehana nanekeka'agura antahineno. ⁴ Nahenaku'ma nenavaririza vahe'mokizmia zamatrege'za zamagazegu hiho. Nazeri haviza hunaku'ma antahintahima nehaza vahera zamazeri haviza huge'za zamagazegu hiho. ⁵ Ra Anumzamoka witi hona'ama hiaza hunka huharafu huzmatrege'za zahomo'ma hiaza hu'za Kagri ankero vahe'mo'za zamaretufe zamatreno. ⁶ Kama vanaza kana eri hanintiri nehunka, eri krarintege'za Ra Anumzamoka ankeromo'a zamarotago huno vino. ⁷ Nagra zamagrira zamazeri

havizana osu'noanagi, zamagra karifu anaginte nante'naze. Nagra mago zana osu'noanagi zamagra nagri nazerinaku keru kafinte'naze. ⁸ E'ina hu'negu atregeno zamazeri havizama huzamo'a antri hanazaza huno zamavatera nena, nagri'ma nazerisie hu'zama anaginte'naza krifumo'a zamazerino. Nagri kerima kafinte'nazafi, zamagra'a tamiho. ⁹ E'ina'ma hanage'na Ra Anumzamokagura tusi musenkase nehu'na, kagi'a erisaga hugahue, na'ankure Kagra naguranevazine. ¹⁰ Ra Anumzamoka ana maka nagu'areti hu'na kagia erisga hugahue. Ra Anumzamoka magore huno Kagrikna anumzana omani'ne. Hagi zamagra'ama zamaza huga osu vahe'mofo zantamine, zmunte omne vahe'mofo zantaminema musufama neseza zamazeri havizama nehazana iza zamaza hugahie. ¹¹ Kezmifinti'ma vahe'ma zamazeri havizama hu vahe'mo'za, havige hu'za keaga hunenantaze. Nagra osu'noa hazenkegura kagra hazenke hu'nane hu'za havigea hunenantaze. ¹² Knare navu'nava'ma huzmantoa zantera, havi zamavuzmava zanu nona hunentaze. E'ina'ma haza zamo higeno, nagu'amo'a tusi kna nehie. ¹³ Hianagi krima erizage'na nasunku hunezmante'na, atafa kukena hu'na manine'na kavera a'o hu'na ana nagamofona zamazama hananegara nunamuna hunezmantoanagi, ana nunamuni'arera nona nosane. ¹⁴ Nagra nagaku'ma hiaza hu'na zavira atenezmante'na, nenreranku'ma hiaza hu'na nasunkura hu'na zavira atenezmantoe. ¹⁵ Hianagi nagrama tanafa'ma hu'na mase'zama huge'za, muse

nehu'za eme naregagi'naze. Hagi antahina ke'na osu'noa vahe'mo'za hara eme renenante'za huhaviza hunante vava nehaze. ¹⁶ Kefo avu'ava'ma nehaza vahe'mo'zama nehazaza hu'za zamagra kiza zokagoke hunenante'za zamavera aninkreki hu'naze. ¹⁷ Ra Anumzamoka hago zazate mago zana huonante natranke'za amanara hu'za neaze. Hanki hankavematiza ha'ma hunentazana naguvazio. Laionimo'ma hiaza hu'za nahe'zama nehaza vahepintira nagu'vazio. ¹⁸ Ana'ma hananke'na rama'a mono kevuma atruma hanafina kagia ahentesga nehu'na, susu hunegante'na tusi'a vahekrerfama atruma hanafina nagra zagamera hu'na kagia erisga hugahue. ¹⁹ Hagi atregeno ha' vahe'nimo'za nagri'ma nazeri havizama nehaza zankura musena osiho. Ana nehunka zamatrege'za zamavaresrama hunenante'za amnezampima knama nenamiza vahe'mo'za rezavumira nehu'za nagizana oreho. ²⁰ Zamagra zamarimpa fruma hu'za vahe'enema manisaza zankura keaga nosazanki, knare hu'zama zamagra'a erizante'ma vanoma nehaza vahe'ma zamahesaza keaga retro nehaze. ²¹ Zamagra zamagira reaka hu'za amanage hu'za havigea hunentaze, kagriku'ma tavuma anteta haketa vanoma nehunazana, meni tagri tavumo'a kageno eri fore hie. ²² Ra Anumzamoka kagra ama ana zana kenka antahinka hu'nananki, kea osura omanio. Ra Anumzanimoka Kagra natrenka afetera akohenka uomanio. ²³ Ra Anumzanimoka otio! Otinka nahorakenka hara huo. Kagra Ra Anumzana nagri Anumza mani'nananki nagri kaziga antenka naguravazio.

24 Ra Anumzana nagri Anumzamoka nagra mago hazenkea osu'noanki, huama hunka zamasmio, na'ankure kagra fatgo hunka refko nehana ne' mani'nane. Hagi zamatrege'za hazenkefima unefrenuge'za ha' vahe'nimo'za nagi'zana oreho. 25 Zamatrege'za zamagu'afina hu'za agrikuma nehuna nera hago azeri haviza hu'ne hu'za osiho. 26 Hazenkefima mani'noge'zama musema nehu'za nagizama neraza vahera zamazeri haviza huge'za zamagazegu hiho. Zamavufga rama nehaza vahera zamazeri haviza huge'za, zamagazegu nehu'za zamagi omne vahe maniho. 27 Hianagi nagri'ma nahomanekaza vahera museza ante vitezmantege'za muse nehuza amanage hiho, Ra Anumzana agra marerisa Anumza mani'neankino eri'za vahe'amofona muse hunenteno asomura hunteno arimpa frua nemie hu'za hiho. 28 Ana'ma hananke'na fatgo kavukvazana huama nehu'na, maka kna zagamera hu'na kagi'a ahentesga hugahue.

36

Deviti'a Anumzamofa vagaore avesizanku asunte'nea zagamere

1 Kefo avu'ava'ma nehia vahe'mofona kumimo'a sumisumi huno agu'afina nanekea nesmigeno, agra Anumzamofonkura korora nosie. 2 Na'ankure agra avufga ra nehuno, agesama antahiana kefo navu'nava zama nehua zamo'a, amne zane huno nentahie. 3 Maka kema hiana fatgo osu, krunagege nehuno, antahintahima huno knare avu'ava'ma huzankura avresra nehie. 4 Hagi agra

kenagera avura ovase mani'nenno kumima hania antahintahi hugentahige nehie. Ana nehuno knare osu avu'ava zanke nehuno kefo avu'ava zampinti'ma atreno rukrahe'ma huno ezankura agesa nontahie. ⁵ Ra Anumzamoka vagaore kavesizamo'a monamo'ma hiaza huno rankrerfa higeno, hugahuema nehana zama amagama antenka hu' kavukva zamo'a hampona azeri agatereno onaga'a me'ne. ⁶ Fatgo kavukava zamo'a zaza huno ra agonagna higeno, fatgoma hunka refkoma hu' kavukva zamo'a ra hagerimo'ma amafenkame urami'ankna hu'ne. Ra Anumzamoka kagra zagagafane vahe'enena magozahu hunka kegava nehane. ⁷ Anumzamoka vagaore kavesizamo'a knare zanfta hu'ne. Maka vahe'mo'za kagri kagekonamofo turunapinka franekize. ⁸ Zamagra Kagri nompinti ne'zana nezamu nehazagenka, Kagri musezamo'a tinkna hu'neanki'za nene'za muse nehaze. ⁹ Na'ankure kagra asimu'ma erino mani tigampui mani'nenka, tagri tavi mani'nanketa negone. ¹⁰ Ra Anumzamoka, kagri'ma kage'za antahizama nehu'za kavesinegantaza vahera vagaore kavesi zanteti zamavesi nezmantenka, fatgo zamavu'zmava'ma nehaza vahera fatgo hunka refko huzmanto. ¹¹ Atregeno zamavufaga rama nehaza vahe'mo'za nagofetura zamagare'za vano nosnageno, kefo avu'ava'ma nehaza vahe'mo'za natufe kantutete natufe kamatetera osiho. ¹² Kefo avu'ava'ma nehaza vahe'mo'za traka nehazanki ko. Matevuno mopafi zamatrege'za vasene'za oti'zankura ana'ana nehazankiza ru'enena o'otigahaze.

37

Anumzamo'a Agra vahe'a amefira huomigahie huno asunte'nea zagamere

¹ Kefo avu'ava'ma nehaza vahekura antahintahi hakarea osuo. Hagi kefo avu'ava'ma nehia vahera keganunua osuo. ² Na'ankure zamagra trazankna hu'za ame hu'za hagage huge, trazamofu amosre'agna hu'za ame hu'za frigahaze. ³ Hagi Ra Anumzamofonte tamentinti nehuta knare tamavutmava hiho. Ama mopafina knare huta nemanita fatgo avu'ava'zama hu'zanku hankavetita eri'zana eriho. ⁴ Ra Anumzamofonku musena huntegeno kagu'amo'ma ave'manesia zana kamino. ⁵ Maka zama hunaku'ma hanana zana Ra Anumzamofu azampi nentenka Agrite'ma kamentintima hanankeno'a, Agra amne anazana hugahie. ⁶ Agra fatgo kavu'kva zanka'a erinte ama hanigeno, nantera zagemo hanatino remsa hiankna nehanigeno, fatgoma hunka refkoma nehana kavukvara zamo'a ferusegeno zage renteankna hugahie. ⁷ Ra Anumzamofu avuga akohenka mani'negeno, nazano hunaku'ma haniazana, Agra'a hino. Hanksi kefo zamavu'zmava'ma nehaza vahe'mo'zama rama'a fenoma ante'za knare'ma hanaza zankura kagesa nontahinka, kefo avu'ava'ma nehaza vahe'mo'zama kefo avu'ava'ma hanaza zankura antahintahi hakarea osuo. ⁸ Krimpagura osunka atregeno krimpama ahe'zamo'a evuneramina, ana zankura antahintahi hakarea osuo. Na'ankure e'i ana zamo'a kavreno hazenkefi ufregahie. ⁹ Hanksi kefo zamavu'zmava'ma nehaza vahe'mo'za fanane hugahazanagi, Ra Anumzamofonku'ma

amuhama hunemiza vahe'mo'za mopa erisanti haregahaze. ¹⁰ Hanki kefo zamavu'zmava'ma nehaza vahe'mo'za ame hu'za fanane hanagenka, anama mani'narega ome hakegahananagi, ozmagegosane. ¹¹ Hianagi zamavufagama anterami'za nemaniza vahe'mo'za ana mopa erisanti hare'za musena hu'za nemani'za, maka zampina knare hu'za manigahaze. ¹² Hagi kefo zamavu'zmava'ma nehaza vahe'mo'za Anumzamofoma amage'ma nentaza vahe'zmahenaku kea oku'a ananeki'za, zamarimpa ahenezmante'za, zamavera aninkreki nehaze. ¹³ Hianagi Ra Anumzamo'a ana vahekura zamagiza nere. Na'ankure zamagri'ma keagama huzmantesia knamo'a ne-eankino, Agra antahino keno hu'ne. ¹⁴ Hanki zamunte omane vahe'ene, vahe'ma havigema hu'za zamazeri havizama nehaza vahe'ene, fatgo avu'ava'ma nehaza vahe'mokizmia, kefo avu'ava'ma nehaza vahe'mo'za zamahe frinaku kazinknozmia hefiza zamazampi eneri'za, kevea atifi erinte'za atia eri krikrranepaze. ¹⁵ Hianagi zamagri'a bainati kazinknomo tumozmi reragino zamaregahie. Ana nehanigeno ati zmimo'a hantagigahie. ¹⁶ Fatgo avu'ava'ma nehuno osi'a feno ante'zamo'a, kefo avu'ava zanteti'ma feno vahe'ma mani nomani'zana agatere'ne. ¹⁷ Na'ankure kefo avu'ava'ma nehia vahe'mofo hihamua eri amne nehie. Hianagi Ra Anumzamo'a Agri amage'ma nentaza vahera kegava hunezmante. ¹⁸ Hagi hazenkezmima omne vahera Ra Anumzamo'a kegava hunezmantenige'za, mevavama hania zantamina

erisanti haregahaze. ¹⁹ Hanki havi knama esige'za ana vahe'mo'za zamagra zamagakura nosu'za, agatonto knafina rama'a ne'za ante'ne'za negahaze. ²⁰ Hianagi kefo avu'ava'ma nehaza vahe'mo'za frigahaze. Hanki Ra Anumzamofu ha' vahe'mo'za traza amosre'agna hu'nazanki'za, kumo ome amne hiankna hu'za fanane hugahaze. ²¹ Hagi kefo avu'ava'ma nehaza vahe'mo'za zagoa kehu'za erite'za, ete ome nozamize. Hianagi fatgo avu'ava'ma nehaza vahe'mo'za muse hu'za keonke zana vahera nezamize. ²² Hagi Ra Anumzamo'ma asomu'ma hunezmantesia vahe'mo'za mopa erisanti haregahazanagi, Ra Anumzamo'ma kazusima huzmantesia vahe'mo'za frigahaze. ²³ Fatgo zamavu'zmava'ma nehaza vahe'mo'zama vanoma nehazageno'a, Ra Anumzamo'a kegava hunezmanteno nomani'zazmigura musena nehie. ²⁴ Zamagra tanafa hugahazanagi, trakara hu'za zamasenja reofragegahaze. Na'ankure Ra Anumzamo'a zmazante zamazerigahie. ²⁵ Hanki mofavrereti'ma manime e'na menima ozafama emeroana, Ra Anumzamo'a fatgo avu'ava'ma nehie vahera amefira huomige, zamatregeno ana vahe'mofo mofavreramimo'za ne'zankura upara nehu'za memea hu'za vano osu'naze. ²⁶ Hanki fatgo zamavu'zmava'ma nehaza vahe'mo'za muse nehu'za keonke'zana vahera nezamizageno, mofavrezmia asomura hunezmante. ²⁷ Hanki kefo avu'ava zampinti'ma atrenka rukrahe hunka fatgo avu'ava zama hanunka, manivava hugahane. ²⁸ Na'ankure Ra Anumzamo'a fatgoma huno refkoma hu'zanku ave'nesiankino, fatgo

avu'ava'ma nehia vahera amefira huomigahie. Agra knare huno kegava huzmantenige'za knare hu'za manivava hugahaze. Hianagi kefo avu'ava'ma nehia vahe'mofo mofavreramina zamahefri hana hugahie. ²⁹ Fatgo avu'ava'ma nehaza vahe'mo'za mopa erisanti hare'za manivava hugahaze. ³⁰ Fatgo avu'ava'ma nehaza vahe'mokizmia, zmagipintira knare antahi'zana atineramigeno, knare avu'avazane kefo avu'avazanema keama'ma hu'zana rempi hunezmie. ³¹ Hagi Anumzamofa kasegemo zamagu'afina avite'neankino, hazaonkre Anumzamofona amage ante fatgo hugahaze. ³² Hagi kefo avu'ava'ma nehaza vahe'mo'za kafo ante'za mani'neza, fatgo avu'ava'ma nehaza vahe zamahe frinaku kankamunku nehakaze. ³³ Hianagi Ra Anumzamo'a zamatrenige'za ana kefo avu'ava'ma nehaza vahe'mo'za hunaku'ma nehazazana osuge, fatgo avu'ava'ma nehaza vahe'mo'zama keagare'ma oti'nageno'a, zamazahinke'za keagafina zamazeri zamagate'oregahaze. ³⁴ Ra Anumzamofonte kamentintia nehunka, Agri avu'avaza'ma'a nevararigeno, rankagi negamino mopa kamigahie. Hagi negesankeno kefo avu'ava'ma nehaza vahe'mo'za haviza hugahaze. ³⁵ Hagi vahe'ma ha'ma renezmantaza vahe'mo'za, knare mopafima zafamo'ma afovenge huno hageno mareriankna hu'za knare nomani'za nemanizage'na negoe. ³⁶ Hianagi mago'a knama evutege'na, ana kefo avu'ava'ene vahetmima nemanizare'ma ome koana, nomanizanki ko fanane nehaze. Ana'ma hazage'na ana

vahetminku'ma hake'na vanoma huana nozamage. ³⁷ Hagi tamage kege nehu'za, fatgo avu'vazama nehu'za, zamarimpa fruma hu'za nemaniza vahe'mokizmi naga'mo'za henka knare hugahaze. ³⁸ Hianagi kefo zamavu'zmava'ma nehaza vahera zamahe fanane hanige'za, vahera zamagripintira fore hu'za ovugahaze. ³⁹ Hianagi Ra Anumzamo'a Agri'ma amage'ma nentaza vahera zamagu'nevazino hazenke knafina kegava hunezmante. ⁴⁰ Ra Anumzamo'a fatgo avu'ava'zama nehaza vahera zamaza nehuno, kefo avu'ava'ma nehaza vahe'mokizmi zamazampintira zamagu'vazige'za so'e hu'za nemanize. Na'ankure zamagra Agripinka fra'maki'za nemanizagu anara nehie.

38

Ra Anumzamoka kamefira huonamio huno hunte'nea zagamere

¹ Ra Anumzamoka krimpa ahenantenka kea onasuge, karimpa ahenantenka knazana naminka nazeri fatgo hugera osuo! ² Keve ka'anura nahankeno nagu'a unefregenka, kazanura rentrako hunka narehapanetine. ³ Krimpama ahenantana zamo higena kria enerugeno, kuminimo higeno zaferinanimi'a natanegrie. ⁴ Na'ankure kumini'mo'a ome ra huno nazeri agateregeno, kna'amo'a narerari nehie. ⁵ Nagri'a neginagi navu'navazamo higeno hi'mnage namumo'a navufgarega tusiza huno hantohanto nehie. ⁶ Hagi tusi nata negrige'na pripri hu'na vano nehu'na, maka kna natagura

nehu'na zavi krafa nehue. ⁷ Hagi namagenamo'a
 teve ha' nehuno, natanegrige'na kri e'nerue.
⁸ Ana nehuno hankaveni'a omnege'na tusiza
 hu'na havizantfa hue. Nagu'afinti'ma natamagria
 zamo hige'na kragira neruna krafa nehue. ⁹ Ra
 Anumzamoka, nagri'ma navesi'a zana maka
 Kagra ko' kenka antahinka hu'nane. Kragi'ma
 nerua zana Kagra nentahine. ¹⁰ Tumo'nimo'a
 fakro fakro nehigeno, hankaveni'a nomanegeno,
 navuragamo'a asu nehie. ¹¹ Hagi zamavesima
 nezmantoa vahe'mo'zane, aronenimo'zanena,
 kri ruvazirante zankure hu'za koro nehu'za
 afete nemanize. Nagri'a koramo'zanena
 anagege nehu'za afete nemanize. ¹² Hagi ha'
 vahe'nimo'za nahenaku krifua anagintere
 nehazageno, nagri'ma nazeri haviza hunaku'ma
 nehaza vahe'mo'za, maka zupa nagri'ma
 nazeri havizama hanaza keagage retro
 nehaze. ¹³ Nagra agesa ankanire vahe'mo'ma
 nehiaza hu'na kea nontahi'na, kema nosia
 vahe'mo'ma agi'ma hamunkino maniaza hu'noe.
¹⁴ Nagra zamagesa ankanire vahe'mo'zama
 nehazaza hu'na kea nontahi'na kenona
 huozamante'noe. ¹⁵ Ra Anumzamoka kavega
 ante'na mani'noanki, Kagra kenona hunanto.
 Kagra Ra Anumzana nagri Anumza mani'nane.
¹⁶ Nagra amanage hu'na nunamuna hu'na
 kasmi'noe, zamatrege'za ha' vahe'nimo'za
 traka'ma hanua zankura nagizana nere'za
 musena osiho hu'na kasami'noe. ¹⁷ Na'ankure
 nata zamo'a mevava huno nevig'e'na, traka hu'za
 nehue. ¹⁸ Hianagi nagra kefo avu'ava'zama
 hu'noa zana huama hu'na negasami'na, tusi

nasunku nehue. ¹⁹ Hagi hankavemati'za ha'ma renenantaza ha' vahe'nimo'za agafa'a omne zante zamago ate'nenantaze. ²⁰ Knare avu'ava'ma huzmantorera kefo avu'ava zanu nona hunante'naze. Na'ankure nagra knare avu'ava nehuge'za ha'renantaze ²¹ Ra Anumzana nagri Ra Anumzamoka onatrege, natrenka afetera vugera osuo. ²² Ra Anumzana nagu'vazi Anumzamoka ame hunka eme nazahuo.

39

Devitima knama manino'ma vania knagu hunte'nea zagamere

¹ Nagra amanage hu'noe, kema hanufina kegava hu'ne'na, kema hu'zampintira kumira osugosue. Hagi Anumzamofoma amage'ma nontaza vahe'enema mani'nenuna, nagra nagira reaka hu'na kea osugosue. ² Hianagi nagra akohena nemanina knare zanku'ma nagima hamunki'na kema osu'na nemnugeno'a, narimpa kanazamo'a ome ra nehie. ³ Ana zanku'ma antahintahima nehugeno'a, narimpa he'zamo'a teve arukru nehigeno, kema hu'zanimu'a amare amare nehie. ⁴ Ra Anumzamoka nama'a kna ama mopafina mani'na vugahufi hunagesa huo. Mani'nama vanuankna hamprinka ketenka nasmio. Na'ankure knanimo'a tusiza huno aganere. ⁵ Hagi kasefa hu'nama manisuanakna eri atupa hankeno, Kagri kavurera amnezankna hie. Hagi vahe'motama tasimu'ma erita mani'zamo'a, magoke asimu'ma anteankna nehie. ⁶ Hagi tagra zagemo'ma rentegenno vahe'mofo ame'ma'ama fore'ma hiaza hu'nonankita, amuhoma huta

erituma hu'na zamo'a amnezankna nehie. Fenoma erituma nehuna zana, ina vahe'mo erisantiharegahie ontahineta eritru nehune. ⁷ Hianagi menina nagra izanku amuhara hugahue? Nagra Kagriteke namentintia nehu'na amuhara nehue. ⁸ Hanki kumini'afintira nagu'nevazinka, atregeno neginagi vahe'mo'za kizazokago kea huonanteho. ⁹ Hagi nagira hamunki'na kea osu manigahue. Na'ankure Kagra knazana nenamine. ¹⁰ Hianagi muse hugantoanki knazama nenamina zana hanki eritro. Hazenkema namina zamo'a tusiza huno nazeri haviza hianki natro. ¹¹ Hagi kumi'ma huna zante'ma knazama tamina zamo'a, zago'amo marerirfa zama antenonkeno hakanomo'ma tragama hiankna huno, tazeri haviza nehie. Maka vahe'mota tagra asimuma antegenoma vahe'mofo agipinti'ma amu'ma atiramiankna hu'nonankita, ame huta fanane hugahune. ¹² Ra Anumzamoka nunamuni'a antahio! Naza huogu'ma zavi'ma netoana krafageni'a antahinamio! Zavi'ma netogenoma navunumo'ma nehiazana keamnea osuo. Na'ankure nagra nantu vahekna hu'na ama mopafina e'noankina nagehemo'zama hu'nazaza hu'na ko fri'na vugahue. ¹³ Hanki karimpama ahenenantana zana natrege'na, osi'a knafina musena hu'na mani'nenana fri'na va'nenno.

40

Anumzamo'ma azahanigu Deviti kre'nea zagamere

¹ Hagi Ra Anumzamo'ma nzama hanigura akohe'na avega ante'na mani'nogeno, Agra

rukrahe hunamino zavi krafageni'a antahi'ne.
² Ana nehuno hapake kerifima antahintahi hakarema nehu'na mani'nogeno, navazu husga huno havere nantege'na, oti hankaveti'na oti'noe.
³ Ana huteno Anumzantimofu agima erisgama hu' zagamera kasefa zagame nami'ne. E'ina hu'neana vahe'mo'zama nege'za Ra Anumzamofoma koro'ma hunte'za Agrite'ma zamentintima hanagu anara hu'ne. ⁴ Hanki zamavufaga rama nehaza vahete'ene havi anumzante'ma zamentintima nehaza vahete'ma amema renti osuno, Ra Anumzamofonte'ma amentintima hanimo'a, agra muse hugahie. ⁵ Ra Anumzana nagri Anumzamoka vahe'mota osugaza rama'a hentofa zantamina hurante'nane. Tagri'ma hurante'nana zantmimofu antahintahima retro'ma huntanana antahintahia, rama'agino avompina krentegara osu'ne. Hanki mago vahe'mo'a kagri knara osu'ne. Kagrama hentofa zantmima hu'nana zantmima hampri'nama kesuana ana makara hampri vagoaregose.
⁶ Hagi kresramnama nevuno ofama hu zankura musena nosane. Hanki menina nazeri ani hanke'na antahi ani' hue. Kagra tevefima kre fananehu ofane kumi ofagura nantahinonkane.
⁷ Hagi anante nagra amanage hu'noe, ko, Nagra ama oe. Anumzamofu avontafepina nagriku hu'za avona krente'naze. ⁸ Anumzanimoka kagri kavesi'ma avaririzanku muse nehue. Hagi kasegeka'amo'a tumonifi me'ne. ⁹ Nagra fatgo kavukava zanka'a eri fraraoki'na, ana maka vaheka'a zamasami'noe. Ra Anumzamoka Kagra kenka antahinka hu'nane, nagra vahekura korora hu'na nagira hamunki'na

omani'noanki vahe'ma zmagu'ma vazi'nana zana huama hu'na vahe kevua zamasm'noe. ¹⁰ Hagi fatgo kavukava'ma nehana zanka'a nagu'afina atrogenora frakino omne'ne. Hanki kema hu'nana kere'ma amage'ma antenka vahe'ma zamagu'ma nevazina hihamuka'amofa agenkea eriamu hu'na zamasm'noe. Hagi tusi'a vahekrerfa mani'nazafi eriamu hu'na vagoore kavesi zamofone, kema hu'nana kere'ma otinenka ana zama hu kavukavara eriamu hu'na zamasm'noe. ¹¹ Hanki Ra Anumzamoka, kasunkuma hunenantana zana azeorinka, vagoore kaveszane ke'ma hunana kere'ma amage'ma antenka ana zama hu kavukava zamo'a kegava hunantegahie. ¹² Na'ankure ohampriga'a hazenkemo kaginante'ne. Hagi kuminimo'a agonagna huno marerineno kama vanuankana rehiza hunantenege'na, ke'zanku nehue. Ana nehu'na kuminimofo nampamo'a nasenifima me'nea zamo'a nazokamofa nampana azeri agateregeno hankaveni'a omne amne hie. ¹³ Hanki Ra Anumzamoka muse hugantoanki nagu'vazio! Ra Anumzamoka ame hunka enka nazahuo! ¹⁴ Hanki nagri'ma nahe frinaku'ma nehaza vahe'mo'za zamagazegu nehanageno antahintahizmimo'a savari hugahie. Hanki hazenkefima mani'noge'zama musema nehaza vahe'mo'za zamagazegu hugahaze. ¹⁵ Hanki hunte'za nagiza nere'za, ehe ehe! hu'zama nehaza vahe'mo'za zamagazegu hugahaze. ¹⁶ Hianagi maka vahe'mo'za Kagri'ma negavaririza vahe'mo'za Kagri'enenamuse hu'za manigahaze. Kagrama zamagu'mavazi'nana

zanku'ma zamave'nesia vahe'mo'za, Ra Anumzamo'a marerisa Anumza mani'ne hu'za hiho. ¹⁷ Hanki nagra namunte omne kne mani'noankino, Ra Anumzamo'a nagrikura agesa antahinami vava nehie. Ra Anumzanimoka Kagra nazahu ne'maninka nagu'vazi ne' mani'nananki, ame hunka eme nazahuo.

41

Deviti kre'nea zagamere

¹ Hagi zamunte omne vahe'ma knare zamavu'zmava'ma hunezmantaza vahera hazenke zama esigeno'a, Ra Anumzamo'a zamagu'vazigahie. ² Ra Anumzamo'a zamagu nevazino zamaza hanige'za ofri'za knare hu'za manigahaze. Ana nehuno zamaza hanige'za maka zama hanaza zamo'a knare nehinkeno, ha' vahe'mo'zama zamahenaku'ma hanageno'a zamagu'vazigahie. ³ Hagi krima erizageno'a, Ra Anumzamo'a kegava hunezmanteno krizmia zamazeri negnamare. ⁴ Ra Anumzamokarega nunamuna nehuanki kasunku hunantenka nazeri kanamaro. Na'ankure osuo hunkama hu'nana kumi hu'noe. ⁵ Hianagi ha' vahe'nimo'za huhaviza hunante'za amanage nehaze, nazupa frinigeta tagera akanigahune? ⁶ Zamagra ronenimo'zama nantu'ma ante'nantazankna hu'za nantu ante nante'nazanagi, havigema hu'za nagenkema hanagu nanekea emerite'za vu'za nagenkea ome hugantikma nehaze. ⁷ Zamago'ma ante'nenantaza vahe'mo'za nazeri haviza hu kea sumi sumi hu'za nanekea ananeki'za, ⁸ agra havi kri erino tafe'arera mase'neankino onkanamregosie

hu'za nehaze. ⁹ Knare aronenima mani'negena antahima nemina, magopinti'ma ne'zama neno'a vahe'mo'a amefi hunenamie. ¹⁰ Hianagi Ra Anumzamoka kasunku hunantenka krini'a nazeri knamrege'na ana vahera nona huzmantaneno. ¹¹ Nazama hananke'na ha' vahe'ni'ama ha'ma huzmagateresu'na, Kagra muse hunenantane hu'na hugahue. ¹² Ra Anumzamoka nagrira hazenkeni'a omne vahe mani'nogu hunka, maka zupa kavuga nantanke'na mani' vava nehue. ¹³ Ra Anumzana Israeli vahe Anumzana mani'nenomanivava Anumzanki, huta agi'a ahentesga hanune. Tamage, tamage.

42

Namba 2 zagame avontafere

Anumzamo zamaza hanigu Kora naga'mo'za hunte'naza zagamere

¹ Dia afumo'ma tinku'ma ave'nesigeno tinku'ma hakeno vanoma nehiaza hu'na Anumzamokagura nagu'amo'a tusiza huno ave'nesie. ² Tinku'ma ave'nesigenoma hiaza huno nagu'amo'a kasefa'ma huno mani'nea Anumzamofonkura nave'nesige'na nazupa agri avurera vugahue hu'na nagesa nentahue. ³ Hanine zagenena zavi'ma netogeno navunuma hiazamo'a nezaniagna nehigeno, ha' vahenimo'za hu'za kagri Anumzana iga mani'ne? hu'za hu'naze. ⁴ Hagi mono'ma hunegantona knare'ma, ko'ma vahe kevuma zamavare'na mono nonka'afima, nevuge'zama zagamema hu'za musenkasema nehaza zanku'ma nagesa

nentahugeno, tumonimo'a netanie. ⁵ Hagi nagafare nagu'amo'a kna nehie? Nagafare tumo'nimo'a netanege'na nasunkura nehue? Nagra Anumzamokare namentintia nehuanki'na, Agrama nagu'mavazi'nea zanku agia ahentesga hugahue. ⁶ Hagi menina nagu'amo'a kna nehianagi, Jodani mopafima ogantuma me'nea Hemoni agonare'ene Misa agonare mani'nea Anumzanimokagura nagesa antahimigahue. ⁷ Hagi hagerimo'ma knafu knafu'ma huno agasasama neriankna huno, knazamo'a eme narefinete. ⁸ Hianagi mago mago kna Ra Anumzamo'a vagoore avesizama'areti avesinentege'na, mago mago kenegera zagamera hu'na agia erisga nehu'na, nasimu'ma namige'nama mani'noa Anumzamofontega nunamuna nehue. ⁹ Hagi nagra Anumzanimofontega krafagea hu'na, Anumzanimoka hankave havegani'a mani'nananki, nahigenka kagerakaninentane? Na'a hige'za ha' vahlenimo'za nazeri haviza nehazage'na nasuzampina vano nehue? ¹⁰ Hagi maka kna ha' vahlenimo'zama kefinti'ma nazeri haviza nehu'za, iga Anumzanka'a mani'ne hu'zama haza zamo'a zaferinani'a ruhantagi'za rufuzafunepaze. ¹¹ Nahigeno nagu'amo'a kna huno evuneramie? Hagi nahige'na nasuzampina mani'na nevue? Nagra Anumzamo'ma nazama hanigu amuhara hugahue! Nagu'mavazi ne', Anumzanimofona mago'ene zagamera hu'na agia erisga hugahie.

Anumzamofo masane tamage naneke'agu hunte'nea zagamere

¹ Anumzanimoka nagrikura fatgo avu'ava'ane ne' mani'ne hunka vahepina huama huo. Kagri'ma nogavariri'za vahe'mo'zama keagama hunenantenagenka nagri kazika antenka nazahu keaga hunka naza huo. Fatgo huzama refkoma nosaza vahe'mo'zama havigema hunentazana nagu'vazio.

² Na'ankure Anumzanimoka Kagra fraki vihuni'a mani'nane. Nahigenka natufetranke'za, ha' vahe'mo'za knazana nenamizage'na nasuzampina vanovano nehue?

³ Hagi Anumzamoka masazanka'ane tamage nanekeka'a atregeno kana naveri huno navareno ruotge agonaka'a, Saionima nemanintega vino.

⁴ E'ina'ma hnanke'na kre sramanavu itaka'are vu'na nazeri musema nehana Anumzanimoka hapu zavena ome ahe'na zagamera hu'na kagia erisga hugahue.

⁵ Nahigeno nagu'amo'a kna huno evuneramie? Hagi nahige'na nasuzampina mani'na nevue? Nagra Anumzamo'ma nazama hanigu amuhara hugahue! Nagu'mavazi'nea Anumzanimofona mago'ene zagamera hu'na agia erisga hugahue.

44

Anumzamo'ma aza hanigu asunte'nea zagamere

¹ Anumzamoka korapa'ma nazano tagehe'mokizmima huzmante'nana zana ko tasamizageta tagra tagesafinti antahi'none.

² Kagra hihamu ka'anu ama mopafima nemaniza vahetmina zamahe kasope netrenka, ana

maka mopafina tagehemokizmia avimazavi hankreankna hanke'za mani'naze. Kagra ha' vahetia zamahe hana hanke'za ama mopa tagehe'moza eri'za knare hu'za mani'naze. ³Hagi tagehemo'za bainati kazintetira ha' vahera harahu zamagatere'za ama mopa e'ori'naze. Huge zamagra'a hankaverera hara hu zamagatore'naze. Hanki Kagri hankavenentake tamaga kazamo'ene kavugosafinti masamo zamaza hu'ne. Na'ankure Kagra kavesizmante'nane. ⁴Kagra nagri kini mani'nenka, nagri Anumzana mani'nane. Kagra hanke'za Israeli vahe'mo'za ha' vahe'zmia hara huzmagatere'naze. ⁵Kagri hankavefi ha' vahetia hara huta zamatufeta ometre emetre nehuta, Kagri kagireti ha'ma hurantenaku'ma hanaza vahera zamagofetura tagia reta zmare hapakopatigahune. ⁶Hagi atini'agura antahinomi'na, kazinknoni'amo'a nagu'vazigahie hu'na amuhara hunomue. ⁷Na'ankure Kagrake'za taza hanketa, ha' vahetia hara huzmagaterenone. E'ina hunka zamavaresrama hunerantaza vahera zamazeri zamagaze hu'nane. ⁸Hagi maka kna nanterantetima vuno kinagama omeseana Anumzamokagu akagia nereta, zamera huta kagia erisga nehune. ⁹Hagi menina kamefi huraminka tatrakeno ha' vahe'mo'za tazeri tagaze nehaze. Ko'ma ha'ma hunaku'ma nevunkenkama nehanaza hunka tagri'enena hatera vunka ome taza nosane. ¹⁰Hagi tatraketa ha' vahetimofo koro nefronke'za, ha' vahetimo'za rohu eme tre'za keonke'zantia e'nerize. ¹¹Hagi tatrakeno ha' vahe'mo'za

sipisipi afu'ma ahe'za nenaku'ma hiankna hu'za nerahe'za tahe panani hazageta vahe mopafina hazagreta umani emani hu'none. ¹² Hagi marerifa vaheka'a osi'a zagore atrenka mago zagoa retrora osu'nane. ¹³ Kagra tatranke'za tava'ontire'ma nemaniza vahe'mo'za kiza zokago kea hurante'naze. Hagi tagri mopa atupa ometre emetrema hu'neregama manigagi'naza vahe'mo'za kizazokago ke hunerante'za tazeri haviza nehaze. ¹⁴ Tagrira kizazokago ke hunteza tazeri retro hanke'za, zamagena neru'za kizazokago hurante'za tazeri fenkami netraze. ¹⁵ Maka kna hugeforenenantazage'na, tusi nagazegu nehu'na vano nehue. ¹⁶ Hagi maka kema antahunana kizazokago kema hurantaza kege nentahita, ha' vahetimo'zama nonama hu'za ha'ma hurante'zama nehaza zanke negone. ¹⁷ Kagrira tamefira hugamita huhagerafi huvempa keka'a ha'ontaginonanagi, ama ana zantamimo'a tagritera fore nehie. ¹⁸ Tagra Kagrira tamefira hunegamita kana atreta havi kampina ovu'none. ¹⁹ Hianagi takenka tazeri haviza hutranketa afi kramofo kumapi nemanune. Ana nehunka frizamoyo hanizanu refitenerantane. ²⁰ Hagi tagrama Anumzantimofo agima aheta mono'ma huontege, tazama rusuteta ru vahe' anumzamofontegama nunamuma hunesunkeno'a, ²¹ tamage huno anazana Anumzamo'a keno antahino hu'ne, na'ankure Anumzamo'a Agra tagu'afima oku'ma me'nea zana keno antahino hu'ne. ²² Hianagi Kagri vahe'ma mani'nona kazigati maka kna tagrira tahe nefrize. Sipisipi afu'ma ahenaku'ma

reharino'ma viaza hu'za rehari'za tavre'za nevaze ²³ Hagi Ra Anumzamoka otinka taza huo! Nahigenka kavura nevasane? Kagera kanirante vava osunka otinka tazahuo. ²⁴ Nahigenka ke'amnea nehane? Tatama tami'za tazeri havizama nehazageta knafima mani'nonana nahigenka Anumzamoka ontage vahe knara nehane? ²⁵ Tagu'amo'a tamino mopafi runtrako higeno, tavufgamo'a avugosaregati mopafi runtrako huno mase. ²⁶ Anumzantimoka otinka taza huo! Vagaore kavesizanku hunka nona hunka mizasenska tavro.

45

Anumzamofo kini tramo'a mevava hugahie huno hunte'nea zagamere

¹ Hentofa naneke antahintahifina nentahugeno, nagu'a nazeri otie. Ana hentofa nanekea kini neku hu'na kregahue. Na'ankure nagefunamo'a avoma kre'are'ma knarezantfama hu'naza vahe'mokizmi avo azotagna hu'ne. ² Kagra hentofa ne' mani'nane. Kagipinti fru huno knare nanekege atineramie. E'ina agafare Anumzamo'a asomura hugante vava nehie. ³ Hankavenentake ha' nera bainati kazinka'a erinka kasoparega atregeno uramino! Kagrira hihamu masaka'amo kagatere'nea ne' mani'nane. ⁴ Masanentake hihamuka'ane vunka tamage nanekegu'ma, agu'ama anteramino mani'zanku'ma, fatgoma huno refkoma hu avu'avakura hara ome huo. Ana nehunka atregeno, tamaga kzamo'a ruzahukna kaguvazana eri fore hinke'za keho.

⁵ Keveka'aramimo'a agona hu'neankino ha' vaheka'aramimofo tumotmina ahe neragie. Ana nehanke'za maka kokankoka vahe'mo'za kagafinke evuneramize. ⁶ Anumzamoka kini traka'amo'a mevava hugahie. Fatgoma huno keagama refkoma nehana azompaka'anu vahera kegava nehane. ⁷ Kagra fatgoma huno keagama refkoma hu zanku kave'nesinka kefo avu'avazankura kavesra nehane. E'ina hu'negu Anumzana Kagri Anumzamo'a masavena kasenifina tagino kazeri ruotgera nehuno, musezamofu masavena mago'a vahera rugatereno kagriteru rama'a taginte'ne. ⁸ Hagi merema nehazu mnazamofu mnama, aloveramofu mnama, kasiema nehazu zamofu mnamo'a kini vahe'mo'za za'za kukenaka'a eri mnanentake hugahie. Hagi elefanti aveteti'ma kinte'nazu kini vahe kumapina strini nofitema rente'za nehazu zavena nehe'za kazeri muse nehaze. ⁹ Kini ne'mofu mofa'nemoza agima me'nea anene mani'naze. Hagi kuini a'mo'a Ofiri kumateti eri'nazu golireti trohu'nazu zantaminu avasasea hu'neni kazantamaga kaziga oti'ne. ¹⁰ Kini netema maniku'ma nehana mofamoka kama kagesa antenenka antahio. Keonke zagaka'ama kumaka'aregama zamatrenka e'nanana kagekanio. ¹¹ Na'ankure negave'a, kini ne'mo'a hentofa kagikagonagura tusiza huno avesinegante. Agra ranka'a mani'negu ke'a antahiminka amage anto. ¹² Hagi Tairi kumateti musezantmina eri'za eme negami'nageno, feno vahe'mo'za kagrama zamazama hananku anara hugahaze. ¹³ Kini ne'mofu kasefa a'mo'a

goliretima avama renenia za'za kukenama huno esigeno'a, avasase'amo'a tampire tampire hugahie. ¹⁴ Ana avasase'ane kukena hunenige'za ana ara avre'za kini netera nevnageno avegama hu' mofaneramimo'za amage avarariza vugahaze. ¹⁵ Maka vahe'mo'za tusi musenkase nehu'za kini ne'mofo kumapina ufregahaze. ¹⁶ Kagri ne' mofavremo'za zmafaha'mozama hu'nazaza hu'za kini vahe manigahaze. Ana hanagenka ugagota kva vahe zamazeri otisanke'za, maka ama mopafina kva vahe manigahaze. ¹⁷ Nagra rankagi kamisuge'za forehu anante anante'ma hu'za esaza vahe'mo'za, kagrira antahinegamiza rankagia kamivava hu'za vugahaze.

46

Anumzamo'a fraki kumati mani'ne hu'za Kora mofavre naga'mo'za hunte'naza zagamere

¹ Anumzamo'a fraki vihutine hankavetine mani'neankino, hazenke knafima tazama hanigura maka kna retro huno nemanie. ² E'ina hu'neankita imima e'nerisigeno, agonamo'a ankariseno hageri amu'nompina vugahianagi, tagra korora osugahune. ³ Hagerimo'a kranto kranto huno agrenkera nehanigeno, agonamo'a imina erino eri tore vare hugahianagi, tagra korora osugosune. ⁴ Mago rantimo'a Anumzamofu rankumapi ufre efre huno Marerirfa Anumzamo'ma nemanifima me'nea zantamina tina zamino zamazeri muse nehie. ⁵ Anumzamo'a e'i ana rankumapi nemaniankino, vahe'mo'za eri havizana osugahaze. Nanterama komatanigeno'a Anumzamo'a ana kumara

kegava huno aza hugahie. ⁶ Ama mopafima me'nea kumatamimpintira vahe'ma azeri agore hu agasasaneranigeno, kini vahe'mo'zama kegavama hu'naza kumatmimo'zanena fuzafupe'za amane zankna hugahaze. Hanki Anumzamo'ma ageru'ma aranigeno'a, tevemo'ma plastikima temramra'ma hiaza huno ama mopamo'a maramra hu'ne. ⁷ Monafi sondia vahe'mokizmi Ra Anumzamo'a, tagrane magopi mani'ne. Jekopu Anumzamo'a tagrama frakita mani vihuti mani'ne. ⁸ Eta Ra Anumzamo'ma ruzahu avu'avazama hiazana eme keho. Agra ra hazenke'za avreno, eno ama mopa eri haviza hie. ⁹ Agra ama mopafina maka kaziga ha'ma nehaza zana eri netreno, atine, kevenena eri hantagi netreno, hankoramina teve hanavazino kre'ne. ¹⁰ Tamagra tamagasasana eri taganeta akoheta mani'neta, Nagrikura Anumza mani'ne huta antahiho. Kokankoka vahe'mo'za nagesga hu'za ra nagi nenamisageno, ama mopafi vahe'mo'zanena nagesga hu'za ra nagi namigahaze. ¹¹ Monafi sondia vahe'mokizmi Ra Anumzamo'a, tagrane mani'ne. Jekopu Anumzamo'a frakita mani vihuti mani'ne.

47

*Anumzamo'a maka vahe'mofo kini ne' mani'ne
huno hunte'nea zagamere*

¹ Mika kokankoka vahe'mota tamazana nehetma, ranke huta muse zagamera nehutma hentofa Anumzamofona agi'a erisga hiho.
² Na'ankure Marerirfa Ra Anumzamo'a knare zantfa hu'nea Anumza mani'neankita, kore

hunenteta agorga'a manigahune. Agra maka ama mopafina marerirfa kini ne' mani'nenno, ama mopa kegava hu'ne! ³ Agra kokankoka vahetmina hara huzmagatenereno ha' vahetia zamaheno eri tagafi atregeta, zamagofetu tagia reta oti'none. ⁴ Anumzamo'a erisantima haresuna zana, huhampirante'nea mopa tami'ne. Jekopu mofavreramima Anumzamo'ma avesima nezmantea naga'mo'zama erisantima nehare'za ra zamagima erisaza zantamina zami'ne. ⁵ Kezati'za muse zagamera nehazageno, Anumzamo'a mareri'ne. Hagi ufena nerazageno, Ra Anumzamo'a anagamua mareri'ne. ⁶ Zgame huta Anumzamofa agi'a erisga hiho. Zgame hiho. Zgame huta Kini netimofa agi'a erisga hiho! Zgame hiho. ⁷ Na'ankure Anumzamo'a Agra maka ama mopafi vahe Kini mani'ne. Zgame avontafepima krente'naza zagame huta agi'a erisga hiho. ⁸ Anumzamo'a manisga huno ruotge'ma hu'nea tra'are mani'nenno, kokankoka vahera kegava hunezmante. ⁹ Kokankoka vahe'mokizmi kva vahe'mo'za Abrahamu Anumzamofa naga'ene emeritru hu'naze. Na'ankure maka ama mopafi kini vahe'ma mani'nazana Anumzamofa vahe mani'naze. Ana hu'neanki'za Ra Anumzamofona agi'a ahentesga hugahaze.

48

Anumzamofa kuma Saioni ran kumaku asunte'nea zagamere

¹ Ra Anumzana marerisa ne' mani'neankita Anumzantimofa rankumapina, Agri ruotge

agonarera zagamera huta agi'a ahentesga hugahune. ² Hagi Anumzamofu agonamo'a, hentofaza huno mesga hu'nege'za, maka kokankoka vahe'mo'za kenakura tusi muse nehaze. Noti kaziga Saioni agonamo'a ruotge hu'neankino hentofaza hu'nea kini ne'mofu rankuma me'ne. ³ Anumzamo'a ana kumapi mani'neni, Agra'a ana kumapinti eama huno kegava nehie. ⁴ Hagi ama mopafi kini vahe'mo'za sondia vahezmi erimago hu'za ana rankumara hara hunte'naku urava'o nehaze. ⁵ Hianagi e'zama eme nege'za antri nehu'za, tusi zamagogogu nehu'za, atre'za koro fre'naze. ⁶ Zamagrira tusi zamahirahi nerege'za, a'nemo'za mofavre kasenteku zamatagu nehazankna hu'naze. ⁷ Hagi kagra zage hanati kazigati hanavenentake zaho'mo Tasisi kumate hanave venterami eri tagana taganu vazitreankna hunka kagra zamahe vagare'nane. ⁸ Ke'age nehazageta ana rankumamofu konarari'agura antahi'nonanagi, Monafi sondia vahe'mofu Ra Anumzamofu rankumara menina tagra tavufinti kone. E'i ana kumara tagri Anumzamofu rankumakino Agra'a kegava huvava hugahie. ⁹ Anumzamoka mono nonka'afina mani'neta, vagoore kavesizantetima kavesinerantana zankura tagesa antahinegamune. ¹⁰ Anumzamoka kagi'amo'ma hu'neaza hu'za zagame'ma hu'za kagima erisgama hanaza zamo'a mopa atumparega vuno eno hugahie. Hanavenentake tamaga kazampina fatgo avu'avazamo avite'ne. ¹¹ Saioni agonafi nemaniza veamo'za muse nehanage'za, Juda

mopafima me'nea kumatamimpima nemaniza vahe'mo'za muse hiho. Na'ankure Kagra fatgo kavukvama hunka vahe'ma refkoma nehana kavukava zanku anara hugahaze. ¹² Saioni rankumara kaginka negenka, mani'neza kuma'ma kegavama nehaza za'za nontamima kinte'nazana hamprinka ko. ¹³ Kuma vihuma kino mareri'nea zana negenka, fraki hankave vihu keginama hu'nea kumara ketenka, henkama efore hu'za esnaza vahera nanekea zamasmio. ¹⁴ Na'ankure Anumzamo'a e'inahu hu'ne. Agra manivava Anumzanti mani'neankino, Agra kegava hurante'nenigeta manime vuta ufrigahune.

49

Hazenke knafima koro osnuna zagame asunte'nea zagamere

¹ Naneke ma hanuana maka vahe'motma nentahinkeno, ama mopafima mani'naza maka vahe'mo'zanena zamagesa ante'za antahiho! ² Marerifa vahe'ma, tami vahe'ma, feno vahe'ma, tamunte omne vahe'motanena antahiho! ³ Na'ankure knare antahizamofo naneke huama nehugeno, nagu'afina antahi ama' hu antahizamo avite'ne. ⁴ Nagra knare antahizamofo nanekegu nagesa ante'na nentahi'na, hapu zavena nehe'na, fraki nanekea zagamepi erinte ama hu'na hugahue. ⁵ Hazenke zama ne-enigeno, ha' vahe'mo'zama eme navazagi kagisazana, nahanige'na nagra korora hugahue? ⁶ Zamagra fenoma ante'naza zante zamentintia nehu'za, tusi zago fenoma ante'naza

zanku zamavufa ra hu'za akagi neraze. ⁷ Tagra antahi'none, mago vahe'mo'a frizampintira agra'a aguravazige, Anumzamofona atesinteno nefuna ovaregosie. ⁸ Mago mizantetira vahe'mo'a atesino, agra'a agu'vazigara osu'ne. Na'ankure mago mizantetira mizaseno, ⁹ frino onkasarino, manivava huno ovugosie. ¹⁰ Nekonke'za knare antahi'zane vahe'mo'za nefrizageno, ana hukna hu'za neginagi vahe'ene antahintahi omne vahe'mo'zanena nefrizage'za, ru vahe'mo'za ana vahe'mokizmi fenozana erisanti neharaze. ¹¹ Ana vahe'mo'za rama'a mopa eri'za zamagia ana mopazmirera asamregahazanagi, matimati'mo'a manivava nonkumazmi senige'za fri'za matipi umanigahaze. ¹² Hagi fenoma antene'za ra zamagima e'neriza vahe'mofo zamagimo'a zazatera meno ovugahianki, zagagafama fri fananema nehiaza hu'za fri'nageno, zamagimo'a fanane hugahie. ¹³ Hagi knare vahe mani'none hu'za neginagi vahe'mo'zama nehaza vahete'ene, ana vahe'mokizmi kere'ma zamentintima nehaza vahete ama anazana fore hugahie. ¹⁴ Sipisipi afute kva vahe'mo, sipisipi afutami zamavareno viaza huno fri'zamo'a zamavareno fri vahe kumapina vugahie. Hagi nanteramasena Anumzamofa vahe'mo'za kegava huzmantegahaze. Kumazmimofona afete'are matipi zamavufagamo'a kasrigahie. ¹⁵ Hianagi nagrira nagu'nevazino, fri'zamofa hiamufintira Anumzamo'a eri varino navaregahie. ¹⁶ Hagi vahe'mo'zama rama'a fenoma ante'za hage'za mareneri'nageno, nonkumazmifima knare zantmimo'ma

avimatesia zankura korora osiho. ¹⁷ Na'ankure zamagrama frisageno'a, maka fenozamimo'a amanezankna hugahiankino, anazana eri'ne'za fri kantega ovugahaze. ¹⁸ Kasefama huno mani'nea knafina maka zampina knare hu'noe huno agra'a husga nehanigeno, vahe'mo'zanena humuse huntegahaze. ¹⁹ Hianagi ko'ma zamagehe'zama hu'nazaza hu'za fri'za nevu'za mago'enena zagemo'ma remsa hania masa onkegahaze. ²⁰ Hagi fenozmigu'ma akagima neraza vahe'mo'za zamagra maka zana antahi anira nosazanki'za, afukra friaza huza frigahaze.

50

Anumzamo Agra'a ke refko hu' nera mani'ne huno Asafu asunte'nea zagamere

¹ Ra Anumzana Hankavenentake Anumzamo'a zage fre kazigati evuno zage hanati kazigama evu'nea vahekrerfa ke huno eritru nehie. ² Saioni kumara konarari'amo agatererfa kuma me'neankino, Anumzamofu masazamo'a remsa huno ana kumapinti enevie. ³ Hagi Anumzantimo'ma esiana agasasane egahiankino, maka zama tefanene hu tevemo avuga neresigeno, tusi ununko netanifi Agra egahie. ⁴ Agra monane mopane ke hanigeno emanineke negesakeno, Agra'a vahera keaga huzmanteno refkoa huzmantegahie. ⁵ Nagri'ma zamagu'aretima hu'za namage'ma nente'za, huhagerafi huvempa kema hune'za nagrite'ma kresramnama vunenantaza vahera ke huge'za eho. ⁶ Hagi fatgoma huno refkoma hu avu'ava zama'agura monamo'a huama

hino. Na'ankure Anumzamo'a Agra'a keaga refko hugahie. ⁷ Nagrama kema hanuana vahe'nimota kama antahiho. Ama'na zantminte Israeli vahe'mota huama huramantegahue. Nagra Anumzankina, tamagri Anumza mani'noe! ⁸ Tamagrama kresramnama nevaza zantero, tevefima krefanane hu ofama nagri navugama erita evavama nehaza zantera keaga huoramantegahue. ⁹ Hianagi bulimakao afu keginaka'afinti ve bulimakao afukuro, meme afu keginaka'afinti ve meme afukura avrenka eno hu'na osugahue. ¹⁰ Na'ankure zafa avo'nompima maka zagagafama mani'nazana nagrike zaga manizageno, tauseni'a agonaramimpima mani'naza bulimakao afutamina nagrike suza mani'naze. ¹¹ Maka namaramima agonafima mani'nazana nagra kena antahina nehugeno, maka zagagafama hofa avo'nompima vanoma nehaza zagaramina nagrike suza mani'naze. ¹² Hanki Nagri'ma naga'ma tenige'na mago zankura tamagrira tamantahi onkegahue. Na'ankure maka zama ama mopafima me'neana, nagrike zantaminke me'naze. ¹³ Nagra ve bulimakao afutamimofa ame'ane, ve meme afu'tmimofa koranena nenofi? ¹⁴ Marerirfa Anumzamofonte'ma huvempama hu'nana naneke avaririnka, musenkase huno susu'ma hunte ofa Anumzamofona hunto. ¹⁵ Ana nehunka hazenkefima ufresunka nagritega nunamuna huge'na kaguvazinugenka, nagrira ra nagia namigahane. ¹⁶ Hianagi Anumzamo'a kefo zamavu'zmava'ma nehaza vahetminkura huno, tamagra kasegeni'a huamara hugara

osu'nazanki nagafare kasege'ni'a huamara nehuta, huhagerafi huvempa kea tamagitetikera nehaze? ¹⁷ Na'ankure tamazeri fatgoma nehugeta tamavesra hunenanteta, anankeni'a tamamefi humita amagera nontaze. ¹⁸ Musufa vahe'ma nezamageta, zamazeri rone nehuta, ru vahe'mofo aro, vema azeri savri huno anteno nemasea vahetamine tragoteta nemanize. ¹⁹ Tamagipina, kefo avu'avazama hu nanekemo avitegeno, havigema hu nanekege tamagefu'nafintira atineramie. ²⁰ Tamagra zogitru huta mani'neta tamafuhe'i zamagenke nehuta, neramarera nemofo neramafuna havige hunezmantaze. ²¹ E'ina'ma nehazage'na nege'na kema nosugeta, tamagrama antahi'zana, Anumzamo'a tagrikna hu'ne huta nehaze. Hianagi menina maka'zama hu'narera keaga huramantegahue. ²² Hagi Anumzamofonku'ma tamage'ma nekaniza vahe'mota kama antahiho, tamagu'a rukrahe huta tamasunku hiho. Hanki ana'ma osnazana, tamahe'na rutagana taganu vazitranena vahe'mo'za tamaza osugahaze. ²³ Hianagi muse nehuno susu hu ofama hunenantea vahe'mo'a, Anumzamo'na ra nagi nenamianki'na, agu'mavazisua kana averi hugahue.

51

Deviti'a kumi'agu asunku zagame hunte'nea zagamere

¹ Anumzamoka kasunku hunanto. Vagaore kavesizanteti rama'a kasunku hunantenka kumini'a eritre vagaro. ² Kefo avu'avazani'a sese hunantenka nazeri avusese nehunka, kumini'a

sese hunka nazeri agru huo. ³ Na'ankure nagra kumini'a ke'na antahi'na hu'nogeno, maka zupa antahintahifina eri'zana e'nerie. ⁴ Nagra kagri kea hantagi'na ha' renegante'na, kagri kavurera kumi hu'noe. E'ina hu'noankinka tamage hunantenka fatgo kazigati refko hunka keaga hunenantane. ⁵ Nagra kumi vahe mani'nogeno, nenrera'a kasenante'ne. Na'ankure nenrera arimpafina kumi vahe fore hu'noe. ⁶ Hianagi tamage nanekemo'a nagu'afi avitesie hunka Kagra kagesa nentahine. E'ina hu'negu knare antahi'zana nagu'afina rempi hunamio. ⁷ Kumini'a hisopureti nazeri agru huge'na agru ha'nenno. Sese hunka nazeri agru huge'na, efeke hamponkna ha'nenno. ⁸ Hanki ete musenkasema huno mani avu'ava zana namigeno, nazeri fru hina ruhantaginana zaferinanimio'za musenkasena hiho. ⁹ Kumini'arera ketenka omaninka, kefo avu'avazani'a eri atre vagarenanto. ¹⁰ Anumzamoka agru tumo nagu'afina tro hunenantenka, Kagrite'ma mani fatgoma hu'za nagu'afina antenanto. ¹¹ Kavugatira nahenati notrenka, Ruotge Avamuka'a nagu'afintira eri otro. ¹² Nagu'ma vazinkenama musema hunoakna musezana ete nenaminka, keka'ama antahino kavariri navesi zana namio. ¹³ E'ina'ma hananke'na kefo avu'ava'ma nehaza vahe'mokizmia kagri kavukavara rempi huzminuge'za, kumi vahe'mo'za ete kagrite rukrahe hu'za egahaze. ¹⁴ Vahe'ma ahe'na korama eri tagi'noa kumira Anumzamoka apase nenantenka nagu'vazio. Ana'ma hananke'na fatgo kavukvama hunka

nagu'ma vazi'nana zankura, musenkasena hu'na zagamera hugahue. ¹⁵ Ra Anumzamoka nagira eri o'za huge'na, zagamera hu'na kagia ahentesga ha'neni. ¹⁶ Na'ankure nagra ofa erina eme kamigahuanagi, kre fanene hu ofagura musena nosane. Kagrite'ma kre fananehu ofama kresramnama vuzankura kave'nosie. ¹⁷ Hagi kagri'ma kavenesia kresramna vu ofa, e'i avufgama anteramino mani'zane. Avufgama anteramino nemanino agua'retima huno asunku'ma huno agu'ama rukrahema nehia vahera Anumzamoka kamefira hunomine. ¹⁸ Kagra kavesintenka Saioni rankumara azeri knare nehunka, Jerusalemi kumamofa kagina huo. ¹⁹ Ana hutenka mani fatgo hu'za mani'neza fatgo avu'ava'ma hu'za kresramna vanaza ofagi, tevefima kre fananehu ofagi, maka zagagafama tevefi krefanene hu ofagi, bulimakao afu'ma kresramna vu itaka'arema kresramna vu ofagura musena hugahane.

52

Doekima hu'nea havi avu'ava zanteku huno Deviti asunte'nea zagamere

¹ Hankavenentake sondia ne'moka, nagafare kefo avu'ava zama nehana zankura kavufga rana nehane? Hagi Anumzamo'ma fatgo avu'ava'ma huno, maka knafima nevia zankura kagesa nontahino? ² Maka kna vahe'ma azeri haviza hu antahintahige retro nehunka, havigema huno vahe'ma azeri haviza hu kemo'a asane'nea resagna huno kagipintira atineramie. ³ Kagra knare avu'ava zama kavesi nentana

avamena agaterenka, havi avu'ava'zana kavesi nentanka, tamage kema kavesi nentanama'a agaterenka havigea kavesinentane. ⁴ Knare osu keka'aretima vahe'ma azeri havizama hu'zanku kavenesia nekinka, kagra havige ne' mani'nane! ⁵ Hianagi Anumzamo'a kahe fanane hanigenka, ru'enena omanigosane. Traza vatitreankna huno nonkuma ka'afintira Anumzamo'a kavazu hutrena ru'enena mopafina omanigahane. ⁶ Fatgo avu'ava'ma nehaza vahe'mo'za nege'za, zamagogogu hugahaze. Anazama kagrite'ma fore'ma hanige'za negenu'za, kagiza nere'za amanage hugahaze, ⁷ Anumzamo naza hugahie huno antahi omino, agra'a hankavegu'ma nehia hankavenentake sondia nete'ma fore'ma nehia zana keho. Agra'a feno zante amentinti nehuno, ru vahe'mokizmia hanavetino kefo avu'ava'zana huzmante vava huno nevie. ⁸ Hianagi nagra Anumzamofu nompina olivi zafamo trette huno amu mareankna nehuanki'na, maka kna Anumzamofu vagaore avesizante namentintia huvava hugahue. ⁹ Knare kavukva'ma hunantana zankura Anumzamoka kagia erisga huvava nehu'na, Kagri kagire amuhara hugahue. Na'ankure Kagri kagimo'a, knare zantfa hu'ne. Kavariri fatgoma nehaza vahe'mokizmi zamavufi kagri kagia nagra husga hugahue.

53

Maka vahera kumi vaheke'za mani'none huno Deviti asunte'nea zagamere

¹ Neginagi vahe'mo'zage zamagu'afina anagea nehaze, Anumzana omani'ne hu'za

zamagesa nentahize. E'inahu vahera ko haviza hu'nazanki'za zamavuzmava zmimo'a kefoza hu'neankino, magomo'e huno knare avu'ava zana nosie. ² Anumzamo'a monafinka mani'nenno, iza ama' antahi'zane vahera ama mopafina mani'nenno, agrira amagera nentefi huno, kefenkma atreno maka vahera nerage. ³ Hianagi magore huno fatgo vahera omani'neanki maka vahe'mota Anumzamofona tamagena humita havizantfa hu'none. Maka vahe'ma mani'nonana kefo avu'avake hunkeno mago'mo'e huno fatgo vahera omani'ne. ⁴ Ana kefo zamavu'zmavama nehaza vahe'mo'za magore hu'za rempia hu'za nontahize. Hanki bretima neankna hu'za nagri vahera zamahe'za nene'za Anumzamofontegama nunamuma hu'zankura zamagesa nontahize. ⁵ Hianagi tusi koro nehu'za zamagogofena, ha'ma regantesaza vahe'mokizmi zaferina herafi atregahie. E'ina hanigenka kagra zamazeri zamagaze hugahane. Na'ankure Anumzamo'a amagena huzmino zamatregahie. ⁶ Hanki Israeli vahe'ma zamagu'ma vazisia ne'mo'a Saioni agonaregati'ma esiana knare hugahie. Hanki Anumzamo'ma Agra vahe'ama eme zamavareno ete zamazeri so'ema hanigeno'a, Jekopu naga'mo'za ranke hu'za zagamera hu'za musena nehanageno, Israeli vahe'mo'zanena musenkase hugahaze.

54

Ra Anumzamo kegava hunantegahie huno asunte'nea zagamere

¹ Anumzamoka kagika'areti nagu'vazio. Hankanaveka'anu nagu'a refko hunka nago.
² Anumzanimoka nunamu keni'a nentahinka, nanekema kasami'nuana kagesa antenka antahio. ³ Na'ankure ru vahe'ma emani vahe'mo'za hara renantazageno, vahe'ma zamazeri havizama nehaza vahe'mo'za nahefri'za nehaze. Zamagra Anumzamofonkura antahi amaneza nesaze. ⁴ Hianagi Anumzamo nazahu nera mani'ne. Agra naza hige'na kasefa hu'na mani'noe. ⁵ Ha' vahe'nimo'zama nagri'ma nazeri haviza hu antahintahima retro'ma haza antahintahia, eri arukrahe hugeno, zamagri zamazeri haviza hino. Anumzamoka kagrama huvempama hunana kante antenka, ana vahetmina zamahe fri vagarege'za mago'enenama mopafina omaniho. ⁶ Ra Anumzamoka nagra navesite kagritero ofa kresramna nevu'na, susu hugante'na kagia ahentesga hugahue. Na'ankure e'inama hanuana knare hu'ne!
⁷ Na'ankure kagra maka hazenkenifintira nagu nevazinka, nazahanke'na ha' vahe'ni'aramina hara huzmagatere'noe.

55

Rone kamo kavreno kanazana ome kamigahie huno hunte'nea zagamere

¹ Anumzamoka naza huogu'ma nunamuma nehuana antahi amnea osunka, kagesa antenka nunamuni'a antahinamio. ² Muse hugantoanki, nunamuni'a antahinaminka kenona hunanto. Na'ankure hazenke zamo'a nazeri haviza hige'na kragira nerue. ³ Ha'

vahe'nimo'za kezati'za rankege hunenantage'za,
 kefo avu'ava'ma nehaza vahe'mo'za knazana
 nami'za nazeri haviza nehu'za, tusi zamarimpa
 ahenenantaze. ⁴ E'ina'ma hazageno'a
 tumonimo'a faki faki nehige'na, fri'zankura
 tusi koro nehue. ⁵ Tusi nagogo nefegeno
 koro zamo'ene nahirahimo'enena nahenefrie.
⁶ Maho namamofoma hiaza hunora nagekona
 huntenege'na, hare'na knare'ma hu'nea
 kumatega mani fruma hu'na umanuresina knare
 hisine. ⁷ Nagra hare'na afete'are ka'ma kokampi
 umanuresine. ⁸ Ununkomo'ene zasi komo'ma
 hifintira, nagra ame hu'na fre'na afete ome
 fraki'na umanuresine. ⁹ Ra Anumzamoka ha'
 vahe'nimozama retroma nehaza antahintahia
 eri savri hunka eri haviza huo. Na'ankure
 vahe'ma azeri haviza hu avu'avazane, mani fru
 osu avu'avaza rankumapina negoe. ¹⁰ Hanine
 zagenena ku'ma keginare vano nehu'za kegava
 nehazanagi, tamage huno ha'zamo'ene kefo
 avu'ava zamo'a kuma agu'afina avite'ne.
¹¹ Maka zama eri haviza hu'zamo ama ana
 kuma amu'nompina megeno, vahe'ma knama
 amino azeri haviza nehuno, revatgama hu
 avu'avazamo'a ana kumara atreno novie. ¹² Ha'
 vahe'nimozama huhaviza hunantazasina, nagra
 ana zankura nagesa ontahuresine. Hagi ha'
 vahe'nimo'zama ha'ma eme hunantazaresina
 nagra frakuresine. ¹³ Hianagi mago avamente'ma
 manino'a ne'moka anara nehane. Kagra
 nagri'enema tagrotenka vanoma nehankenana,
 kagena antahina hu'noa navate ronanimoka
 anara nehane. ¹⁴ Korapara kagranena knare huta
 magopi nemanita, tusi'a vahe'ma Anumzamofa

mono nontegama ne vazafima magokama nevu'ane. ¹⁵ Ha' vahe'ni'aramina atregeno antri hanazaza huno fri'zamo'a zmavatera ne-enkeno, matimo'a zamavu aga zmasgahu nakarino. Na'ankure kefo zamavu'zmava zamo'a zamagu'afina nonkino me'ne. ¹⁶ Hianagi Anumzamofonku kea hanugeno, Ra Anumzamo'a nagu'vazigahie. ¹⁷ Knazani'afima mani'nenan nanterane, feru'ene kenage'enena krafagea nehugeno, Ra Anumzamo'a antahi nenamie. ¹⁸ Ra ha'pintira nahokeno ete nagu'vazine. Na'ankure rama'a ha' vahe maninazafinti naza huno navare'ne. ¹⁹ Anumzana Agra kini mani vava huno ne-ea kini ne'mo krafage'ni'a antahino zamazeri haviza hugahie. Na'ankure nagri ha' vahe'mo'za zamavu'zmavara rukrahera osuge, Anumzamofona korora huntegera nosaze. ²⁰ Ronenimo'a ha'renanteno huhagerafi huvempagema hu'neana ruhanentagie. ²¹ Naneke'amo'a batagna huno frufu hu'neanagi, agu'afina ha'ma hu'za me'ne. Naneke'amo'a olivi masavenkna huno frufu hu'neanagi, agu'afina asane bainati kazi me'ne. ²² Knazanka'a Ra Anumzamofa azampi antegeno, Agra knazanka'a e'nerino kazeri hanavetino. Agra fatgo zamavu'zmava'ma nehaza vahera zamatreng'e'za regarari'za trakara osugahaze. ²³ Hianagi Anumzamoka kefo zamavu'zmava'ma nehaza vahera zamavarenka hazenke zamofa kerifi zamatrengahane. Hagi vahe'ma zamahe nefri'za vahe'mo'zane krunagema nehaza vahe'mo'zanena kasefa vahe mani'ne'za ko frigahaze. Hianagi nagra Kagriku antahi

negamina namentintia nehue.

56

Filistia vahe'mo'za Gati kumate Deviti azeri-naku nehazageno asunte'nea zagamere

¹ Anumzamoka kasunku hunanto, na'ankure vahe'mo'za nahe'za narotago nehaze. Maka kna ha' vahenimo'za nazeri havizantfa nehaze. ² Ha' vahe'nimo'za nahenaku knane knanena nenavararizageno, zamavufaga ra hanaza kazigati rama'a vahe'mo'za hara eme hunenantaze. ³ Hianagi koro'ma hanua knafina, Kagrite namentintia hugahue. ⁴ Anumzamo'ma huvempama hu'nea kere namentintia nehu'na, agia ahentesga nehue. Nagra Anumzamofonte namentintia nehuankina, na'a hanigena amne vahetfankura korora hugahue? ⁵ Nagrama hua nanekea zamagra eri rukrahe nehu'za, nazeri haviza hunaku maka kna mani'ne'za oku'a kea retro nehaze. ⁶ Nagri'ma nazeri'za nahenakura, oku'a kea retro hu'za kafona ante'za vano nehu'za, kama vano nehuge'za zamavunte'za nenagaze. ⁷ Kefo zamavu'zmavama nehaza vahera ana zamavu'zmava zantera Anumzamoka zamahe kasopetro. Hanki krimpa ahezmantenka zamazeri fenkami atro. ⁸ Kagra nasunku'ma huazana kavuntenka nenagane. Zavi'ma atogeno'ma navunu'ma hia navunura tafempi afinte'nane. Magoke magoke zana avompi krente'nane. ⁹ Hagi nazama huogu'ma Kagritegama kezamati'nena, ha' vahe'nimo'za koro fregahaze. E'ina'ma hanage'na Anumzamoka nagri kaziga mani'nenka hara

huzmantane hu'na ke'na antahi'na hugahue. ¹⁰ Anumzamo'ma Agrama huvempama hu'nantenegu nentahina agi'a ahentesga hugahue. Tamage Ra Anumzamokama huhampri nante'nana zanku kagia erisga hugahue. ¹¹ Nagra Anumzamokare namentintia nehuanki, na'a hanige'na amne vahetfankura korora hugahue. Agra vahetfa mani'neanki na'a hunantegahie? ¹² Nagra huvempama hu'noa kere amage ante'na, nazama nehana zantera susu hu'na ofa hugantegahue. ¹³ Na'ankure Kagra fri zampintira nagu'nevazinka, tanafa'ma hu'za nehugenka naza hu'nane. E'ina hu'nananki'na menina amne Anumzamoka kavuga vano nehu'na, vahe'moma asimu'ma erino nemia tavitera vano hugahue.

57

Solinku'ma kore'ma huno Deviti'a freno nevuno asunte'nea zagamere

¹ Kasunku hunanto Anumzamoka, kasunku hunanto! Na'ankure nagra kagripinka franekue. Kagri kagekonamofo turunapinka, fraki'na mani'nenugeno hazenke zamo'a nagateregahie. ² Marerirfa Anumzamofontega nagra kezatigahue. Maka zama hugantegahuema nehia zama hunenantea Anumzamofontega kezanatigahue. ³ Agra monafinkati nazama hu'zana atresigeno eme nagura vazigahie. Nagofetu'ma zamagama re'za vonoma nehaza vahetmina, Agra zamazeri zamagaze hugahie. Anumzamo'a monafinkati vagaore avesizane, hugahuema hu'neaza huno navesinte vava hugahie. ⁴ Nagra vahe'ma

amprizama nenaza laioniramimofu amu'nozmifi mani'noe. Zamave'mo'ma keve kna higeno zamagefu'namo'ma bainati kazinkno kna'ma hu'nea vahetmimofu amu'nompi mani'noe. ⁵ Anumzamoka monaramina agaterenka onagamu mani'nananki'za husga hugantegahaze. Hagi masazankamo'a maka ama mopafina remsa hanie. ⁶ Ha' vahe'nimo'za nahenaku krifu anagi ante'nazageno nagu'amo'a kna nehie. Hanki kama vu'na e'nama nehufina, keru kafinte'nazanagi, ana kerifina zamagra'a tamigahaze. ⁷ Anumzamoka nagu'areti hu'na nagra kagriteru namentinti nehue. Nagra nagu'areti namentinti nehuanki'na zagamera hu'na kagia ahentesga hugahue. ⁸ Nagu'amoka otio. Hapu zavenane laeri zavenanena oti'o. Nagra zagame hu'na ko'matu'zana azeri otigahue. ⁹ Nagra maka kokankoka vahe'mokizmi zamavufina, susu hu'na kagia ahentesga hugahue. Maka vahe'mokizmi zamavufina zagamera hu'na Anumzamoka kagia ahentesga hugahue. ¹⁰ Anumzamoka vagaore kavesizamo'a, monagna huno amunagamu marenerigeno, hugahuema hu'nana kema amage antenka hu kavukava zamo'a amunagamu marerino hampona avako nehie. ¹¹ Anumzamoka monaramina mani agaterenka onagamu mani'nanankino, vahe'mo'za husga hunegante'nageno masazanka'amo'a maka ama mopafina remsa hugahie.

58

Anumzamo'a ama mopafi vahera refko hugahie

huno asunte'nea zagamere

¹ Tamagra kva vahe'mota fatgo naneke keagafina nehazafi? Tamagra fatgo huta vahe'mokizmi naneke refko nehazo? ² I'o, tamagu'afina kefozama hu antahintahi retro nehuta, ama mopafi vahera zamazeri haviza nehaze. ³ Kefo avu'ava'ma nehaza vahe'mo'za anama kasezmantetegati kana atre'za hazagre'naze. Zamagra nezamarera ku'afi mani'neza havigege hu'naze. ⁴ Nanekema hazazamo'a ha' osifavemofo avu'ataga zankna nehige'za, nanekema nehazazamo'a kobra osifavemo'ma hiaza hu'za kea nontahize. ⁵ Hagi zavenama aheno osifavema azeri oti vahe'mo'a, eri ruzahu ruzahu huno'ma zavenama ahesiana, ana osifavemo'a ontahigosie. ⁶ Anumzamoka zamagipima me'nea zamavera rutafrī atro. Ra Anumzamoka ama ana laioniramimofo zamagemazampa rutavegri atro. ⁷ Zamatrege'za hagege mopafima tima tagiramino ome fananema hiaza hu'za fanene hiho. Zamatregeno zamazampima eri'naza kevemofo agonazmimo'a atupaseho. ⁸ Zamatrege'za koravemo'za hagage hazaza huge, osi mofavremo ana kasentegeno zage onkeneno friankna hiho. ⁹ Kavoramimo'ma tevere'ma me'nenō amuhoma nehia kna'a agetereno, Anumzamo'a ame huno kasefa vahero, ozafa tavavaro, kefo avu'ava'ma nehaza vahera ruharafi hutregahie. ¹⁰ Anumzamofoma amage'ma nentaza vahe'ma, kefo avu'ava'ma nehaza vahe'mo'zama zamazeri havizama nehaza zante'ma Anumzamo'za nonama huno zamahenige'za, kenu'za muse hugahaze.

Anumzamofoma amage'ma nentaza vahe'mo'za kefo zamavu'zamava'ma nehaza vahe'mofo korampi zamagia sese hugahaze. ¹¹ Ana hanige'za maka vahe'mo'za amanage hugahaze, tamage huno fatgo avu'ava'ma nehaza vahe'mokizmia mizazmia me'neankino, fatgo huno'ma ama mopafima vahe'ma refkoma nehia Anumzana mani'ne hu'za hugahaze.

59

Ha' vaheni'amofa zamazampinti Anumzamoka nagu'vazio huno Deviti asunte'nea zagamere

¹ Anumzamoka ha' vahe'nimofo zamazampintira nagu'vazio. Ha' vahe'nimo'zama ha' hunantenaku'ma neazana nahokenka navre frakio. ² Kefo avu'ava'ma nehaza vahe'mokizmi zamazampintira nazeri vario. Vahe korama eri taginaku'ma, tusi'zama hu'za vanoma nehaza vahe'mokizmi zamazampintira nagu'vazio. ³ Hagi ko, zamagra nagri nahenaku kafona nentaze. Ra Anumzamoka nagra havizana hunozmante'na kumira osu'noanagi, hankavenentake ha' vahe'mo'za nahenaku antahintahia retro nehaze. ⁴ Nagra mago havizana osu'noanagi, ha' hunante'naku zamaga re'za ome retrotra nehaze. Otio! Otinka nagri'ma hunante'zama nehaza zana negenka naza huo. ⁵ Ra Anumzana Monafi sondia vahe'mokizmi Anumzamoka, Kagra Israeli vahe Anumza mani'nananki, otinka kokankoka vahe'mo'zama ha'ma hunante'zama nehaza vahera knazana zaminka zamazeri haviza huo. Kefo avu'ava'ma nehaza vahe'tmina, kasunkura huozamanto. ⁶ Ana maka kinaga e'za rankumamofona megia

eme kagigagi nehu'za, kramo'ma nehiaza hu'za hauhau hu'za vano nehaze. ⁷ Knare osu nanekema zamagipinti'ma atineramiana ko. Zamagipinti'ma rukahama huneramia nanekemo'a, bainati kazi atiramiankna nehige'za amanage nehaze, Iza naneketia antahigahie hu'za nehaze. ⁸ Hianagi Ra Anumzamoka Kagra ana vahetmina zamagiza nerenka, kokankoka vahetamina kiza zokago ke hunezmantane. ⁹ Kagra nagri hankave mani'nananki'na, Kagri kavega mani'nenugenka, nagura vazigahane. Na'ankure Kagra Anumzamoka, nagrama frakisua hankave vihuni'a mani'nane. ¹⁰ Nagri Anumzamo'a vagaore avesizama'areti avesima nenantea ne'mo naza hugahie. Anumzamo'a naza hanige'na, ha' vaheni'a zamage fenkaminete'na zamagiza regahue. ¹¹ Ra Anumzamoka zamahe ofrio. Na'ankure nagri vahe'mo'za ame'ama hu'za rempima huzmina zana zamagenekanize. Hanki hihamukanu zamahe arava hege'za zamarena reho. Ra Anumzamoka kagra tagri hanko mani'ne. ¹² Hagi ana vahe'mo'za kumi'mo avite kege nehaze. Na'ankure ana vahe'mokizmi zamagipina kefo kemo avite'ne. Zamatregeno zamagri zamavufaga ra hu'zamo, zamazeri haviza hino. Na'ankure zamagra kazusi ke nehu'za, krunage nehaze. ¹³ Ra Anumzamoka karimpa ahe zamantenka zamahe fanane huo! Zamahe fanane huge'za magore hu'za omaniho. E'ina huge'za maka ama mopafi vahe'mo'za Anumzamo'a Jekopu naga Israeli vahera kegava huzmantene hu'za ke'za antahi'za hiho. ¹⁴ Ana maka kinaga

ete e'za rankumamofona megia eme kagigagi nehu'za, kramo'ma nehiaza hu'za, hauhau hu'za vano nehaze. ¹⁵ Zamagra ne'zankura maka kaziga hake'za vano nehu'za, ne'zama nezamu'ma nosu'za hauhau hu'za vano nehaze. ¹⁶ Hianagi nagra hihamukagura zagamera hugahue. Maka nanterana vagaore kavesizankura zagamera hu'na kagia ahentesga hugahue. Na'ankure Kagra knazampima mani'nogenka, nagrira fraki kuma'ene naguvazi kuma'ene mani'nane. ¹⁷ Anumzamoka kagra hankavenia mani'nananki'na, Kagritega zagamera hu'na kagia ahentesga hugahue. Kagra fraki kumani'a mani'nanankinka, vagaore kavesizanka'aretima kavesima nenantana Anumza mani'nane.

60

Anumzamo ha' vahetia agianu rehapatigahie huno hunte'nea zagamere

¹ Anumzamoka, Kagra ko tatrenka tazeri haviza hu'nane. Kagra krimpa aherantenka e'nananki, menina ete tazeri knare huo! ² Kagra mopa eri tore hankeno, kekora reno vuno eno hu'neanki, ana kekokana renagro. Na'ankure mopamo'a zahufa kazara nehie. ³ Kagra vaheka'amofona rama'a knaza zaminka zamazeri amuho nehunka, hankave waini taminketa neteta neginagia hu'none. ⁴ Hianagi Kagri'ma koro'ma hugante'za, mono'ma hunegantaza vahera kevemo'ma zamavate'ma zamazeri zankura, mago avameza zami'nane. ⁵ Kagrama kavesima nezmantana vahera zamagu'vazio. Tamaga kazanu taguranevazinka, nunamuntia

antahiraminka kenona huranto. ⁶ Ruotge hu'nea konarari'afi mani'nenno, ama huvempa kea hu'ne. Nagra muse hu'na Sekemu kumara eri fako nehu'na, Sukoti agupomofu zaza'ane upa'anena mesarimi hu'na kegahue. ⁷ Giliati'ene Manase'enena nagri suza mani'na'e. Hanki Efraemi'a Nagri fetori manigeno, Juda'a kini azompani'a mani'ne. ⁸ Hianagi Moapu mopa tima nefroa zuompani'a me'nigeno, Edomu mopare nagia anona zafitregahue. Filistia vahera hara huzamagatere'na musena hugahue. ⁹ Hagi iza navareno hankavenentake vihuma me'nea rankumapina vugahie? Iza navareno Edomu moparera vugahie? ¹⁰ Anumzamoka Kagra tatrenka kamefira huneramino? Kagra ru'enena tagri sondia vahetaminena hatera ovugosano? ¹¹ Taza hunka ha' vahetia hara huzmanto, na'ankure vahetfamo'za taza hugara osu'naze. ¹² Anumzamofu hanavereti ha' vahetia hara huzmagateregahune. Agra ha' vahetia zamahetreteno, zamagofetu agia reno zamare hapatigahie.

61

Havere navrenka vuo huno hunte'nea zagamere

¹ Anumzamoka krafage'ni'a antahio! Nunamu ke'ni'a kagesa antenka antahio! ² Nagu'amo'ma knama nehige'na, mopa atumparegati naza huogura Kagritega kezana netue. Hanki navrenka hanavenentake havere marerige'na nagu'vazi'nenno. ³ Na'ankure Kagra fraki kuma'ni'a mani'nenka, vihuni'a mani'nanankino

ha' vahe'nimo'za eme onahegahaze. ⁴ Natrege'na mono nonka'afi manivava hu'na va'нено. Natrege'na Kagri kagekonafinka fraki'na mani'нено. ⁵ Na'ankure huvempama hu'noana, Anumzamoka antahi'nane. Kagri kagigu'ma koro'ma hu'za mono'ma hugantesaza vahe'mo'za erisanti haregahaze hunkama ante'nana zana nagri nami'nane. ⁶ Kini ne'mofona mago'ene kafuzage'a erinte za'za huo. Vahe'ma forehu anante anante'ma huno'ma vania knafina, agra zazate ama mopafina manigahie. ⁷ Agra Anumzamofu avuga kini manivava huno vugahie. Hagi vagaore kavesi zamo'ene hugahuema hu'nana zama hu kavukva zamo'a, kegava huntessie. ⁸ Ana'ma hananke'na knane knanena kagia ahentesga huvava hugahue hu'nama huvempama hu'noa kante antena, zagamera hu'na kagia ahentesga hugahue.

62

Nagra kagrikuke kavegante'noe huno hunte'nea zagamere

¹ Anumzamo'ma nazama hanigu akohe'na avegante'na mani'noe. Na'ankure Agrake nagura nevazie. ² Agrake'za fraki haveni'a mani'нено, nagura nevazie. Agra fraki kumani'a mani'neankina, antria hu'na korora osugahue. ³ Hago zazate ana maka vahe'mota magoke nera hara renteta aze. Ana maka'moza nahenaku nenavararize. Zamagrama nagazana nagra fraguvazirami have keginagna huge, kuraramperami keginagna hu'noe. ⁴ Nagrama ra nagima eri'na mani'noa zana, nazeri fenkami

atrenaku, keaga retro nehaze. Havigema hu'za nagri'ma nazeri havizama hu'nakura tusi muse nehaze. Navurera husga hunenantazanagi, zamagu'afina antahi haviza hunenantaze. ⁵ Anumzamoka Kagrikuke nagra akohe'na kavega ante'na mani'noe. Nagra Kagripi amuha zani'a ante'noe. ⁶ Agrake'zage framaki hanave havenia mani'neankino, kegava hunenanteno nagu'nevazie. Agra fraki kumani'a mani'neankina, antria hu'na korora osugahue. ⁷ Anumzamoke nagura nevazino, ra nagia nenamie. Anumzamoke havegani'ane, fraki kumani'anena mani'ne. ⁸ Vahe'nimota Agriteke maka kna tamentintia hiho. Maka tamagu'a Agriteke anteho, na'ankure Agra fraki kumati mani'ne. ⁹ Agima me'nea vahetetima vuno agima omane vahetema vu'neana, mago asimuma hutreankna hu'nazankiza, zamagra amne'za Agri avufina mani'naze. Hanki zamagra'a knama sigelire'ma erinte'zama kesazana, knazmimo'a zahomofu kna'a agateore'ne. ¹⁰ Vahe'ma knama amino azeri havizama hu'zamo naza hugahie hunka kamentintina huge, musufamase avu'avazamo naza hugahie hunka amuhara huge, fenzanka'amo'ma ome rama huno nevanigenka, ana zamo'a naza hugahie hunka amuhara osuo. ¹¹ Anumzamo'ma magoke kema nehige'na, tare zanku nagesa nentahue. Hihamu hankaveane Anumza mani'nane. ¹² Vagaore kavesizana, Ra Anumzamoka Kagri suzane. Tamage hunka maka vahera refko huzmantenka nazanoma hu'nenarera nona hunka mizana zamigahane.

63

Tinku'ma hiaza huno Anumzamokagura nave'nesie huno asunte'nea zagamere

¹ Anumzamoka Kagra nagri Anumza mani'nanke'na, Kagrikura tusiza hu'na nehakroe. Nagu'amo'a tinku'ma hiaza huno, Kagrikura navenesigeno, tima omne hagage kokampina navufgamo'a Kagrikura tusiza nehie. ² Hagi Anumzamoka mono nonka'afina negage'na hihamukane, masaka'anena ke'noe. ³ Na'ankure vagaore kavesi zamo'a asimuma erino mani'zana agatere'neanki'na, kagi'a erisga huvava hugahue. ⁴ Nasimuma erina mani'na vanua knafina, kagi'a ahentesga nehu'na, nazana erisga hu'nenana Kagritega nunamuna hugahue. ⁵ Knare ne'zama naminke'na nenamura nehuankina, muse zagame hu'na husga hugantegahue. ⁶ Hanki tafenire'ma masenena, kagrikura nagesa nentahi'na, ana kenagera nunamuna nehu'na, nagesa antahigami'noe. ⁷ Na'ankure Kagra nazahu ne' mani'nananki'na, nagra Kagri kagekonamofu turunapinka mani'nenana muse zagamera hugahue. ⁸ Anumzamoka nagu'amo'a Kagrite tragoteno me'negenka, tamaga kanzu nazeri antrako nehane. ⁹ Hianagi nagri'ma nahenaku'ma nehaza vahe'mo'za haviza hugahaze. Zamagra friza fri vahe'mofo kumapi amefenkame mopa agu'a uramigahaze. ¹⁰ Bainati kazinknonu zamahe vagaresigeno, ahi kramo'za zamavufaga'a traga hu'za negahaze. ¹¹ Hianagi kini ne'mo'na Anumzamokagu musena hugahue. Anumzamofonte'ma zamentintima

nehaza vahe'mo'za, Anumzamofona agia erisga nehanageno, havigema nehaza vahe'mo'za kea osugahaze.

64

Anumzamo aza hanigu vahe'mo nunamu hu'nea zagamere

¹ Anumzamoka narimpa havizama hu'zama huama'ma hanuana antahi nenaminka, ha' vahe'mo'za nazeri koro ke nehu'za, nahe'za nehazanki kegava hunanto. ² Kefo avu'ava'ma nehaza vahe'mo'za nahenaku nanekea oku'a retro nehazanki, nazeri franekinka, ranke rankema nehaza kefo vahe'mokizmi zamavureti nazeri frakio. ³ Zamagra ana vahe'mo'za bainati kazin kume'ma kaneaza hu'za, zamagefu'na kumera negane'za, nanekema hazana, kefo nanekezmimo'a kevema ahetrzaza nehaze. ⁴ Ana vahe'mo'za kafoma ante'nazafinti kezmina omane vahera kevea nezmahe'za, antri hazaza hu'za korora osu tusiza hu'za hara hunezmantaze. ⁵ Zamagra kefo avu'avazama hunakura kea huganti hugama hu'za zamazeri hankaveneti'za, vahe krifuma anagintesagura oku'a keaga retro nehaze. Ana nehu'za mago vahe'mo'a onketfa hugahie hu'za nehaze. ⁶ Hazenkema hu' kema retroma nehu'za amanage nehaze, knare antahintahirafa retro hune hu'za nehaze. Vahe'mofo agu'afine antahintahifina vahe'ma revatga huzamoke avite'neankinka keamara osutfu hugahane. ⁷ Hianagi Anumzamo'a Agra kevea zamahe'nige'za, ame hu'za hazenkea erigahaze. ⁸ Zamagri zamagefu'namo zamazeri haviza hanige'za,

zamesaza vahe'mo'za zamagena neru'za, kiza zokago kea huzmantegahaze. ⁹ Ana hanige'za maka vahe'mo'za koro nehu'za, Anumzamo'ma kaguvazama hia zankura huama nehu'za, maka avu'avazama eri fore'ma hia zamofonkura antahintahia huvava hugahaze. ¹⁰ Anumzamofoma amage'ma nentaza vahe'mo'za Ra Anumzamofonkura muse nehu'za, Agri turunapinka manigahaze. Ana nehanage'za fatgo zamavuzmava'ma nehaza vahe'mo'za, muse nehu'za agi'a ahentesga hugahaze.

65

Anumzamoka tagu'vazi ne' mani'nane huno asunte'nea zagamere

¹ Anumzamoka Saioni kumapi rankagia kamigahaze. Na'ano hugantegahune hutama ko'ma huvempama hu'nenuna zana tagra hugahune ² Na'ankure Kagra nunamuntia nentahine. Maka vahera Kagriteke egahune. ³ Tagrama kumitigu'ma antahintahi hakarema nehunkenka, Kagra ana kumitia apaser-ante'nane. ⁴ Kagrama huhamprintankeno, ruotge kuma tava'onte'ma nemanimo'a rama'a asomu erigahie. Kagri mono nompinka rama'a knare zane musezamo'enena avite'ne. ⁵ Anumzamoka knarezantfa huno mareri agatere'nea fatgo kavukva hunka nunamuntia antahinka nona hunerantane. Anumzamoka Kagra tagu'vazi ne' mani'nane. Ama mopafi vahe'mo'za Kagrite zamentintia nehazageno, hagerimpima afetema nemaniza vahe'mo'zanena kagrite zamentintia nehaze. ⁶ Kagra hihamukareti agonaramina

trohunentenka, hanaveka'a eri ama hu'nane.
⁷ Hagerimo'ma krantokrantomu nehigenka,
Kagra azeri arava nehenka, kokankoka mopafi
vahe'mo'zama rankerankema nehazagenka,
zamazeri neraganane. ⁸ Mopa atumparegama
nemaniza vahe'mo'za ruzahu ruzahu kaguva
zantamima erifore'ma hana zankura, ama zana,
naza fore nehie hu'za nehu'za, tusi zamagogogu
nehaze. Zage hanati kazigati vuno zage fre
kazigama umani emanima nehaza vahe'mo'za
Kagrama hana kavukvamo zamagu'a zamazeri
otige'za tusi muse nehaze. ⁹ Kagra mopa kegava
hunenska tina aminkeno mopamo'a knare huno
masavena nehie. Anumzamoka maka kaziga
tina tro hunte'nanankino, knare huno witi
tina amigeno, rama'a raga renente. Na'ankure
Kagraka'a e'inahu huno fore hugahie hunka retro
hunte'nana kante anteno efore nehie. ¹⁰ Hozama
rekorinte mopafina Kagra kora atrankeno
runteno mopa ru fru nehuno, mopa ragana
runezmane. Ana nehunka ata kora atrankeno
hozafina runtegeno ne'zamo'a knarera huno
nehageno rama'a ne'zana renente. ¹¹ Kagra mago
kafufina asomu hurantankeno, ne'zamo'a tusi'za
huno amponere. Ana nehigeno kama vanoma
hupinena nezamo'a aviteno herafineramie.
¹² Hanki ka'ma kokampina trazamo'a hageno
tetre nehigeno, agonaramimpina trazamo'a
tetre huno refitegeno musena nehaze.
¹³ Hanki krahopina sipisipi afutamine, meme
afutamimo'za avitazageno, agupofina witi
hozamo'a fankanino kankmuna omnetfa
hu'ne. Ana maka trazama nenaza afu'mozane

hozamozanena ranke hu'za zagamera hu'za musena nehaze.

66

Anumzamofo susu hunte'za agi'a ahentesga hu'naza zagamere

¹ Maka ama mopafima nemaniza vahe'mota, ranke huta zagamera huta Anumzamofona agi'a ahentesga hiho! ² Anumzana Agri agimofo hihamu hanave'agura zagamera huta agi'a ahentesga hiho. Zgame huta Agri hihamu masazama'agura erinte ama hiho! ³ Anumzamofonkura, kavukva zamo'a knare zantfa huno mareri agatere'ne hiho. Ha' vahekamo'za Kagri hihamu hankavegura koro hu'za zamavufaga eri anaki'za Kagritega neaze. ⁴ Maka ama mopafima me'nea zantamimo'za monora hunegante'za, zagamera hu'za kagia ahentsga hugahaze. Zgamera hu'za rankagia ahentesga hugahaze. ⁵ Eta tagri Anumzamo'ma hu'nea zana eme keho. Agra knarezantfa huno mareri agatere'nea avu'avaza, maka vahe'mofontera eri fore hu'ne. ⁶ Hagerina eripapa hugantigama huno kana erifore hige'za, Agri vahe'mo'za hagege mopafi rugitagiz kantukaziga vu'naze. Hanki Agriku musena hanune. ⁷ Agra kinia mani'nenno tusi'a hihamu'areti kegava huvava hugahie. Agra kokankoka vahera maka kna avua anteno nezmageanki, ke ontahi vahe'mo'za hara reonteho. ⁸ Maka ama mopafi vahe'mota Anumzamofona husga huntého. Ranke huta agia ahentesga nehinke'za vahe'mo'za

antahiho. ⁹ Tagrama fri'zankura kegava huneranteno, tatregeta regaririta trakara nosune. ¹⁰ Anumzantimoka rerahenka knazana neraminka, silvama tevefi kreno eri agru hiaza hunka tazeri agru hane. ¹¹ Kagra kuko atrenka tazeritenka, tagumpina tusi'a knaza eri kofirantane. ¹² Ana nehunka tatrankeno tasenia refrage mafrage hu'za karisia eri'za vano hu'naze. Tevefine timpinena ufre'nonanagi, ete Kagra tavrenka anketa maka'zama ampore'nea mopafi one. ¹³ Nagra tevefi kre fanane hu ofa mono nonka'afi eme hugantegahue. Nagrama huvempama hu'noa zantera ofa hugahue. ¹⁴ Nagra ra hazenkefi mani'nena, huvempa hu'noe. ¹⁵ E'ina agafare tevefima kre fanene hu ofa Kagritega hugahue. Nagra so'ema hu'nenia agonknaza ohari ve sipisipi afu kresramna vanugeno knare mna nevina, Nagra ve bulimakao afu'ene meme afu'enena Kagritega kresrama vanugeno, knare mna marerigahie. ¹⁶ Anumzamofoma koro'ma hunentaza vahe'mota, eta eme nentahinke'na Anumzamo'ma hunante'nea zana tamasmi'neni. ¹⁷ Nazama hinogura Agritega krafa nehu'na, nanekema hufina agi'a erisga huvava nehue. ¹⁸ Nagrama kumini'ama huama'ma osuresina, Ra Anumzamo'a nunamunkeni'a ontahisine. ¹⁹ Hianagi Anumzamo'a nunamuni'a nentahie. Nunamunkeni'a agesa anteno nentahie. ²⁰ Anumzamo'a ra agi erisie. Agra nunamuni'a antahi annea nosuno vaga ore avesizama'a nagritetira eri notre.

67

Anumzamofonku'ma muse huno hu zagamere

¹ Anumzamoka kasunku hurantenka asomura hunerantenka, kavugosa rukrahe huramigeno kavugosafinti masamo'a remsa huranteno taza hino. ² E'ina hanankeno Kagri kavukva zana ama mopafi vahe'mo'za ke'za antahi'za nehanageno, tagu'ma vazi'nana hihamu hankaveka'a kokankoka vahe'mo'za ke'za antahi'za hugahaze. ³ Anumzamoka, vahe'mo'za kagia ahentesga hugahaze. Tamage maka kokankoka vahe'mo'za zagamera hu'za kagia ahentesga hugahaze. ⁴ Ana maka vahe'ma ama mopafima nemaniza vahe'mo'za musena nehu'za, zagamera hu'za kagia ahentsga hugahaze. Na'ankure Kagra mago avamenteke fatgo hunka vahera refko henezmantenka, kokankoka vahera antahintahia zaminka zamazeri fatgo nehane. ⁵ Maka vahe'mo'za zagamera hu'za Ra Anumzamoka kagia erisga hugahaze. Ana maka vahe'mo'za kagia erisga hugahaze. ⁶ Ana hanageno ama mopafina ne'zamo'a amporegahie. Anumzana tagri Anumzamo'a rama'a zampi asomura hunerante. ⁷ Anumzamo'a asomu hurantesie! E'ina'ma hanigeno'a ana maka vahe'ma ama mopafima mani'naza vahe'mo'za Anumzamofona korora hunteseze.

68

Anumzamo'a ha' vahe'aramina zamahe panani hugahie huno asunte'nea zagamere

¹ Anumzamo'a otino ha' vahe'aramina zamahe panani hanie! Agri'ma avesrama hunentaza atre'za koro fregahaze. ² Zamahe panani huge'za zahomo tevegu eri amne huno vuno eno nehiaza hu'za freho. Fukimo tevemofu tava'onte me'neni temramra hiaza hu'za, kefo avu'ava'ma nehaza vahe'mo'za Anumzamofu avuga haviza hu'za fanene hugahaze! ³ Hianagi fatgo zamavu'zamava'ma nehu'za Anumzamofu amage'ma nentaza vahe'mo'za muse hiho. Anumzamofu vahe'mo'za agri avuga musena nehanageno, musezamo'a zamagripina avitegahie. ⁴ Anumzamofu zagamera huta agi'a ahentesga hiho. Hampo agofetu'ma manino vanoma nehia nera husga hunteho. Agi'a Ra Anumzanki, Agri avuga musena hiho. ⁵ Agra megusa mofavre'ramimofu nezmafa mani'ne. Agra ruotge hu'nea kuma'afi mani'neni, kento a'neramina zmahonekea Anumza mani'ne. ⁶ Hagi agraku'ma nemanina vahera Anumzamo'a naga'afi avrentegeni muse huni nemanigeni, kinama hu'zama mani'naza vahera kinafintira zamavare fegi atrege'za musena hu'za knare nomani'zana nemanize. Hianagi Agri'ma ha'ma renentaza vahera, hagege hu'nea mopafi zamantege'za nemanize. ⁷ Anumzamoka vaheka'ama Isipiti'ma zamavare atineraminka kagia kazana ometre eme atre hunka masi hunka hagege kokampima vugota hunka nevankeni, ⁸ mopamo'a momi'momi huni tore'vare hu'ne. Anama hu'neana Anumzamoka kavuga, Sainai agonamofu Anumzane, Israeli vahe Anumzamoka kavuga anara hu'ne. ⁹ Kagri vahe'mo'zama erisantiharesaze hunkama

hagege mopama zami'nana mopafina, rama'a ko atrankeno, kora aru kasri kasri huno maka zana azeri kasefa hu'ne. ¹⁰ Ana mopafi na Kagri vahera mani'nazagenka, ne'zana eri amporenampinti zamunte omne vahera ne'zana Anumzamoka zami'nane. ¹¹ Ra Anumzamo'ma vahe'mokizmima nanekema zamasamigeno, rama'a a'neramimo'za ana nanekea eri'za vu'za ome huama hu'naze. ¹² Hagi Kini vahe'mo'zane sondia vahe'mo'zanena maka zana atre'za fre'naze. Zamagra makazana atre'za frazage'za Israeli a'neramimo'za fenozmia refko hu'za eri'naze. ¹³ Hagi zamagra sipisipi afu kevufima nemasageno, maho namamofa agekonare silvanu rekamarenteankna nehuno, azokate golinu rekamrenteankna huno refitegahie. ¹⁴ Hankavenentake Anumzamo'ma ana mopafima nemaniza kini vahe'ma zamahe panani'ma hu'neana, Zalmoni agonafi ko'mopa ko tamiankna huno zamahe panani hu'ne. ¹⁵ Basani agonaramina tusinasi agonarami me'ne. Basania rama'a agonaramina amunagamu mareri'nea agonarami me'naze. ¹⁶ Rama'a agona morusama me'nea agonamoka, nagafare Saioni agonare'ma Anumzamo'ma manigahue hu'noma hu'nea agonagura, kegasanea nehane? Tamagerfa huno Ra Anumzamo'a ana agonare manivava huno vugahie. ¹⁷ Ohampriga'a karisiramimo'za Ra Anumzamofona azeri kaginte'nazageno, Saioni agonaretira eno ruotgema hu'nea mono noma'afinka emareri'ne. ¹⁸ Hanki mareri agatere'nea agonafima marenerinka kina vahetmina zamavarenka marerinke'za, ke ontahi vahe'mo'zane ha'ma renegantaza

vahe'mo'zanena musezana negamize. Menina
 Ra Anumzamo'a tagrane ama agonafina
 manigahie hu'za nehaze. ¹⁹ Ra Anumzana
 tagu'vazi Anumzamofona husga huntaho!
 Na'ankure maka knafina knazantia Agra
 e'nerie. ²⁰ Tagri Anumzana Agra tagu'ma
 nevazia Anumza mani'ne. Mareri agatere'nea
 Ra Anumzamo frizampintira tagura nevazie.
²¹ Hianagi Anumzamo'a ha' vahe'aramina
 zamaseni rurako huno nezmaheno, ke
 ontahi kefo zamavu'zmava zanku'ma
 zmavesinente'za ana zamavu'zmavama
 nevaririza vahera Anumzamo'a zamaseni
 zaferina rufuzafupegahie. ²² Ra Anumzamo'a
 huno, ha' vahera Basanitira zamavare'na
 egahue. Amefenkame hageri agu'atira
 zamavare'na marerigahue. ²³ Ana hanugeta
 nagri vahe'mota zamagri korampi tamagia
 sese nehanageno, kraramimo'zanena ana
 korana negahaze. ²⁴ Anumzamoka Kagri
 nagara rama'amo'za erimpi hu'za neazage'za
 vahe'mo'za nezamagaze. Nagri Anumzana
 kini'nimoka naga'mo'za mono nOMPI erimpi
 hu'za unefraze. ²⁵ Zgame'ma hu' vahe'mo'za
 vugota hazageno, zamefira ruzahu ruzahu
 zavenama ahe vahetami vazageno, amu'nompina
 mofa'nemo'za nevu'za nase'nasepana nehaze.
²⁶ Maka Israeli vahe'ma atruma hanafina zagame
 huta Anumzamofona agi'a hentesga hiho. Israeli
 vahe'ma zamasimu'ma nezmia Ra Anumzana
 Zgame huta agi'a husga huntaho. ²⁷ Osi nagara
 Benzameni naga'mo'za egote'za azageno,
 rama'a kva vahetmina Juda nagapinti azageno,

maka Zebuluni nagapinti'ene Naftali nagapinti
maka kva vahetmina e'naze. ²⁸ Anumzamoka
hihamuka'a eriamu huo. Anumzamoka
korapa'ma hu'nanaza hunka hankaveka'a eriamu
huo. ²⁹ Ama mopafi kini vahe'mo'za musezana
eri'za mono nonka'afi Jerusalemi egahaze.
³⁰ Kokankokama ha' vahetamima mani'naza
vahetamina zamazeri korio. Varoza trazampima
afi zagama mani'naza zagaramina zamazeri
korio. Bulimakao afutmima hankavezmi omne
bulimakao anenta taminema mani'nazana
zamazeri korio. Zamazeri arava hege'za silvane
golinena eri'za takisia eme kamiho. Hanki
ha'ma hu'zanku'ma musema nehaza vahetmina,
zamahe panani huge'za freho. ³¹ Isipi vahe'mo'za
zago'amo'ma marerirfa haveramina eri'za
musezana eme negamisageno, Itiopia vahe'mo'za
eme kepri hu'za monora hugantegahaze. ³² Ama
mopafima kini vahe'mo'zama kegavama hu'naza
kumatamimpima nemaniza vahe'mota, Ra
Anumzamofona zagamera huta agia ahentesga
hiho. ³³ Korapa'ma me'nea hampomoyo
agofetu'ma manino'ma harenoma enevia
nera zagamera huta agia erisga hiho. Kema
nehigeno'a, agerumo'a monagemo'ma hiaza
nehie. ³⁴ Anumzamoyo hihamu hankavemoyo
agi agenkea, huama hunka vahera zamasamio.
Agri konarari masa'amo'a Israeli vahera
remsa hunezmantegenyo, anami monafina
hankave'amo'a avite'ne. ³⁵ Anumzamo'a mono
noma'afina knare'zanfta huno mareri agatereno
mani'ne. Israeli vahe Anumzamo Agra'a vahera
hihamu hankavea nezmiankino, Agrake'za ragia
erisie!

69

Anumzamoka nagu'vazio huno asunte'nea zagamere

¹ Anumzamoka nagu'vazio! Na'ankure timo'a ti hageno nazeri nakrinaku nanankente ne-e.

² Hapapi hampakanena amefenkame supa'nenan uneramue. Hankave moparera nagia noroe. Timu'nompi nevugeno timo'a nazeri nakari'za nehie.

³ Anumzamoka nazama huogu'ma kavegama ante'nenan krafagema nehua zamo'a hanaveni'a omanegeno, navurgamo'a nata negrigeno, nanankemo'a tusiza huno hagege nehie.

⁴ Mago haviza osu'nore'ma zamavaresrama hunenantaza vahe'mo'za nanumpima me'nea nazokara agatere'za rama'a vahe mani'naze.

Anumzamoka hankavenentake ha' vahe'mo'za havige hu'za nahe fri'za nehaze. Havige hu'za e'ori'noa zankura musufa se'nananki tamio hu'za nehaze.

⁵ Anumzamoka Kagra neginagi navu'nava zani'a kenka antahinka hu'nanankino, maka kumini'amo'a Kagri kavurera frara okigahie.

⁶ Ra Anumzamoka kagrite'ma zamentintima nehaza vahera, nagrama hanua navu'navazamo'a zamazeri zamagazea osino. Monafi sondia vahe'mofo

Ra Anumzamoka nagrama hanua navu'nava zantera zamazeri fenkamia ozmatro. Kagra Israeli vahe Anumza mani'nane.

⁷ Na'ankure nagra Kagri kamagama antoa zanku kiza zokago kea hunenantazage'na nagazegura nehue. Ana nehugeno nazeri havizama nehaza zamo'a tusiza huno nazeri nagaze nehie.

⁸ Nafuhemo'zama nenage'za keno antahino'ma

osu'nea vahe'ma agatereankna nehaze. Hagi nenrera mofavremo'za rurega vahe'ma huntazankna zamavu'zamava hunenantaze. ⁹ Mono nonka'agu'ma navesintoa zamo'a nagu'afina tevema reankna nehigeno, Kagri'ma kazeri havizama hu kema nehaza vahe'mo'za nagri'enena nazeri haviza hu naneke nehaze. ¹⁰ Hanki zavi'ma nete'na kave'ma a'o'ma hu'na nunanuma nehuge'za vahe'mo'za, nazeri haviza hu ke nehaze. ¹¹ Nasunku'ma nehu'na nasunku kukenama huazankura, zamagra hunte'za kiza zokago ke hazage'na nagra zamagri zamavurera kiza zokago zankna hue. ¹² Hanki rankuma kafante'ma nemaniza kva vahe'mo'za nagenke nehazageno, akatima nene'za neginagima nehaza vahe'mo'za nazeri haviza hu zagame asunenantaze. ¹³ Hianagi menina kna fatgo'are nunamuna nehuanki Anumzamoka vagaore kavesi zanteti kavesinantenka nona hunantenka tamage hunka nagu'vazio. ¹⁴ Anumzamoka hapapintira navresga hunka nagu'vazio. Hanki natrege'na hapapina hampakanena uofra'nenno. Zamavresrama hunenantaza vahe'mokizmi zamazampintira nagu nevazinka, tirupintira navazuhuti atro. ¹⁵ Anumzamoka natregeno tima hageno esiantimo'a eme narefi otege, tirumo'a nazeri onakrige, fri vahe kerimo'a nasgahu onakrino. ¹⁶ Ra Anumzamoka nunamuni'a antahinaminka nona hunanto, na'ankure vagaore kavesizamo'a knarezantfa hu'ne. ¹⁷ Anumzamoka eri'za vahekamo'na kamefira huonaminka, ame hunka nunamu keni'a antahinka nona hunanto. Na'ankure ra hazenkefi mani'noe! ¹⁸ Anumzamoka

erava'o hunka nahokenka nagu'vazio. Ha' vahe'ni'amofa zamazampintira ete nagu'vazinka navro. ¹⁹ Ha' vahe'nimo'zama nazeri nagaze nehu'za, hu haviza hunenante'za, nagima eri havizama nehaza zana Kagra ko kenka antahinka hu'nane. ²⁰ Kema nenasuza nazeri havizama haza zamo'a, tumoni'a netanege'na kria enerue. Hagi zamasunku hunantegahazafi hu'nama hua vahe'mo'za zamasunkura hunonantaze. ²¹ Hagi ne'zama namigazana netre'za, vahe'ma ahe nefriaza avu'atgaza nezampina ante'za nenami'za, tinku'ma navenesige'za tima namigazana atre'za, aka waini nami'naze. ²² Atregeno rama'a ne'zama retro hunte'za nenaza zamo'a, kukonkna huno zamazeri haviza nehina, maka zampima knare'ma hu'za nemaniza nomanizamo'a krifugna huno zamazeri haviza hino. ²³ Atregeno zamavumo'a asu nehinke'za, zamavua onkeho. Ana nehunka zamatregeno zamavufagafina hanavezmia omne amne nehina, hanavezmia atreme vu'za ome haviza hiho. ²⁴ Kagra karimpa ahe'zamantenka zamazeri haviza nehunka, tusi'a kasivazi nezmantenka zamahe hana huo. ²⁵ Nonkumazmimo'a haviza nehinkeno, nevasaza seli nozmimo'a vahera omaninigeno zutesie. ²⁶ Na'ankure Kagrama knama zaminka zamazeri havizama hana vahera zamahe'za zamasu'za nehu'za, zamazeri havizama nehanke'za zamatagu'ma nehaza vahe'mokizmia ki'za zokago ke hunezmantazageno mago'ane zamatagura nehaze. ²⁷ Kumi'zmia erinte agofetu agofetu nehunka, ana kumizmia apasezmantenka zamagura ovazio. ²⁸ Asimu

eri avontafepima zamagima me'neana renehaganenka, fatgo avu'ava'ma nehaza vahe'mokizmi zamagima krentesampina zamagia kreonto. ²⁹ Anumzamoka knazampi mani'nena natagu nehuanki, vahe'ma zamagu'ma nevazina hihamuka'anu nagu'vazio. ³⁰ E'inama hananke'na zagame hu'na kagia ahentesga nehu'na, susu hugante'na husga hugantegahue. ³¹ Na'ankure e'i ana'ma hanua zamo'a bulimakao afu'ma aheno kresramna vuge, maka pazive'ene agigo azankonema me'nenigeno kresramna vanigeno Ra Anumzamo'ma musema hu'zana agatere'ne. ³² Zamavufama anterami'za nemaniza vahe'mo'za Anumzamo'ma eri'zama erisia zana nege'za, musena hugahaze. Anumzamofonku'ma nehake'za nunamuma hunentaza vahe'mo'za hankavea erigahaze. ³³ Na'ankure Ra Anumzamo'a maka zanku'ma upama nehaza vahe'mokizmi krafagea nentahino, Agri naga'ma zamavare'za kinama ome huzmante'naza vahera ozmatregahie. ³⁴ Maka monamotane, ama mopamokanena Ra Anumzamofona agia ahentesga nehinkeno, hagerine maka ana hageri agu'afima nemaniza zagamotanena zagamera huta agia ahentesga hiho. ³⁵ Na'ankure Anumzamo'a Jerusalemi kumara agu'nevazino, Juda rankumatamina eri fatgo huno kigahie. Ana hanige'za Agri vahe'mo'za anampi mani'ne'za zamagra mopazmia erisanti haregahaze. ³⁶ Eri'za vahe'amofa nezmagehoza erisanti hare'za nemanisage'za, agri'ma amagama nentaza vahe'mo'za anampina manigahaze.

70

Anumzamoka ame' hunka nazahuo huno asunte'nea zagamere

¹ Muse hugantoanki Anumzamoka nagu'vazio! Ra Anumzamoka ame hunka enka eme nazahuo. ² Nahenaku'ma nehaza vahera zamazeri fenkami netrenka, zamazeri zamagaze huo. Hagi hazenkefima mani'noge'zama musema nehaza vahera zamazeri rukrahe huge'za zamagazegu nehu'za viho. ³ Oho! Meni keta eri fore hu'ne hu'zama nagriku'ma nehaza vahetmina, zamazeri zamagaze huge'za zamagazegu hiho. ⁴ Hianagi Kagriku'ma nehakaza vahe'mokizmia, tusi'a muse'za ante avite'zmantesane. Zamagu'ma vazi'nana zanku'ma zamave'nesia vahe'mo'za Anumzana marerirfa Anumza mani'ne hu'za ranke hu'za kagia ahentesga huvava hanaze! ⁵ Hianagi nagra namunte omne maka zankura upa nehua ne' mani'noe. Hanki Anumzamoka muse hugantoanki, ame hunka eme naza huo. Kagrake'za naza hunka naguvazi' nera mani'nananki, Ra Anumzamoka ame hunka eme nazahuo.

71

Anumzamoka hankaveni'ma evuneramini-genka onatro huno asunte'nea zagamere

¹ Ra Anumzamoka kegava hunantogu Kagritega neoanki, natrege'za ha' vahenimo'za nazeri nagazea osiho. ² Nahokenka nagu'vazio, na'ankure Kagra fatgo avu'ava zanke nehana Anumza mani'nane. Kagesa antenka krafageni'a nentahinka nagu'vazio. ³ Hanavenentake

havegani'a mani'nege'na anampinka fre'na
 maka kna ome frakineno. Kagra huzmantege'za
 nagura vaziho. Na'ankure Kagra nagu'vazi
 havegani'ane vihuni'ane mani'nane. ⁴ Kefo
 zamavuzmava'ma nehaza vahe'mokizmi
 zamazampinti'ene, vahe'ma zamazeri havizama
 nehaza vahe'mokizmi zamazampintira
 nagu'vazio. ⁵ Na'ankure Ra Anumzamoka
 kagrake'za nagri amuha zani'a mani'nane.
 Mofavrema mani'nena agafa hu'na kagritera
 namentintia hu'noe. ⁶ Kasema nanteneregati
 kagrake'za naza hankena mani'na e'noe. Kagra
 nenarera arimpafintira navre atirami'nane.
 E'ina agafare zagamera hu'na Kagri kagia
 ahentesga huvava hugahue. ⁷ Maka zama
 nagri mani'zampima fore'ma nehia zana,
 rama'a vahe'mo'za ke'za antahi'za nehu'za
 rempi nehaze. Na'ankure kagra hanaveni'a
 mani'nenka, kegava hunenantane. ⁸ E'ina
 agafare tagane'na omani zagamera hu'na kagi'a
 ahentesga huvava hugahue. Ana nehu'na maka
 kna kagri hiamu masakagura huama hugahue.
⁹ Hanki ozafama renugenka Anumzamoka
 onatro. Hankaveni'ama omanenigenka kamefira
 huonamio. ¹⁰ Na'ankure ha' vahe'nimo'za
 nazeri haviza hu naneke nehu'za, nahe frinaku
 oku'a nanekea retro nehaze. ¹¹ Zamagra
 amanage nehaze, Anumzamo'a amefi humianki,
 avaririta ome azerisune. Na'ankure mago
 vahe'mo'a ahora okegosie hu'za nehaze.
¹² Anumzamoka nagrira natrenka afetera
 omanio. Anumzani'amoka ame hunka enka
 eme naza huo. ¹³ Havigema hunante'za nazeri

havizama nehaza vahe'mokizmia, zamazeri zamagaze nehunka zamazeri haviza huo. Hanki hazenkema naminaku'ma nehaza vahera zamazeri fenkami netrenka, zamazeri zamagaze huo. ¹⁴ Hianagi nagra kagrite amuhara huvava nehu'na, zagamera hu'na mago'ene kagia ahentesga huvava hugahue. ¹⁵ Fatgo kavukava zanka'agura nagra huama nehu'na, vahe'ma agu'ma nevazina zankura maka zupa huama hugahue. Na'ankure kagra tagu'ma vazi'nanana ra zankrefa tro hu'nanankina, nagra ke'na antahina hugara osu'noe. ¹⁶ Ra Anumzamoka hanavenentake eri'zama eri'nana zankura nagra husga hugantegahue. Kagra maka'zama kegava hu'nana Anumzana mani'nanankina, fatgo kavukava'ene Anumza kagrake mani'nane hu'na mika vahera zamasmigahue. ¹⁷ Anumzamoka mofavrema mani'noretima agafa huno amare'ma eana, Kagra rempi hunaminka neanke'na hentofazama hu'nea kavukva zanka'agura huama hu'na vahera zamasami vava nehue. ¹⁸ Ozafama resugeno efe nazoka'ma tagisiana, Anumzamoka onatrenka naza huge'na mani'nena, hihamu hankaveka'ane, ranra kaguvazama erifore'ma hu'nana zantminkura, menima fore'ma nehaza vahera zamasm'i'nenno. ¹⁹ Anumzamoka fatgo kavukva zankamo'a mona agatereno ame'anagema mareri'ne. Kagra ruzahu ruzahu kaguva zanke erifore hu'nane. Anumzamoka kagri kna vahera ama mopafina omani'ne. ²⁰ Kagra antahinenka natranke'na hazenkefine knazampinena unefroe. Hianagi kagra nazeri knare nehunka, amefenkame mopa

agu'ama mani'nofintira ete navre atiramigahane.
²¹ Navresga hunka ra nagi nenaminka, mago'ane nazeri knare hunanto. ²² Hapu zavena ahena kagia ahentesga hugahue. Na'ankure kagra huvempama hu'nana keka'are amage ante Anumzani'a mani'nane. Israeli vahete'ma Ruotge'ma hu'nana Anumzamoka, nagra laeri zavena nehe'na zagamera hu'na kagia ahentesga hugahue. ²³ Nagra ranke hu'na muse zagamera nehu'na, Kagia ahentesga hugahue. Na'ankure kagra nagu'vazinka ete navre'nane. ²⁴ Hagi fatgo kavukva zanka'agura maka kna huama hu'na vahera zamasami vava hugahie. Na'ankure nazeri havizama hunaku'ma nehaza vahera zamazeri fenkami netrenka zamazeri zamagaze hu'nane.

72

Solomoni asunte'nea zagamere

¹ Anumzamoka fatgoma huno refkoma hu' avu'ava zana kini nera neminka, fatgo kavukva zanka'a kini ne'mofo nemofona amio. ² Fatgo avu'ava huno vaheka'a refko hunezmanteno, zamunte omne vahera fatgo avu'ava hunezmanteno kegava huzmantesie. ³ Ranra agonaramimo'za knare huno manifru hu nomani'za avre'za vahetera ne-enageno, neone agonaramimo'za fatgo avu'ava zamofona nena raga'a rentegahaze. ⁴ Zamunte omane vahera zamahonekeno, maka zanku'ma upa'ma nehaza vahe'mokizimi mofavreramina zamagu nevazino, vahe'ma ha'ma renezmantaza vahera zamazeri haviza hugahie. ⁵ Zagema reno

nevanigeno ikamo'ma remsa nehanire, fore'ma hu anante anante'ma hu'za vanaza vahe'mo'za korora hunegante'za monora hugante vava hu'za vanaze. ⁶ Hagi kini ne'mo'ma vahe'ma kegavama hania avu'ava zamo'a, menima apri'nea apepate'ma ko'ma runteankna nehuno, mopafima atako'ma runteankna hugahie. ⁷ Kini ne'mo'ma kegavama hania kna'afina, Anumzamofoma amage'manentaza vahe'mo'za mani'za zmifina knare hu'za hagegahaze. Ikamo'ma remsama nehanifima maka'zama hanaza zamo'a, knare zanke huno tretre hanie. ⁸ Hagi mago hagerinteti'ma vuno mago hagerintema vanigeno, Yufretisi tinteti'ma vuno, mopa atumparegama vuno e'noma haniana, ana kini ne'mo miko vahera kegava hanie. ⁹ Hanki hagage kokampima nemaniza vahe'mo'za agrite zmarena emere'za kepri nehanageno, ha' vahe'aramimo'za zamavugosaregati avuga masene'za kugusopa negahaze. ¹⁰ Hanki Tasisi kumate kini vahe'mo'zane, hageri amu'nompima nemaniza vahe'mo'zanena takisi zagoa eri'za kini nera eme amigahaze. Ana nehanageno Seba kumate kini ne, Seba'enena ana hu'za musezana eri'za kini nera eme amigahaze. ¹¹ Maka kini vahe'mo'za agrite kepri hunentesageno, maka kokankoka vahe'mo'za agri eri'za erintegahaze. ¹² Na'ankure zamunte omne vahe'mo'zama krafagema nehanageno'a, agra antahizmino zamagu vazigahie. Vahe'mo'za zamazeri havizama nehazage'zama, vahe'mo'zama zamazama nosaza vahera, agra zamaza hugahie. ¹³ Zamunte omne vaheku'ene maka

zanku'ma upama nehaza vahekura agra asunku hunezmanteno zamagu' vazi'nige'za ofrigahaze. ¹⁴ Vahe'mo'zama knama zami'za zamazeri haviza nehu'za, ha'ma rezmantaza vahera zamahokeno zamagu vazigahie. Na'ankure agri avurera vahera raza mani'naze. ¹⁵ Kini ne'moka zazate manigahane! Seba kumateti golia eri'za kagri eme kamisaze. Maka zupa kagrikura nunamuna hunegante'za, asomu kea hugantesaze. ¹⁶ Ama mopafina witimo'a rama'a nehanigeno, agonafinena witimo'a hageno, marerino umase emase hanie. Lebanoni zafaramimo'ma nehiaza huno zafa ragamo'a knare huno renentenigeno, ran kumapima nemaniza vahe'mofo nomani'zamo'a tra'zama hageno tretre hiankna huno, knare'za huno afovege huno tretre hugahie. ¹⁷ Hanki kini ne'mofo agimo'a mevava huno nevina, zagemo'ma me'nenoma remsama huno vania kna'afina kini ne'mofo agia erisga hugahaze. Anumzamo'ma agri'ma asomu'ma hunte'neankna huno maka ama mopafi vahera asomura hunezmantesige'za nege'za ana nera husga hunteseze. ¹⁸ Ra Anumzana Israeli vahe Anumzamofona agi'a ahentesga hanune. Agrake'za knare huno mareri agatere avu'ava zana erifore nehie. ¹⁹ Ra Anumzamofona hihamu masa'ane agi'a ahentesga huvava hanune! Hankavenentake masa'amo'a maka ama mopafina remsa hanie! Tamage! Anazana fore hanie. ²⁰ Jesi nemofo Deviti nunamumo'a amare eme vagare'ne.

Namba 3 zagame avontafere

*Anumzamo'a nagri hankaveni'a mani'neni
Nagri Anumza mani'ne huno Asapu asunte'nea
zagamere*

¹ Tamagerfa huno Anumzamo'a Israeli vahe'mokizmia knare hunezmanteno, zamagu'amo'ma agruma hu'nea vahe'mokizmia knarera hunezamante. ² Hianagi nagiamo'a krarige'na traka hu'na masekate'noe. Nagiama renakeroana regaririna masekatoe. ³ Na'ankure zamavufaga rama nehaza vahera kanive renezmate'na, kefo avu'ava'ma nehaza vahe'mokizmi nomanizamo'ma knare zanke'ma hia zama nege'na, kenanunu hu'noe. ⁴ Na'ankure ana vahe'mokizmia zamavufagafina zamatazana omanege'za, kria e'ori hanaveti'za nemanize. ⁵ Mago'a vahe'mo'zama nehazaza hu'za hazenkefina uofrege, ruga'a vahe'mo'zama nehazaza hu'za knazampina unofraze. ⁶ E'ina hu'negu zamavufaga rama hu' zamo'a, zmanankempima nentaniza pasesugna nehigeno, vahe'ma hazenkema zamizamo'a kukena antanizankna hu'ne. ⁷ Ana vahe'mokizmi zamagu'amo'a hanavenetino tapari'nege'za kefo avu'ava zana huvava hu'za nevaze. ⁸ Zamagra kiza zokago kene kefo kege nehu'za, zamavufaga ra nehu'za vahe'ma zamazeri haviza hu kankuke nehakaze. ⁹ Zamagrama nanekema nehu'za monafima mani'naza vahera huhaviza hunezmante'za, zamagra mopa eri nafa'a hu nanekege nehaze. ¹⁰ Ana hazage'za zamagogogu nehazageno, antahintahi zmimo'a savri nehie. Ana nehu'za ana vahe'mokizmi nanekea tima

nazaza hu'za nenaze. ¹¹ Ana vahe'mo'za amanage
 nehaze, inankna huno Anumzamo'a keno
 antahinora hugahie? hu'za nehaze. Marerirfa
 Anumzamo'a amafima fore'ma nehia zana,
 keno antahinora osugahie hu'za nehaze. ¹² Kefo
 avu'ava'ma nehaza vahera zamageho, knare
 nomani'za mani'nazageno fenozmimo'a ome
 ra huno nevie. ¹³ Nagra nagu'a kegava hugeno
 agru huno me'negena, kumira osu'noanki, e'i
 ana zama hu'noa zamo'a amnezankna hugahifi?
¹⁴ Maka knafina hazenkefi nagra mani'na
 nevue, maka nanterana nazeri haviza hankena
 natagura hu'na nevue. ¹⁵ Nagra ama anazamofu
 nanekema vahetmima zamasamuresina, ha'
 vahe zamazampi vaheka'a zamavarente'naku
 nagra komoru huresine. ¹⁶ Hianagi inankna hu'za
 kefo avu'ava'ma nehaza vahe'mo'za, nomaniza
 zamifina knarera nehaze. Nagra antahi amara
 osu'na, tusi knazampi nemanue. ¹⁷ Ana'ma
 hute'na Anumzamoka mono nompima ufre'na,
 kefo avu'ava'ma nehaza vahe'mofonte'ma
 henkama efore'ma hania zana ke'na antahi'na
 hue. ¹⁸ Tamagerfa hunka Anumzamoka
 krari'nenia kampi zamavarentege'za rekrari'za
 zavapi urami'za hazenke eriho. ¹⁹ Zamagra
 ame hu'za hazenkea eri'za haviza nehanageno,
 korozamo zamahe frigahie. ²⁰ Vahe'mo'ma
 ava'nama keteno nanterama otigeno, ana
 ava'namo'ma fanenema hiankna hunka
 Anumzamoka zamazeri fanenema hugahane!
²¹ Ana zama ke'na antahi'nama nehugeno'a,
 musezanimu'a omanegeni narimpa aka
 nehegeni, tumo'nimo'a natagri'ne. ²² Nagra

ana zana anira osu'noanki, neginagi hu'na antahintahi'a omne afi zaga kafagna kagri kavurera hu'noe. ²³ Hianagi nagra katre'na ovu maka knafina kagrane mani'nogenka, tamaga kaziga nazante nazeri'nane. ²⁴ Ana nehunka knare antahintahi naminka, nazeri fatgo nehanankinka, henka navrenka masanentake kumapina vugahane. ²⁵ Monafina nagri vahera omani'neanki, kagrake'za mani'nane. Hagi mopafina mago zankura navesi onteghuanki, kagrike'za navesi kantegehue. ²⁶ Nagu'amo'ene navufgamo'enena zaferina omne amne huno navresra nehianagi Anumzamoke'za nagu'amofona nazeri hankavenetiankino, nagri Anumza Agra mani vava nehie. ²⁷ Kagri'ma katre'za afetema nemaniza vahe'mo'za fanane hugahaze. Na'ankure kamefi'ma hugamiza vahera zamazeri haviza nehane. ²⁸ Hianagi nagrama Anumzamofu tvaonte'ma nemanua zamo'a knare nehie. Ra Anumzamo'a nagri Anumza mani'neni, nagu vazi kuma mani'neankina, knare'ma huno mareri agatere avu'ava zama'agura huama hugahue.

74

Mono noma eri haviza hu'naza zanku hunte'naza zagamere

¹ Anumzamoka nahigenka kamefira huraminka mani vava hunka nevane? Nahigenka trazampi zmantanke'zama vanoma nehaza sipisipi afutaminkura, Kagra krimpa ahenezmantane? ² Korapama Nagri vahe manigahaze hunkama huhampri'nana vahe

mani'nonanki, kagera okaninka kagesa antahiramio. Tagu'ma nevazinka mareri fenozani'agna huta manigahaze hu'nana vahe tagra mani'none. Kagra Saioni agonarema nemanina agonagura (Jerusalemi) kagesa antahio. ³ Eri havizama hazageno havizama huteno zazate'ma me'noma nea rankumapi, nevunka ko. Ha' vahetimo'za Kagri mono nona eri haviza hu'naze. ⁴ Kagri ha' vahe'mo'za ana mono nOMPI mani'ne'za kezana neti'za, ha'ma hugatere'naza avame'zana, krauvefana (flek) asenentaze. ⁵ Saumenuma zafama antagitre'naku'ma nehazaza hu'za nona antagi tapage nehaze. ⁶ Hagi mono no zafare'ma antreno'ma keonke'zamofO amema'ama trohunteno avasasema hunte'nea zana, sasume tunuti'ene hamanteti antagi hantagutagi atre'ne. ⁷ Ana ha' vahe'mo'za zamagra teve tagintazageno mono nonka'a teno ko mopafi tepasaru huramigeno, Kagri kagima me'nea nona eri ankrare kre'naze. ⁸ Zamagra amanage hu'za antahintahia antahi'naze, ana maka zana eri haviza hutregahune hu'za hute'za, ana mopafima Anumzamofoma mono'ma hunentaza nonkumatamina teve tagintazageno te'ne. ⁹ Anumzamoka tamagrane mani'noe hunka mago avamezana eri fore hanketa onkone. Hagi ana maka kasnampa vahe'mo'za omanizageno, ama knazamo'ma vagamaresia zama tasami'naza vahera omani'naze. ¹⁰ Anumzamoka nama'agna atresankeno ha' vahetimo'za huhavizana hugantegahaze? Hagi zamatre'sanke'za maka zupa kagia eri haviza huvava hanazo?

11 Nahigenka hankavenentake tamaga kazana rusutenka taza nosane? Hanavenentake kazana renamaginka omaninka rusutenka zamahe frio.

12 Hianagi Anumzamoka korapama evu'nea knafine meninena nagri kini ne' mani'nenka, ama mopafina tagura vazi'nane. 13 Kagra hankaveka'areti hagerina eri atanankeno tare kaziga otikenka, hagerimpima nemanía afizagamofó aseniramina rupraro vazi'nane.

14 Laviataniema hu'za nehaza afi zagama hagerimpi nemanía zagamofó aseniramina rupraro vazitenka, hagage kokampima nemaniza zagagafa zaminke'za ne'naze. 15 Kagrake'za kampu'i tine, neone tinena erinkazo hankeno, timo'a krohupeno enevigenka, ontaneno evuvavama nehía tirantamina eri neranane.

16 Masane, haninena anantarega kagri suza me'na'e. Kagrake'za zagene ikanena, tro hunte'nane. 17 Kagrake'za mopamofona isagana antetere nehunka, amuhó knane zasi'ma hu kna trohu ante'nane. 18 Ra Anumzamoka ha' vahe'mo'zama huhavizama hunegantazana kagesa nentahinka, neginagi vahe'mo'zama kagi'ama huhaviza nehaza zana ko. 19 Hagi atregeno maho namaka'a afi zagamo'za zamahe'za oneho. Vahe'mo'zama knama nezamiza vaheka'a kagerakani zamante vava osuo. 20 Huhagerafi huvempa kema hu'nana zana kagera okanio. Na'ankure ama mopafima hanintirima hu'nefina, vahe'ma ohefri ahefrima hu'zamo'a avite. 21 Vahe'mo'zama zamazeri havizama nehaza vahera zamatrege'za, zamagazegura nehu'za rukrahe hu'za oviho.

Hanki atrege'za zamunte omne vahe'mo'zane, maka zanku'ma atupa'ma nehaza vahe'mo'za kagi'a ahentesga hiho. ²² Anumzamoka otinka tagri kaziga antenka tahoko. Neginagi vahe'mo'za maka knafina, hago zazate huhaviza hugante'za nevaze. ²³ Ha' vahekamo'zama nehazankea antahi amnea osuo. Hagi ranke hu'zama huhaviza hunegantaza zamo'a anagamu mareri vava nehie.

75

Anumzamofu agi'ama ahentesgama hu zagamere

¹ Anumzamoka susu huganteta kagia ahentesga hune. Na'ankure tagri tava'onte kagra mani'nane. Knare'za huno mareri agatere'nea kavukva zanka'agura vahe'mo'za huge antahige nehaze. ² Anumzamo'a huno, vahe'ma refko hu knama erinte'noa kna fatgore, vahera mago avamenteke ante'na refko huzmantegahue. ³ Hagi mopama momi'ma higeno, vahe'mofu mani'zamo'a herave korave nehigena, Nagra mopama azeri'nea trara azeri akona nehue. ⁴ Zamavufga rama nehaza vahekura tamavufga rana osiho nehu'na, kefo avu'ava'ma nehaza vahekura hu'na, hara agateregahune huta tamimiza runafege nehuta, hankavetamia erita mareorihho hu'na zamasamigahue. ⁵ Hara hu agateregahune huta hankavetamia erita marenerita, tamanankena antesga huta tamavufga rankea osiho. ⁶ Vahe'mofoma azeri antesgama hu'zana, zage hanati kazigatiro, zage fre kazigatiro, hagage kokampintira omegahie. ⁷ Anumzamoke vahera

refko huno, nezmageno avre anagamu netreno, avre henkama netreno hugahie. ⁸ Na'ankure mnanentake zantamine waini tinema eri havia hu'nea hankave tina agrema'age nehigeno, Ra Anumzamo'a azampi azeri'ne. Agra maka ama mopafima kefo avu'ava'ma nehaza vahete tagitresigeno, ana vahe'mo'za nene'za ro'afima me'nia ankarere'anena nehana hugahaze. ⁹ Hianagi nagra maka kna Anumzamo'ma tro'ma hu'nea zankura huama hu vava nehu'na, zagamera hu'na Jekopu Anumzamofona agi'a ahentesga hugahue. ¹⁰ Na'ankure Anumzamo'a huno, kefo avu'ava'ma nehaza vahe'mokizmi hankavea eri atregahuanagi, fatgo avu'ava'ma nehaza vahe'mokizmia mago'ane hankavea zamigahue.

76

Mago vahe'mo'a kagri kavuga otigara osu'ne huno Asapu asunte'nea zagamere

¹ Juda vahe'mo'za Anumzamofona ke'za antahi'za hu'neza kesga hunentazageno, Israeli mopafina agimo'a haruharu hu'ne. ² Jerusalemia Agrama nemanía kuma megeno, Saioni agonare noma'a me'ne. ³ E'i anampina ha' vahe'mokizmi kevemofa agonare'ma tevema nerea kevema, hankoma, bainati kazinknone mago'a hazantamine ruhantagi atre'ne. ⁴ Kagri hihamu hankavene masazanka'amo'a, zagagafama ahe'za nenaza agonaramina agatere'ne. ⁵ Hankave ha' vahetmina zamarohu zamarenka zamahe fri'nanankiza mago'mo'a otino hara huorantegahie. ⁶ Jekopu Anumzamoka

hate'ma ne-enka ivimo agazamo'ma hunka ankeno'a, hosi afu'mo'ene hosi agumpima vanoma nehu'za ha'ma nehaza vahe'mo'zanena, kazara osu'za mopafi mase'naze. ⁷ Na'ankure kagoro huga vaheki'za Kagrikura vahe'mo'za korora hugahaze. Hagi krimpa ahezamo'ma tevema neresifina, iza knarera hu'nenia vahe'mo kavuga otigahie? ⁸ Ha' vaheka'ama knazama zamisana kea monafinkati huama nehankeno, mopafima nemaniza vahe'mo'za zmahirahiku nehu'za, kea osu kavuga akohe'za nemanize. ⁹ Hagi Anumzamo'a otino vahe'mo'zama zamazeri havizama nehaza vahera refko huzmantegahie. ¹⁰ Vahe'mo'za zamarimpama nehaza zamo'a, rankagi negamize. Na'ankure mago'ama mesia rimpahie'za erinka kanankempi kavasese hugahane. ¹¹ Ra Anumzana tamagri Anumzamofontega huvempa nehuta, anama huvempama hanaza kea eri ragareho. Knare'zantfama huno mareri agatere'nea ne'tega miko vahe'mota musezana erita agrite eho! ¹² Na'ankure ugagota kva vahe'mo'zama antene'za, akagima neraza zantamina, Agra ahe hantagi netrege'za, ama mopafi kini vahe'mo'za koro hunentaze.

77

Hazenke knafina Ra Anumzamofonku hakregahue huno asunte'nea zagamere

¹ Anumzamofontega ranke hu'na nagra krafagea hugahue. Nazama hinogura ranke hu'na krafa hanugeno Anumzamo'a antahi namigahie.

² Hazenkefima unefre'na, Ra Anumzamofonku

hake'noe. Kinagareti'ma agafama huno vuno ko'ma ome tu'neana monafinka nazana rusutete'na nunamuna hu'noanagi, narimpamo'a kna hu'ne. ³ Anumzamokagu'ma nagesama nentahi'na, natagura karagi neru'na, kagriku'ma nentahi'na nunamuma nehugeno, zaferinani'a omne amne hu'ne. ⁴ Kagra navua eri hari hanke'na maka kinaga navura omase mani'nena, tusi antahintahi hakare nehu'na kea osu'noe. ⁵ Ko'ma evu'nea knafima knare'ma hu'na mani'noa zanku nagesa nentahi'na, ko'ma evu'nea kafuramimpima fore'ma hu'nea zantaminkura nagesa nentahue. ⁶ Nagrama kenage'ma nehua zagamenigura nagesa nentahi'na, nagu'afina antahintahia hu'noe. Anante antahintahinimo'ma ama'ma higena, ko'ma hu'noa zagamekura nagesa nentahi'na, anage hu'noe, ⁷ Anumzamo'a ha natreno amefi hu'namifi? Ete mago'anena avesinanteno nazeri so'ea huonantegahifi? ⁸ Vagaore avesizamo'a ha fanene hu vagarefi? Huvempama hu'nea kemo'a hago vagarefi? ⁹ Anumzamo'a asunku'ma hurante zankura agekanifi? Hifi tusi'a arimpa aheneranteno asunku zama'a azenerifi? ¹⁰ Anante anage hu'na antahi'noe, Marerirfa Anumzamo hara renante hu'na hu'noe. ¹¹ Hianagi Anumzamo'ma hu'nea avu'ava zankura nagera okanigahue. Tamage, nagra korapa'ma ruzahu ruzahu kaguvazama hu'nana zankura nagera okanigahue. ¹² Maka zama tro'ma hu'nana zankura nagesa antahigami vava nehu'na, ranra avu'avazama hu'nana zantmimofonku nagu'afina antahi vava hugahue. ¹³ Anumzamoka

kavukva zankamo'a ruotagetfa hu'ne. Tagri hankavenentake Anumzankna Anumzana magore huno omanitfa hu'ne. ¹⁴ Kagra ruzahu ruzahu kagu'vaza eri fore hu'nana Anumza mani'nane. Kagra vahe'mokizmi amu'nompi hankaveka'a erifore hu Anumza mani'nane. ¹⁵ Kagra hankavenentake kasanuti vaheka'a Jekopu mofavreramine, Josefe mofavreraminena zamagu'vazi'nane. ¹⁶ Anumzamoka timo'ma negageno'a, koro nehigeno, hagerimo'ma negageno'a koro huno ahirahiku hu'ne. ¹⁷ Hampompintira ko'mo'a herafi neramigeno, monagemo'a kragugu nehigeno, kopsinamo'a rutrage huno kevema ahene trazankna huno enevie. ¹⁸ Kagra hankeno monagemo'a ununkomofa agasasa nerigeno, kopsinamo'a maka kokantega trage huno rumsa huno vuno eno nehigeno, ama mopamo'a kaza nehuno tusi agogogu nehie. ¹⁹ Kama vanoma nehana kamo'a hageri amu'nompi vu'ne. Kagra tusi'a hankave timpi nevanke, vahe'mo'za kagiaka nonkaze. ²⁰ Sipisipi afutami avreno viankna hunka, vaheka'a ana kampina zamavarenka vananke'za, Aroni'ene Mosesekia sipisipi afu kva vahekna huke zamavareke vu'na'e.

78

Henkama fore'ma hanaza vahera zamasmihohuno asunte'nea zagamere

¹ Rempima hurasua zana vahe'nimota antahiho, nanekema tamasmisuana tamagesa ante'neta antahiho. ² Na'ankure nagra mago fronka ke tamamigahue. Rempima hurasua

zantamima korapama oku'ama me'nea zantmi rempi huramigahue. ³ Kanihe'ma ko'ma antahi'nona kanihe tamasamigahue, ko'ma tagehe'mozama hurasmi anante anante'ma hu'za e'naza kanihe tamasamigahue. ⁴ Hagi ama ana tamage nanekea, mofavretirera frara okigosunanki, Ra Anumzamo'ma hihamu hankave'anuti'ma ruzahu ruzahu kaguva zantmima erifore'ma hu'nea zantamina, menima fore'ma nehaza vahetmina zamasamigahune. ⁵ Na'ankure Agra Jekopuna trake'a nemino, kasege'a Israeli vahera zami'ne. Ana nehuno tagehe'mofonkura, mofavre nagatamia ama ana nanekea rempi huzamiho huno zamasmine. ⁶ Ana hinkeno henkama fore hu anante anante'ma hu'za vanaza vahe'mo'za, ama ana nanekea antahine'za, mofavrezmia rempi hu'za zamasami vava hu'za viho. ⁷ E'ina hanage'za fore hu anante anante'ma hu'za vanaza vahe'mo'za Anumzamofonkura amuhara nehu'za, kasegea amage nente'za, ruzahu ruzahu kaguva zama hu'nea zankura zamagera okanigahaze. ⁸ E'ina nehu'za zamagehemo'zama zamagu'ama eri hanavemati'naza zana nosu'za, hara renonte'za, kea antahi'za avarari fatgo nosu'za, zamagu'a Anumzamofona omi'nazanknara osugahaze. ⁹ Hagi Efraemi sondia vahe'mo'za ati kevea zamazampi eri'nazanagi, ha'ma hazafina zamage'na humi'za hara osu koro fre'naze. ¹⁰ Zamagrama huhagerafi huvempa kema Anumzanema hu'nazankea runetagre'za, kasege'ama avarari zankura zamavaresra hu'naze. ¹¹ Anumzamo'ma maka ruzahu

ruzahu zama zamaveri'ma hu'nea zankura zamagenekani'za, kagu'vazama hu'nea zankura zamagesa ontahi'naze. ¹² Hagi Zoani kaziga Isipi mopafina zamafahe'mofo zamavufina, Agra ruzahukna kaguvaza erifore hu'ne. ¹³ Na'ankure Agra hagerina amu'nompinti eri ataneno, kana eri fore huno zamavreno kantu kaziga vigeno, timo'a emare hihi huno mareri'ne. ¹⁴ Hagi masafi'na hamponteti kana zamaveri huno zamavareno nevuno, maka hanimpina teve anefanu remsa huzmanteno zamavareno vu'ne. ¹⁵ Ka'ma kopina Agra havea rutaneno tina zamigeno, timo'a krohupeno ege'za ne'naze. ¹⁶ Hagi Agra neone tintamina erifore higeno, havefintira hanatino tirantima eviaza huno enevie. ¹⁷ Hianagi ana hagege ka'ma kopina amnea omani'za kumira hu'za ne-eza, marerirfa Anumzamofona hara rente'za e'naze. ¹⁸ Zamagra zamagu'areti hu'za Anumzamofona rehe'za nege'za, zamavesi zmavesima nehia nezankura Anumzamofona antahige'naze. ¹⁹ Ana nehu'za Anumzamofona huhaviza hunente'za amanage hu'naze, Anumzamo'a Agra amne hagege kokampintira ne'zana eri fore huramigahio? hu'za hu'naze. ²⁰ Tamage Agra havea rutanegenon timo'a krohupeno evuno aviteno megahianagi, Agra bretine ame'anena vahe'a zamigahifi?

²¹ Hagi Ra Anumzamo'ma ana nanekema nentahigeno'a, arimpama ahe'zamo'a teveregenon Jekopu nagara teve krenerasegenon, mago'a Israeli vahe'mokizmia tevereti krerasage'ne. ²² Na'ankure zamagra Anumzamofontera zamentintia nosu'za, kegava hurantegahie

hu'za antahi omi'naze. ²³ Hianagi Agra mon-
 amofonkura kafana anagio, higeno monamo'a
 kafana anagino erihagro hu'ne. ²⁴ Mana
 ne'zanema nehaza ne'zana ko'ma riankna
 huno monafinkati herafi tregeno, monafintira
 witia zmige'za ne'naze. ²⁵ Ankeromofu ne'za
 zamige'za vahe'mo'za nenazageno, nezmu'ma
 huga avamente Anumzamo'a rema'a ne'za
 zamige'za ne'naze. ²⁶ Zage hanati kaziga zahora
 huntregeno monafina zahora erino enevigeno,
 Agra'a hihamu'areti sauti kaziga zahora azeri
 fatgo higeno Agra antahia kantera nevie. ²⁷ Agra
 monafinti ame'a atregeno eramino mopafina
 kugusopamo hihi huno mareriankna nehigeno,
 namama zmi'neana namaramimo'a rama'a
 hu'za hagerinkena kasepagna hu'naze. ²⁸ Ana
 namaramina Anumzamo'a higeno seli noma
 ki'za mani'naza amu'nompine, seli noma
 ki'zama nemanizafinena erami erami hu'naze.
²⁹ Zamagrama zmanankenku'ma haza zaga Agra
 zamige'za nezamu hu'naze. ³⁰ Hianagi ana
 ne'zana nevaga orenazageno, ana ne'zamo'a
 zahufa zamagipi me'nege'no, ³¹ Anumzamo'a
 ana vahetamina tusi arimpa ahe'zmanteno
 hankavenentake vahezmiya zamahehna hu'ne.
 Hagi hankavenentake Israeli nehazaveramina
 zamahehna hu'ne. ³² E'inara hu'neanagi, ana
 vahe'mo'za ana zankura zamagesa ontahi'za
 kumira hu'za vu'naze. Anumzamo'ma knare
 eri'zama eri'nea zankura antahimi'za Agrite'ma
 zamentintima hu'zankura zamavaresra
 hu'naze. ³³ E'ina hazageno ame' huno zamazeri
 haviza hige'za amne zankna nehazageno,

zamazeri koro hige'za koro hu'naze. ³⁴ Hagi Anumzamoma agafa huno zamahema nefrige'za nege'za, maka zana netre'za ete rukrahe hu'za Anumzamofontera hanaveti'za zamentintia hu'naze. Ana nehu'za zamagu'a rukrahe hu'za Anumzamofona zamagu'areti hu'za avariri'naze. ³⁵ Anumzamoma tagri fraki haveganti mani'ne hu'za zamagesa nentahi'za, Mareri Agatere Anumzana tahokeno tavre'nea nere hu'za antahi'naze. ³⁶ Hianagi ana maka zama hu'nazana zamagiteti hu'nazanki tamage hu'za zamagu'a omi'naze. Zamagra amne zamagiteti havige hu'naze. ³⁷ Zmagu'amo'a tamagea huno Anumzamofontera hankvetino omnene. Ana hige'za Anumzanema huhagerafi'naza huvempa kea kegava osu'za ru hantagi'naze. ³⁸ Hianagi Anumzamoma asunku Anumzankino kumizmia atrenezmanteno, zamahe fri vagaore'ne. Rama'a knafi rimpah'e'zana azenerino, zamahe vaga ore'ne. ³⁹ Ana nehuno vahekura amne vahetfa mani'naze huno agesa antahi'ne. Vahe'mo'za zahomo'ma evu huhu huno vuteno omeankna huza vagaregahaze. ⁴⁰ Hagi hagage kokampima mani'neza rama'a zupa Ra Anumzamofona hararentazageno arimpa knanena mani'ne. ⁴¹ Hagi mago'ane Ra Anumzamofona rehe'za nege'za Israeli vahe ruotge Anumzamofona rimpagna erimi vava hu'za vu'naze. ⁴² Zamagra ha' vahe'zmimofa zamazampinti'ma zamagu'ma vazi'nea hihamu'agura zamage kaninte'naze. ⁴³ Isipi mopafima ruzahu ruzahu kaguvazama erifore nehuno, Zoani kazigama knare huno mareri agatere'nea ruzahu ruzahu

kaguvazama eri fore'ma hu'nea zankura zamagesa nontahizageno, ⁴⁴ Agra tirazmia eri rukrahe higeno korasege'za ana tintetira tina one'naze. ⁴⁵ Agra tusi'a kosintami huzmantege'za kregre hu'za nezamampri'zageno, hogatmi huntege'za rama'a hazenkea zami'naze. ⁴⁶ Agra neonse kenu'ene ranra kenu'ene huzmantege'za, hozazmia ne'za erihna hu'naze. ⁴⁷ Agra ranra komopa ko atregeno waini zafa zamia ahe haviza nehigeno, neonse komopa ko atregeno, sikamo zafazmia ahe haviza hu'ne. ⁴⁸ Hagi Agra bulimakao afuzmia ranra komopa ko atregeno zamahe nefrigeno, kopsina atregeno trazama nenaza afuzagama kegavama hu'nazana zamaheno eri vagare'ne. ⁴⁹ Agra tusi'a arimpa ahe'nezmanteno, vahe'ma zamazeri haviza hu ankeri vahetamina mago'a huzmantege'za, zamazeri haviza nehu'za zamahe fri'nagura e'naze. ⁵⁰ Agra arimpa ahezamofa kana retro huno magore huno Isipi vahetmina zamagura ovazi'neanki, knazana zamino zamazeri haviza hu'ne. ⁵¹ Isipi vahetmimofo nompintira ese ne' mofavreramina Agra zamahe fri'ne. Hamu nagamokizmi zamagonesa mofavreramina agra zamahe fri'ne. ⁵² Hianagi Anumzamo'a Agra'a vahetmina sipisipi afutmima vugoteno avreno'ma viankna huno hagege kokampina kegve huzmante so'e huno zamavareno vu'ne. ⁵³ Agra'a kegava huzamanteno zamavareno vige'za zamagra korora osu'naze. Hianagi ha' vahe'zmimo'za hagerimpina ti nakri'naze. ⁵⁴ Agra ruotge'ma hu'nea mopa atupare zamavareno e'ne. Agra tamaga azantetima

ha'ma huno'ma eri'nea agona kokampi
 zamavareno e'ne. ⁵⁵ Hagi Agra zamavugama
 ana mopafima mani'naza vahera zamahe
 kasopenetreno, ana mopa erisantihareho huno
 zami'ne. Ana hige'za avamente avamente
 hu'za refko hu'za Israeli naga nofimo'za
 seli nonkuma ki'za mani'naze. ⁵⁶ Hianagi
 zamagra Anumzamofona rehe'za nege'za,
 Marerirfa Anumzana ha' renente'za, kasege'a
 ovarari'naze. ⁵⁷ Zamagra Anumzamofona
 zmagena hunemi'za, zamagehemo'zama
 hu'nazaza hu'za Anumzamofona avarari fatgo
 osazageno, ati amagenamo'ma kazakiankna
 huno znavu'zamava zmimo'a kazaki'naze.
⁵⁸ Zamagra havi anumzantamimofoma mono'ma
 hunente'za, kumama tro husgama hunte'naza
 zamo Anumzamofona azeri arimpa nehe'za,
 havi anumzama antre'za tro'ma huntaza
 zanku Anumzamo'a azeri kanivea rezmante'ne.
⁵⁹ Hanki Anumzamo'ma ana nanekema
 nentahino'a tusi arimpa ahogeno, Israeli vahera
 amefi huzamino zamatre vagare'ne. ⁶⁰ Ana
 nehuno Silo kumate'ma seli mono noma'afima
 nemaniretira atreno vu'ne. Vahe amu'nompima
 seli noma'afima nemaniretira atreno vu'ne.
⁶¹ Agra huhagerafi huvempage vogisia ha'
 vahe zamazampi antege'za eri'za kumazmirega
 vu'naze. Agri hihamu hankvema huvame huno
 me'nea zana ha' vahemoza eri'za ome antene'za
 ana zamofona ke amne zankna hu'naze.
⁶² Agra vahe'aramina ha' vahe zamazampi
 zamavarentege'za ha' vahe'mo'za zamahe'za
 kazinteti traga hu'naze. Na'ankure Agra'ama
 erisantiharege'za Agri ruotge vahe'ma mani'naza

vahekura tusi arimpa ahezmente'ne. ⁶³ Kasefa nehazaveramina tevemofu neza nesazagenu, kasefa mofaneramimo'zama vema erisaza vene'nea omanige'za, masinezmente'zama nehaza zagamera osu'naze. ⁶⁴ Hagi pristi vahera bainati kazinteti zamahe vagarazage'za, ana pristi vahe'mokizmi kento aneramimo'za zamasunkura hu'za zavira ote'naze. ⁶⁵ Vahe'mo'zama mase'nazafinti'ma otizaza huno Ra Anumzamo'a oti'ne. Hanave sondia ne'mo'ma hanave waini tima neteno, neginagima huno mase'nereti'ma otiankina huno oti'ne. ⁶⁶ Ha' vahe'aramina Agra zamahe panani hige'za ete freza nevazagenu, zamagazema huvavama hu'are zamazeri haviza hu'ne. ⁶⁷ Hianagi Josefe nagara avesra huzmanteno nezmatreno, Efraemi naga nofi'enema mani'zankura avresra hu'ne. ⁶⁸ Hianagi Juda naga huhampri'no zamagrane umani'ne. Na'ankure Agra Saioni agonagu avesi'ne. ⁶⁹ E'i anante ruotgema hu'nea mono noma'a Agra kiska huno kintegenu, anagamu marerino monarega mareri'ne. Ana nehuno ana nomofu tra'ama ante'neana mopamo'ma hanavetiankina huno hanaveti'neankino mevava hugahie. ⁷⁰ Agra eri'za vahe'a Deviti huhampri'nteno, sipisipi afu keginafinti ke higeno e'ne. ⁷¹ Anumzamo'a Devitima avre'neana a sipisipine amima nenea anenta'aramima kegavama nehia eri'zampinti avreno Jekopu agehemofu, Ra Anumzamo'a Agra'a feno zama'agna huno huhampri'nea Israeli vahe'a kegava hu eri'zana ami'ne. ⁷² Hagi Deviti'a maka agu'areti'ene maka zama tro'ma hu'are'ma antahi ani'ma hu'nea ne'kino, Israeli vahera kegava

hu'ne.

79

Asapu asunte'nea zagamere

¹ Anumzamoka megi'a vahe'mo'za hara eme huragatere'za erisanti'ma hare'nana mopaka'a e'neri'za, ruotgema hu'nea mono nonka'a eri haviza nehu'za, Jerusalemi kumara tagna vazitrazageno hihi huno mareri'ne.

² Eri'za vaheka'aramine Kagrima negavaririza vaheka'aramina zamahete'za zamavufaga'a atrazageno namamo'zane zagagafamo'za ne'naze.

³ Jerusalemi kumapina zamahe'za korana tagitrazageno tihageno eviankna nehigeno, asezmente'nia vahera magore huno omani'ne.

⁴ Mika tagri tava'onte'ma nemaniza vahe'mo'za huhaviza hunerantazageno, mani kagirante'naza kumapinti vahe'mo'za ki'za zokago ke hurante'naze.

⁵ Ra Anumzamoka nama'a kna krimpa aherantenka vugahane? Kagra karimpa aherante vava hunka vugahampi? Maka kna kanive renerantankeno ana zamo'a tevenefakna hu vava huno vugahifi?

⁶ Mono'ma hugante'zanku'ma zamavaresrama hunegantaza vaheku karimpa ahenezmantenka, kini ne'mo'ma kegavama hu'nea kumatamimpi vahe'mo'zama kagihanta'ma novaziza vahetami karimpa ahezmando.

⁷ Na'ankure Kagri vahe Israeli vahera zamahe'za eri vagarazageno, mopazmimo'a vahe omani hagege kokankna hie.

⁸ Ko'ma tagehemo'zama hu'naza kumitera antahintahi ka'afina ana zankura antahinka ovuo. Kasunku hurantenka ame hunka enka eme taza huo.

Na'ankure tagra tusi'a hazenkefi manune.
⁹ Anumzana tagu'vazi ne' mani'nananki
 taza huo. Kagra'a kagimofo knare zanku
 nentahinka taza huo. Kagri kagima husgama
 hugantesaza zanku netahinka, kumitia apase
 nerantenka tagu'vazio. ¹⁰ Na'a hanige'za ru
 vahe'mo'za hu'za, iga zamagri Anumzana
 mani'ne? hu'za hugahaze. Tagona kema hunka
 ana vahetmima ha'ma huzmante'sana zana,
 tagra kamneno. Na'ankure zamagra eri'za
 vaheka'aramimofo korana zamahe'za eri tagi
 atre'naze. ¹¹ Kinama hu'naza vaheka'amo'zama
 zamatagu'ma nehu'za, kragi'ma neraza zana
 antahio. Frigahaze hu'zama hazage'zama
 mani'naza vahera, marerirfa hihamuka'anu
 zamagu'vazio. ¹² Anumzamoka tava'ontire'ma
 nemaniza vahe'mo'zama Kagri'ma huhavizama
 hugantazarera, 7ni'a zupa ana zantera nona
 huzmanto. ¹³ Ana'ma hananketa Kagri vahe'mota
 tretre'ma hu'nea trazampima tantenanketa
 sipisipigna huta mani'nomota musena nehuta,
 susu hugante vava nehanunkeno, henkama
 forehu anante anante hu'zama esaza vahe'mo'za
 ana zanke hugahaze.

80

*Anumzamoka ete tazeri knare huo huno hu'nea
 zagamere*

¹ Sipisipi afu kevuma kegavama nehazaza
 hunkama Israeli vahe'ma kegavama nehana
 kva ne'moka, kagesa antenka antahio. Sipisipi
 afu'ma kegavama huno viazama hunka Josefe
 agehe'mofoma, avrenka nevamoka antahio.

Kagra serafimiema nehaza ankerontremofu amu'nompima manisga hunkama nemanina Anumzamoka masazanka'a remsa hunerantenka eme taza huo. ² Efraemi naga'ma, Benzameni naga'ma, Manase nagate'enena Hankaveka'a eri ama' hunka tagu'vazio. ³ Etenka tazeri knare nehunka, kavugosafinti masanu remsa hunerantenka taguravazio. ⁴ Ra Anumzana Monafi sondia vahetmimofo Anumzamoka, zazate kagri vahe'mota nunamuma huta neonkenka karimpa ahenerantane. ⁵ Tasunkuzana bretima hiaza hunka neraminka, tima hiaza hunka tavunura rama'a taminketa ne'none. ⁶ Tava'ontire'ma nemaniza vahetmina zamatranke'za, tagri mopareku hu'za hara hunerante'za, ki'za zokago kea hunerantaze. ⁷ Monafinka sondia vahe'mofo Anumzamoka ete tazeri knare nehunka, atregeno kavugosafinti masa zamo'a remsa hunerantesigenka taguravazio. ⁸ Kagra Isipitira waini avina rukafrinka erinka, ama mopafima megia vahetmima mani'nazana eme zamahenati netrenka, tagrira ama ana mopafi avimzama seaza hunka eme hankre'nane. ⁹ Kagra ama mopa emeri ama' hurantanketa, tagra ama ana mopafi arafu'na reta mani avite'none. ¹⁰ Ana waini zafamofo turuna'mo agonaramina turuna hunentegeno, azankuna'amo'za hankave sida zafa refite'ne. ¹¹ Hagi azankunamo'a hageno zage fre kaziga Mediterenia hagerintega vigeno, agatamo'a hageno zage hanati kaziga Yufretisi tinte uhanati'ne. ¹² Hianagi nahigenka hoza kagina ahe fragu vazitranke'za karankama vanoma

nehaza vahe'mo'za ufre'za krepri raga musufa neragize? ¹³ Zafa tanopafinti zamagonknazama ohari afi afu'mo'za ana wainia zamaganuti reppipro nehazageno, afi zagagafamo'za ana zafa raga nenaze. ¹⁴ Monafinka sondia vahe'mofo Anumzamoka muse hugantonanki etenka eno. Waini hozaka'afima nehia zana Monafinkatira kefenkma atrenka negenka, ama ana waini zafaka'a kegava huo. ¹⁵ Ana wainia Kagraka'a kazampinti kri'nane. Ana ne'mofavrea Kagraka'a azeri nena hu'nane. ¹⁶ Ana waini hozaka'a teve negre'za, rukafri kafro hutre'naze. Karimpa ahenka kavugosa hunezmantenka zamahe fanene huo. ¹⁷ Hanki kazana rusutenka kaza tamaga kazigama mani'nea ne' hankavea neminka, Nagri vahe manigahaze hunkama tazeri nenama hu'nana vahe mani'nonanki tazeri hankavetio. ¹⁸ E'ina hugeta tamefira huonkamimneno. Ete tazeri kasefa hugeta, Kagritega nunamuna nehuta, kagia ahentesga hamneno! ¹⁹ Monafinka sondia vahe'mofo Anumzamoka ete tazeri knare nehunka, atregeno kavugosafinti masazamo'a remsa huranteno taguravazino.

81

Vahe'nimo'za ke'ni'a antahiho huno hu'nea zagamere

¹ Anumzamoka Agra tagri hankaveti mani'neanki zagame huta agi'a erisga hanune. Jekopu Anumzamofontega muse zagamera huta agi'a erisga hiho? ² Zgamera nehuta nasenasepana neheta, knare ageru'ma neria

hapu zavenane laeri zavenanena aheho.
³ Kasefa ikama eme antesigeta sipisipi afu'mofo paziveteti ufena nereta, ikamo'ma zarama vagehinigeta, ra ne'za kreno nekna egahianki, ne'zana kreta neneta musenkase hiho. ⁴ Ama'i Israeli vahe'mofo trake, Jekopu Anumzamo'ma Israeli vahe'motama tami'nea kasegene trake. ⁵ Anumzamo'ma Isipi vahe'ma ha'ma renenteno'a, Josefe naga'mozama avaririsaza trake huno retro hunte'ne. Nagra ontahi'noa agerupinti agerura runo anage hu'ne, ⁶ Nagra zamafunte'ma me'nea knazana eri atroe. Kna zama e'neriza ekaeka kutamia tamazampintira eri atre'noe. ⁷ Knafima mani'neta krafa nehazagena, tamagu'vazi'noe. Nagra hanintiri hampompinti monagema hiaza hu'na kenonatamia huramante'noe. Meriba tinte tamamentintia reramahe'na tamage'noe. ⁸ Tamavumro tamantena tamazeri fatgo hunaku huanki, vahe'nimota antahiho! Israeli vahe'mota tamavumro'ma nentenugeta kea osu mani'neta amne tamagesa antahiho. ⁹ Ru vahe'mokizmi anumzantera monora huontege, havi anumzantera tamarena reta monora huontehe. ¹⁰ Nagra Ra Anumzana tamagri Anumzamo'na Isipi mopafintira tamagura vazi'na tamavre'na emareri'noa Anumza mani'noe. Tamagira eri aka hunenke'na knare zantaminura tamagipina ante vita'nenno. ¹¹ Hianagi nagri vahe'mo'za keni'a nontahi'za, namagera onte'naze. ¹² Zamagu'amo'ma hanavetige'na zamatroge'za zamagra zamavesi avariri'za vu'naze. ¹³ Tamagra nagri vahe'mota

keni'a nentahinkeno, Israeli vahe'mota nagri kante'ma navaririta vanageno'a knare hugahie. ¹⁴ Nagra ame hu'na tamagri ha' vahera zamahe rava hugahue. Ha'ma renezmantaza vahera nazana rusute'na hara huzmagateregahue. ¹⁵ Ra Anumzamofoma zamavaresrama hunentaza vahe'mo'za agri avurera antri nehu'za tatapa hugahaze. Ana knazana eri vava hu'za vugahaze. ¹⁶ Hianagi knare zantfama hu'nea witi tami'nen negahaze. Ana nehu'na havefinti afi tumeri taminena neramu hugahaze.

82

Hankavezmima omne vahe'ene maka zanku'ma upa'ma nehaza vahe'ma zamagu'vazisia zagamere

¹ Anumzamo Agra mona kumapina vugota huno mani'nen, anumza mani'nonema huza nehaza kva vahetamima omerituma hu'za keagama nehazageno'a, nanekea refko nehuno antahintahi'a huama nehie. ² Tamagra nama'a zupa havizama nehaza vahe'mokizmia zamavesi nezmanteta, kefo avu'ava'ma nehaza vahera knare avu'avara hunezmantaze? ³ Hankavezmima omne vahe'ene megusa mofavre nagara zamaza nehuta, zamunte omne vahe'ene zamazeri havizama nehaza vahe'enena zamahokeho. ⁴ Zamunte omne vahe'ene maka zanku'ma upa'ma nehaza vahe'enena zamagu'nevazita kefo avu'ava'ma nehaza vahe'mokizmi zamazampintira zamahoketa zamavareho. ⁵ Hagi vahe'ma zamazeri havizama nehaza vahe'mota, mago zana antahita keta osuta hanimpi vano nehazageno, ama mopamofa

tra'amo'a tore'vare nehie. ⁶ Nagra amanage hu'noe, tamagra anumza mani'naze, ana makamota tamagra Marerirfa Anumzamofa mofavre mani'naze hu'na hu'noe. ⁷ Hianagi vahe'mo'zama nehazaza huta frigahaze. Mago'a kva vahe'mo'zama nehazaza huta frigahaze. ⁸ Anumzamoka otinka ama mopafi vahera keaga huzmanto. Na'ankure ana maka vahe'ma mani'nazana kagri vaheke'za mani'naze.

83

Anumzamoka kea osura omanio huno hu'nea zagamere

¹ Anumzamoka kea osura omanige, agesa ankanire vahe knara hunka omanige, akohenka omanio. ² Ha' vahekamo'zama ranke rankema nehaza zana nontahino? Zamavesrama hunegantaza vahe'mo'zama zamavufaga rankema nehazana nonkano? ³ Vaheka'a zamahenaku amne vaheknama hu'za vano nehu'za, marerirfa fenozani'e hunkama hu'nana vaheka'a zamahenaku oku'a nanekea retro nehaze. ⁴ Zamagra amanage nehaze, enketa Israeli vahera mopazmifintira zamahehna hamneno hu'za nehaze. Zamahehna hanunkeno, ama mopafina Israeli vahe zamagia omnenige'za mago'ane antahi ozamisaze. ⁵ Zamagra mago zamarimpa hu'za ana nanekea retro nehu'za, kagri'ma ha'ma regante'naza nanekea huhagenerafi'za huvempa nehaze. ⁶ Hagi ana nanekema nehaza vahetamina Idomu vahetmima, Ismaeli vahetmima, Moapu vahetmima, Hagri vahetmima, ⁷ Gebali vahetmima, Amoni vahetmima, Ameleki

vahetmima, Filistia vahetamine, Tairi
 rankumapi vahe'mo'zane anara hu'naze.
⁸ Asiria vahe'mo'zanena anampina efre'za Loti
 agehe'mokizmia hankave zami'naze. ⁹ Midieni
 vahe'ma huzmante'nanaza nehunka, Kisoni
 tirampima Siserane Jabininema huznantenana
 zana huzmanto. ¹⁰ Ana vahetmina Endori
 mopafi zamahehna hankeno zamavufagamo'ma
 anampima kasri'neankna hino. ¹¹ Zamatrege'za
 hankavenentake vahe'zmimo'za Orebike
 Zebikema hu'na'aza hu'za nefrinkeno, ugagota
 kva vahe'zmimo'za Zebake Zalmunakema
 hu'na'aza hu'za friho. ¹² Na'ankure zamagra
 hu'za, Anumzamo'ma traza ne' afu'tmima
 kegavama nehia mopa aheta hanaregahune
 hu'za hu'naze. ¹³ Anumzamoka zamahe panani
 huge'za kagikagi zahomo kugusopa eri harafi
 huno freankna nehu'za, zaho'mo witi hona eri
 hareno viankna hiho. ¹⁴ Zamatrege'za zafafi afe
 taginteankna hu'za nerenkeno, agonafi afe'ma
 tagintegenohagna hagna huno teankna hiho.
¹⁵ Ununko huntegenonezmavrarino keonke'zana
 eri tasagihu agumpi agumpi huno zamazeri
 korora hino. ¹⁶ Zamazeri zamagaze huge'za tusi
 zmagazegu nehu'za, Ra Anumzamoka kagifi
 eme anterami'za mani'neza kamage anteho.
¹⁷ Zamazeri zamagaze nehunka, zamarimpa
 zamazerigna huvava huge'za zamagazegu
 nehu'za friho. ¹⁸ E'ina huge'za Ra Anumza
 mani'nane hu'za kage'za antahi'za nehanageno,
 maka mopafi vahe'mo'za kagrake'za Marerirfa
 Anumzana mani'nane hu'za ke'za antahi'za
 hugahaze.

84

Ra Anumzamofu nonkumapi umanisuegu nagesa antahi vava nehue hu'nea zagamere

¹ Monafinka Sondia vahe'mokizmi Ra Anumzamoka nemanina kumakamo'a hentofaza hu'ne. ² Ra Anumzamofu mono nompima mani'zankura nagu'areti hu'na navesinavesi nehue. Nagra nagu'areti'ene, maka navufgareti'enena muse nehu'na ranke hu'na kasefa huno mani'nea Anumzamofona zagamera hu'na agi'a ahentesga hugahue.

³ Kisve namamo'zane suvi namamo'zanena kresramna vu ita tava'onte nozmia kine'za amura ante'za mofavre'zmia azeri'nena nehaze. Monafi sondia vahe'mofu Ra Anumzamoka nagri kini mani'nenka, Anumzani'a mani'nane.

⁴ Ra Anumzamoka kagri nompima nemaniza vahe'mo'za muse nehu'za, zagamera hu'za kagia ahentesga huvava hugahaze. ⁵ Ra Anumzamokaregati'ma hankavema e'neriza vahe'mo'za muse nehanageno, Saioni agonare'ma vu'za mono'ma ome hugante'naku'ma zamagesa are'are'ma nehaza vahe'mo'za muse hugahaze.

⁶ Hagi balsam zafamo'ma hu'nea Baka agupofima rugitagi'zama vanu'za, ana agupofinti'ma tima hanatiaza hu'za maka zana eri kasefa hugahaze. E'ina hanigeno ko'ma arania zamo'a, kerifina timo'a avitegahie.

⁷ Anama nevu'za ome hankavetime vu'za hanavenentake vahetami Ra Anumzamofu avuga Jerusalemi kumatera uhanatigahaze. ⁸ Ra Anumzana Hankavenentake Anumza Jekopu Anumzamoka nunamuni'a antahinamio.

⁹ Anumzana tagri hanko mani'nananki, masavema taginka frenentenka

huhamprinte'nana kini ne'mofona kavuntenka negenka kegava hunto. ¹⁰ Magoke knama Kagri mono nompima mani'zamo'a, tausen'i'a knama megi'ama mani'zana agatere'ne. Kefo avu'ava'ma nehaza vahe'mofo, nompima knare nomani'zama mani'zana atre'na, Anumzamoka nomofo kafante'ma mani'suana knare hugahie. ¹¹ Na'ankure Ra Anumzamo tagrira kegava huneranteno masati mani'ne. Agra'a asunku hunezmanteno razmagia nezamie. Fatgo zamavu zamavama nehaza vahe'mokizmia knare zantamina azeori nezamie. ¹² Monafi hankavenentake sondia vahe'mokizmi Ra Anumzamoka, kagrite'ma zamentintima nehaza vahe'mo'za muse hugahaze.

85

Anumzamoka tazeri kasefa huo hu'nea zagamere

¹ Ra Anumzamoka mopaka'a azeri knare hu'nane. Kagra etenka Jekopu nagamofo fenozana erinte avitente'nane. ² Kagra vaheka'amofa kefo avu'ava zana atre'nezmantenka, maka kumizmia refite zmante'nane. ³ Krimpa akama nehegenka azenerinka, krimpa ahezamo'ma tevenefa'ma nehigenka krimpa aheozmante'nananki azeri'nane. ⁴ Anumzana tagu'vazi ne'moka krimpa aherantenka kea orasunka, ete tazeri knare huo. ⁵ Kagra krimpa aherante vava hunka vugahampi? Kagra vahetmima forehu anante nante'ma hu'za vanaza vahera krimpa ahezmantegahampi? ⁶ Kagra ete tazeri kasefara

hananketa, vaheka'amota kagrikura musena huta ovanuno? ⁷ Ra Anumzamoka vagaore kavesizana, taveri nehunka tagu'vazio. ⁸ Ra Anumzana Agra Anumzamo'ma haniankea nagra antahi soe hugahue. Na'ankure Agri kema antahiza amagama nentaza vahera rimpa fru nezamie. Hagi ana atre'za neginagi zamavu'zmavara ete osiho. ⁹ Hagi Anumzamofoma koro'ma hunente'za agri agoragama nemaniza vahera tamage huno zamagu vazigahie. Ana hanigeno tagri mopafina Agri masazamo'a avitegahie. ¹⁰ Vagaore avesizamo'ene tamage nanekemo'enena eme tutagiha nehakeno, fatgo avu'avazane, arimpa fruzamo'enena eri mago hu'na'e. ¹¹ Hugahuema hu'nea kema amage'ma anteno ana zama hu' avu'avazamo'a mopafinti hageno atiramigeno, fatgo avu'avazamo'a monafinkati ke fenkma atreno nege. ¹² Ra Anumzamo'a knare'ma hu'nea zana tamisigeno ama mopafina nezamo'a amporesigeta vasagegahune. ¹³ Fatgo avu'avazamo'a vugota huno nevuno kama vania kana retro huno vugahie.

86

Anumzamoka vagaore kavesizamo'a rankrerfa hu'ne huno Deviti asunte'nea zagamere

¹ Ra Anumzamoka kagesa antenka nunamu keni'a antahinka nona hunanto. Na'ankure nagrira kna nami'za nazeri haviza nehazage'na, maka zankura atupa nehu'na, naza hugara osu'noe. ² Anumzamoka kegava nagrira

hunanto. Na'ankure kagri kavariri fatgo nagra nehue. Kagrite'ma namentintima nehua Anumzanimoka eri'za vahekamo'na nagu'vazio.

³ Ra Anumzamoka kasunku hunanto, na'ankure maka kna kagritega nunamuna huvava nehue.

⁴ Ra Anumzamoka eri'za vahekamo'na nagu'afina muse'za antenanto, na'ankure kagritega nunamuna nehu'na monora hunegantoe.

⁵ Ra Anumzamoka kagra knarezantfa hu'nanankinka kumizmia atrezmante'naku retro hu'nane. Zamazama hananegu'ma kagri'ma kantahigaza miko vahe'mokizmia vagaore kavesizanu ante avite'nezmantane.

⁶ Ra Anumzamoka kagesa antenka nunamu ke'ni'a antahinamio. Kasuraginentenka nazama huogu'ma krafama nehua krafageni'a antahinamio.

⁷ Hazenke knafima ufresuna kagritega nunamuna hanugenka, nunamu keni'a antahinamigahane.

⁸ Ra Anumzamoka kagrikna anumzana magore huno omani'ne. Kagrama nehana kna kagu'vazana mago'a anumzantmimo'za osugahaze.

⁹ Mika kokankoka vahe'ma tro'ma huzmante'nana vahe'mo'za Ra Anumzamoka kavuga e'za monora eme hunegante'za ruotge'ma hu'nea kagia ahentesga hugahaze.

¹⁰ Na'ankure kagra knarezantfa huno mareri agatere'nea kavu'kvaza erifore nehane. Kagrake'za Anumzana mani'nane.

¹¹ Ra Anumzamoka kavukva zanka'a rempi hunamige'na, tamage nanekeka'a amage antena va'nenno. Nagu'a nazeri agru huge'na, kagri kagigura koro hunte'na agorga mani'nenno.

¹² Ra Anumzana nagri Anumzamoka nagu'areti

hu'na susu hunegante'na, zagamera hu'na kagia ahentesga hugahue. Kagi'a ahentesga huvava hu'na vugahue. ¹³ Na'ankure Kagrama navesi'nantenka knare'ma hunenantana zamo'a rankrerfa hu'ne. Kagra fri vahe kumapinti nagu'vazi'nane. ¹⁴ Hazenke vahe'mo'za ha'renantaze. Vahe'ma zamahe'za zamazeri havizama nehaza vahe'mo'za nahe fri'za nehu'za, Kagrira kagefenkami atre'za kage amneza nehaze. ¹⁵ Hianagi Ra Anumzana kagra keke nehunka kasunku hu Anumza mani'nanankino, vagaore kavesizanu knare hunerantenka, ame hunka krimpa ahenorantenka, kema hu'nana kema avaririnka ana zama hu kavukva zamo'a kagripina avite'ne. ¹⁶ Ra Anumzamoka kavugosa hunaminka, kasunku hunanto. Eri'za vaheka'amofona hankavea neminka, eri'zama erinegantea a'mofo nemofona agu'vazio. ¹⁷ Ra Anumzamoka nagri'ma navesi nenantana zamofa avame'zana naveri huo. E'ina hugeno zamavaresrama hunentaza vahe'mo'za nege'za zamagazegura hugahaze. Na'ankure Ra Anumzamoka knarera hunenantenka naza nehane.

87

Ra Anumzamoka vagaore kavesizamo'a rankrerfa hu'ne hu'nea zagamere

¹ Ruotge agonarera Ra Anumzamo'ma tro'ma hu'nea rankumara me'ne. ² Agra mago'a rankuma'ma Israeli mopafima me'nea rankumatmima avesima nenteama'a agatereno Jerusalemi rankumara avesinde. ³ Anumzamofa rankuma'mokagura vahe'mo'za

hentofa kege hunegantaze. ⁴ Nagri'ma ke'za antahi'zama hu'naza vahe'ma antahima nezamisuna, Isipi vahe'ma Babiloni vahe'enena zamagia ahentesgahue. Filistiane Tairi kuma'ene Itiopia kuma'enena ana zanke hu'na zamagia ahentesgahue. Ana maka'mo'za Jerusalemi kumapi vahe ase'za manigahaze! ⁵ Ana hugahianagi Jerusalemi kumapima nemaniza vahekura amanage hugahie, maka Jerusalemi kumapima fore'ma huta nemaniza vahe'mota, muse huta knare nomani'zante nemanisageno, Marerirfa Anumzamo'a ana rankumara Agra'a eri hanavetisigeno meno vugahie. ⁶ Ra Anumzamo'ma vahe zamagima kreno evanuno'a Agra amanage hugahie, zamagra Jerusalemi kumapi kasezmantege'za, zamagra ana kumapi vahe mani'naze huno hugahie. ⁷ Zgame nehaza vahe'mo'zane konkema neraza vahe'mo'zanena amanage hu'za zagamera hugahaze, Tagrama musema nehuna zamo'a, Jerusalemi kumapinti ne-e, hu'za hugahaze.

88

Feru'ene kenage'enena Kagri kavuga krafagea nehue hu'nea zagamere

¹ Ra Anumzana naza nehunka nagu'ma nevazina Anumzanimoka, masare'ene haninena Kagri kavuga nunamuna nehue. ² Nunamuma nehua nunamu keni'a nentahinka, naza huogu'ma krafagea nehuana antahinaminka naza huo. ³ Na'ankure nomanizanifina hazenke zamo'a avinetenno, navareno fri vahe kuma tava'onte nevie. ⁴ Fri'zage'zama matipima

ome asenezmantaza vahekna hu'noe. Nagra hanaveni'a omane vahe kna hu'noe. ⁵ Zamagra fri vahe amu'nompi natrazage'na, fri' vahe'ma matipima asentegenoma maseankna hu'na mase'noe. Ana hugenka Kagra kazana antenka kegava huonante natranke'na haviza hu'noe. ⁶ Kagra amefenkame tami'nea kerimofona aro'are, hanintirima hu'nefi natre'nane. ⁷ Krimpama ahezamo'a narentrako huno urami'ne. Hagerimo'ma hianza hunka rugnafu knafu hunka naherava he'nane. ⁸ Roneni'aramina nagritetira renatitrinke'za vu'za e'za nehu'za zamago atenante'naze. Nagra frekani'a omanege'na krifu ahente'na manue. ⁹ Knazama eri'na zavi'ma atoazamo'a, navunumo'a navua resuhie. Mago mago knafina Ra Anumzamokama nazama hanankura kantahinegoe. Kasunku'ma hunantenka nazama hanankura kagritega nazana erisga nehue. ¹⁰ Kagra kagu'vazana hunka fri'nea vahera aza nehampi? Fri'naza vahe'mo'za fri'nazafintira oti'za zagamera hu'za kagia ahentesga hugahazafi? ¹¹ Frizage'zama matipima asezmente'naza vahe'mo'za vagaore kavesizanka'agura huamara hugahazafi? Huge keka'ama avaririnka hugahuema hu'nana zama nehana kavukva zankura keonke zamo'ma havizama hu'nefina huama hugahazafi? ¹² Kaguvazama zama hu'nana zantamina hanimpina ke'za antahi'za hugahazafi? Hifi frizage'za vahe'mo'zama zamage'ma akanizmantaza vahe'mo'za fatgo kavukva zankura keaga huge antahigamige hugahazafi?

¹³ Hianagi Ra Anumzamoka naza huogu kagritega krafagea nehue. Maka nanterana kagritega nunamuna nehue. ¹⁴ Ra Anumzamoka nahigenka nenatrenka, kavugosa rukrahera hunka kamefira hunenaminate? ¹⁵ Osi'ma mani'noregati'ma knazama eri'na e'noa zamo'a, kri eri'na fri'za hue. Kagra nazeri koro'ma hu' zanke hanke'na, rama'a knazampi mani'na oe. ¹⁶ Krimpa ahe'zamo'a ti hageankna huno narefi netegeno, nazeri namanoma vazina zamo'a nazeri haviza nehie. ¹⁷ Nanteranteti'ma agafama huteno tima hageno refite'nanteankna huno korozamo'a narefite'ne. ¹⁸ Ronenine navesimanentoa vahetaminena nagripintira zamavare hana hu'nane. Ana hankeno hanimo'a, nagri arone ase'ne.

89

Ra Anumzamofa vagaore avesizama'agu Etani hu'nea zagamere

¹ Ra Anumzamofa vagaore avesizama'agura nagra zagamera huvava hugahue. Hugahuema hu'nana kema avaririnkama hu kavukvazana huama nehanuge'za, forehu anante anante'ma hanaza vahe'mo'za antahigahaze. ² Na'ankure nagra amanage hu'na huama hugahue, Ra Anumzamoka vagaore kavesizamo'a mevava huno vugahie. Hugahuema hunana kema avaririnkama hu kavukvazamo'a monamo'ma nehiaza huno mevava hugahie. ³ Ra Anumzamoka hunka, Nagrama huhamprinte'noa eri'za ne' Deviti'ene huhagerafi huvempagea nehu'na, agri'ene huvempa kea hu'noe. ⁴ Devitiga kagripinti'ma fore'ma hu anante

anante'ma hu'za vanaza vahepintinke,
 kini vahera zamazeri fore huvava hu'na
 vugahue hunka hu'nane. ⁵ Ra Anumzamoka
 monamo'za knare huno mareri agatere
 kavukva zanka'a husga hunegantesage'za,
 hugahuema hu'nana ke'ma avaririnkama
 hu kavukvazana, atruma hu'za mani'saza
 ankeri vahe'mo'za husga hugahaze. ⁶ Iza
 monafima nemanizafintira Ra Anumzanknara
 hu'ne? Monafima mani'nea hanavenentake
 ankeromo'a Kagri knara osu'ne. ⁷ Marerirfa
 ankeri vahe'mo'za, Anumzamofonkura kesga
 hu'za koro hunentaze. Anumzamo'a Agri'ma
 tra'are'ma manigaginte'naza ankeri vahetmina,
 zamagatereno mareri agatere'nea Anumza
 mani'ne. ⁸ Ra Anumzana Monafinka Sondia
 vahe'mofo Anumza mani'nane! Kagrikna
 hankave Anumzana omani'ne. Ra Anumzamoka
 kagra hankavenentake Anumza mani'nenka,
 hugahuema hu'nana kema avaririnkama hu
 kavukvazamo'a kazeri kagi'ne. ⁹ Kagra knafu
 knafu'ma nehia hagerina kegava hu'nane.
 Hagerimo'ma knafu knafu'ma higenka, Kagra
 zamaherava nehane. ¹⁰ Rehapu'e hu'zama
 nehaza tusi'a osifave krerfama hagerimpima
 nemanina osifavea, Kagra asenia rupraro
 vazinka ahe'nane. Hankavenentake kazanuti
 ha' vaheka'a zamahe panani hu'nane. ¹¹ Ra
 Anumzamoka mona kagri su'a megeno, mopa
 kagri su'a me'ne. Hagi maka ama mopafima
 me'nea zantamina maka kagrike zantmi
 me'neankinka, kagrake tro huzmante'nane.
¹² Kagrake'za noti kazigama me'nea zantamina
 tro nehunka, sauti kazigama me'nea zantamina

tro hu'nane. Tabori agonane Hemoni agonanemokea musena nehuke, zagamera huke kagia ahentesga neha'e. ¹³ Anumzamoka kazamofona hihamu hanave'amo'a agatere'ne. Kazamo'a tusiza huno hanavenentake hu'ne. Tamaga kaziga kazamo'a mareri agatereno hankavenentake hu'ne. ¹⁴ Fatgo avu'avazane, maka zama fatgoma huno'ma refkohu avu'avazamokea kinima mani'nana traka'amofotra me'na'e. Vagaore kavesizamo'ene tamage nanekekamo'enena kavuga neva'e. ¹⁵ Ra Anumzamofoma mono'ma hunente'za muse zagame'ma nehaza vahe'mo'za muse hugahaze. Na'ankure zamagra Ra Anumzamofona Agri masa zampi vano nehaze. ¹⁶ Kagri kagirera nanteranteti agafa hu'za musena nehazageno, vuno kinaga omese'ne. Fatgo kavukva zanka'amo'a zamagrira zamazeri muse nehie. ¹⁷ Kagra masanentake hihamu hankavezmi mani'nane. Na'ankure kagra muse hurantenka hankavea neraminketa, tagra hankavenentakera nehune. ¹⁸ Ra Anumzantimoka Kagra tagri hanko mani'nane. Israeli vahe'mofo Ruotge'ma hu'nea Ne'mo'a Agra kinia tami'ne. (2 Samuel 7:8-16) ¹⁹ Korapara Kagri'ma kazigazima hu'za negavariri'za tagehemofona, ava'nafi nanekea amanage hunka zamasami'nane, Nagra hankavenentake sondia azeri oti'noe. Nagra amne vahepinti vahetmimofo kini manigahane hu'na huhamprinte'noe. ²⁰ Nagra eri'za vahe'ni'a Deviti hakena erifore hu'noe. Nagra ruotge masave anumpina taginte'na, azeri ruotge hunte'noe. ²¹ Nagra nazanu

hagaza nemi'na, hihamu'ane nazanu azeri
 hankavetigahue. ²² Ha' vahe'amo'za revatga
 osuge, kefo avu'ava'ma nehaza vahe'mo'za
 azeri fenkamia otregahaze. ²³ Agri avuga ha'
 vahe'aramina zamahe'na rehapatinetre'na,
 zamavaresrama hunentaza vahera zamahehna
 hugahue. ²⁴ Nagra avesinte vava nehu'na, agrane
 mani'nenugeno nagri nagifinti hankavea erino
 ome hankavetigahie. ²⁵ Hihamu amisugeno
 Mediterenia hagerinteti vuno, zage hanati
 kaziga Yufretis tirantema uhanati'nea mopa
 kegava hugahie. ²⁶ Ana hanugeno Nagrikura
 amanage hugahie, Kagra Nenfaga mani'nenka,
 nagri Anumza mani'nanankinka, nagri
 naguvazi Have mani'nane huno hugahie.
²⁷ Nagra azeri nagonesa mofavre sa'nenana,
 maka ama mopafina hankavenentake kini
 ne' fore huno manigahie. ²⁸ Nagra vagaore
 navesizanu, navesinte vava hu'na nevuna,
 huhagerafi huvempa ke'ni'a eri tamage hugahue.
²⁹ Agripinti'ma fore hu anante anante'ma hu'za
 vanaza vahera kegava huzmante'nanena, kini
 tra'amo'a monagna huno mevava huno vugahie.
³⁰ Hianagi agripinti fore hu anante anantema
 hanaza vahe'mo'zama nagri kene kasegenema
 novaririza, kasegeni'a novaririsaza, ³¹ tra keni'a
 ruhanetagi'za, kasegenima ovaririnazana,
³² Nagra ana kumizmirera sefu nezmi'na, ke'nima
 rutrage'narera knazana zamigahue. ³³ Hianagi
 Nagra navesinte vava nehu'na, agri'enema
 huvempama hu'noa keni'a ruha'ontagigahue.
³⁴ Huge huhagerafi'noa keni'a ruha'ontagige,
 magore hu'na kema hu'noa kea ete'na eri

otregahue. ³⁵ Nagra ruotge hu'nea huvempage Devitina hunte'noankina, havigea osugahue. ³⁶ Deviti nagapintike kini vahera manivava hu'za vanageno, kini tra'amo'a zagemo'ma nehiaza huno mevava huno vugahie. ³⁷ Ikamo'ma monafima me'nenoma, huama'ma huno neviaza huno, tra'amo'a mevava huno vugahie. ³⁸ Hianagi menina kavresra hunentenka kamefi humine. Masavema anumpima tagintenka kinima azeri oti'nana nera krimpa ahentane. ³⁹ Eri'za vaheka'anema huhagerafi'nana huvempa kea kamefi huneminka, kini fetori'a kugusopafi zafitre'nane. ⁴⁰ Agu'ma nevazia kuma have keginaramina, maka ahe fragu vazinetrenka, fraki kuma'a eri haviza hutre'nane. ⁴¹ Maka vahe'ma ana kante'ma enevaza vahe'mo'za arohure'za keonke zama'a eri hana nehazageno, tavaoma'arema nemaniza kini ne'mofona kizazokago ke hunte'naze. ⁴² Ha' vahe'aramina hankave zaminke'za hara hugate'nere'za, musenkase nehaze. ⁴³ Ha'ma nehia bainati kazinknoma'a eri amnezankna nehunka, ha'ma nehigenka kamefi huminka aza osu'nane. ⁴⁴ Kagra marerirfa konariri'a eri netrenka, kini tra'a mopafi eri akaha hutre'nane. ⁴⁵ Kagra ame hunka zahufafi azeri ozafa nerenka, azeri agaze hu'nane. ⁴⁶ Ra Anumzamoka nama'agna fraki vava hunka vugahane? Krimpa ahe'zamo'a nama'gna teveareno vugahie? ⁴⁷ Kagesa antahio, nagra zazatera mani'na ovugahue. Vahe'ma tro'ma hurante'nanana, amne'za mani'none. ⁴⁸ Mago'mo'e huno mani vava huno ovugahianki, maka frisuna vaheke

mani'none. Mago'mo'e huno fri'zana agatereno fregara osu'ne. ⁴⁹ Ra Anumzamoka iga vagaore kavesizana me'negenka anara nehane? Kagra huvempama Deviti'ma hunentenka, kavesinte vava hugahue hu'nane. ⁵⁰ Ra Anumzamoka eri'za vaheka'amo'na huhavizama hunenantazana antahio. Rama'a vahe'mo'zama huhavizama hunenantaza kea nagu'afi erinte'na vano nehue. ⁵¹ Ra Anumzamoka ha' vahekamo'za kizazokago ke hunenantaze. Anumpima masavema tagintenka kinima azeri oti'nana nera, vuno eno'ma hirega hunte'za ki'za zokago ke hunentaze. ⁵² Ra Anumzana ragi amivava hugahune. Tamage, tamage.

90

Namba 4 zagame avontafere

Anumzamofu vahe'mo Mosese hu'nea nuna-mune

¹ Ra Anumzamoka fore hu anante anante huno'ma e'nea vahepina, kagra kumati'gna hunka maninka e'nane. ² Agonaramina forera osu'negeno, ama mopane kokanema tro'ma osu'nenka, ko maninka e'nana Anumzankinka eseteti'ma agafama huno atupare'ma uhanati'neana Kagrake'za Anumzana mani'nane. ³ Vahera zamazeri rukrahe hanke'za ete kugusopafi nevazagenka amanage nehane, tamagra fri vahe mani'nazanki, ete frita kugusopa seho hunka nehane. ⁴ Na'ankure 1 tauseni'a kafumo'a, kagri kavurera amneza me'neankino, mago knamo'a sondia vahe'mo'ma kenage'ma kvama krino mani'negeno ame huno

eviankna hu'ne. ⁵ Avanama ke'nea zamo'ma vahe antahintahifinti'ma ame huno fanane hiankna hunka vahera ahe nefrine. Vahe'mo'za nanterama trazama hageno mareriankna nehaze. ⁶ Nanterana tra'zamo'a amosrea ahetenno, kinagama segeno'a hagege nehie. ⁷ Ra Anumzamoka krimpama aherantanketa hagege nehuta, kasima vazinerantanketa, tagra tusi tagogogu nehune. ⁸ Ra Anumzamoka kumitia kavuga eri fanara huntankeno, oku'a nehu'na kumitimo'enena kagri masare amate me'negenka negane. ⁹ Tagra maka kna kagri krimpa hezampi manita nevuta, tasimu'ma anteanakna huta ame huta fanane nehune. ¹⁰ Kafuma manita vanuna kafua, 70'a kafu tami'nane. Hanki tavufgamo'ma knare'ma huno me'nigeta, amne 80'a kafuzagea manigahune. Hianagi knare kafuma manita vanumpina, tatazamo'ene hazenke zamo'enena avitenno nevanigeno, kafu zagetimo'a ame huno evanigeta fanane hugahune. ¹¹ Krimpa ahe'zamofa hihamu'a, iza mago vahe'mo'a antahino keno hu'ne? Na'ankure krimpa ahe'zamo'a, rankrerfa hu'neanki'za kagoro hugantega vahe korora hunegantaze. ¹² E'ina hu'negu manitama vanuna kna'a rempi huramigeta knare antahi'zana enerita manita vamnenno. ¹³ Ra Anumzamoka ete tagritega eno. Hago zazate krimpa ahezmantenka avega antenka ananki, eri'za vaheka'aramina kasunku huzmanto. ¹⁴ Maka nanterana vagoore kavesizanteti tazeri knare hugeta, maka knama manita vanunana, musena nehuta zagamera huta musena huvava hamnenno. ¹⁵ Tazeri havizama hunka e'nana avamente, ete tazeri muse huo.

Hazenkefima manitama e'nona kafumofa avamente tazeri muse huo. ¹⁶ Ra Anumzamoka eri'za vahekamota ranra zama tro'ma hu'nana zana taveri hananketa negesunkenka, anahu kna hunka hihamu masaka'a mofavre nagatimofona eriyama hananke'za kegahaze. ¹⁷ Ra Anumzana tagri Anumzamoka kavesizamo'a tagri'ene me'neno, maka zama hanunana eri knare nehinketa, maka zampina knare hanune.

91

Anumzamofonte'ma zamentintima nehaza vahe'mofo zagamere

¹ Hagi iza'o marerisa Anumzamofa hankavefima ome frakino manisia vahera, Hankavenentake Anumzamo refitentenigeno ana tonapinka manigahie. ² Hagi nagra Ra Anumzamofonkura amanage hu'na huama hugahue. Ra Anumzamo'a nagrama frakisanua kuma'ene, nagu'vazisania kuma mani'neno, nagri Anumza mani'neanki'na agrite namentintia hugahue. ³ Na'ankure Anumzamo'a kva hugante'neankino, katre'nigeno vahe'mo'zama krifuma anaginte'naza krifumo'a kaze'orisigeno, vahe'ma ahe nefria krimo'a kazeri havizana osugahie. ⁴ Ageko'nafi kavre frakinkenka mani'nesnankeno, agekona'anu refitegantegahie. Anumzamofona vagaore huvempa ke'amo'a, hankone hankave vihugna hu'neankino kegava hugahie. ⁵ Kenage'ma kamano vazi'zama fore'ma hania zankura korora osuo. Ana nehunka masare'ma kevemo'ma ame huno eno kazeri havizama huzanku'enena korora osuo. ⁶ Ana zanke hunka kenage'ma rankrima esania

zanku'enena korora nosunka, hazenke zamo'ma eno masare'ma eme kazeri haviza hunaku'ma hania zanku'enena korora osuo. ⁷ Hagi kagri tva'ontera 1tauseni'a vahe nefrisanigeno, kazantamaga kaziga 10 tauseni'a vahe frigahaze. Hianagi ana zamo'a kagriterera erava'o osugahie. ⁸ Kagra kavufinti negesnankeno, havi zamavu zamava'ma hu'naza vahera Anumzamo'a zamazeri haviza hugahie. ⁹ Hagi kagra Ra Anumzamofoma fraki kumaka'a eri nesenka, Marerisa Anumzamofoma, kagu'vazi kumaka'ama eri sesanana, ¹⁰ magore huno havi zamo'a kazeri havizana nosanigeno, mago krimo'a kagrama manisana nonku'ma ka'arera erava'o osugahie. ¹¹ Na'ankure inantego vunka enkama hananana, Ra Anumzamo'a ankeri vahe'a huzmante'na e'za, maka kama vanoma hanampina eme kegava hugantegahaze. ¹² Ana nehu'za zamazanu kavresga hanageno, havemo'a kagiafina oregahie. ¹³ Laionine osifa'venena zanazeri fenkami netrenka, hankave laionine ha' osifa'venena (cobra) kagiafi zanazerintenka zanare hapatigahane. ¹⁴ Ra Anumzamo'a huno agrama avesi nenantegu hu'na, agrira agu'nevazi'na, Nagri nagima keno antahino'ma hu'negu hu'na, kegava huntegahue. ¹⁵ Hagi nagritegama nunamunke'ma hanige'na, agri nunamua antahimigahue. Ana nehu'na knafima mani'nesige'na, agrane magoka manine'na, aza nehu'na ra agi amigahue. ¹⁶ Ana nehu'na mizama'ama amisanuana, kna'a erinte za'za hanugenno muse huno nemanisige'na, Nagra vahe'ma agu'ma nevazua hanaveni'a eri averi

hugahue.

92

Mani fruhu kna Sabati knare'ma hanaza zagamere

¹ Ra Anumzamoka susu huno humusema hugante zamo'a knare'zantfa hu'neanki'na, Marerisa Anumzamoka zagame hu'na kagi'a ahentesga hugahue. ² Anumzamoka maka zupama tagri'ma kavesirantenka knare'ma hunerantana zankura nanterana huama nehu'na, maka zupama kage'ma kaninorantana zankura kinaga huama nehu'na, ³ Laeriema nehaza zavenareti'ene, hapureti'ene zavena nehe'na, zagamera hu'na kagia ahentesga hugahue. ⁴ Ra Anumzamoka Kagrama eri'nana eri'zanu nazeri muse hankena, Kagrama kanzanu'ma tro hunka eri fore'ma hu'nana zankura zagamera hu'na musena nehue. ⁵ Ra Anumzamoka kagra ra eri'za eri'nanankino, Kagri antahi'zamo'a rankrerfa huno amefenkame tami'ne. ⁶ Antahintahima oma'ne vahe'mo'a ana zana keamara nosigeno, neginagima nehia vahe'mo'a ana zana antahiamara nosie. ⁷ Havi avu'ava zama nehaza vahe'mo'za, trazamo rehakarufeno mareriaza hu'za nehagesage'za, kefo avu'ava zama nehaza vahe'mo'za amosrema ahenteaza hu'za makazana antegahazanagi, kagra zamahe fanene hugahane. ⁸ Na'ankure Ra Anumzamoka kagi'a ahentesga hu vava hu'za vugahaze. ⁹ Ra Anumzamoka kagri ha' vahe'mo'za tamagerfa hu'za fanane nehanage'za, havi zamavu zamava'ma nehaza vahe'mo'za miko panani hu'za ufre efre hugahaze.

10 Hianagi afi bulimakaomofu pazivemo'ma hankavematiaza hunka, nagrira nazeri hankave ti'nane. Ana nehunka kasefa masavereti taginka nanuntera frenantanke'na musena hu'noe. 11 Nagra navufinti nezmagoge'za ha' vahenimo'za evu neramizageno, kefo avu'ava'ma nehaza vahe'mo'zama, ha'ma renenantaza vahe'ma, ha'ma huzmagaterazageno zavi krafama haza zana antahi'noe. 12 Hianagi fatgo avu'ava'ma nehaza vahe'mo'za, tofe zafamo knare zantfa huno hageno mareriankna nehu'za, sida zafamo Lebanoni mopafi hageno trette huno mareriankna hugahaze. 13 Zamagra Ra Anumzamofu nompfi hankre'naza zafagna nehu'za, tagri Anumzamofu kumapina zamagra knare'zantfa hu'za trette hu'za hagegahaze. 14 Fatgo vahe'mo'za tavava ozafa regahazanagi raga renente'za, zafa asi'namo trette huno kasefa kasefa nehiaza hu'za manigahaze. 15 Ana vahe'mo'za huama hu'za, Ra Anumzamo'a fatgo avu'ava'za nehia nekino, Agra hankave havetia mani'neankino Agripina havi avu'ava zana omne'ne hu'za hugahaze.

93

Anumzamo'a kini mani'ne hu'nea zagamere

1 Ra Anumzamo'a Agrake kinia mani'neni masanentake zaza kukena hu'ne. Hanave'areti kukena hu'neni hahunaku retro huno mani'ne. Ama mopa tro huntogeno hankavetino me'neankino, mago vahemo'e huno eri kazara osutfu hugahie. 2 Ra Anumzamoka kagra maka zana forera osu'negenka korapa

mani'nanankinka, kinia mani vava hunka neane.
³ Ra Anumzamoka hagerimo'a tusiza huno kranto kranto nehigeno, monagemo'ma hiaza huno timo'a ra agasasa nerie. Ana nehigeno hagerimo'a hanavetino kranto krantora nehie.
⁴ Ra Anumzamofu hanavemo'a hagerimo'ma eme runagrama neseno'ma, agasasama neriam'a agetereno tusi hankavenentake higeno, rama'a tintamimofu agasankenena agatere'ne.
⁵ Anumzamoka'ma ante'nana kasegea mago vahe'mo'a eri otregahie. Tamagerfa huno Ra Anumzamoka Kagri mono nonkamo'a ruotge huno mevava hugahie.

94

Anumzamo'ma havi vahe'ma azeri haviza ne-huno knare vahe'ma azeri so'ema hania zagamere

¹ Ra Anumzamoka kagri'ma ha'ma renegantaza vahera, kagra nona hunka zamazeri haviza nehana Anumza mani'nane. Ana hu'nananki krimpa ahe'zana eriam'a huge'za keho. ² Ama mopafima mani'ne'za zamavufaga rama nehaza vahera, otinka keaga huzmantenka refko hunezmantenka mizana zamio. ³ Ra Anumzamoka nama'agna kefo zamavu zamava'ma nehaza vahe'mokizmia zamatre'nanke'za musena huza maniza egahaze? Nama'a knazami me'ne? ⁴ Nama'a zupa kefo zamavu zamava'ma nehaza vahe'mo'za havigea nehu'za, kefo avu'ava'ma nehaza nama'a zupa zamavufaga erisga hu nanekea nehaze? ⁵ Ra Anumzamoka ana vahe'mo'za kagri vahera zamare hapa'neti'za, Nagri vaherema hunka

erisantima hare'nana vahera zamazeri haviza nehaze. ⁶ Ana vahe'mo'za kento a'nene megusa mofavre nagara zamahe nefri'za, ru mopareti'ma tagri mopafima emani'naza vahe'enena zamahe nefrize. ⁷ Ana vahe'mo'za hu'za Ra Anumzamo'a avua norage hu'za nehu'za, Jekopu naga'mo'za tagrama hu'na zantera Ra Anumzamo'a avua anteno norage hu'za nehaze. ⁸ Tamagra neginagi nehuta keontahi vahe mani'nazanki kama antahiho, ina zupa ama' antahi'zana erigahaze? ⁹ Vahe'motama tagesama tro hunte'nea Anumzamofona agesa ankani re'nefi? Vahe'mota tavuragama tro hunte'nea Anumzamofona, avua asuhu'nefi? ¹⁰ Ama mopafi vahe'ma knama zamino zamazeri fatgoma nehia Anumzamo'a, zamavumrora anteno zamazeri fatgoa osugahifi? Ama mopafi vahe'ma rempi hunezamia Anumzamo'a antahi'zankura atupa hu'nefi? ¹¹ Ra Anumzamo'a vahe'mokizmi antahi'zama keno antahino'ma hiana, ana antahintahizmimo'a amnezankna huno zahoma huhu hutreankna hu'ne. ¹² Ra Anumzamokama azeri fatgoma nehunka kasege ka'afinti'ma rempima hunemina vahe'mo'a asomu erigahie. ¹³ Ana vahemo'ma knafima unefrogenka, kegava hunentenka arimpa fru neminka, kefo avu'ava'ma nehia vahe'mofo keria Anumzamoka kagra kafintenenka azerigahane. ¹⁴ Na'ankure Ra Anumzamo'a vahe'a amefira hunozamino, nagri nagare huno huhampari zamante'nea vahe'agino ozamatregahie. ¹⁵ Keagama refko'ma hanazana, fatgo avu'ava zante nege'za refko hugahaze. Ana nehanage'za fatgo avu'ava'ma nehaza vahe'mo'zama nege'za

amage antegahaze. ¹⁶ Hagi kefo avu'ava'ma nehaza vahe'mo'zama nazeri havizama nehanageno'a, iza nagritega anteno nagura nevazino, havi avu'ava'ma nehaza vahe'mo'zama nazeri haviza hu'zama nehanageno'a naza hugahie? ¹⁷ Hagi Ra Anumzamo'ma naza osiresina, nagra ko fri'na keonke zamofa agasankema omne fri vahe kumapi umanusine. ¹⁸ Nagrama hu'na regarari'na umasoema hugenka, Ra Anumzamoka vagoore kavesi zanteti knare hunantenka nazerisga hu'nane. ¹⁹ Narimpagna zamo'ma nazeri havizama hunaku'ma nehigenka, Kagra nazeri fru hunka nazeri hankavetinke'na, muse hu'noe. ²⁰ Fatgo avu'ava zama nosu'za, havi kasegema nente'za, vahe'ma zamaza hazage'zama kumi'ma nehaza kva vahe'mo'za Kaganena taragote'za nomanize. ²¹ Ana vahe'mo'za magopi atru hu'za kea anakite'za, fatgo avu'ava zama nehaza vahera zamahe frikea hu'za kna nezami'za, ke'zami omane vahera zamahe frinaku nehaze. ²² Hianagi Ra Anumzamo'a nagri vihuni'agino kegava hunantegahie. Anumzanimi'o'a nagrama frakinua havega mani'ne. ²³ Kefo avu'ava'ma nehaza vahe'mo'zama hu'naza kumira erino zamagri zamagumpi nenteno, ana kumi zamigu huno zamazeri havizana hugahie. Ra Anumzana tagri Anumzamo ana vahera zamazeri havizana hugahie.

95

Anumzamofa agima erisgama hanaza zagamere

¹ Enketa Ra Anumzamofona muse zagame huta agi'a ahentsga nehuta, tagu'ma nevazia Havegi Ra Anumzamofona ranke huta agi'a ahentesga hanune. ² Enketa Agri avuga vuta susu hunenteta, muse zagame huta agi'a ahentesga hamneno. ³ Na'ankure Ra Anumzamo'a marerisa Anumza mani'nenno, maka havi anumzantamina zamagatereno, ugota Kini mani'ne. ⁴ Ama mopafima kerima huno ame fenkame'ma urami'neregati'ma vuno, ame'nagame marerigatere'nea agonaregama vu'neana, ana maka Anumzamofa azampi me'ne. ⁵ Hagerina Anumzamo tro hu'negu huno, Agri suza me'ne. Ana zanke huno ho'mu mopa azanuti tro hu'ne. ⁶ Enketa kepri huta mono hunenteta, Ra Anumo'ma tagri'ma tro'ma hurante'nea ne' avuga tarena reta monora hutesune. ⁷ Na'ankure Agra tagri Anumza mani'neankino, sipisipi afu'tamima kegavama nehiaza huno kegava hurantegeta, Agri azampi mani'none. Ana hu'neanki, meninena tamagesa ante'neta Agri agerura antahiho. ⁸ Ra Anumzamo huno, Israeli vahe'mo'zama hagege kokampima ne-eza, Meriba kumaku'ma Masa kumarema nehaza kumatema, zamagu'a kafama erigi'naza zana huta tamagu'a kafana eri onkiho. ⁹ Hagi tamagehe'moza hagege kokampima manine'za, maka zama eri fore'ma hua zana ko ke'nazanagi, Nagri hanave kenaku renahe'za ke'naze. ¹⁰ Hagi 40'a kafumofa agu'afina nagote nezmantena amanage hu'na hu'noe, ama vahe'mo'za kana atre'za hazanegre'za, nagrama hihoma hu'na huzmantoa nanekea amagera nontaze. ¹¹ Ana'ma

hu'nazagu hu'na tusi narimpa ahenezmante'na, amanage hu'na huvempa hu'noe. Nagrama huama hu'na, tamisugetama ome mani fru hugahazema hu'noa mopafina uofretfa hugahaze (Hibru 4:3).

96

Anumzamo'ma so'e avu'ava'ma hunezmantea zagamere

¹ Tamagra Ra Anumzamofona kasefa zagame huntaho. Maka ama mopafima mani'naza vahe'mota Ra Anumzamofona zagame huntaho. ² Ra Anumzamofona zagame hunenteta, agi'a ahentesga hiho. Ana nehuta vahe'ma zamagu vazino etema nezamavarea zankura, maka knafina huama huta vahera zamasamiho. ³ Agri hiamu masazama'agura kokankoka vahera huama huta nezamasamita, hanavenentake eri'zama eri'nea zankura, huama huta maka vahera zamasamiho. ⁴ Ra Anumzamo'a maka zana agatereno tusi'a Anumza mani'neankino, Agrake ra agi'a erigahie. Maka havi anumzana zamagatere'neankita, Agrikuke'za korora huntegahune. ⁵ Na'ankure maka ama mopafima mani'naza vahe'mokizmi havi anumzantamina, amne zamazanteti tro hu'naza zantami me'naze. Hianagi anamifima me'nea monaramina, Ra Anumzamo agra'a tro hunte'ne. ⁶ Ra Anumzamo'a noma'afina rahi erino kinia mani'negeno, agri hiamune masa'amo'ene konariri'amo'enena noma'afina avite'ne. ⁷ Ama mopafima kokankokama mani'naza vahe'mota, Ra Anumzamofona husga hunenteta, agri

hihamu masa zama'aguenena husga huntetho. ⁸ Ra Anumzamo'a agrake ra agia erigara hu'neanki agi'a erisga nehuta, ofatamia erineta, agri mono nompina ufrehu. ⁹ Ra Anumzamofona ruotage huno masa nentake'ma hu'nea avasase zama'afi mani'neta monora huntetho. Maka ama mopafima mani'naza vahe'mota, agri avure mani'neta, kore hunenteta, tamahirahiku hiho. ¹⁰ Ama mopafima kokankokama mani'naza vahe'mokizmia zamasamita, Ra Anumzamo'a kini mani'ne huta hiho! Ama mopa tro huntegeni hankavetino me'neankino, mago zamo'a eri kazara osugahie. Agra ana nehuno maka ama mopafima mani'naza vahera, mago avamenteke refko huzmantegahie. ¹¹ Monane mopamokanena muse nehinkeno, hagerimokane tigu'ama me'nea zantami motanena, ranke huta Ra Anumzamofona husga huntetho. ¹² Hozamokane hozafima nehagaza ne'zamota, avo nehageta musenkase hiho. Ana nehanageta zafa ta'nopafima me'nea zafamota ranke huta muse zagamera hiho. ¹³ Na'ankure Ra Anumzamo'ma esaniana, ama mopafima mani'naza vahe eme refko huzmanteku egahianki, agri avuga ana zana hugahaze. Ama mopafi vahe'ma eme refko huzmantesiana, fatgo avu'ava zanteti'ene, ke tamage'areti'ene huno eme refko huzmantegahie.

97

Anumzamo ugota kini mani'nea hu'nea zagamere

1 Ra Anumzamo'a kini mani'neni maka zana kegava hu'ne huta, maka ama mopafima mani'naza vahe'mota muse nehinke'za, hagerimofu amu'nompima me'nea mopafima nemaniza vahe'mo'zanena musena hiho. 2 Hanintiri hu'nea hampomo'ene tapari'nea hampomo'ene azeri kagintegeni mani'ne. Fatgo avu'ava zanteti'ene mago avamenteki'ma refko'ma hu avu'ava zama'areti, kini tra'amofu trara anteni mani'ne. 3 Tevenefa'mo agri avuga hagana hagana nehigeni, maka asoparegati'ma ha' vahe'amozama eme regaginti'naza vahera teve zamareni tefanene nehie. 4 Agri kopasi'namo'a trege huni ama mopa remsa nehigeni, ama mopamo'ma ana zama negeni'a tusi ahirahi nere. 5 Anumzana ama mopama kegava hu'nea ne'mofu avuga, agonaramimo'za masavemo'ma ze'ze huni pakepake nehiaza hu'za pakepake hu'naze. 6 Anamima me'nea mona ramimo'za fatgo avu'ava zama'agu huama nehanageni, maka ama mopafima kokankokama mani'naza vahe'mo'za agri hihamu masazama'a negaze. 7 Hagi zmazantetima antre'za tro'ma hu'naza havi anumzamofu amema'are'ma mono'ma hunente'za, zamavufaga rama nehaza vahe'mo'za zamagazegu hugahaze. Ana nehanageni maka havi anumzantamimo'za, Anumzamofu avuga zamareni re'za mono huntegahaze. 8 Saioni kumamo'ene, Juda mopafima me'nea kumatamimo'za, anankema nentahi'za, tusi musenkase nehaze. Na'ankure Ra Anumzamokama keagama refko'ma hana zanku, anara hu'naze. 9 Na'ankure Ra Anumzana

Kagra Marerirfa Anumza mani'nenka maka ama mopa kegava hu'nane. Ana hu'nenka kagrake'za rankagia erinka, maka havi anumzantamina zamagterenka onagamu mani'nane. ¹⁰ Ra Anumzamofoma avesima nentaza vahe'mota, kumimofona tamefi humiho. Tamagu'areti'ma huta amage'ma nentaza vahe'mota, Ra Anumzamo'a kegava huramantegahie. Ana nehuno kefo avu'ava zama nehaza vahe zamazampintira tamagu vazigahie. ¹¹ Fatgo avu'ava zama nehaza vahera Anumzamo'a remsa hunezmanteno, zamagu'amo'ma fatgo hu'nea vahera musezana ante nezmantege'za muse nehaze. ¹² Anumzamofoma amage'ma nentaza vahe'mota, agrama hu'nea avu'ava zankura muse hunenteta, ruotage'ma hu'nea agigura susu hunteho.

98

Anumzamo maka vahe kini mani'nea hu'nea zagamere

¹ Ra Anumzamo'ma knare'nare zama erifore'ma hu'nea zanku huta, Agritega kasefa zagame huntetene. Agra tamaga kaziga hankavenentake azanteti'ene, ruotage'ma hu'nea azanteti'ene huno hara hugatere'ne. ² Ra Anumzamo'a Agrama vahe'ma zamagu'ma vazizama'a eriamana nehuno, maka kokankoka vahera fatgo avu'ava zama'a eri zamaveri hu'ne. ³ Agrama Israeli vahe'ma huvempa huzmanteno, maka zupa nagra navesi tamante vava nehu'na, namefira huozamigahue huno'ma huvempama hu'nea nanekegu agha antahi'ne.

Ama mopama ometre emetre'ma hu'neregama nemaniza maka vahe'mota, Anumzamo'ma tagu'ma vazi'nea zana ko ke'naze. ⁴ Maka ama mopafima nemaniza vahe'mota ranke huta Ra Anumzamofa agia ahentesga hiho. Mago zankura rekura osuta, ranke huta muse zagamera eri otita nehuta musenkasea hiho. ⁵ Hapu zavena nehenkeno knare ageru neranigeta, zagamera nehuta Ra Anumzamofona agi'a ahentesga hiho. ⁶ Ufenteti'ene sipisipimofa paziveteti ufena nereta, Ra Anumzana kini ne'mofa avuga ranke huta zagamera nehuta musenkasea hiho. ⁷ Hagerimokane, hagerimpima nemaniza zagaramimota tamagerura erintesga huta rantamageru riho. Anazanke huta ama mopamokane, agofetu'ma nemaniza zantamimota tamaganena anazanke hiho. ⁸ Ranra tintamimoza zamazana nehesageta, agonaramimota tamagerura eri mago huta musenkase zagamera hiho. ⁹ Na'ankure Ra Anumzamo'ma ne-eana ama mopafima nemaniza vahe refko huzmanteku ne-eankino, maka ama mopafima kokankokama nemaniza vahera fatgo avu'ava huno, mago avamenteke refkoa huzmantegahie.

99

Anumzamo ugagota kini mani'ne hu'nea zagamere

¹ Ra Anumzamo'a kini manino maka zana kegava hu'neanki, maka kokanko'ma nemaniza vahe'mota korora hunenteta tamahirahiku hiho. Agra serabimie nehaza ankerontremofa

amu'nompini kinitra' anteno onagamu mani'negeno, ama mopamo'a imi enerie. ² Saioni kumapina Ra Anumzamo'a tusi konariri'ane mani'nenom, maka kokankokama mani'naza vahetera Agra manisga huno mani'nenokegava hunezmante. ³ Maka ama mopafima mani'naza, vahe'mo'za ra huno so'e zantfama hu'nea kagia husga hunegante'za, kagrikura ruotage hu'ne hu'za hiho. ⁴ Hankavenentake'ma hu'nana kini ne'moka, fatgo avu'ava zanku kave'nesie. Kagraka'a fatgoma huno refko hu avu'ava zana eri agafa hu'nane. Ana nehunka Israeli vahera magoke avamente antenka fatgo avu'ava hunka refko hunezmantane. ⁵ Ra Anumzana tagri Anumzamofona agi'a ahentesga nehuta, agri agafi ome kepri huta monora huntesnune. Na'ankure agra ruotage hu'ne. ⁶ Hagi pristi eri'zama eneriza vahe amu'nompina, Mosesi'ene Aronikea pristi eri'zana eri'na'e. Agritegama nunamuma nehaza vahe amu'nompina, Samueli'a agrane nunamuna higeno, Ra Anumzamo'a nunamuzamia antahinezamino nona huzmante'ne. ⁷ Ra Anumzamo'a vimago hampompi mani'nenom, Israeli vahera keaga zamasami'ne. Ana hige'za amage anteho huno'ma zamasamia tra kene, kasegenena amage ante'naze. ⁸ Ra Anumzana tagri Anumzamoka nunamu zamia antahi zami'nane. Ana'ma hanke'za kagri'ma ke'za antahi'zama hazana, kumi atre zamante Anumza mani'nane hu'naze. Hianagi zamagrama kumi'ma hazagenka nona hunka zamazeri haviza nehana Anumza mani'nane. ⁹ Ra Anumzana tagri Anumzamofona

agi'a ahentesga nehuta, ruotage'ma hu'nea agona'afina monora huntesnune. Na'ankure Ra Anumzana tagri Anumzamo'a ruotage hu'ne.

100

Anumzamofoma agima ahentesgama hu zagamere

¹ Maka ama mopafima mani'naza vahe'mota musenkase huta zagamera nehuta Ra Anumzamofa agi'a ahentesga hiho. ² Ra Anumzamofona muse huta eri'zama'a erinteho. Agri avugama nevanuta, muse zagame huta viho. ³ Ra Anumzamo'a Anumza mani'ne huta keta antahita hiho. Agra'a tro hurantegeta agri vahe mani'none. Ana huta agri vahe mani'nonankino, sipisipi kva vahe'mo sipisipi kegava hunteankna huno kegava hurantegeta mani'none. ⁴ Agri kumapima ufre kahante'ma nevuta muse hume nevuta, unefreta agi'a ahentesga hiho. Ana nehuta susu huta muse hunenteta, ra agi'a ahentesga hiho. ⁵ Na'ankure Ra Anumzamo'a knare hu'negu agri vagaore avesizamo'a mevava huno vugahie. Hagi hugahuema huno hu'nea ke'are oti'nenno, fore hu anante anante'ma hu'za knane knanema mani'za aza vahera zamaza nehia Anumza mani'ne.

101

Kini ne' Deviti'ma huvempa hu'nea zagamere

¹ Ra Anumzamoka vagaore mevava kavesi zanka'agu'ene, fatgo kavukva zankura zagamera hugahue. Ra Anumzamoka zagame nehu'na kagri kagia ahentesga hugahue. ² Nagra kegava hu'na

mani'nena, fatgo avu'ava zanke hu'na vugahue. Ra Anumzamoka ina zupa enka, nagrira eme naza hugahane? Nagra nonifima manine'na, inankna zama hanuana fatgo avu'ava zanke hugahue.

³ Nagra vahe'ma agazema nemia havi avu'ava zantera navua ante'na onkegahue. Havi avu'ava zama nehaza vahe'mokizmi avu'ava zankura nago'nete. Ana hu'neanki'na ana vahe'enen rutragote'na omanigahue.

⁴ Akrahe krehe avu'ava zama nehaza vahera zamatre'nuge'za nagri tva'ontera omegahaze. Ana nehu'na kefo avu'ava zana namefi humigahue.

⁵ Tava'ozamire'ma nemaniza vahe'ma oku'ma zamazeri havizama nehaza vahera, ozmatre'na zamazeri haviza hugahue. Vahe'ma zamage fenkami netre'za zamavufaga ataneraza vahera ha' rezamantegahue.

⁶ Zamagu'areti'ma tamagama hu'za Anumzamofoma avariri fatgoma nehaza vahera, nagra kegava huzmantegahue. Iza'o hazenke'ama omne'nenia vahe'mo Nagri eri'zana erigahie.

⁷ Havigema hu'za vahe'ma rezmatgama nehaza vahera zamatre'nuge'za, nagri nompina mani'neza eri'zani'a e'origahaze. Havigema nehaza vahera zamatre'nuge'za, nagri noni'afina mago kankamuna zaminuge'za navuga omanigahaze.

⁸ Ama mopafintira kefo avu'ava zama nehaza vahera, maka nantera nagra zamahe fanene huvava hugahue. Anumzamofu rankumapima havi avu'ava zama nehaza vahera zamahe fanene hugahue.

*Vahe'mo'ma knazampima unefreno nehia
nunamu zagamere*

¹ Ra Anumzamoka nunamuni'a nentahinka, naza huogu'ma zavi krafama nehuana antahinamio. ² Kna zampima mani'nesugenka, kavugosa rukrahe hunka kamefira huonaminka, kagesa antahinamio. Ana nehunka naza huogu'ma kezankema nehanugenka, ame hunka naza huo. ³ Kumo'ma mareriteno ame huno fanane hiaza hu'na osi'a knafi mani'nenafanane hu'za nehugeno, zaferinanifintira teve rukru nehigeno, tevemo'ma tankanu'zama teganinkani nehiankna zaferinanimio'a nehie. ⁴ Zagemo'ma trazama temagigeno'ma hiaza huno nagu'amo'a evuramitfaza nehige'na, ne'zana onesanua nagesa nehie. ⁵ Karagi'ma ruazamo higeno, navufgamo'a zaferinare vuno ome kamare'ne. ⁶ Hagege huno vahe omani ka'ma kokampi komutomo'ma hiaza hu'na nagrake nemani'na, atrazageno haviza hige'za vahera nomaniza kumatamimpi, komutomo'ma manino vano hiaza nehue. ⁷ Kenagera navura mase'noanagi, antahintahimo'a eri'zana erivava hige'na, navura omase'noe. Ana hige'na nomofo agofetu'ma namamo agraku akoheno maniaza hu'na nemanue. ⁸ Nagri ha' vahe'mo'za maka zupa kiza zokago ke hunantevava nehaze. Ana nehu'za vahe'ma kema nezamasu'za zamazeri havizama hunakura, nagri nagi ahenente'za hu havizana hunezmantaze. ⁹ Ne'zama neaza hu'na ta'nefara nene'na, tima nofina navunumo'a eramige'na, navunu'ene tina ne'noe. ¹⁰ Na'ankure kagra tusi krimpa ahenantenka, nagrira nazeri

sga hutenka matevu natre'nane. ¹¹ Nagra za'za kna omanigahuankino knanimo'a ame huno kinaga fre zagemofo amema'amo'ma hiaza huno vaga neresnige'na, trazamo osapareaza hu'na hagege nehue. ¹² Hianagi Ra Anumzamoka kagra kinia maninka za'zate kegava hunka vugahane. Ana hu'nesnanke'za henkama mani'za vanaza vahe'mo'zanena ana zankura zamagera okanigahaze. ¹³ Kagra otinka Saioni rankumakura kasunku huntegahane. Na'ankure kagrama kasunku'ma huntenska aza hugahue hunkama huhampri'nana kna fatgo eankinka, kavesinentenka aza hugahane. ¹⁴ Saioni kumapi havemo'a haviza hu'neanagi, eri'za vahekamo'za tusiza hu'za avesinte'naze. Ana nehu'za menima kumamo'ma haviza higeno kugusopa moke'ma hu'nea zankura, tusiza hu'za zamasunku hunentaze. ¹⁵ Maka kokankoka mopafima mani'naza vahe'mo'za Ra Anumzamoyo agigura zamahirahiku nehu'za, avuga zamarena regahaze. Ana nehanage'za maka ama mopafi kini vahe'mo'za Anumzamoka hihamu masaka'agura koro hugahaze. ¹⁶ Na'ankure Ra Anumzamo'a Jerusalemi kuma'ma ete eri so'ema huno negino, Agra'a hihamu masa'afima eama'ma hania zanku anara hugahaze. ¹⁷ Ana nehuno zamunte omane zamavufaga zamavapa nemaniza nagamokizmi nunamuna antahi nezamino, nazankuro nunamuma hu'za antahima kesaza nunamu kezmia antahi amnea osugahie. ¹⁸ Ama ana zankura avontafepi krente'ne sanunke'za henkama fore hu anante anante'ma

hanaza vahe'mo'za hampari'za antahigahaze. Ana nehanage'za henkama fore'ma hanaza vahe'mo'za Ra Anumzamofa agi'a ahentesga hugahaze. ¹⁹ Ra Anumzamo'a onagamu ruotgema hu'nea noma'afi mani'neni, kefenkateno ama mopafina nege. ²⁰ Hagi kinafima mani'naza vahe'mo'zama karagi'ma nerazazana nentahino, zamahe frigahune hu'za hu'naza kina vahera katufe zamatre'naku anara nehie. ²¹ Ana'ma hanige'za Saioni agonafina Ra Anumzamofa agi'a huama nehanage'za, Jerusalemi kumapina agi' agi ahentesga hugahaze. ²² Maka ama mopafima kokankokama nemaniza vahe'mo'za, magopi eme eritru nehanage'za, maka ama mopafima kinimo'ma kvama huterema hu'nea mopareti e'za Jerusalemi kumapina Ra Anumzamofa mono eri'zana emerintegahaze. ²³ Ozafa ore kasefa vahe mani'nogeno, Ra Anumzamo'a nagri hankavea eri netreno, knani'a eri atupa hu'ne. ²⁴ Ana higena Anumzamofonkura amanage hu'na hu'noe. Anumzanimoka kasefa vahe mani'noanki, knani'a eri atupara hunka ama mopafintira nazeri otro. Kagra ofri manivava hunka neana Anumza mani'nane. ²⁵ Korapara Kagra ama mopamo'ma regrino'ma me'nia trara tro hunentenka, monare'ma me'nea zantamina Kagra kazanteti tro huzmante'nane. ²⁶ Ana zantamimo'za vagaresazanagi, Kagra manivava hunka vugahane. Atafa kukenamo'ma hiaza huke ome haviza hugaha'e. Kasefa kukena eri nehankreno atafa kukenama hate atregeno'ma viaza hunka zanazeri atresankeke vagaregaha'e. ²⁷ Hianagi Kagra mago avamenteke

maninka nevnankeno, kafu kamo'enena vagaore vuvava huno vugahie. ²⁸ Kagri eri'za vahe'mokzimi mofavre nagara, Kagra kegava hu so'e huzmante'snanke'za knare hu'za manigahaze. Ana'ma hananke'zama manine'za kase zamantesnaza mofavre nagapinti'ma efore'ma hu'za vnaza vahe'mo'za, kagrane magoka knare hu'za manigahaze.

103

Anumzamo'ma tavesima rante'nea zanku'ma Deviti'ma asunte'nea zagamere

¹ Maka nagu'areti hu'na Ra Anumzamofona agi'a ahentesga nehu'na, nagu'areti hu'na ruotage'ma hu'nea agi'a ahentesga hugahue. ² Maka nagu'areti hu'na Ra Anumzamofona agi'a ahentesga nehu'na, knare avu'ava zama huno maka zampima nazama nehia zankura naganera okanigahue. ³ Anumzamo'a maka kumini'a eri netreno, maka krini'a eri netreno, ⁴ nagu'vazino navrege'na ofri'na mani'noe. Ana nehuno vagaore avesi zane asunku zanena, fetori'ma hiaza huno nanuntera ante'ne. ⁵ Anumzamo'a knare'nare zantamina namige'na eri knare nehue. Ana nehu'na nazeri kasefa higena, tumpamo'ma hanave'ama eri kasefa'ma nehiaza hu'na hanavea erina manigahue. ⁶ Ra Anumzamo'a fatgo avu'avaza huzmanteno, vahe'mo'zama knamazami'za zamazeri havizama nehaza vahera, maka mago avamenteke refko hunezmante. ⁷ Korapara Ra Anumzamo'ma nazano tro hunaku'ma hiazana eri ama huno Mosesena asami'ne. Ana nehuno hankave eri'zama eneria zana zamaveri hige'za

Israeli vahe'mo'za ke'naze. ⁸ Ra Anumzamofona asunku zamo'a aviteno mareri'ne. Ana hu'neankino, avesi rante vava nehuno, ame huno arimpa ohe Ra Anumza mani'ne. ⁹ Agra kea tasuvava nosuno, arimpa aherante vava huno ovu Anumza mani'ne. ¹⁰ Tagrama kumi'ma hu'nona avamente knazana tamigaragi anara nosuno, tagri kefozamofa avamente ranknaza tamigaragi anara nosie. ¹¹ Anumzamofoma koro hunte'za agoragama nemaniza vahe'ma avesima nezamantea avesizamo'a, monamo'ma mopama agatereno ame'nagame'ma meaza huno Ra Anumzamofa avesi zamo'a ame'nagame mareri'ne. ¹² Zage hanati kazigatima zage fre kazigama evu'neana afete me'neankino, anahukna huno tagri kumira afete eri netre. ¹³ Nefa'ma mofavre naga'ama asunku'ma hunezmanteaza huno, Ra Anumzamo'a Agri'ma koro'ma hunente'za agoragama nemaniza vahera asunkura hunezmante. ¹⁴ Na'ankure Agrama mopama erino tagri'ma tro'ma hurante'neana, Agra ko tageno antahino hu'neankino, tagrikura kugusopa mani'naze huno nentahie. ¹⁵ Tagra vahe'ma ama mopafima mani'nonana trazankna hu'nonankita za'zatera omanigahune. Ana hu'neankita tra'zamofa amosremo'ma osi'a knafi rutarenteaza nehune. ¹⁶ Anama hutegeni zaho'mo ana amosrema eri hare'noma vigeno, zamage'ma nekanizaza nehune. ¹⁷ Hianagi Ra Anumzamofonku koro'ma nehu'za Agri agoragama nemaniza vahera, knane knanena Anumzamofona vagaore avesi zamo'a zamagrane mevava nehie. Ana

nehanigeno zamagripinti'ma fore'ma hanaza vahe'mokizmi mofavre nagate'enena fatgo avu'ava huzmanteno nevie. ¹⁸ Anumzamofokasegene tra ke'nema kegava huso'ema hu'nezama amage'ma nentaza vahera, e'inahu avu'ava'za hunezmante. ¹⁹ Ra Anumzamo'a Agrama kinima manisania trara monafi retro hunte'ne. Ana hu'neankino anante mani'nenomakazana kegava nehie. ²⁰ Hankavenentake hu'naza ankeromota Ra Anumzamofogagi'a ahentesga hiho. Hankavenentake'ma hu'neta, nazano hihoma huno higeta Agri amage'ma nentamota, nazano hihoma huno hania zamofoke'a amage anteho. ²¹ Monafima ohampriga'a ankeroramima mani'netama agri avesi'zama amage'manentaza ankeromota, Ra Anumzamofona agi'a ahentesga hiho. ²² Maka zama tro'ma hunte'nenomagraama kegavama hu'nea mopafima nemaniza zantamimota, Ra Anumzamofona agi'a ahentesga hiho. Ana nehinke'na naganena maka nagu'areti hu'na Ra Anumzamofona agi'a ahentesga hugahue.

104

Ra Anumzamo'ma maka'zama tro'ma hu'nea zamofozagamere

¹ Nagra nagu'areti hu'na Ra Anumzamofona agi'a ahentesga hugahue. Ra Anumzana Anumzanimoka kagra rankrerfa hu'nane. Za'za kukenamo'ma hiaza huno masa zankamo'ene konaririkamo'enena kazerino vazinte'ne. ² Za'za kukenama hiaza hunka masa zanka'a eri hankre'nane. Ana nehunka monafima me'nea zantaminena, seli noma eri atama nereaza hunka,

mona eri atarente'nane. ³ Monafima me'nea hampompima tima marenevazimofa anaga kaziga, nonka'ama vazisga hania zafaramina reture'nane. Hagi karisifima hiaza hunka hampompina maninka vano nehunka, zahopi maninka harenka vano nehane. ⁴ Kagra zaho'mofonku hankeno nanekeka'a erino vano nehie. Ana nehigeno hagna hagna'ma huno nerea tevemo, Kagri eri'za vahera mani'ne. ⁵ Kagra ama mopa tro hutanka tra'are antankeno me'neankino kazara osugahie. ⁶ Tavravereti'ma hiaza hunka hagerinu mopa refi'netenka, agonaramina tinu refitankeno azeri nakari fenkateno onaga me'ne. ⁷ Hianagi kagrama hage rimofonku'ma hankave kema hankeno'a, koro huno nevie. Kagrama monagemo'ma hiankna hunka kageru'ma nerankeno'a, tintamimo'a ame'ama huno nevie. ⁸ Agonaramimo'za marerisga nehazageno, agupo mopamo'za uramiza e'ire mano hunka hunte'nampi me'naze. ⁹ Ana nehunka hagerimofona, isa kana antetenankeno ana isa kana agatereno vuno mago'anena mopa refi'otegahie. ¹⁰ Kampu'i tina tro huntankeno, tinkagomupina nevigeno, ne'onse tintamina huntankeno agonaramimofa amu'nompinena nevuno, ¹¹ maka afizaga gafamofona tina nezamige'za nenazageno, afi donki afu'tamimo'za tinku'ma nezmagege'za ana tina nazageno fru zame'nesie. ¹² Hare'zama vanoma nehaza namamo'za ana timofo ankenarega nona ki'za manine'za, ana timofo ankenaregama me'nea zafaramimofa azankunate manine'za zagamera nehaze.

¹³ Kagra mona kumakafi onagamu mani'nenka, kora atrankeno eramino agona ramimpina runente. Ana nehunka kagraka'a kazanko avona antenka, maka zana tro hunka ama mopafina antankeno aviteno me'ne. ¹⁴ Bulimakao afu'mo'zama nesaza trazana kagra hankeno hagenege'za vahe'mo'za ahe'za hoza nentaze. Ana hutazagenka kagra hankeno, mopafintira ne'zamo'a hageno marerino nenarga rentege'za vahe'mo'za e'nerize. ¹⁵ Anazanke hunka kagra hankeno wainimo'a hageno marerige'za, eri'za waini tina tro hu'za nene'za antahi musena nehazagenka, olivi masavena zaminke'za eri'za zamugosafina frageno rumsa nehigenka, ne'zama nene'za hankavema eri'za manisaza zana bretia nezamine. ¹⁶ Ra Anumzamofa zafamo'za tina nezamu nehazageno, Ra Anumzamo'ma Lebanoni mopafima sida zafaramima hankre'nea sida zafamo'za tina nezamu nehaze. ¹⁷ Ana sida zafa ramimpina nama ramimo'za nona eme ki'za nemanize. Ana nehazage'za afi patomo'zanena (stork) saipresi zafa ramimpi nozamia eme negize. ¹⁸ Za'za agona ramimpima nemaniza afi meme afutamimo'za vano vano hu'za nemanize. Ana nehazage'za vare'mo'za havemofa keko kampi fraki'za zamagu nevazize. ¹⁹ Kagra ika tro hunka ante'nankeno me'nenko, ruzahu ruzahu knagura hunerasamie. Ana nehigeno inankna fatgore zagemo'a ufregahie zagemo'a agra'a keno antahino hu'ne. ²⁰ Kagra hanina atrankeno hania eme negie. Ana hanke'za zafa tano'pafima nemaniza zagagafamo'za rerakaure'za vano nehaze. ²¹ Kenagera

kasefa laioni ramimo'za zagagafama ahe'za tragama hu'za nesagura rankrafage hu'za vano nehazagenka, Anumzamoka ne'zana zaminke'za nenaze. ²² Hagi zagema ufreg'e'za ana laionimo'za ete vu'za nemaniza have kampi ome nemasaze. ²³ Ana'ma nehazage'za vahe'mo'za vu'za e'za hu'za eri'za zamia ome e'nerizageno vuno kinaga nese. ²⁴ Ra Anumzamoka, kagra agigu agigu zantami tro hu'nane. Kagra knare antahi'za ka'areti ana maka zantamina tro hu'nane. Ana hankeno Kagrama tro hu'nana zagagafamo'za ama mopafina mani avite'naze. ²⁵ Hagerimo'a rankrerfa huno uvu evu hu'negeta negone. Ana hu'neankino ana hagerimofu agu'afina agigu agigu zaga, osira rana huno ohampriga'a mani avite'naze. ²⁶ Ana hagerimofu agofetura venteramimo'za vano nehazage'za, Laviataniema hu'za nehaza afi zagama, tro'ma hu'nana zagamo ana hagerimpina tina freno vano nehuno zokagora nereno nemanie. ²⁷ Ana maka tro'ma huzmante'nana zagagafamo'za, kna fatgore'ma ne'zama zamisnanku kagriteke kete'za nemanize. ²⁸ Kagra ne'zana zaminke'za nenaze. Kagra kazana eri atarenka ne'zana zaminke'za nazageno zamura nehie. ²⁹ Hianagi Kagrama rukrahe'ma hunka kamefi'ma huzaminke'za, zamagra antri hu'za antahintahi hakare nehaze. Hagi Kagrama zamasimu'ma erinke'za, zamagra fri'za ete mopanesaze. ³⁰ Kagra kasimura huhu huvazi zamantanke'za, zamasimura eri'za kasefa hu'za mani'naze. Ana nehunka maka ama mopamofu agofetu'ma me'nea zantamina, ete eri kasefa hankeno

me'ne. ³¹ Ana hu'neankino Ra Anumzamofu hihamu masazamo'a mevava huno nevanigeno, maka zama tro'ma hu'nea zankura Ra Anumzamofu muse hugahie. ³² Ra Anumzamofu ma kefenkateno ama mopafima uruha'ma nehigeno'a, ama mopamo'a kazakaza nehigeno, Ra Anumzamofu ma agona ramima avako'ma nehigeno'a tevegu nehie. ³³ Nagrama ofri'ma mani'nesua kna'afina, Ra Anumzamofontega zagamera hugahue. Ana nehu'na zagame hu'na Anumzamofu agi'a ahentesga hunteme nevu'na ome frigahue. ³⁴ Nagrama Ra Anumzamofonku'ma antahintahima nehua zama Agrama keno antahino'ma hanuno'a muse hanie. Na'ankure nagra Ra Anumzamofonte mani'nenamusenka'nea nehue. ³⁵ Hagi kumi'ma nehaza vahe'mo'za ama mopamofu agofetutira fanene nehanageno, kefo avu'ava'ma nehaza vahe'mo'za fanane hu'za omanisaze. Maka nagu'areti hu'na Ra Anumzamofu husga huntente'na, Ra Anumzamofu agi'a ahentesga hugahue.

105

Anumzamofu ma ruzahu ruzahu eri'zama eri'nea zamofu zagamere

¹ Ra Anumzamofu agi'a aheta susu huntenteta, ranra eri'zama eri'nea zankura maka ama mopafima mani'naza vahera huama huta zamasamisune. ² Anumzamofontega muse zagame huta susu huntensune. Ana nehuta knare huno hentofa eri'zama eri'nea zankura vahera zamasamisune. ³ Anumzamofu agimo'ma ruotage'ma hu'nea zankura husga huntensune.

Hagi Ra Anumzamofoma mono'ma hunentaza vahe'mota muse hiho. ⁴ Ra Anumzamofonku'ene agri hankave'agu'enena nehaketa, avugosafima kesunkura hake vava hanune. ⁵ Agrama ruzahu ruzahu eri'zama eri'nea zanku'ene kaguvaza eri fore nehuno, keaga refko hugahue huno'ma hu'nea zankura taganera okanisune. ⁶ Hagi Agri eri'za vahe Abrahamu mofavre naga'mota, agrama huhampri ramantegeta Jekopumpinti'ma fore'ma hu'naza vahe mani'naze. ⁷ Ra Anumzamo'a agrake tagri Anumzana mani'ne. Ana hu'neankino, maka ama mopafi vahera refko hunezmante. ⁸ Anumzamo'ma huhagerafi huvempagema hu'nea kegura maka zupa ageraokani antahi vava hugahie. Ana hu'neankino tausen'a zupama fore hu anante anante'ma hu'za vanaza vahete'enena ana huvempa kemo'a mevava huno vugahie. ⁹ Hagi ana huhagerafi huvempagea Abrahamu'ene hu'neankino, ana huvempagea Aisakinte eri hankaveti'ne. ¹⁰ Anumzamo'a henka ana huvempama hu'neanke'a Jekopunte eriamana nehuno, Israeli vahetera ana huvempa kemo'a mevava hugahie huno zamasami'ne. ¹¹ Tamagrama eriterema hanare Kenani mopa tamisanugeta erisanti haresnageno, ana mopamo'a tamagri mopa mevava hugahie huno Anumzamo'a hu'ne. ¹² Ama ana nanekema Anumzamo'ma hu'neana, Kenani vahe amu'nompina Israeli vahera kraga vahekna hu'za osi'a naga mani'nazageno ananke hu'ne. ¹³ Israeli vahe'mo'za vahe mopafine, ru kinimo'zama kegavama hu'naza mopafi mani'za

vano vano hu'naze. ¹⁴ Hianagi Anumzamo'a zamatregeno mago'a vahe'mo'za zamazeri havizana osu'naze. Israeli vahetega Anumzamo'a anteno zamazeri haviza hunaku'ma nehaza kini vahera ha' kea huzamine. ¹⁵ Anumzamo'a huno nagrama huhampri'noa vahera zamavakora osiho huno nehuno, nagri kasnampa vahera zamazeri havizana osiho huno hu'ne. ¹⁶ Anage nehuno Kenani mopafina Anumzamo'a agatontoza atregeno ne-egeno, maka ne'zana eri fanane huvagare'ne. ¹⁷ Ana'ma nehuno'a mago ne' huntetegeni ugoteno Isipi mopafima vu'neana Josefekino, kazo kazo eri'za erisanie hu'za zagoreti mizase'za avre'za vu'naze. ¹⁸ Ana hute'za seni nofiteti agafina anakizageno atagura nehige'za, ainireti rini tro hute'za anankempina rusi hu'naze. ¹⁹ Ana huno manino nevigeno ava'nama ke'nea zamo'ma efore'ma hania knamo'a ehanati'ne. Ana higeno Ra Anumzamo'a Josefena reheni ke'ne. ²⁰ Hagi kini ne' Fero'a hige'za kinafintira Josefena katufente'naze. Vahete'ma kegavama hu'nea kini ne'mo hige'za kinafintira katu fentageno vu'ne. ²¹ Ana hutazageno kini ne'mo'a Josefena huhampri antegeni rankva manino, maka noma'afima me'nea zantera kegava nehuno, maka fenoma ante'nea zante'enenana kegava hu'ne. ²² Ana hu'neankino agra amne kini ne'mofo eri'za vahera kina nompina zamavarenenteno, kini ne'mofoma antahintahima nemiza vahera rempi huzamigahie. ²³ Hagi henka Israeli naga'mo'za Isipi mopafina efre'naze. Ana hutazageno Jekopu'a Hamu vahe mopafi kraga

vahe seno emani'ne. ²⁴ Anante Ra Anumzamo'a Agra'a Israeli vahera zamaza hige'za, rama'a mofavre kasezamante'naze. Ana hume nevu'za rama'a vahe ome forehu hakare hu'za ha' vahe'zamimofu hankavea zamagatere'naze. ²⁵ Anante Anumzamo'a Isipi vahe antahi'zana eri rukrahe hige'za, Agri'a nagara Israeli vahera ha' rezamante'naze. Ana nehu'za Ra Anumzamofu Agri'a eri'zama eneriza Israeli vahe'ma zamazeri haviza hanaza kanku hake'naze ²⁶ Hianagi Ra Anumzamo'a eri'za vahe'a Mosesene, Aronine huhampari zanantegeke vu'na'e. ²⁷ Ana higeke Hamu nagama Isipi mopafima nemaniza vahetera vuke, Ra Anumzamo'ma hu'nea kaguvazane, avamezanena ome eri fore hu'na'e. ²⁸ Ra Anumzamo'a higeno Isipi mopafina hanizamo eme refite'ne. Na'ankure Anumzamofu nanekea ontahi'za Israeli vahera zamatrage'za ovu'naza zante anara hu'ne. ²⁹ Anumzamo'a maka tintamina eri rukrahe higeno, kora segeno ana timpima mani'naza nozameramimo'za fri vagare'naze. ³⁰ Anantera hoga'mo'za Isipi mopafina avitete'za, kini ne'mo'ma nemasefinena mani vite'naze. ³¹ Ra Anumzamo'a kosine umpe umpe'ene huzmantege'za eri erintagu hu'za maka Isipi mopafina emani avite'naze. ³² Ko'mopa ko huntogeno ko'ma rianza huno eneramigeno, kopsi'na atrogeno ru trage huteno tevenefa huno maka Isipi mopafina vuno eno huvagare'ne. ³³ Isipi vahe'mokizmi waini hozane, fiki zafaraminena eri haviza nehuno, Isipi mopafima me'nea zafaramina rukrara karurupetre'ne. ³⁴ Ana nehuno tusinasi kenutami huzmantege'za rama'a

hu'za ohampriga'a e'naze. ³⁵ Ana kenu'mo'za trazantamina vatri'za neza maka eri hana nehu'za, hozafi me'nea ne'zantamina ne'za maka eri vagare'naze. ³⁶ Ana nehuno Anumzamo'a Isipi mopafina ese'ma kasezmante'nea agonesa anentatamina miko zamahe vaganereno, maka vahe'mo'za zage mofavregu'ma musema nehu'za hankavetie hu'zama nehaza ne' mofavre nagara zamahe vagare'ne. ³⁷ Ra Anumzamo'ma vahe'a Israeli naga'ma zamavarege'za Isipiti'ma etirami'za e'naku'ma nehu'za, rama'a silvane golinena eri'ne'za e'naze. Magomo'e huno Israeli naga nofipintira tanafara osu'ne. ³⁸ Israeli vahe'mo'zama Isipi mopama atre'za azage'za, Isipi vahe'mo'za tusi muse hu'naze. Na'ankure ko'ma Israeli vahe koro'ma hu'naza zanku anara hu'naze. ³⁹ Anumzamo'a mago hampo antegeni Israeli vahera anteso hunezmantegeni, hanimpina tevenefanu remsahu zamante'ne. ⁴⁰ Israeli vahe'mo'zama ne'zanku'ma antahigazageno'a, hifa namazaga atregeno ege'za ahe'za nenazageno, monafinti mana ne'zana atregeno ege'za eri'za nazageno zamura hu'ne. ⁴¹ Agra havea rutanegeni timo'a rumpasasa huno krohupeno eno, hagege kokampina ranti evu'ne. ⁴² E'inama hu'neana Anumzamo'a eri'za vahe'a Abrahamuma ruotge huvempa kema hunte'nea kegu agesa nentahino anara hu'ne ⁴³ Hagi Anumzamo'ma nagri nagare'ma huno huhampari zamante'nea Israeli vahe'ma, Isipiti'ma zamavareno ne-ege'za, ranke hu'za kezati'za musenkasea nehu'za e'naze. ⁴⁴ Ana nehuno ru vahe'mokizmi mopa eri zami'ne. Ana hige'za ru vahe'mo'za

maraguzati'za hankre'naza ne'za Israeli vahe'mo'za eri nafa'a hune'za vasage'za ne'naze. ⁴⁵ Ama ana maka zama fore'ma hu'neana, Israeli vahe'mo'za nege'za, Anumzamofa kasegene tra kenena amage antesagu huno anara hu'ne. Ra Anumzamofona agi'a ahentesga hanune.

106

Anumzamo'ma vahe'ama knare avu'ava'ma hunezmantea zagamere

¹ Ra Anumzamofa agi'a ahentesga nehuta susu huntune. Na'ankure agra knare hu'ne. Agrama avesi nerantea zamo'a vagoore mevava huno nevie. ² Ra Anumzamo'ma hankavenentake eri'zama eri'nea zankura, iza hamprino kegara hugahie? Ana hu'neankino mago vahe'mo'a agri agi'a husga huntegahianagi, Agrama antahi'nea avamentera osugahie. ³ Iza'o maka zupama fatgo avu'ava zama nehuno, fatgo huno refkohu avu'ava zama nehia vahe'mo'a muse hugahie. ⁴ Ra Anumzamoka vaheka'ama zamazeri knare'ma nehanunka, kagesa antahi nenaminka, erava'o hunka naza hunka nagu'vazio. ⁵ Kagrama huhampri zamante'nana vahe kamo'zama so'e mani'zampima musema hu'za nemanisage'na, zamagrane musema hu'zanku nave'nesige'na kagri vahe'ene musena hanue hu'na nagesa nentahue. Kagrama erisantima hare'nana vaheka'ane natrege'na magoka mani'ne'na, Kagri kagi'a ahentesga ha'nenno. ⁶ Tagri tagehe'mo'zama hu'nazaza huta tagra kumi hu'none. Ana nehuta kumi hu hakare huta eri hakare hu'none. ⁷ Tagehemo'zama Isipima mani'neza kagrama

eri fore'ma hu'nana kaguva zankura musena osu'naze. Kagrama kavesi zamantenenkama so'e kavukva'ma huzmante'nana zankura zamaganekani'naze. Ana nehu'za Koranke hagerinte'ma ne-eza ha' regante'naze. ⁸ Ana hu'neanagi Anumzamo'a Agri agimofu knare zankure huno zamaguravazi'ne. Ana nehuno Agra tusi hankave'a erinte ama hanige'za kesazegu anara hu'ne. ⁹ Anumzamo'a hankave ke Koranke Hagerimofona huntogeno, hageri amu'nompina ka fore huno, hagage kokampima hu'neaza huno mopa fore higeno hagege hu'ne. Ana hutegeni hagege kokampima me'nea mopare'ma viaza huno, hagerimofu amu'nompina Israeli vahera zamavareno kantu kaziga vu'ne. ¹⁰ E'ina huno Anumzamo'a ha'ma rezmante'naza vahe'mofu zamazampintira zamagu'nevazino, ha' vahe'zmimokizmi hankavefintira zamagu'vazino ete zamavare'ne. ¹¹ Hianagi zamagri ha' vahera, hagerimo ete eme ruhamprino refitege'za fri vagarageno, anampintira magore huno kuzafara omani fri vagare'naze. ¹² Ana'ma hige'za Anumzamofu vahe'mo'za agrama huvempama hu'nea kegura zamentinti nehu'za, zagame hu'za agri agi ahentesga hu'naze. ¹³ Hianagi Ra Anumzamo'ma erifore'ma hu'nea zankura, ame hu'za zamagekani'naze. Ana hige'za Anumzamofu antahintahigura avega onte'za nazano hunaku'ma haza zana, amne tro hu'naze. ¹⁴ Hagege kokampima e'nazana ne'zama ne'zankura tusiza huno zamavesi zamavesi hu'ne. Ana nehige'za vahe omani

ka'ma kokampina Anumzamofona rehe'za ke'naze. ¹⁵ E'ina hazageno Anumzamofoma antahigaza zana amne zami'ne. Hianagi havizantfa hu'nea kri atregeno eme zamazeri haviza hu'ne. ¹⁶ Seli nonkuma'ma eme ante'za mani'nafintira, mago'a oti'za Ra Anumzamo'ma huhampri zananteno zanazeri ruotagama hu'nea pristi eri'za netre Mosesene Aronikema e'neri'a eri'zankura kanive reznante'naze. ¹⁷ Ana'ma hazageno'a mopamo'a ruaka huno Datanina asgahu nenakrino, anampina Abiramune mago'a naga'enena zamazeri nakrifenska atreno refite'ne. ¹⁸ Ana naga'mokizmi kema antahi'za amage'ma nente'za vahe'mo'za havi avu'ava'ma hu'naza vahera, tevemo eramino eme te fanane hu'ne. ¹⁹ Horepi agonafima ete'za golireti kre maramra hu'za, bulimakao anenta'mofo amema'a tro huntete'za, ana zamofu avuga kepri hu'za monora hunte'naze. ²⁰ Hihamu masa'ane Anumzana amne zama hiaza hu'za, tra'zama nenea zaga ve bulimakaomofu amema'are atre'naze. ²¹ Isipi mopafima zamagu vazinaku'ma hankave kaguvazama erifore'ma nehuno, zamavareno etiramino'ma e'nea Anumzana, zamage kaninte'naze. ²² Anumzamo'ma e'inahu hankave eri'zama Hamu mopafi erifore nehuno, ruzahu kaguvazama koranke hagerinte'ma erifore hige'zama ke'naza zankura zamagesa ontahi'naze. ²³ E'ina'ma hu'nazagu huno Anumzamo'a zamazeri haviza hugahue huno huama hu'ne. Hianagi Agrama huhamprinte'nea ne' Mosesena Anumzamofone veamokizmi amu'nompi oti'neni antahigeno, krimpa ahe'zana atregeno uramino huno meme

higeno, Anumzamo'a zamazeri havizana osu'ne. ²⁴ Hagi zamagra knare mopafima ufre zankura zamavesra hu'ne. Na'ankure Anumzamofu kegura zamagra zamentintia osu'nazagu anara hu'naze. ²⁵ Zamagra seli nozamifi mani'neza sumisumi hu'za kehakare nehu'za, Ra Anumzamofu nanekea amage onte'naze. ²⁶ Ana'ma hazagu huno Anumzamo'a aza erisga nehuno vahe omani ka'ma kokampi zamatre'nuge'za frigahaze huno huvempa kea hu'ne. ²⁷ Ana nehu'na zamagripinti'ma efore'ma hanaza vahera, zamazeri panani hanuge'za ru vahe moparega umani emani hu'ne'za anantega frigahaze hu'ne. ²⁸ Hagi henka Israeli vahe'mo'za Peori kumatera Bali havi anumzana mono hunente'za, fri vahete'ma ofama nehaza ne'zanena ne'naze. ²⁹ E'inahu havi avu'ava zama haza zamo Ra Anumzamofona azeri rimpa hazageno rankri atregeno eno, eme zamazeri haviza hu'ne. ³⁰ Hianagi Finiasi'a otino kumi'ma hu'naza vahera zamahe hana higeno, ana krimo'a vagare'ne. ³¹ Ana hu'neankino ananteti'ma agafa hu'za mani'za vanaza vahe'mo'zane, henkama forehu anante nante'ma hu'za vanaza vahe'mo'za, Finiasi'a fatgo avu'ava'za hu'ne hu'za maka zupa antahimi'za vugahaze. ³² Israeli vahe'mo'za Meriba mopafima me'nea tintaminte'ma mani'neza Ra Anumzamofona azeri rimpa ahazageno, ana'ma hazazamofu knazana Mosese agofetu erintegeni eri'ne. ³³ E'ina hu'za Mosesena azeri rimpa ahazageno, osuga naneke Mosese'a hu'ne. ³⁴ Anama emani'naza mopafima mani'naza vahera, Ra Anumzamo'a

zamahe hana hiho huno Israeli vahera
 huzmante'neanagi, ana nanekea amagera ante'za
 zamahe hanara osu'naze. ³⁵ Hianagi Israeli
 vahe'mo'za ana mopafima nemaniza vahe'ene
 ruhava hu'za nemani'za, ana vahe'mokizmi
 kefo avu'ava zana amage ante'za hu'naze.
³⁶ Ana nehu'za havi anumzamofu monora
 hunte'naze. Ana'ma haza zamo'a krifugna huno
 zamazeri haviza hu'ne. ³⁷ Ana nehu'za ne'mofa
 zamia zamahe'za havi anumzante kresramna
 vu'naze. ³⁸ Hazenkezmi omane'nea ne'mofa
 zamia zamahe'za, korazmia eri neragi'za, Kenani
 vahe'mokizmi havi anumzantaminte zamahe'za
 Kresramanama vu'naza korazmimo mopa eri
 hi'nimna vu'ne. ³⁹ E'inahu kefo avu'ava'ma
 hazazamo higeza Anumzamofu avurera agrua
 nosu'za, havi anumzama avesima antaza
 zamo'a Ra Anumzamofu avurera, vere a'mo'ma
 neve'enema mani fatgo osuno, atreno mago
 venema monko avu'ava zama hiaza hu'naze.
⁴⁰ E'ina hu'negu Ra Anumzamo'a vahe'agura tusi
 arimpa ahenezmanteno, nagri vahere huno'ma
 erisanti'ma hare'nea vahera agotezmanteno
 avesra huzmante'ne. ⁴¹ Ana huteno ru
 mopafi vahe'ma zamavesrama hunezmantaza
 vahe'mokizmi zamazampi zamavarentege'za,
 ana vahe'mo'za kegava huzmante'naze. ⁴² Ana
 nehu'za ha' vahe'zamimo'za knazana zamiza
 zamazeri haviza nehazage'za, zamagri hankavefi
 mani'naze. ⁴³ Rama'a zupa Anumzamo'a
 zamagu vazi'neanagi, kema antahi avu'ava
 zana zamagripina omane'negu huno, zamagri
 kumimo zamazeri haviza hu'ne. ⁴⁴ Hianagi
 knafima mani'neza zamazama hanigu Ra

Anumzamofontega zavi krafa hu'za nunamuma hazageno'a, nunamuzamia antahino asunku huzmante'ne. ⁴⁵ Anumzamo'a zamagrikure huno huvempama huzmante'nea nanekegu agesa antahi'ne. Na'ankure vaga ore mevava avesi zama'agu agesa nentahino, antahintahi'a rukrahe hu'ne. ⁴⁶ Israeli vahe'ma zamavare'za ome kina huzmante'naza vahera, Anumzamo'a zamarimpa eri rukrahe hige'za Israeli vahera zamasunku huzmante'naze. ⁴⁷ Taguvazio, Ra Anumzana tagri Anumzamoka ru vahe moparegama umani emanima hu'nontegati tavre atru huo. Ana'ma hananketa ruotage'ma hu'nea kagia neheta hu muse huneganteta, musenkase huta kagi'a ahentesga hugahune. ⁴⁸ Ra Anumzana Israeli vahe Anumzamofona agi'a ahentesga hanune. Maka zupa knane knanena agra manino nevial Anumza mani'ne. Maka vahe'mota tamage huta nehuta, Ra Anumzamofona agi'a ahentesga hanune.

107

Nampa 5 zagame avontafere

Anumzamofa knare avu'avazanku muse hu zagamere

¹ Ra Anumzamofona susu huntesnune. Na'ankure agra knare avu'ava hu'neranteankino, avesimaranteno knare'ma hunerantea avu'avazamo'a mevava huno vugahie. ² Ra Anumzamo'ma ha' vahe zamazampinti'ma tamagu'vazino tamavre'nenia vahe'mota, ranke huta Ra Anumzamo ha' vahe'mofo zamazampinti tagu'vazino tavre'ne huta

huama huta vahera zamasamiho. ³ Na'ankure zage hanati kazigane, zage fre kazigane, noti kazigane, sauti kaziganema ru vahe moparegama umani emanima huta kinama huta mani'nazaregatira, agra ete zamavare atru hu'ne. ⁴ Mago'amo'za vahe omani ka'ma kokampi vano vano nehu'za, manisnaza rankumaku hake'nazanagi onke'naze. ⁵ Ne'zankura zamaganetege'za tinku'enena hagage nehu'za fri'za hu'naze. ⁶ Ana kna zampima manine'za, Ra Anumzamofontega zavi krafa hazageno, ana kna zampintira zamagu'vazino ete zamavare'ne. ⁷ Agra knare huno zamavare fatgo huno umanisaza rankumate zamavareno vu'ne. ⁸ Zamatrenke'za Ra Anumzamofona vagaore mevava avesi zama'agura susu hunente'za, knare avu'ava'ma huzmante'nea zanku'enena humuse hunteho. ⁹ Tinku'ma avesiaza huno maka zanku'ma ave'nesia vaهران eri knare hunente. Ne'zanku'ma hiaza huno maka zanku'ma aga'ma netea vahera, knare zantaminu agu'afina antevinete. ¹⁰ Mago'a nagara tusi haninkino antrako hu'nefi, seni nofiteti kina huzmantage'za zamatagu nehu'za mani'naze. ¹¹ Na'ankure Ra Anumzamofona nanekea ha'arente'za zamefi hunemiza Marerisa Anumzamo'ma hihoma huno huzmantea nanekea amagera onte'nazagu anara hu'naze. ¹² E'ina agafare Anumzamo'a zamazeri anteramisige'za akohe'za manisazegu, zamatrege'za tusi maraguzati'za knanentake eri'zana eri'naze. Ana nehu'za traka hu'nazanagi, mago vahe'mo'e hunora zamaza osu'ne. ¹³ Ana knaza zamifima zamagrama mani'ne'za, Ra Anumzamofontega zavi krafa hazageno, ana

knazampintira zamaza huno zamagu'vazi'ne.
¹⁴ Tusi hani zampinti'ene fri'zamofu turunapima
 mani'nazafintira Anumzamo'a zamavare
 atineramino, seni nofimo'ma kinama
 rezmante'nea zana katufezmante'ne. ¹⁵ Ana'ma
 hanige'za zamatrenke'za Ra Anumzamofona
 vagaore mevava avesi zama'agura susu
 hunente'za, knare huno hentofa avu'ava'ma
 huzmante'nea zanku'enena susu huntaho.
¹⁶ Bronsireti'ma tro hu'naza kahana rurapage
 huno rufuzafupenetreno, kafama erigi'za
 rentrako nehaza ainia rufutagi atre'ne.
¹⁷ Zamagrama agri ke'ama ontahi avu'ava'ma
 hazazamo'a, negi vahe'mofu avu'ava'za
 tro nehu'za, kumi'ma haza nona'a knafina
 ufre'za zamatazana eri'naze. ¹⁸ Ne'zama
 ne'zankura zamavesra nehu'za, fri'zamofu
 kahantera erava'o nehaze. ¹⁹ Ana knazamo'ma
 zamazeri haviza hige'zama manine'za, Ra
 Anumzamofontega zavi krafa hazageno, ana
 hazenkefintira zamagu'vazino zamavare
 atirami'ne. ²⁰ Anumzamo'a naneke'a huntegen
 eno zamazeri neganamreno, frinaku'ma
 nehazafintira eme zamagu'vazi'ne. ²¹ Ana
 hu'negu zamagra Ra Anumzamofona vagaore
 mevava avesi zama'agu'ene, knare avu'ava'ma
 huzmante'nea zanku'enena susu huntegahaze.
²² Ana nehu'za muse ofa Anumzamofontega
 Kresramana nevu'za, knare avu'ava'ma
 hu'nea zankura zagame hu'za musenkase
 nehu'za huama hiho. ²³ Mago'amo'za ventefi
 mani'za hagerimofu agofetu vu'za e'za hu'za
 ru moparega fenozana eri'za zagore ometre
 emetre nehaze. ²⁴ Ana vahe'mo'za zamagranena

Ra Anumzamo'ma hankave eri'zama eri'nea zana ke'za antahi'za nehu'za, knare zantfama hu'nea zantamima hagerimofa agu'afima tro'ma hunte'nea zanena ke'naze. ²⁵ Anumzamo'a hankave zaho huntogeno eno hagerina eme vazi'zoregeno, hagerimo'a kranto kranto nehie. ²⁶ Ana nehuno anama mani'naza ventea erisga huno ame'nagame monafi mareriteno, atregeno hagerimpina amefenkame uneramie. Ana'ma higeno'a ventefima vanoma nehaza vahe'mo'za koro hu'za tusi zamagogogu nehaze. ²⁷ Ana nehu'za ventefima vanoma nehaza vahe'mo'za aka tima ne'nea vahe'mo'ma neginagi nehuno, traka huno umse emase hiaza nehu'za, ventema agu'vazi antahi'zazmimo'a vagare'ne. ²⁸ Ana knazamo'ma zamazeri havizama nehige'za, Ra Anumzamofontega kezati'zageno, ana knaza ramimpintira zamagu'vazino zamavare'ne. ²⁹ Anumzamo'a hagerimofona akohenka manio huno magoke zupa higeno, hagerimo'ma kranto kranto'ma nehia agasasamo'a urami avazage'ne. ³⁰ Hagerimo'ma ome avamazagegeno'a ventefima vano nehaza vahe'mo'zama nege'za tusi muse nehazageno, vunaku'ma haza kumate'ma me'nea tinkenarega zamavare so'e huno zamagu'ma vazisaza kumatega vu'ne ³¹ E'ina hu'negu Ra Anumzamofona vagaore avesi zama'agura susu hunente'za, knare avu'ava'ma huzmante'nea zanku'enena susu huntegahaze. ³² Anumzamofa vahe'ma atruma hanafina Agri agi'a ahentesga nehu'za, kva vahe'ma atruma hanafinena husga huntegahaze. ³³ Tirama ne-ee tintamina Anumzamo'a eriranegen

hagege mopa fore nehigeno, tima nehanatia kampuitamina eri ranegeno mopamo'a hagege hu'ne. ³⁴ Ana nehuno masave nentake'ma hu'nea mopafina, higeno hagemo'a aviteno mopa eri haviza hu'ne. Na'ankure ana mopafima nemaniza vahe'mo'zama havi avu'avazama hu'naza zanku huno anara hu'ne. ³⁵ Hianagi hagege kokampina Anumzamo'a higeno tirura mare'nevazigeno, ka'ma kokampina higeno tintamimo'a rama'a eforera huno ne-e. ³⁶ Ana'ma huteno'a ne'zanku'ma zamaga'ma netea vahera zamavareno ana mopafina vige'za umanine'za, nona ki'za ranra kumatmina erifore hu'za mani'naze. ³⁷ Ana mopafina hoza ome eri'za nente'za, waini hozanena antazageno raga rentege'za rama'a tagi'naze. ³⁸ Anumzamo'a vahe'a asomu huzmantege'za rama'a mofavre kasezamante'za eri hakare nehazageno, bulimakao afu'mo'zanena rama'a forehu hakare hu'za vu'naze. ³⁹ Hagi zamagra rama'a vahe'ma mani'nazaretira ome osi osi hume vu'za osi'a vahe mani'nazagu ha' vahe zamimo'za hara eme huzmagatere'za zamazeri zamagaze nehu'za, zamata nezami'za tusi knaza zamizage'za zamasunku zampi mani'naze. ⁴⁰ Ra Anumzamofu vahe'ma ha'ma eme huzmantaza vahe'mokizmi kva vahetera, Anumzamo'a arimpa ahe'zana erikaha hutrege'za, ka'ma kokampina kanku hazagre'za vano vano nehaze. ⁴¹ Hianagi zamunte omane vahe'mo'zama knafima mani'nazageno'a, Anumzamo'a zamaza huno zamavare netreno, sipisipi afu'mo'zama nehazaza huno zamazeri hakare hige'za, rama'a

mofavre zamante'za eri hakare nehaze. ⁴² Fatgo avu'ava'zama nehaza vahe'mo'za ana zama nege'za muse nehanage'za, kefo avu'avazama nehaza vahe'mo'za kea osu zamagira hamunki'za mani'naze. ⁴³ Hagi iza'o knare antahi'zama me'nesia vahe'mo'a ama ana zankura agesa anteno nentahino, Ra Anumzamofu vagaore mevava avesi zama'a keno antahino hugahie.

108

*Amentintifima oti hankavetino mani'zanku
Deviti asunte'nea zagamere*

¹ Anumzamoka nagu'areti hu'na kagriterana namentintia nehue. Ana nehuanki'na maka nagu'areti hu'na zagamera nehu'na, kagri kagia ahentesga hugahue. ² Nanterama zahufa masama osu'nesige'na oti'na laeliema nehaza zavenane, hapu'ema nehaza zavenanena nehe'na masama hu'zana azeri otisugeno masa hugahie. ³ Maka ama mopafima mani'naza vahe'mokizmi zamavufi, Ra Anumzamoka susu hugantegahue. Ana nehu'na kokankokama nemaniza vahe'mokizmi zamavufi kagi'a ahentesga hu'na zagamera hugahue. ⁴ Na'ankure vagaore mevava kavesi zamo'a mona agatereno ame'nagame mareri'ne. Ana nehigeno so'e kavukva'ma hurante vavama hunka neana zamo'a onagamu hampompi mareri'ne. ⁵ Anumzamoka kagri kagia ahentesga hanunkeno monafi marenerisigeno, kagri hihamu masazankamo'a maka ama mopafina vuno eno hanige'za vahe'mo'za antahiza ke'za hanaze. ⁶ Hanki menina kagrama kavesinerantana vaheka'a tagu'vazinka ete

tavaro. Nunamuni'a antahi nenaminka kagra hankave ka'areti nagu'vazio. ⁷ Anumzamo'a ruotage'ma hu'nea mono noma'afi mani'nenomanage huno huvempa hu'ne. Nagra hara ko hugatere'noanki'na, muse hu'na Sekemu mopane Sukoti agupo mopa refko hugahue. ⁸ Giliati mopane Manase mopamokea nagri mopa menakeno, Efraemi mopamo'a bronsi fetori nanunte nentanuankna huno megeno, Juda mopamo'a kini vahe'mo'ma azampima e'neria azotani'agna hu'ne. ⁹ Hagi Moapu mopamo'a tifre zuompa ni'agna hu'neankino, henka nagri eri'za vahe nemanisige'na, Idomu mopafi nagia nona zafi atregahue. Ana nehu'na Filistia vahera hara huzmagatenerena, kezati'na musena hugahue. ¹⁰ Iza navareno hankave vihu keginama hugagi'naza rankumapina ufregahie? Iza navareno Idomu mopafina vugahie? ¹¹ Anumzamoka kagra ko kamefi hurami'nampi? Anumzamoka tagri sondia vahera zamaza osugahampi? ¹² Anumzamoka taza hugeta ha' vahetia hara huzmagaterammeno. Na'ankure vahe'mo'ma tazama hu'zamo'a, amne zankna hugahie. ¹³ Anumzamo'a taza hanigeta hara huzmageteregahune. Na'ankure ha' vahetia agiaretu zamare hapatigahie.

109

Knazampima mani'nea vahe'mofo zagamere

¹ Anumzana kagri kagima ahentesgama nehua Anumza mani'nananki, kagasasana eri taganenka omanio. ² Na'ankure kefo

avu'ava'zama nehu'za krunagama nehaza vahe'mo'za, zamagira reaka hu'za nazeri haviza hu nanekea nehu'za, havige hunante'za vano nehaze. ³ Maka kazigatira huhaviza hunenantaza kemo nazeri kanegigeno, mago agafa'a omane'nea zante zamagra nenahaze. ⁴ Nagra navesi nezmante'na, nunamu huzmante noanagi, zamagra rukrahe hu'za osu'noa zanku havi naneke hunante'naze. ⁵ Knare avu'ava zama huzmantoa zantera, nona hu'za havi avu'ava hunante'naze. Ana nehu'za nagra navesi zmantoanagi, nagrira navesi onante'za zamavesra hunante'naze.

⁶ Kefo avu'ava'ma nehia vahe huntogeno ha'ma renenantea vahera keaga hunteno, Agri ha' vahe huntogeno keaga hunteno. ⁷ Hagi keaga'ama refko hania ne'mo'ma naneke'ama nentahino'a, hago hazenke hu'ne huno hugahie. Ana nehuno ana ne'mo'ma nunamuma huno e'neana, ana nunamumo'a kumizase'ne. ⁸ Atregeno ana ne'mo'a ame huno nefrisigeno, mago vahe'mo agri nona eri'noe. ⁹ Agri mofavre naga'mo'za megusa nemanisageno, nenaro'a kento a' manisanie. ¹⁰ Ana ne'mofo mofavre naga'mo'za vano vano nehu'za, vahe zante meme hu'za vano nehu'za, havizama hu'nea nozamia atre'za afete hake'za vano hiho. ¹¹ Hagi ana ne'mo'ma mago vahe'mofo zama nofi'ma hu'nenno omi'nesia zantera, anazamofo nafa'amo'a eme ana ne'mofo fenzana eri vagaregahie. Ana nehanige'za ru kumate vahe'mo'za e'za, amuhoma huno eri atruma hu'nea feno zama'a maka eri'za vugahaze. ¹² Mago vahe'mo'a ana ne'mofonkura asunkura hunteno knare avu'avara huonteno.

Ana nehina ana ne'mofo megusa mofavre nagara zamasunkura huozmantegahaze! ¹³ Ana nehanigeno agripinti'ma fore'ma hanaza mofavre nagara ana maka fri vagaresage'za, henkama fore'ma hanaza vahe'mo'za ana vahera antahi ozamigahaze. ¹⁴ Ana ne'mofo agehemo'zama hu'naza kumira Ra Anumzamo'a aganera okanisie. Ana nehuno ana ne'mofo nerera'ma hu'nesia kumira avontafepintira eri otresie. ¹⁵ Ra Anumzamo'a maka zupa ana vahe'mokizmi kumikura aghesa antahi vava nehanige'za, ana ne'mofona vahe'mo'za mago'ene zamagesa antahi omigahaze. ¹⁶ Na'ankure ana ne'mo'a vahe'ma so'e avu'ava'ma huzmante zankura avesra nehuno, zamunte omane vahe'ene ke'onke zanku atupama nehaza vahera zamazeri haviza nehie. Ana nehuno zamarimpa zamatafima mani'naza vahera zamahe fri'ne. ¹⁷ Ana ne'mo'a sifana kema vahe'ma huzmanteno zamazeri haviza hu zankura muse nehie. Ana hu'neanki menina agri sifna kemo sifna huntano azeri haviza hanie. Ana ne'mo'a vahera zamazeri so'ea nosia neki, ana nera azeri so'ea osanie. ¹⁸ Agrama vahe'ma sifna kema huzmantea zamo'a, avate'ma za'za kukenama eri antaniaza nehuno, tima negeno avufgafi ufreaza nehigeno, masavemo'ma zaferinafima ufreaza hu'ne. ¹⁹ Hagi vahe'ma sifnama huzmante'nea zamo'a ete rukrahe huno agrite eno, kukenama antaniaza huno avufgare nemesigeno, maka zupama amu nofi'ma regeno afafafima meaza hino. ²⁰ E'inahu knazana Ra Anumzamo'a atresigeno eno, nagri'ma nazeri haviza hu kema

nehaza vahera eme zamazeri haviza hanie.
²¹ Hianagi Ra Anumzana nagri Anumzamoka, kagraka'a kagigu nentahinka, enka eme naza huo. Na'ankure kavesi zankamo'a knare zantfa hu'neanki, nagu'vazinka ete navro. ²² Nagrira namunte omanege'na, maka zankura atupa hu'na mani'nogeno, tumo'nimo'a fakifaki nehuno nata negrie. ²³ Kinaga fre zagemo rentegenonamemo ome atupa hiaza hu'na, ome vagare'za nehu'na, ra kenu'mo atafari ramiaza nehue. ²⁴ Nagra ne'zama a'o hu'na manua zamo higeno narenafina hanave'a nomanegenonavufgamo'a tari'vazino zaferinare ome akamare'ne. ²⁵ Vahe'mo'zama nagri'ma nenage'za tusi kizazokago ke hunenante'za, zamaseniarugenka hu'naze. ²⁶ Ra Anumzana nagri Anumzamani'nananki naza hunka, vagaore mevava kavesi zanteti nagu'vazio. ²⁷ Ama ana zama nehana zankura, Ra Anumzamo Agra'a azanuti agura nevazie hu'za ke'za antahi'za hiho. ²⁸ Zamagra nagrira kazusi hunantegahaze. Hianagi kagra asomu hunantegahane. Nagriranazeri haviza hugahaze. Hianagi zamagrira zamazeri haviza hananke'za zamagazegu hugahaze. Hianagi kagri eri'za vahe'mo'a musenkase hugahie. ²⁹ Nagri'ma havigema hunante'naza vahe'mo'za zmagazezamo'a refitezmantegahie. Ana nehanageno za'za kukenamo'ma rufiteaza huno zamagazemo'a refitezmantegahie. ³⁰ Ra Anumzamofona tusiza hu'na susu hunente'na, vahe'ma atruma hanaza amu'nompima mani'nenana, agri agi'a ahentesga hugahue. ³¹ Na'ankure Agra maka zanku'ma

atupa'ma nehaza vahe kaziga mani'neni,
 vahe'mo'zama zamazeri havizama nehu'za
 zamahe frinaku'ma nehazageno'a Agra zamaza
 nehie.

110

*Anumzamo'ma huvempama hu'nea kini nemofo
 zagamere*

¹ Ra Anumzamo'a Ranimofonkura amanage
 huno asami'ne, nazantmaga kaziga mani'nege'na,
 ha' vaheka'a zamazeri atresanuge'za kagiafinka
 mase'nagenka zamagofetu kagia renka
 otigahane!

*(Matiu 22:44, Aposolo 2:34, 1 Korinti 15:25, Hi-
 bru 1:1-13)*

² Ra Anumzamo'a kazeri antesga hanigenka
 Jerusalemi rankumate kva mani'nenka,
 mago'a kuma'enena kegava nehunka, ha
 vaheka'anena kegava huzmantegahane. ³ Hagi
 kagrama hate'ma vunaku'ma hananke'za, kagri
 vahe'mo'za amne zamagra'a oti'za kagrane
 vanageta ha' vahe'enena hara ome hugahaze.
 Ruotage'ma hu'nea agonafima kenage ata
 komo'ma, trazante runtegeno kasefa hankavema
 ete eriaza hunka, maka zupa hankaveka'amo'a
 kasefa hugahie. (Hibru 5:6, 6:20, 7:17-21.)

⁴ Ra Anumzamo'a huvempa hu'neankino
 naneke'a amage antegahie. Melkizedeki'ma
 hu'neaza hunka Kagra pristi vahe fore hugahane.
 E'ina hu'neankinka pristia manivava hunka
 vugahane. ⁵ Ra Anumzamo'a kazantamaga
 kaziga mani'neankino, arimpahe zamo'ma
 efore hania knazupa, kini vahera rama'a

zamaheno rehapatitregahie. ⁶ Ama mopafima mani'naza vahera, zamagrama hu'naza zamavu'zmava zantera Anumzamo'a keaga hunezmanteno, zamatresnige'za hapinti rama'a vahera zamahe'za eri kevu hanageno hihi huno marerigahie. Ana nehuno maka ama mopafima mani'naza kini vahetamina zamaheno rutragatrago hutregahie. ⁷ Hianagi agra karanka nevuno, kantegama me'nea osi tina neneno hankavea erigahiankino hara hu agatereno asenia antesga hugahie.

111

Ra Anumzamofoma agi'ama ahentesgama hu zagamere

¹ Ra Anumzamofona agi'a ahentesga hanune. Fatgo avu'ava'ma nehaza naga'ma atruma hanafina, maka nagu'areti hu'na Ra Anumzamofona susu hunteguhue. ² Ra Anumzamo'ma eri'zama eri'nea eri'zamo'a, so'e zantfa hu'ne. Ana hu'neanki'za agrama eri'nea eri'zanku'ma musema nehaza vahe'mo'za, ana zamofa agenkea atrazageno zamagu'afi me'nege'za nentahize. ³ Maka zama Anumzamo'ma nehia zamo'a agri hankave hihamu masa zama'anena erinte ama nehie. Ana hu'neankino Anumzamofa fatgo avu'ava zamo'a, vagaore mevava huno nevie. ⁴ Anumzamo'a ruzahu hentofa eri'zama eri'nea zankura, tamaganera okanisie huno tagri antahizana eri o'netie. Ra Anumzana tagri Anumzamo'a asunku nehuno arimpa fru Anumza mani'ne. ⁵ Anumzamofonku'ma

koro'ma hunte'za agorga'ama nemaniza vahera, agra ne'zana zamige'za nenaze. Agrama huvempama hu'nea kasege'agura agera okani agesa antahi vava hugahie. ⁶ Anumzamo'ma hankave'ama eri ama hige'za agri vahe'mo'zama ke'nazana, ru vahe mopa hanareno, eri zamige'za erisantihare'za menina mani'naze. ⁷ Agrama hugahue huno'ma hu'nea zana maka tro nehuno, fatgo huno refko nehia Anumza mani'neankino, maka kasege'amo'a tamage ke me'neankita antahita amage antegahune. ⁸ Ana kasegemo'a mevava hugahie huno eri hankaveti'neankita, maka zupa fatgo tavutva nehuta amage ante vava hugahune. ⁹ Agra vahe'a mizaseno ete nezamavareno, mevava hania huhagerafi huvempage huzmante'ne. Ana hu'neankino agri agimo'a, ruotage huno hentofaza hu'ne. ¹⁰ Ra Anumzamofoma koro'ma hunte'zana, knare antahi'zamofa agafa'a me'ne. Iza'zo agri avesi'zama amage'ma antesnaza vahe'mo'za antahintahi zampina ani hugahaze. Ana hu'negu maka zupa Anumzamo'a ra agia eri vava hanie.

112

Knare veamo'za muse hugahaze hu'nea naneke

¹ Ra Anumzamofa agi'a ahentesga hiho! Iza'o Ra Anumzamofonku'ma koro hunenteno, muse huno'ma agri kasegema amage'ma nentesnia vahe'mo'a knare asomu erigahie. ² Ana nehanageno mofavre naga'amo'za ranra vaheke efore hu'za maka kaziga ama mopafina knare hu'za manigahaze. Hagi ana

fatgo avu'ava zama nehania vahepinti'ma, henka forehu anante nante'ma hu'za maka kazigama vanaza vahe'mo'za asomu'ene manigahaze. ³ Ana vahe'mokizmi nompina zagone feno zamo'enena megahie. Ana nehanigeno fatgo zamavu zamavamo'a maka zupa mevava huno vugahie. ⁴ Hani zana fore hugahianagi, Anumzamofu amagama nente'za vaheku'ma zamasunku'ma nehu'za, knare zamavuzmava hunezmante'za fatgo zamavu'zamava zama nehaza vahe'mokizmia tavi'mo remsa huzmantegahie. ⁵ Vahe'mo'za zagoma nofi hunaku'ma nehanageno, iza'o muse huno zagoma nemino, maka zama hanifima fatgo kazigatike'ma hania vahe'mo'a, maka zama hania zamo'a knare hugahie. ⁶ Fatgo avu'ava zama nehania vahera kefo avu'ava zamo'a azeri otregahie. Fatgo avu'ava zama nehaza vahera, vahe'mo'za zamagerakani ozamante'za, zamagesa antahizami vava hugahaze. ⁷ Ana vahe'mo'za knazama fore hania zamofu agenkema nentahisu'za korora osugahaze. Na'ankure zamagra Ra Anumzamo'a taza hugahie hu'za amuhara nehu'za, zamentintia nehaze. ⁸ Ana vahe'mo'za zamagu'a zamazeri hanaveneti'za, korora osu mani'ne'za nezmagesage'za ha' vahezmi zamazeri haviza hugahaze. ⁹ Ana vahe'mo'za zamunte omane vahera refko hu'za mago'a zana amne zamigahaze. Ana nehanageno fatgo zamavu'zamava nehaza zamo'a mevava huno nevanige'za vahe'mo'za, husga hunezmante'za ra zamagi zamigahaze. ¹⁰ Hagi kefo zamavu'zamava

zama nehaza vahe'mo'za ana zama nege'za, zamarimpagu nehu'za zamavera aninkreki hugahaze. Ana nehu'za kefo avu'ava zama nehaza vahe'mo'zama knare'nare zama erinaku'ma antahintahima hu'nesaza zana e'orisageno, mago'a zama erinaku'ma amuhama nehaza zamo'a amne zankna hugahie.

113

Knare vahe'mo'za muse hugahaze hu'nea naneke

¹ Ra Anumzamofu agi'a ahentesga hanune! Ra Anumzamofu eri'za vahe'mota Anumzamofu agi'a ahentesga hiho. Ra Anumzamofu agi'a ahentesga hiho. ² Menine henkanena Ra Anumzamofu agigura muse hunte vava huta vanune. ³ Zage hanatitegati vuno zage fretegama vanigeta, maka vahe'mota, Ra Anumzamofu agi'a husga huntene. ⁴ Ra Anumzamo'a onagamu mani'neni, maka ama mopafi vahera kegava hu'nege, Agri konarari masa zamo'a mona agatereno amenagame mareri'ne. ⁵ Ina vahe'mo Ra Anumzana tagri Anumzamo'ma tra'are'ma manisgama hu'nea Anumzankna vahera mani'ne? ⁶ Ana Anumzamo'a onagame mani'neni kefenkateno monane mopanena nege. ⁷ Zamunte omne vahe'ma kugusopafima mase'nazana Anumzamo'a zamavazu huno zamazeri o'netino, maka zanku'ma atupa'ma nehaza vahe'ma ta'nefapima mani'nazana zamavaresga nehie. ⁸ Ana huteno kva vahe'mofo trate zamantege'za, agri vahe'ma kegavama nehaza ugota kva vahe'mo'zama nemaniza

tva'ontera nemanize. ⁹ Mofavre onte naravo ara mofavre amigeno rama'a mofavre nenteno, tusi muse nehie. Ra Anumzamo'a ra agia erisie.

114

Anumzamo'ma koranke hagerinte'ma zamazama hige'za hu'naza zagamere

¹ Hagi Israeli vahe'mo'zama Isipiti'ma atre'zama e'nazana, Jekopu naga'mo'za ru zamageru'ma neraza vahe'mokizmi moparegama umani'nazaregatira atre'za e'naze ² Ana'ma hazageno'a Juda mopamo'a Anumzamofu mono nonkna higeno, Israeli mopa Agra'a kegava hu'ne. ³ Koranke hagerinte'ma azageno'a, ana hagerimo'a nezmageno koro fre'ne. Ana nehigeno Jodani timo'a ete rukrahe huno ne-erega vu'ne. ⁴ Ranra agonaramimo'za, ve sipisipimo'zama nehazaza hu'za takaure takaure nehazageno, ne'onse agonaramimo'za anenta sipisipimo'zama nehazaza huza takaure takaure hu'naze. ⁵ Nazamo higenka Koranke hagerimoka, korora nefrane? Nazamo higenka Jodani timoka, ete rukrahe hunka neantega nevane? ⁶ Nazamo higeta ranra agonaramimota, ve sipisipimo'za nehazaza huta takaure takaurera nehaze? Nazamo higeta ne'onse agonaramimota, anenta sipisipi afumo'zama nehazaza huta takaure takaurera nehaze? ⁷ Ama mopamoka Ra Anumzamofu avuga kahirahiku nehunka, Jekopu Anumzamofu avuga kahirahiku huo. ⁸ Ana Anumzamo'a havefina higeno tirura marenevazigeno, havemoke'ma hu'nea

agonafintira higeno tina hanatino ne-ea ne'
mani'ne.

115

*Anumzana Agrake tamage Anumzana mani'ne
hu'nea naneke*

¹ Ra Anumzamoka tagra rantagia e'origahunanki, kagrake rankagia erigahane. Na'ankure kagra maka zupama vagaore kavesi zanku'ene, hugahuema hu'nana zama amage'ma antenkama nehana zanku huta, kagi'a husga hunegantone. ² Nagafare ama mopafima mani'naza vahe'mo'za tagrikura hu'za, Anumza zamimo'a iga mani'ne hu'za nehaze? ³ Tagri Anumzamo'a monafinka mani'neankino nazano hunaku'ma hiazana agra'a avesite amne nehie. ⁴ Hianagi mago'a vahe'mokizmi havi anumzana, silvareti'ene golireti vahe'mo'za avako hu'za zamazanteti tro hu'naze. ⁵ Ana havi anumzantamina zamagira me'neanagi, keaga nosu'za, zamavurga me'neanagi, onkegahaze. ⁶ Hagi zamagesa me'neanagi keaga nontahi'za, zamagona me'neanagi mna ontahigahaze. ⁷ Zamazana me'neanagi mago zana avakora hu'za nonke'za, zamagia me'neanagi kana ante'za vanoa nosu'za, zamanankena me'neanagi, zamagerura orugahaze. ⁸ Hagi ana havi anumzantamima tro'ma nehaza vahe'mo'za ana havi anumzantamo'zama havizama nehazaza hu'za zamagra haviza nehanage'za, ana havi anumzante'ma zamentintima nehanaza vahe'mo'za zamagranena haviza hugahaze. ⁹ Hagi tamagra Israeli vahe'mota

Ra Anumzamofonte tamentintia hiho. Na'ankure agra hankogna huno mani'neankino, agrake'za tamahorakeno tamagura nevazino kegava huneramante. ¹⁰ Aroni nagapinti'ma pristi eri'zama e'neriza nagamota, Ra Anumzamofonte tamentintia hiho. Na'ankure agra hankogna hu'neankino agrake'za tamahorakeno tamagura nevazino, kegava huneramante. ¹¹ Hagi Ra Anumzamofonku koro'ma hunteta agoraga'ama nemaniza vahe'mota, Ra Anumzamofonte tamentintia hiho. Na'ankure Agra tamazahu ne' mani'neni tamagri hanko mani'neankino, Agrake'za tamahora keno tamagura nevazino kegava huneramante. ¹² Ra Anumzamo'a ageraokani aghesa antahi neramiankino, asomura hurantegahie. Israeli vahera asomura hunezmanteno, Aroni naga'ma pristi eri'zama e'neriza naga'enena asomura huzmantegahie. ¹³ Zamagi me'nea vahero zamagi omane vahe'mo'zanema, Ra Anumzamofonkuma koro'ma nehaza vahera Anumzamo'a asomu huzmantegahie. ¹⁴ Ra Anumzamo'a asomu huramantena tamagra mofavrea kasente hakare nehanageno, tamagri mofavre naga'enena asomura huzmantesnige'za mofavrea kasente hakare hanaze. ¹⁵ Ra Anumzana monane mopanema tro'ma hu'nea Anumzamo tamagrira asomura huramantesie. ¹⁶ Monafina Ra Anumzamo nemanino, ama mopa vahemotagu maniho huno tami'ne. ¹⁷ Ko'ma fri'naza vahe'mo'za zagamera hu'za Ra Anumzamofa agi'a ahentesga osugahaze. Na'ankure zamagra fri'za keaga osu kumapi, matipi umani'naze ¹⁸ Hianagi

tagra Ra Anumzamofona menine henka'anena agri agi'a ahentesga huvava huta vanune. Ra Anumzamofa agi'a ahentesga hanune!

116

Anumzamofonku susu hunte zagamere

¹ Nagra Ra Anumzamofona navesinentoe. Na'ankure Agra nagerura nentahino asunku'ma hunanteno nazama hinogu'ma krafa kema huana antahinenamie. ² Na'ankure Agrama agesa anteno antahi nenamia zankura, nagrama kasefa'ma hu'na manisanua kna'afina agriteke nunamuna hugahue. ³ Fri'zamo'a nofimo'ma nazeri anakiaza nehigeno, fri vahe kumaku'ma koro huazamo'a, nazeri fenkami netre. Ana zamo hige'na knazampi nemani'na nasu zampi nemanue. ⁴ Ana'ma nehige'na Ra Anumzamofa agi ahe'na, Ra Anumzamoka nagu'vazio hu'na nunamuna nehue. ⁵ Ra Anumzamo'a asunku huneranteno, fatgo avu'ava nehia ne' mani'neankino, tagri Anumzamofona arimpa fruzamo'a avite'ne. ⁶ Zamagra'ama zamaza osuga vahera, Ra Anumzamo'a kegava hunezmante. Korapara ra hazenkezampi mani'nogeno naguravazi'ne. ⁷ Menina narimpa fru hu'na mani'noe. Na'ankure Ra Anumzamo'a knare hunante'ne. ⁸ Nagrira fri'zampinti nagu'vazino nenavreno, navunura eri haminenanteno, naza hige'na trakara hu'na nomasoe. ⁹ Ana nehigu nagra kasefa'ma hu'na ama mopafima manisanua kna'afina, Ra Anumzamofa avure kana vano hugahue.

¹⁰ Nagra Ra Anumzamokare namentinti nehugu amanage hugahue. Ranknazamo nazeri haviza nehie. ¹¹ Nagra antahintahi hakarema nehua knafina amanage hu'na Kagritega kezana netue. Maka amama mani'naza vahera havige nehaza vahe mani'naze. ¹² Ra Anumzamo'ma maka knare avu'ava zama hunante'nea zantera, nagra na'a nona hu'na amigahue? ¹³ Waini ofama erino Ra Anumzamofonte emerisga hiaza hu'na nagu'vazino navre'nea zankura musenkase nehu'na, agi'a ahentesga hugahue. ¹⁴ Hagi Anumzamofu vahe'ma maka eme etruma hanafina, nazano hugahue hu'nama Ra Anumzamofu avure'ma huvempama hu'noa zantamina hugahue. ¹⁵ Ra Anumzamofoma amage'manentaza vahe'ma frizana, Anumzamofu avurera so'e zantfa nehie. ¹⁶ Ra Anumzamoka nagra kagri eri'za vahe mani'noanki'na, eri'za vahekamo'na kagri nompima eri'za e'neria a'mofu mofavre mani'noe. Ana hu'neankinka nofimo'ma kinama renante'neana katufenka nazeri fru hu'nane. ¹⁷ Ana hu'neanki'na kagritega humuse ofani'a hunegante'na, Ra Anumzamoka kagire nunamuna hugahue. ¹⁸ Hagi nazano hugahue hu'nama Ra Anumzamofu avure'ma huvempama hu'noa zantamina, maka Anumzamofu vahe'ma eme etruma hanafina ana zana hugahue. ¹⁹ Jerusalemi kuma'mofu agu'afima, Ra Anumzamofu mono noma me'nea kumapi, Ra Anumzamofu agi'a husga huntuesue.

Ra Anumzamofa agi'a ahentesga hanune hu'nea zagamere

¹ Maka ama mopafima kokankokama nemaniza vahe'mota, Ra Anumzamofa agi'a husga huntaho. Maka mopafi vahe'mota Anumzamofona agi'a ahentesga hiho. ² Na'ankure Ra Anumzamo'a tuziza huno vagaore avesi zanteti avesi neranteno, Agra hugahuema hu'nea ke'a avaririno kegava hurantevava nehie. Ra Anumzamofona agi'a ahentesga hanune.

118

Anumzamo aza hu'nea zanku kva ne'mo muse nehuno hunte'nea zagamere

¹ Ra Anumzamofona susu huntasune, na'ankure Agra knare avu'avaza huneranteno vagaore avesi zama'areti avesirante vava nehie. ² Maka Israeli vahe'mota huta, Anumzamofona vagaore avesi zama'amo'a mevava huno nevie huta hiho. ³ Aroni naga'ma pristi eri'zama e'neriza nagamota hanazana, Anumzamofona vagaore avesi zama'amo'a mevava huno nevie huta hiho. ⁴ Ra Anumzamofonku'ma koro'ma hunente'zaagoragama nemaniza vahe'mota Anumzamofona vagaore avesi zama'amo'a mevava huno nevie hu'za hiho. ⁵ Nagra ra knazampima manine'na Ra Anumzamofonte nunamuma hugeno'a, Ra Anumzamo'a nunamuni'a antahinamino knazanifintira naza hige'na fru hu'na nemanue. ⁶ Ra Anumzamo'a nagri kaziga mani'neanki'na, nazano vahe'mo'ma hunante'naku'ma hania zankura, korora osugahue. ⁷ Tamage, Ra Anumzamo'a nagri

kaziga mani'neankino, nagrira naza hugahie. Ana nehuno ha'ma renenantaza vahera zamazeri haviza nehanige'na, muse nehu'na zamage fenkami atregahue. ⁸ Ra Anumzamofompima fra'makino mani'zamo'a, vahete'ma amuha'ma hu'zana agatere'ne. ⁹ Ra Anumzamofompima fra'makino mani'zamo'a, ugagota kva vahete'ma amuha'ma hu'zana agatere'ne. ¹⁰ Maka kokankoka vahe'mo'zama eme navazagi kagi'za hara hunante'naze. Hianagi Ra Anumzamofogifi ana vahera hara huzmagatere'noe. ¹¹ Nagri'ma ha'ma hunante'nakura tamagerfa hu'za maka asoparegati eme navazagi kagi'naze. Hianagi Ra Anumzamofogifi hara huzmagatere'noe. ¹² Ha' vahe'mo'za tumemo'ma nehiaza hu'za eme nazeri kagi'naze. Hianagi tevemo'ma osi trazampima ruhagana huno teteno fanane hiankna hu'naze. Ana nehazage'na Ra Anumzamofogifi hara huzmagatere'noe. ¹³ Ha' vahenimo'za hankaveti'za hara hunante'za e'za eme nazeri haviza hunaku hu'naze. Hianagi Ra Anumzamo'a naza hu'ne. ¹⁴ Ra Anumzamo'a nagri hankavene, nagri zagame'ene mani'ne. Ana hu'neankino agrake naguranevazie. ¹⁵ Fatgo avu'ava zama nehaza vahe'mo'za seli nozamifi manine'za musenkase nehu'za, muse zagame'ma hu'nazana, Ra Anumzamofogifi tamaga azamo'a, hankavenentake'za eri fore hu'ne hu'za hu'naze. ¹⁶ Ra Anumzamo'a tamaga kaziga azana eri sga huno mani'nenohara hugaterene. Ra Anumzamofogifi tamaga kaziga azamo'a hankavenentake eri'za eri fore hu'ne. ¹⁷ Nagra ofri'na kasefa hu'na manine'na,

Ra Anumzamo'ma tro'ma hu'nea zankura huama hu'na vahera zamasamigahue. ¹⁸ Ra Anumzamo'a nagrira nazeri fatgo hunaku knaza namino nazeri havizantfa hu'ne. Hianagi natrege'na ofri'noe. ¹⁹ Fatgo avu'avazamofu kafana eri anaginantege'na, ufre'na Ra Anumzamofona humuse hunta'neni. ²⁰ Ama Ra Anumzamofu kafane. Ana hu'neanki'za fatgo vahe'mo'za ama ana kafanteti ufregahaze. ²¹ Anumzamoka nagri nunamuma antahi nenaminka, nagu'mavazinke'nama knare hu'nama mani'noa zankura susu hu'na humuse hugantoe. ²² Noma negiza eri'zama'a omane'nea have hu'zama eri atre'naza havemo'a, nomofu renagentete asetenageno noma azeri hankaveti have fore hu'ne. (Matiu 21:42, Maki 12:10-11) ²³ Ama ana eri'zana Ra Anumzamo eri fore higeta negonankino, hentofaza hu'negeta negone. ²⁴ Ama zagegna Ra Anumzamo tro hu'ne. Ana hu'neankita ama ana knafina musenkase huta trimpa frune manisanune. ²⁵ Ra Anumzamoka keke huta muse hugantonanki, tagu'vazinka neravrenka, tazeri so'e hananketa maka zampina knare huta manisanune. ²⁶ Iza'o Anumzamofu agifima esania vahera, Ra Anumzamo'a asomu huntegahie. Ana vahe'mofona Ra Anumzamofu nompi agia husga huntesine. (Matiu 21:9. 23:39. Maki 11: 9-10. Luku 13: 35.19: 38. Joni 12: 13) ²⁷ Ra Anumzana tagri Anumza mani'neankino, agra'a masa'areti remsa hurante'ne. Ofama hunteseza zana erita vuta, kresramna vu itamofu pazivete nofiteti ome anakinteho. ²⁸ Anumzamoka nagri Anumza mani'nanku, susu hu'na humuse hugantegahue. Kagra nagri

Anumza mani'nananki'na, kagri kagi'a husga hugahue. ²⁹ Ra Anumzamofona susu huta humuse huntesanune. Na'ankure agra knare zantfa hu'neankino, vagaore mevava avesi zama'amo'a mevava huno vugahie.

119

Anumzamofa kasegemo'a knare zantfa hu'ne hu'nea naneke

**Aleph*

¹ Iza'zo nomani'za zamifima fatgo avu'ava zama nehu'za, Ra Anumzamofa kasegema amage'manentaza vahe'mo'za muse hugahaze. ² Iza'zo Anumzamofa kasegema amage'ma nente'za vahe'mo'za, maka zamagu'areti'ma hu'za agriku'ma nehakaza vahe'mo'za muse hugahaze. ³ Ana vahe'mo'za havi avu'ava zankura zamavesra nehu'za, Anumzamofoma ave'nesia avu'ava zanke hu'za amageranentaze. ⁴ Anumzamoka kagra kasegeka'a neraminka tagrikura hunka, ana kasegea amage ante fatgo hiho hunka hu'nane. ⁵ Nagri'ma nave'nesiana maka zupa kagri trake amage nentesugeno, nomani'zanifina ome hankavetisiegu nave'nesie. ⁶ Ana'ma hanige'na nagazegura osugahue. Na'ankure kagri kasegefi navua ketena vugahiankina, nagra nagazegura osugahue. ⁷ Hagi fatgoma hu'nea kasegeka'ama rempima hu'na antahisuna, fatgo nagu'areti hu'na kagrira humuse hugantegahue. ⁸ Kagri tra keka'a amage

* **119:** Hibru kefi alfa betia amareti agafa huno vu'ne.

antenaku nehue. Muse hugantoanki natrenka kamefira huonamio.

Beth

⁹ Inankna huno nehezavemo'a nomani'za ma'afina agrua huno manigahie? Agrama mani agruma huno mani'naku'ma hanuno'a, kagri ke'ma amage'ma antesanuno, anara hugahie. ¹⁰ Kagri'ma kagenakura nagu'areti tusiza hu'na nehakoanki, natrege'na kagri kasegea atre'na kana hazagre'na ofraneno. ¹¹ Kagri nanekea nagu'afi erintogeno me'neanki'na, kagri kavurera kumira osugahue. ¹² Ra Anumzamoka kagri kagia ahentesga nehuanki, tra keka'a rempi hunamio. ¹³ Kagrama tasami'nana kasegeka'a, nagipintira huama hu'na vahera zamasamigahue. ¹⁴ Kagri kasegegu'ma musema nehua zamo'a, afu fenonku'ma musema nehua zana rugatere'ne. ¹⁵ Amage'ma antehoma hunka tami'nana tra kegura nagesa are'are nehu'na, kagri kavukva zante navua ante'na negoe. ¹⁶ Kagri tra kegura tusi muse nehuanki'na, kagri nanekegura naganera okanigahue.

Gimel

¹⁷ Nagra kagri eri'za vahe mani'noanki nazeri so'e huge'na, kasefa hu'na manine'na nanekeka'a amagera anta'nenno. ¹⁸ Navurga eri hari huge'na, kagri kasegefima hentofazama me'nea zana keama ha'nenno. ¹⁹ Nagra ama mopafina karaga vahe emani'noanki, nagri navurera kasegeka'a eri frara okio. ²⁰ Kagri kasegema amage'ma ante'zankura maka knafina nagu'amo'a tusiza huno avesi'avesi

nehie. ²¹ Kema ontahi veganokno'ma nehu'za kasegeka'ama atre'za hazama negraza vahera, kagra zamazeri konerinka zamatrenanke'za huviza hugahaze. ²² Zamatrege'za kiza zokago kea hunenante'za huhaviza huonanteho. Na'ankure kagri kasegea, nagra amagera nentoe. ²³ Vugota kva vahe'mo'zanena magopi manine'za nazeri haviza hunaku keaga ana'nekize. Hianagi eri'za vahekamo'na kagri kasegegu nagesa antahintahi nehue. ²⁴ Kagri kasegegura tusiza hu'na musena nehugeno, ana kasegemo'a knare antahi'za nenamie.

Daleth

²⁵ Nagra kugusopafi urami'na mase'noanki, kagra naneke ka'areti nazeri kasefa huo. ²⁶ Nagrama nazano hunaku'ma nagesa antahi'noa zana kagrira kasamugenka, ke'nirera nona hunante'nane. Ana hu'nananki menina tra keka'a rempi hunamio. ²⁷ Nagrira naza huge'na kasegeka'amofa agafa'a antahi ama ha'neni. Ana'ma hananke'na so'e zantfama hu'nea eri'zama eri'nana zankura nagesa antahintahi hugahue. ²⁸ Nagu'amo'a kna nehigena, nasunku zampi mani'neni zavira netoanki, kagrama nanekefima hu'nana kante amage antenka nazeri hankavetio. ²⁹ Nagrama havigema nehua zampintira nazeri afete atro. Ana nehunka kasunku hunantenka, kasegeka'a rempi hunamio. ³⁰ Kagrira ogatre'na tamage hu'na kamage antegahue hu'na ko huhampri'noe. Ana nehu'na maka zupa kasegeka'a, nagu'areti hu'na amage antegahue hu'na nagesa antahi'noe. ³¹ Kagri kasegea azeri antrako hu'noanki, Ra

Anumzamoka natregeno mago zamo'a nazeri nagazea osino.

³² Kagri kasegeka'a, amage ante'na vugahue. Na'ankure nagri antahi'zana, kagra eri ra hu'nanku anara hugahue. ³³ Ra Anumzamoka kasegeka'a rempi hunamige'na, amage ante'na nevu'na ome vagaretega va'nenno.

He

³⁴ Ama' antahi'zana namige'na kasegeka'a nentahi'na amage anta'nenno. Ana kasegeka'a maka nagu'areti hu'na amage antegahue. ³⁵ Kagra naveri huge'na kagri kasegemo'ma vuoma huno hu'nea kante vaneno. Na'ankure nagra ana kasegegu musena nehue. ³⁶ Nagri nagu'a eri rukrahe huge'na kagri kasegema amage ante'zanku navesi navesi nehu'na, havi kazigati zago eri'na feno vahera omani'nenno. ³⁷ Agafa'a omane zantaminte'ma navuma negoazana eri netrenka, kagrama naneke ka'afima hu'nana kante amage antenka nazeri kasefa huo. ³⁸ Kagrama huvempama hu'nana zana eri'za vahekamo'nare erinteama nehananke'za, vahe'mo'za kagriku korora hugantegahaze. ³⁹ Vahe'mo'zama nazeri nagazema hu nanekema nehazafintira, Kagra naza huo. Na'ankure kagri kasegemo'a knare hu'ne. ⁴⁰ Kagri kasegema amage'ma ante zankura navesi navesi nehuanki, kagra fatgo kavukva hunka nazeri kasefa huo.

Vav

⁴¹ Ra Anumzamoka atregeno vagoore mevava kavesi zamo'a nagritera ne-esigenka, kagrama huvempama hu'nana kante antenka,

nagu'vazinka ete navro. ⁴² Ana'ma hananke'na nazeri havizama hu kema nehaza vahe'mofok'e'zamirera kenona huzmantegahue. Na'ankure kagri nanekere namentintia nehue. ⁴³ Kagra tamage keka'a nagipintira eri otro. Na'ankure nagra kagri kasegegu amuhara nehue. ⁴⁴ Kagri kasegea nagra maka knafina amage antevava hugahue. ⁴⁵ Mago zamo'a kina reonantesige'na fru hu'na vano hugahue. Na'ankure nagra maka nagu'areti hu'na, kagri kasegea amage nentoe. ⁴⁶ Kini vahe'mokizmi zamavuga oti'na kagri kasegea huama hu'na nezamasami'na, nagazegura osugahue. ⁴⁷ Kagri kasegegura muse nehuankina, ana kasegea navesinentoe. ⁴⁸ Nagra kagri kasegere nazana erisga nehu'na, kagri kasegegura maka zupa nagesa antahintahia nehue.

Zayin

⁴⁹ Kagri eri'za vahekamo'nama huvempama hunante'nana kegura kagesa antahio. Na'ankure anazamo hige'na, kagriteri amuhara nehue. ⁵⁰ Kagrama huvempama hunante'nana nanekemo nazeri hankavenetigeno, knazampima ufroana ana nanekemo nazeri kasefara nehie. ⁵¹ Zamavufga rama nehaza vahe'mo'za, nagrira ki'za zokago ke hunenantaze. Hianagi nagra Kagri kasegea namefira hunomue. ⁵² Ra Anumzamoka korapa'ma tami'nana kasegeka'a naganera nokanue. Ana nehugeno ana nanekemo nazeri hankavenetie. ⁵³ Kefo avu'ava'ma nehaza vahe'mo'zama Kagri kasegema amage'ma nontageno'a, tusi narimpa

nehe. ⁵⁴ Ru vahe moparega kraga'ma umanine'na, Kagri kasegea eri rukrahe hu'na asunte'noe. ⁵⁵ Ra Anumzamoka kenage'enena kagri kagigura naganera nokanue. Ana nehuanki'na kagri kasegea amage antegahue. ⁵⁶ Nagra nomani zanifina maka zupa kagri kasegea amagenentoe.

Heth

⁵⁷ Ra Anumzamoka nagri suza mani'nane hu'na kagrira huhampari'noe. Ana nehu'na huvempa hu'noanki'na amage'ma anteho hunka'ma tami'nana nanekeka'a, amage antegahue. ⁵⁸ Kagra asomu hunanto hu'na maka nagu'areti hu'na kantahinegoe. Kagrama huvempa hu'nana kante amage antenka, kasunku hunanto. ⁵⁹ Nagrama nehua navu'nava zankura nagesa antahintahi nehu'na, rukrahe hu'na Kagri kasege amage antegahue. ⁶⁰ Nagra mago zankura avega ontegahuanki'na, amehu'na Kagri kasegea amage antegahue. ⁶¹ Kefo avu'ava zama nehaza vahe'mo'za nazeri anaki'za nehaze. Hianagi Kagri kasegegura nagera nokanue. ⁶² Kenagera oti'na fatgoma hu'nea kasegeka'agura humuse hunegantoe. ⁶³ Kagri'ma kamagama nente'za vahe'mo'za, Kagri kasegema amage'ma nentaza vahe'ene tragote'na nemanue. ⁶⁴ Ra Anumzamoka vagaore mevava kavesi'zamo ama mopafina avite'neanki, kasegeka'a rempi hunamio.

Teth

⁶⁵ Ra Anumzamoka kagrama huvempama hu'nana kante amage antenka, eri'za vahekamo'na knare'zana rama'a tro hunante'nane.

66 Kagri kasegegura namentinti nehuanki, knare'ma huno refkohu avu'ava zane, ama' antahi'zana namio. 67 Nagra kamagera onte'na kana atre'na havi kante vugenka, kagra knaza naminka nazeri fatgo hu'nane. Hianagi menina kagri nanekeka'a amagenentoe. 68 Kagra knare hu'nenka knare avu'ava zanke nehananki, kasegeka'a rempi hunamio. 69 Zamavufga rama nehaza osu'noa zanku havige hunante'za vano nehaze. Hianagi nagra nagu'areti hu'na, Kagri kasegea amagenentoe. 70 Ana vahe'mokizmi zamagu'amo'a afovamo'ma hiaza huno kakani'ne. Hianagi kagri kasegegura tusiza hu'na muse nehue. 71 Knazama naminka nazeri havizama hu'nanana nagri knare zanku anara hu'nane. Na'ankure e'i ana zamo'a Kagri kasege amage ante'za rempi hunami'ne. 72 Kagrama tami'nana kasegemo'a, rama'a tauseni'a goline silvanena rugatereno nagritero razankrerfa me'ne.

Yodh

73 Kagraka'a kazampinti tro hunantenka nazeri fore hu'nane. Ana hu'nanku kagri kasegema rempima hu'na antahisanugu ama' antahi'zana namio. 74 Kagriku'ma koro'ma nehaza vahe'mo'za nagri'ma nenage'za muse hugahaze. Na'ankure Kagri nanekegu amuhara nehugu anara hugahaze. 75 Ra Anumzamoka kagra fatgo hunka refkoa nehane. Nagri nazeri fatgo hunaku naneke ka'are Kagra oti'nenka, knazana nami'nane. 76 Eri'za vahe kamo'nama huvempama hunante'nana kante amage antenka, atregeno vagaore mevava kavesi zamo nazeri

hankavetino. ⁷⁷ Kagra kasunku hunantenka nazeri kasefa huge'na mani'nenno. Na'ankure Kagri kasegegura tusiza hu'na muse nehue. ⁷⁸ Zamavufga rama nehaza vahe'mo'zama havigema hu'za nazeri havizama hu'naza vahera zamazeri zamagaze huo. Hianagi nagra Kagri kasegegu nagesa antahintahi hugahue. ⁷⁹ Kagri kasegema antahi'neza, kagriku'ma koro'ma nehu'za kagoraga'ama nemaniza vahera atrege'za nagrite erava'o hiho. ⁸⁰ Naza hugena kagri kasege amage nente'na, havi nagia e'orisanue. Ana nehu'na nagazegura osanue.

Kaph

⁸¹ Kagrama nagu'vazinka navresnanku navesinavesi nehige'na kavega ante'na za'zate'ma manua zamo higeno, zaferinani'a omane amane nehie. Hianagi Kagri nanekegu amuhara nehue. ⁸² Kagrama huvempama hu'nana kemo'ma nena'ama efore hanigu navuma antete'na manua zamo'a, navunata negrie. Ana hige'na nagra hu'na, nazupa nazeri knare hugahane hu'na nehue? ⁸³ Mememofa akurutetima troma hu'naza tintafema teverema ante hagege hazageno, ome haviza hiankna huno navufgamo'a havizantfa hu'ne. Hianagi Kagri tra kea nagra nagera okani'noe. ⁸⁴ Nama'a zupa Kagrikura kavega antegahue? Nagri'ma knama nenamiza vahera, ina zupa nona hunka knazana zamigahane? ⁸⁵ Zamavufga rama nehaza vahe'mo'za kagri kasegea amagera nonte'za, nagrama tnafa'ma hu'na mase'nugura kama vano nehufina keru kafinentaze. ⁸⁶ Maka

kasegekamo'a tamage nanekege me'ne. Agafa'a omane'nea zante vahe'mo'za havige hu'za hazenke naminaku nehazanki naza huo. ⁸⁷ Ana vahe'mo'za ama mopafintira kofahu'za nahe fri'za hu'naze. Hianagi Kagri tra kea namefira huomi'noe. ⁸⁸ Kagra vagaore mevava kavesi zanteti nagrira nazeri antese hunka kegava hunenantane. Ana hu'negu kagri tra kea amage ante vava hugahue.

Lamedh

⁸⁹ Ra Anumzamoka Kagri nanekemo'a vagaore mevava naneke me'neankino, monafinka hankavetino me'ne. ⁹⁰ Kagra nazano hugahue hunkama hu'nana zama nehana kavu'ava zamo'a mevava nehuno, forehu anante nante'ma hu'za vanaza vahetera vugahie. Mopa tro hunka antankeno hankavetino me'ne. ⁹¹ Kagri kasegemo'a hankavetino meme eno ama knarera ehanati'ne. Ana hu'neankino maka ama mopafima me'nea zantamimo'za Kagri eri'zanke e'nerize. ⁹² Hanki Kagri kasegegu'ma tusi musema osuresina, nagrama natazama erua knafi ko frusine. ⁹³ Nagra tamagerfa hu'na kagri kasegea nagera okanigahue. Na'ankure ana nanekemo higenka, nasimura naminke'na kasefa hu'na mani'noe. ⁹⁴ Nagra kagri vahe mani'noanki nagu'vazio. Na'ankure maka zupa Kagri kasege amagera nentoe. ⁹⁵ Kefo avu'ava zama nehaza vahe'mo'za kafo ante'za mani'neza nazeri haviza hunaku nehaze. Hianagi Kagri kasegegura nagesa antahintahi hugahue. ⁹⁶ Nagrama ke'na antahi'na huana, mago zamo'a knare huno hankavetino mezana omane'ne. Hianagi Kagri

kasegea mago zamo'a azeri ontesigeno, mevava huno vugahie.

Mem

⁹⁷ Nagra Kagri kasegegura tusiza hu'na navesi nente'na, maka knafina nagesa antahintahi nehue. ⁹⁸ Kagri kasegemo knare antahi'zana namige'na, ha' vaheni'a knare antahizampina zamagate'neroe. Na'ankure maka zupa Kagri kasegemo nagrane me'nenno, nazeri fatgoa nehie.

⁹⁹ Nagra maka zupa Kagri kasegegu nagesa antahintahi nehu'na, rempima hunenamiza vahera zamagatere'na knare antahi'zana eri'noe.

¹⁰⁰ Ranra vahe'mokizmia zamagatere'na knare antahi'zana eri'noe. Na'ankure maka zupa Kagri tra ke amagera nentogu anara hu'noe. ¹⁰¹ Maka kefo avu'ava zama hu'zantera nagia renakere'na novue. Na'ankure kagri naneke amage antenaku anara nehue.

¹⁰² Nagra Kagri tra kea atre'na namefira huomi'noe. Na'ankure Kagra knare'za hunka, rempi hunami'nanku anara hu'noe.

¹⁰³ Kagri nanekema nagite'ma erinte'nama koana, tusi haganentake hu'neankino, tumerimo'ma hagama nehiamama'a rugatereno tusi haga hu'ne!

¹⁰⁴ Kagri kasegemo ama' antahi'zana nenamie. E'ina hu'negu maka havi avu'ava zankura nagotenenoe.

Nun

¹⁰⁵ Kagri nanekemo'a lamu tavikna huno nagiafina remasa hunenanteno, tavikna huno kama nevufina remsa hunenante. ¹⁰⁶ Nagra huvempa hu'na fatgoma hu'nea trake amage antegahue. Anage nehu'na hu hankavetuanki'na

amage antegahue. ¹⁰⁷ Ra Anumzamoka nagra tusi'a kna zampi manuanki, Kagrama huvempama hu'nana kante amage antenka, nazeri kasefa huge'na ofri mani'nenno. ¹⁰⁸ Ra Anumzamoka ofagna hu'na Kagri'ma rama'a zupama susu'ma hu'na husgama hunegantoana antahi nenaminka, kasegeka'aramina rempi hunamio. ¹⁰⁹ Maka zupa ha' vahenimo'za nahe fri'za nehaze. Hianagi Kagri kasegea naganera okanigahue. ¹¹⁰ Kefo avu'ava zama nehaza vahe'mo'za nagri'ma nazeri haviza hunakura, kampina krifu anagi antazankna nehaze. Hianagi Kagri kasegea atre'na hazanogroe. ¹¹¹ Kagri kasegea mevava feno zankna hu'na erisanti hare'noe. Na'ankure ana nanekemo, nagu'a nazeri muse nehie. ¹¹² Nagra kagri kasege maka zupa amage antegahue hu'na nagesa antahi'noanki'na, amage anteme nevu'na ufrigahue.

Samekh

¹¹³ Kagri kasegema amage antegahune nehu'za tare antahintahima nehaza vahera nagote'nezmantoe. Hianagi Kagri kasegea navesinentoe. ¹¹⁴ Nagrama fra'ma kisanua kuma'ene hankonine Kagra mani'nane. Kagri nanekegu amuhara nehue. ¹¹⁵ Tamagra kefo avu'ava zama nehaza vahe'mota, nagrira natareta viho. Na'ankure nagra Anumzanimofa kasege amage ante'naku nehue. ¹¹⁶ Ra Anumzamoka kagrama huvempama hu'nana kante amage antenka, nazeri hankavetige'na ofri kasefa hu'na mani'nenno. Ana nehunka atregeno

amuha'ma nehua zamo'a, amne zanknara osino.
¹¹⁷ Nazeri sga huge'na knare hu'na nemani'na,
 maka zupa kasegeka'agura antahintahi huvava
 ha'nenno. ¹¹⁸ Kagri kasegema amage'ma nontaza
 vahera kamefi hunezamine. Zamagra ana
 vahe'mo'zama nehaza havigemo'a amne zankna
 hugahie. ¹¹⁹ Kefo avu'ava zama nehaza vahera
 kagra amne zama hiaza hunka ama mopafintira
 reganope netrane. Ana hu'negu nagra Kagri
 kasegea navesinentoe. ¹²⁰ Nagra kagriku koro
 nehugeno, navufgamo'a nahirahi nere. Kagra
 keagama refko'ma nehana zanku, nentahi'na
 korora nehue.

Ayin

¹²¹ Nagra knare huno fatgo hu'nea avu'avaza
 hu'noanki, natrege'za vahe'ma knama zamiza
 zamazeri havizama nehaza vahe'mo'za nazeri
 havizana osiho. ¹²² Muse hugantoanki kagri eri'za
 vahekamo'na kegava hunenantenka, natrege'za
 zmavufga rama nehaza knazana onamiho.
¹²³ Kagrama huvempama hu'nana kante amage
 nentenka, fatgo kavukva hunka havi avu'ava
 zama nehaza vahe'mokizmi zamazampinti'ma
 naza hunka nagu'vazisanegu'ma navuma
 antete'nama manua zamo'a navumo'a natagrie.
¹²⁴ Vagaore mevava kavesi zanteti eri'za
 vahekamo'na kavesigante'noe hunka naveri
 nehunka, tra keka'a rempi hunamio. ¹²⁵ Nagra
 Kagri eri'za vahe mani'noanki ama' antahi'zana
 namige'na, Kagri kasegea antahi amara ha'nenno.
¹²⁶ Ra Anumzamoka menina Kagri kna efore
 hu'negu, Kagri kasegema runetagraza vahera

zamazeri haviza huo. ¹²⁷ Tamagerfa hu'na Kagri kasegema navesimanentoa zamo'a, agruma hu'nea golia rugatere'ne. ¹²⁸ E'ina agafare maka Kagri kasegemo'a tamage naneke me'ne hu'na nentahi'na, havi kante'ma vu'zankura nagonete.

Pe

¹²⁹ Kagri kasegemo'a knare zantfa hu'negu, nagra amage nentoe. ¹³⁰ Kagri nanekema eri vakare'za rempima huneramiza zamo'a, tavi remsa hiankna huno remsa hunerante. Ana hu'neankino antahizama'a omane vahe'mo'enena nanekeka'a antahi ani' hugahie. ¹³¹ Nagi'ma aka hu'nena nagefunama hagna hagna'ma nehuana, na'ankure nagu'areti tusiza hu'na Kagri kasegema navesinentogu anara nehue. ¹³² Kagri kagima avesinentaza vahe'ma hunezmantanaza hunka, rukrahe hunka kasunkura hunanto. ¹³³ Kagra huvempama hu'nana kante antenka, kama vanoma hanufina kegava hunanto. Ana'ma hanankeno'a kefo avu'ava zamo'a nazeri nagate oregahie. ¹³⁴ Vahe'mo'zama knama namiza nazeri havizama nehaza zampintira, Kagra ete navu'vazinka nenavrege'na, Kagri kasegea amage anta'nenno. ¹³⁵ Kagra kavugosafinti masaka'anu eri'za vahekamo'na remsa hunenantenka, kasegeka'a rempi hunamio. ¹³⁶ Vahemo'zama Kagri kasegema amage'ma nontageno'a, navunumo'a, navufintira tinkna huno herafi neramie.

Tsadhe

¹³⁷ Ra Anumzamoka Kagra fatgo kavukva'ene ne' mani'nankeno, Kagri kasegekamo'enena fatgo

hu'ne. ¹³⁸ Kagrama tami'nana kasegemo'a fatgo hu'neankino, vahe'mo'za zamentintia hugahaze. ¹³⁹ Nagri'ma ha'ma renenantaza vahe'mo'za Kagri nanekea antahi nomizageno, narimpa ahe'zamo'a tusi'za huno teve rukru nehie. ¹⁴⁰ Kagrama huvempama hu'nana nanekeka'ama avamepima erinte'na koana knarezantfa hu'nege'na, Kagri eri'za vahekamo'na tusiza hu'na navesinentoe. ¹⁴¹ Nagra amne nagi omane vahe mani'noge'za, vahe'mo'za huhaviza hunenantaze. Hianagi Kagri kasegea naganera nokanue. ¹⁴² Fatgo kavukva zamo'a mevava huno vugahie. Ana hu'neankino Kagri kasegemo'a, fatgo naneke me'ne. ¹⁴³ Knazamo'a nazeri navesra hianagi, kagri kasegemo nazeri muse nehie. ¹⁴⁴ Kagri kasegemo'a maka zupa tamagerfa huno fatgo hu'ne. Kagra naza huge'na ana nanekea antahi ama nehu'na, kasefa hu'na mani'nenno.

Qoph

¹⁴⁵ Ra Anumzamoka nagra nagu'areti hu'na Kagritega zavi krafa hu'na nunamuna nehuanki, nunamuni'a antahinamio. Ana'ma hananke'na kagri tra kea amage antegahue. ¹⁴⁶ Kagritega zavi krafa nehuanki, nagu'vazinka naza huge'na, Kagri kasegea amage anta'nenno. ¹⁴⁷ Kagrama naza hananegura zahufama masama osu'nege'na oti'na Kagritega zavi krafa nehu'na, Kagri nanekere amuhara nehue. ¹⁴⁸ Kenage'ma navu'ma omase hari hute'nama nemanuana, na'ankure Kagri nanekegu nagesa antahintahi nehu'na anara nehue. ¹⁴⁹ Ra Anumzamoka vagaore mevava kavesi zanteti'ma kavesi

nenantana Anumza mani'nananki, zavi krafama nehuana antahi nenaminka, Kagrama hu'nana kante amage antenka nazeri kasefa huge'na nasimura eri'na mani'nenno. ¹⁵⁰ Kema ontahi vahe'mo'za nazeri haviza hunaku nagritega erava'o nehaze. Ana vahe'mo'za Kagri kasegemofu tava'ontera omani'nazanki afete mani'naze. ¹⁵¹ Ana hu'neanagi Ra Anumzamoka nagri tvaonte mani'nankeno, ana maka Kagri kasegemo'a tamage nanekege me'ne. ¹⁵² Nagra korapa'ma Kagri kasegema rempi hu'nama antahi'noana, Kagra kasegeka'agura vagaore mevava hugahie hunka eri fore hankeno me'ne.

Resh

¹⁵³ Nagrama natazama e'nerua zana negenka, ana knazampintira nazeri atro. Na'ankure nagra Kagri kasegea naganera nokanue. ¹⁵⁴ Nagri kaziga antenka keagafina naza hunka keaga nehunka, Kagrama huvempama hu'nana kante antenka nazeri kasefa nehunka, nasimura namige'na mani'nenno. ¹⁵⁵ Kefo avu'ava zama nehaza vahe'mo'za zamagu'ma vazizamofona afete nemanizankinka zamagura ovazigahane. Na'ankure ana vahe'mo'za kagri kasegea amagera nontazagu, anara hugahane. ¹⁵⁶ Ra Anumzamoka Kagri kasunku zamo'a rankrerfa hu'neanki, kagri kasegemo'ma hu'nea kante antenka nazeri kasefa nehunka, nasimura namige'na mani'nenno. ¹⁵⁷ Nagri'ma nazeri havizama nehaza vahe'ene knazama nenamiza vahetmina rama'a mani'naze. Hianagi Kagri kasegea atre'na namefira hunomue. ¹⁵⁸ Havigema hu'za vahe'ma rezmavatga

hazage'zama hazenkema eneriza vahe'ma nezamage'na, amutisanua nagesa nehie. Na'ankure ana vahe'mo'za Kagri nanekea antahi amneza nehaze. ¹⁵⁹ Nagrama kagri kasegema navesimanentoa zana nenagenka, Ra Anumzamoka vagaore mevava kavesi zanteti kavesinantenka nasimura namige'na kasefa hu'na mani'nenno. ¹⁶⁰ Kagri nanekemo'a tamage naneke me'ne. Ana hu'neankino maka fatgo tra kekamo'a vagaore mevava huno vugahie.

Shin

¹⁶¹ Mago ke agafa'a omane zante ugagota kva vahe'mo'za nazeri haviza nehaze. Hianagi nagu'areti hu'na kagri nanekegura korora nehu'na nagesa antahintahi nehue. ¹⁶² Mago vahe'mo'ma tusi fenozama eri nafa'a nehuno musema hiaza hu'na, Kagrama huvempama hu'nana nanekegura tusi muse nehue. ¹⁶³ Havigema hu avu'ava zankura, nagrira nagonete. Hianagi Kagri kasegea navesi nentoe. ¹⁶⁴ Fatgoma hu'nea kasegegura, mago zage knafina 7ni'a zupa Kagrira humuse hunegantoe. ¹⁶⁵ Kagri kasegema amage'ma nentaza vahe'mo'za ra zamarimpa frune nemanizankino, mago zamo'a zamazeri tanafara osugahie. ¹⁶⁶ Ra Anumzamoka nagu'vazinka etema navresnanku amuhara nehu'na kavega ante'na manine'na, Kagri kasegea amagenentoe. ¹⁶⁷ Kagri kasegema nagrama amage'nentooana, na'ankure nagra tusiza hu'na navesinentogu hu'na amageranentoe. ¹⁶⁸ Maka kasegeka'ane tra keka'anena nagra amagenentoe. Na'ankure

nagra maka'zama nehuana, Kagra ko nagenka antahinka hu'nane.

Tav

¹⁶⁹ Ra Anumzamoka nagri zavi krafamo'ma Kagrite'ma ne-eana antahi nenaminka, Kagrama huvempama hu'nana kante amage antenka ama' antahi'zana namio. ¹⁷⁰ Nagrama nunamuma nehuana antahi nenaminka, kagrama huvempama hu'nana kante antenka nagu nevazinka ete navro. ¹⁷¹ Kagra kasegeka'ama rempima hunenamina zanku hu'na, Kagri kagia husga hunegantoe. ¹⁷² Kagri kasegegura nagra zagame hugahue. Na'ankure Kagri kasegemo'a, miko fatgo nanekege me'ne. ¹⁷³ Kagra kazana rusutenka nazahuo. Na'ankure nagra Kagri kasegema amage antegahue hu'nama huhampri'noanki naza huo. ¹⁷⁴ Ra Anumzamoka Kagrama nagu'nevazinka nazama hananku kavega ante'na mani'noe. Ana nehu'na Kagri kasegegura tusiza hu'na musena nehue. ¹⁷⁵ Kagra natrege'na ofrina kasefa hu'na manine'na, Kagri kagia ahentesga haneno. Ana nehanugeno Kagri kasegemo naza huno vugahie. ¹⁷⁶ Sipisipi afumo'ma hiaza hu'na kana atre'na hazagre'noe. Ana hu'noanki Kagri eri'za vahekamo'na eme hakrenka navro. Na'ankure Kagri kasegegura naganera nokanue.

120

Agonaregama mareneri'za nehaza zagamere

¹ Nagrite'ma knazama fore'ma higena, Ra Anumzamofonte e'na zavi krafa hu'na

antahigogeno, nunamuni'a antahi nami'ne.
² Nagra amanage hu'na nunamuna hu'noe.
 Ra Anumzamoka zamagi'arima nehu'za
 vahe'ma rezamatgama nehaza vahe tvaontera
 omanisuanki naza hunka navre atro.
³ Havigema nehuta vahe'ma revatagama nehaza
 vahe'mota, Ra Anumzamo'a naza tamagrira tro
 huramantegahie? Inankna knaza tamagrira
 tamigahie? ⁴ Harafa sondia vahe'mokizmia roro
 hu'nea keve zamireti, tamahe haruharu nehuno,
 brumu zafamofu teve tankanu'za nerenia erino
 regasrimprigahie. ⁵ Nagra Meseki mopafima
 kraga'ma emani'nena nomani'zana mani so'ea
 osu'noe. Anazanke hu'na afete Kedari mopafima
 mani'noana, seli nontamimpi nemani'na mani
 so'ea osu'noe. ⁶ Zamarimpa fruma huno
 manizanku'ma zamavesrama nehaza vahe'enena
 zazate mani'noe. ⁷ Nagra ha' osu fru huno mani
 zankuke nehua neki'na, arimpa fruma huno mani
 zanku'ma keagama nehuge'za, ha' eri otikege
 nehaze.

121

*Anumzamo kva vaheti mani'ne hu'nea
 zagamere*

¹ Nagra navua kesga hu'na agonaramintega
 koanagi, inantegati nazamahu vahera egahie?
² Monane mopanema tro'ma hu'nea Ra
 Anumzantegati naza hu'zana ne-e. ³ Agra
 katre'nigenka regrarinka omasegosane.
 Na'ankure kagri'ma kegavama hunegantemo'a
 avura nomasea ne' mani'ne. ⁴ Antahio,
 tamagerfa huno Israeli vahe'ma kegavama

hunezmantemo'a, avu'tokora nosuno avura nomasea ne' mani'ne. ⁵ Ra Anumzamo'a tamagrira kegava huramante'ne. Ra Anumzamo'a tona zafagna huno kagri tvaonte mani'nenno, kegava hunegante. ⁶ Zage feru'pima nevnankeno'a zagemo'a tenogasagesigeno, kenage'ma nevnankeno'a, ikamo'a hazenkea ogamigahie. ⁷ Ra Anumzamo'a kagrira kegava hugante'sigenka, so'e hunka nemaninka hazenkea e'origahane. ⁸ Meninteti'ma agafa huteno henkama maninoma vaniana, inantego vunka enka'ma hananana Ra Anumzamo'a avua anteno kegava hugante vava huno vugahie.

122

Ra Anumzamofa ra mono nontega marenerino hu' zagame, Deviti asunte'nea zagamere

¹ Vahe'mo'za nagrikura hu'za, enketa Ra Anumzamofa mono nontegama vanune hu'za nehazage'na, tusiza hu'na musena nehue. ² Hagi menina Jerusalemia rankafaraminteti ufreta kumapina oti'none. ³ Jerusalemi rankumapima me'nea nontamina magopi magopi hu'za eri hankaveti'za ki'nazageno, kuma'mo'a hankavetino knare huno me'ne. ⁴ Ra Anumzamofa vahe Israeli vahe'mo'za trakemo'ma hihoma huno hu'nea kante ante'za, nagate nofite hu'za anantega mareri'za Ra Anumzamofona susu hunente'za, agi ome ahentesga nehaze. ⁵ Hagi mani'neza keagama refko'ma nehaza tratami anantera me'ne. Ana tratamintera Deviti naga'mo'za kinima mani'za esaza kini tratami me'ne. ⁶ Rimpa fruma

huno manizankura Jerusalemi rankumakura nunamu huntaho. Jerusalemi kuma'ma avesi nentaza vahe'mo'za makazampina knare hu'za hage'za marerigahaze! ⁷ Jerusalemi kuma'moka kuma keginamofu agu'afina arimpa fru huno mani avu'ava zamo megahie. Ana nehanigeno kini vahe'mofu nontamimpina hazenkea omanesige'za knare hu'za manigahaze. ⁸ Nagrira nafu nagna'zane, rone'nimo'zanema Jerusalemi kumapima mani'naza nagaku nagesa nentahi'na, Jerusalemi kumapina hara omena arimpa fru'za mesanie hu'na nehue. ⁹ Ra Anumzana tagri Anumzamofu mono noma me'nea zanku nagesa nentahi'na, Jerusalemi kuma'mokagura nunamuna nehanugenka maka zampina knare hunka hagenka marerigahane.

123

Ra Anumzamofu ra mono nontega marenerino hu'zagamere

¹ Ra Anumzamoka monafinka kini trakare manisga hu'nanke'na, nagra navua kesga hu'na negagoe. ² Eri'za vahe'mo'za kva vahe zamimofonte zamavu kete'za nemanizageno, eri'za a'mo'a kvama hunte'nea a'mofonte azama hanigu'ma avuma keteno maniaza huta, Ra Anumzana tagri Anumzamo'ma asumantagi ranteno tazama hanigu, agrite tavua keteta nemanune. ³ Ra Anumzamoka kasunku hunerantenka mago'ene kasuragiranto. Na'ankure tagrira tusiza hu'za vahe'mo'za tazeri haviza nehaze. ⁴ Zamavufga rama nehaza vahe'mo'za za'zate tagrira kiza zokago ke

hunerantage'za, keontahi vahe'mo'za tagrira tazeri haviza nehaze.

124

Ra Anumzamofa ra mono nontega marenerino hu'zagame, Deviti asunte'nea zagamere

¹ Maka Israeli vahe'mota amanage huta hiho. Ra Anumzamo'ma tagri kazigama omani'neresina, inankna hugahie? ² Ra Anumzamo'ma tagranema omani'nesige'zama ha' vahetimo'zama ha'ma eme hurantesnazana inankna hugahie? ³ Ha' vahetimo'zama tusi zamarimpama aherante'naresina, ko e'za magozagama asgahu nakriankna hu'za tagrira eme tavuaga tasgahu nakrizasine. ⁴ Tagrira timo hageno eme tavreno nevigeno, timo tazeri nakariresine. ⁵ Tusi avunema anteno hageno nea timo, tagrira eme tavreno vu'neresine. ⁶ Ra Anumzamofona humuse huntesanune. Na'ankure agra tatreg'e'za afi zagamo'zama zagagafama ahe'za tragama nehazaza hu'za, ha' vahe'mo'za eme tahe'za traga osu'naze. ⁷ Krifuma anagintegeni azeri'nea namamo'a rugraru'vazino freaza huta, tazeri'nea nofimo'a rukano higeta atreta fre'none. ⁸ Ra Anumzama monane mopane tro'ma hu'nea Anumzamo tagrira taza nehie.

125

Ra Anumzamofa ra mono nontega marenerino hu'zagamere

¹ Ra Anumzamofonte'ma zamentintima nehaza vahe'mo'za zamagra Saioni Agonama

mago zamo'ma azeri tore'ma osigeno,
oti hankavematino mevava huno viaza
hu'za oti hanavetine'za mani'za vugahaze.

² Agonaramimo'ma Jerusalemi kuma'ma azeri
kaginteaza huno, Ra Anumzamo'a vahe'a
meninteti'ma agafa huteno vuvavama haniana
manigagi zamanteno kegava huzmantegahie.

³ Kefo avu'ava zama nehaza vahe'mo'za
kva vahera efore hu'za Ra Anumzamofoma
amage'ma nentaza vahe'mofo mopa kegava
osugahaze. Hanki zamagrama e'ina'ma

hanage'za, Anumzamofoma amage'ma nentaza
vahe'mo'za, zamagranena zamage ante'za kefo
avu'avaza hugahaze. ⁴ Zamagu'amo'ma fatgo

hu'nege'za, knare zamavu zamava'ma nehaza
vahe'mokizmia, Ra Anumzamoka zamazeri
knare huo. ⁵ Hianagi Ra Anumzamoka, kefo

avu'ava zama nehaza vahera zamazeri netrenka,
anazanke hunka havi avu'ava zama nehaza
vahera zamazeri atro. Israeli vahe'mo'za
zamarimpa frune manisaze.

126

*Ra Anumzamofu ra mono nontega marenerino
hu' zagamere*

¹ Israeli vahe'ma kinama ome hu'naza vahe'ma
Ra Anumzamo'ma ete zamavarenoma Jerusalemi
kumate'ma egeta, tagra ava'na negompi huta
hu'none. ² Ana zupa tagra tusi kizazokago

nehuta, zagame huta muse hu'none. Ana'ma
nehunke'za ana zupa kokankoka vahe'mo'za
amanage hu'naze. Ra Anumzamo'a ruzahu'za
huno Israeli vahera zamaza hie hu'za hu'naze.

³ Tamage, Ra Anumzamo'a ruzahu'za huno

tagrira taza higeta tusi muse hu'none. ⁴ Negevi hagage kokampima tima enevuno mikazama eri kasefa'ma nehiaza hunka, knare'zanu Ra Anumzamoka ante vitenerantenka tazeri kasefa huo. ⁵ Zavi'manete'za avimzama nehankresaza vahe'mo'za ranke hu'za muse zagame nehu'za ne'zana hamaregahaze. ⁶ Avimzama hankre'naku'ma eri'za kantegama nevu'za, zavitemema nevanamo'za, hozafinti'ma ne'zama hamre'za nontegama eri'za ne-esuza ranke hu'za muse zagamera nehu'za eri'za egahaze.

127

Ra Anumzamofu ra mono nontega marenerino hu' zagame, Solomoni asunte'nea zagamere

¹ Hagi Ra Anumzamo'ma mago noma onkisiana, ana noma kisia kamunta nemofo eri'zamo'a amne zankna hugahie. Hagi Ra Anumzamo'ma mago rankuma'ma kegavama osaniana, kuma kvama nehaza vahe'mokizmi eri'zamo'a, amne zankna hugahie. ² Kagrama ne'zama nesana zanku'ma kamu'nasisima nehunka, nanterame otinka eri'zama e'nerinkeno vuno hanima huno kenage'ma nesegenka nontegama neanana, amne zampi hankaveka'a netrane. Na'ankure Ra Anumzamo'a agrama avesi nezmantea vahera mani frua zamige'za zamura nemsaze. ³ Ra Anumzamo'ma mofavreramima neramiana museza neramie. Ana hu'neankino Anumzamo'a asomu hunerante. ⁴ Kasefa ne'mofo mofavreramimo'za harafa vahe'mo'ma azampima keveramima eriaza nehie. ⁵ Keve kupima keveramima eri viteankna huno, rama'a

ne' mofavreramima eri fore'ma hu'nesia ne'mo'a muse hugahie. Na'ankure agra agazegura osuno ha' vahe'anena kuma kafantera keaga hugahie.

128

Ra Anumzamofa ra mono nontega marenerino hu' zagamere

¹ Ra Anumzamofoma koro'ma hunente'za agri avu'ava'ma amage'ma nentaza vahe'mo'za muse hugahaze. ² Kagrama kamu'nasisima hunka eri'zama eri'nesana eri'zamofa raga'a, kagraka'a taginka negahane. Ana'ma hanunka asomu'ene knare hunka manigahane. ³ Nonka'afina kagri a'mo'a wainimo knare huno rama'a ragama renteankna hugahie. Kagri mofavre naga'mo'zama ne'zama nenaku'ma trate'ma manikagi snazana, mensi nehagea olivi zafagna hu'za manigagi kantegahaze. ⁴ Tamagerfa huno e'inahu zama fore'ma haniana, Ra Anumzamofoma koro'ma hunentaza vahete fore hugahie. ⁵ Ra Anumzamo'a Saioni kumate mani'nenka, asomu hugantegahie. Kagrama kasefa'ma hunka manisnana kna'afina, Jerusalemi kumamo'a maka zampina so'e zantfa huno nehagesigenka kegahane. ⁶ Kagra muse hunka mani'nenka mofavre naga kamo'zama kasezamante'naza mofavre nagara zamagegahane. Israeli vahe'mo'za ha'zana omanesige'za fru hu'za manisaze.

129

Ra Anumzamofa ra mono nontega marenerino hu' zagamere

¹ Nagrama mofavrema mani'noreti agafama huteno'ma e'neana, ha' vahe'nimo'za hara eme hunante'za nazeri haviza hutere hu'naze. Ama ana nanekea maka Israeli vahe'mota namage anteta hiho. ² Nagrama mofavrema mani'noreti agafama huteno'ma e'neana, ha' vahenimo'za hara eme hunante'za nazeri haviza hutere hu'naze. Hianagi nagrira hara hunagateore'naze. ³ Ha' vahe'mo'zama sefu'ma nami'naza zamo'a nagumpina, hozama antenaku'ma hozafu vahe'mo'za zazate'ma tinkama asazaza huno tinka evu evu hu'ne. ⁴ Hianagi Ra Anumzamo'a fatgo hu'neankino, kefo avu'ava'ma nehaza vahe'mo'zama kinama renante'naza nofira ahekano hutrege'na fru hu'na mani'noe. ⁵ Jerusalemi kuma'ma zamago'ma tenentaza vahera, zamarotago hanage'za rukrahe hu'za nefre'za zamagazegu hanaze. ⁶ Ana vahe'mo'za nomofo agofetu'ma nehagea trazamo'ma mareri za'za osu'nenno hagege hiaza hu'za, zamagra zazatera omanine'za hagege hugahaze. ⁷ Ana trazana witima vasage vahe'mo'a azampina eri aviotege, kona anakigera osugosie. ⁸ Hagi zamagri tvaonte'ma vahe'ma enevu'za amanahu asomu nanekea huozmantegahaze. Ra Anumzamo'a asomu huramante'nie. Tagranena Ra Anumzamofa agifi asomu ke huramantone hu'za osugahaze.

130

*Ra Anumzamofa ra mono nontega marenerino
hu'zagamere*

¹ Ra knazamo refite'nantegenana manine'na, Ra Anumzamokarega naza huogu kezanetue.
² Ra Anumzamoka nagerura antahio. Kasunku hunantogu'ma kezamanetuana kagesa antenka antahio. ³ Ra Anumzamoka Kagra tagri kumi'ma avontafepima krentantesina, keagama hurantesana zupa Kagrira keagafina, iza kagateregahie? ⁴ Hianagi kagra tagri kumi'ma atrerante'nana zanku huta kagriku korora hugahune. ⁵ Ra Anumzamofonku avega ante'noe. Nagu'amo'a Agriku avega ante'neankina, agri nanekere amuhara nehue.
⁶ Kenage'ma kuma kvama nehaza vahe'mo'zama, ame huno nanterama rumsama hanigu avegama nentazama'a, agatereno nagu'amo'a tusiza huno Ra Anumzamofonkura avega nente. Tamage rumsama hanigu avegama nentazama'a agatereno nagu'amo'a tusiza huno Ra Anumzamofonkura avega nente. ⁷ Israeli vahe'mota Ra Anumzamofonku amuhara hiho. Na'ankure agripina vagaore mevava avesi zamo'ene, vahe'ma agu'vazino ete avre avu'ava zamo'a avite'ne. ⁸ Israeli vahe'mo'zama maka kumi'ma hu'naza zampintira, Ra Anumzamo'a Agrake'za kumizamia eri netreno ete zamavaregahie.

131

Ra Anumzamofu ra mono nontega marenerino hu'zagame Deviti asunte'nea zagamere

¹ Ra Anumzamoka navufga atahara nosuna, nagra namimiza runafagera nosue. Nagra ranra zanku'ene, nagrama osuga zankura nagesa

antahintahia nosue. ² Osi mofavremo'ma zavima ote'noma nerera azampima akoheno maseaza hu'na, akohe'na narimpa frune nemanue. Ana zanke huno nagu'amo'enena fru huno nemane. ³ Tamagra Israeli vahe'mota meninteti'ma agafama huno vaniana Ra Anumzamofonte amuhara huvava huta viho.

132

Ra Anumzamofa ra mono nontega marenerino hu'zagamere

¹ Ra Anumzamoka Devitinku'ene, agrama maka knazampima manino e'neazankura kaganera okanio. ² Israeli vahe'mofo Hankavenentake Anumzamoka Deviti'ma huvempagema kagrite'ma hu'neana, ³ amanage huno hu'ne, nagra nonirega vu'na, siparera uomasegahue huno hu'ne. ⁴ Nagra atre'nugeno navumo'a toko nosanige'na, navua kesuraki'na omase manine'na, ⁵ Ra Anumzana Israeli vahe'mokizmi hankavenentake Anumzamo'ma manisania nona kite'na, mani frua hugahue hu'ne. ⁶ Tagra Efrata (Betlehem) kumate'ma manineta huhagerafi huvempage vogisimofo agenkea antahiteta, vuta Ja'ari mopafi me'negeta ome ke'none. ⁷ Anante tagra huta, enketa Anumzamo'ma nemanianontega vuta, Agrama nemanianokini tra'mofo agiafi monora huntesanune huta hu'none. ⁸ Ra Anumzamoka otinka Kagri hankavema huhamprino me'nea huhagerafi huvempage vogisimo'ma, Kagrama mani fruma hanana nompima nevanigenka, Kagrane enka ana nompinka umarerio. ⁹ Kagri pristi vahe'mo'za

za'za kukenama hiaza huza fatgo avu'ava zana eri nehankre'za, Kagri'ma hankavetiza kamage'ma nentaza vahe'mo'za, ranke hu'za zagamera nehu'za musenkasea hugahaze. ¹⁰ Kagri eri'za ne' Devitinku kagesa nentahinka, Kagra'ama masavema frentenka huhampari'nana kini nera kamefira huomio. ¹¹ Ra Anumzamo'a Devitina hankave huvempage hunte'neankino, ana huvempagea eri otregahie. Ana huvempa kema hu'neana, kagrama kasezmante'nana mofavre nagapinti mago'mofo huhampri antesnugeno kagri nona erino kinia manigahie, huno hu'ne. ¹² Hagi kagri ne'mofavre naga'mo'zama, nagrama huhagerafi'noa huvempa kene, kasegenema amage'ma antesageno'a, zamagripinti'ma fore hu anante anante'ma hu'za vanaza mofavre naga'mo'za kinia mani vava hu'za vugahaze. ¹³ Na'ankure Ra Anumzamo'a Saion kuma hunehamprino, Nagri kuma mesie huno hu'ne. ¹⁴ Ra Anumzamo'a huno, ana kumara nagrama mani fru hanua kuma mevava hugahie. Na'ankure ana kumakura tusiza huno navenesianki'na, anampi nagra manigahue. ¹⁵ Ana kumapi vahe'mo'zama nazankuro atupa'ma hanaza zana, amne zamazeri knare nehu'na, ana kumapima zamunte omane vahe'ma mani'naza vahera ne'zana zami'nuge'za nezamu hugahaze. ¹⁶ Hagi Jerusalemima nemaniza pristi vahera za'za kukenama hiaza huna vahe'ma zmaguvazi zana eri hankre zamantegahue. Ana nehanuge'za hankaveti'za namage'ma nentaza vahe'mo'za, ranke hu'za zagamera nehu'za musenkasea hugahaze.

17 Hanki Nagra Devitina hankave'a amigahue. Nagrama masavema taginte'na huhamprinte'noa ne'mo nagri vahe'mofo tavira manigahie.
 18 Nagra agri ha' vahera zamagaze zanu refite zmantegahue. Hianagi agra hihamu masa'ane kini ne' efore hugahie.

133

Ra Anumzamofa ra mono nontega marenerino hu' zagame Deviti asunte'nea zagamere

1 Hagi koganamo'zama mago zamarimpa hu'za magopima mani avu'ava zamo'a knare zantfa hu'ne. 2 Mago arimpama huno mani avu'ava zamo'a, Aroni asenire masave tagino frentegeni agemazampa azokatega uramino za'za kukena'amofa ananke kante uramiankna nehie. 3 Mago arimpa huno mani avu'ava zamo'a, Hemoni agonaregati ata ko'mo, eno Saionima me'nea agonaraminte eme runteaza hu'ne. E'ina kumate Ra Anumzamo'a asomura hunezmante'nige'za, mani vava hugahaze.

134

Ra Anumzamofa ra mono nontega marenerino hu' zagamere

1 Maka Ra Anumzamofa eri'za vahe'ma, Ra Anumzamofa mono nompima kenage eri'zama e'neriza vahemota Ra Anumzamofona agi'a ahentesga hiho. 2 Ana nehuta nunamuma hanafina, tamazana erisga huta ruotage'ma hu'nea mono noma me'nerega hunenteta Ra Anumzamofona agi'a ahentesga hiho. 3 Monane mopanema

tro'ma hu'nea Ra Anumzamo'a Saioni agonare
mani'nenom asomu hura mantegahie.

135

*Ra Anumzamofo eri'zanku'ma hu musema
huntasaza zagamere*

¹ Ra Anumzamofo eri'za vahe'motma Ra Anumzamofona agi'a ahentesga hiho. Ra Anumzamofona husga hunteho. Ra Anumzamofona agi'a ahentesga hiho. ² Ra Anumzamofo mono nompima omanetiza vahe'ene, tagri Anumzamofo mono nonkumapima oneti'za vahe'mota anara hiho. ³ Ra Anumzamofona agi'a ahentesga hiho. Na'ankure Ra Anumzamo'a Agra knare hu'ne. Ra Anumzamofona zagame huta agi'a ahentesga hiho. Na'ankure Agri agimo'a so'e zantfa hu'ne. ⁴ Na'ankure Ra Anumzamo'a Jekopunkura nagri'a suzane huno huhamprirenteno, Israeli vahekura huno nagri marerisa feno zankna hu'za manigahaze huno huhampri zamante'ne. ⁵ Nagrama ke'na antahi'nama huana, Ra Anumzamo'a rankrerfa hu'ne. Ana hu'neankino maka havi anumzantamina zamagatere vagare'ne. ⁶ Ra Anumzamo'a monafino, ama mopafino, hagerimofo agofeturo, hagerimofo agu'afinema nazano tro hunaku'ma hiazana amne nehie. ⁷ Agra higeno mopama ome atregetatira hampomo'a eri tru huno marenerigeno, ko'ene kopasi'nanena atregeno ne-e. Ana nehuno fenoma nentea noma'afinti zahora atregeno ne-e. ⁸ Isipi vahe'mokizmi agonesa mofavreramine, afukra zamifintira agonesa

anenta'araminena maka ome zamahetre eme zmahetre hu'ne. ⁹ Isipi vahe'mota tamagri amu'nompi, Feronte'ene, Fero eri'za vahetera kaguva zane, avamezanena eri fore huno zamazeri haviza hu'ne. ¹⁰ Kokankokama mani'naza vahera ome zmahetre eme zmahetre nehuno, hankavenentake kini vahera zamahe fri'ne. ¹¹ Ana kini vahera, Amori vahe kini ne' Sihonima, Basani vahe kini ne' Ogima, maka Kenani mopafima mani'naza kini vahe'taminena zamahe hana hu'ne. ¹² Ana huteno ana vahe'mokizmi mopa Agra vahe Israeli nagara eri zamige'za erisanti hare'naze. ¹³ Ra Anumzamoka kagri kagimo'a maka kna mevava huno nevie. Maka vahe'ma forehu anante nante'ma hu'za vanaza vahe'mo'za Ra Anumzamoka Kagri kavukva zankura antahigami'za vugahaze. ¹⁴ Na'ankure Ra Anumzamo'a vahe'a refko huno nezamageno, eri'za vahe'a asunku huzmantegahie. ¹⁵ Kaza osu havi anumzantamina, silvareti'ene golireti vahe'mo'za avako hu'za zamazanteti tro hunte'naze. ¹⁶ Ana havi anumzaramina zamagira me'neanagi, keaga nosu'za, zamavua me'neanagi zamavua nonke'za, ¹⁷ zamagesa me'neanagi keaga nontahiza, zamagona me'neanagi zamasimura nontaze. ¹⁸ Hagi ana kaza osu havi anumzantamima tro'ma hu'naza vahe'ene, ana zantaminte'ma zamentintima nehaza vahe'mo'zanena, ana kaza osu havi anumzankna hugahaze. ¹⁹ Israeli vahe'mota Ra Anumzamofa agi'a ahentesga nehinke'za, Aroni naga'nofi'ma pristi eri'zama e'neriza naga'mo'za Ra Anumzamofa agi'a ahentesga hiho. ²⁰ Livae

naga nofi'mota Ra Anumzamofa agi'a ahentesga nehinke'za, iza'zo Ra Anumzamofonku'ma koro hunente'za vahe'mo'za Agri agoragama nemanisaza vahe'mo'za Ra Anumzamofa agi'a ahentesga hiho. ²¹ Saioni agonare'ma mani'naza vahe'mota Ra Anumzamofona agi'a ahentesga hiho. Na'ankure Agra ama ana Jerusalemi kumapi nemanie. Ra Anumzamofa agi'a ahentesga hiho.

136

Ra Anumzamofoma susu hunte zagamere

¹ Ra Anumzamofona susu huntetane, na'ankure Agra knare hu'ne. Anumzamofona vagaore avesizama'amo'a mevava huno vugahie. ² Anumzana susu huta humuse huntetane. Na'ankure Anumzamofona vagaore avesizama'amo'a mevava huno vugahie. ³ Ra Anumzamofona susu hunteta husga huntetane, Agra maka ama mopafi ranra vahetmimofo Ra Anumza mani'ne. Na'ankure Anumzamofona vagaore avesizama'amo'a mevava huno vugahie. ⁴ Agrake'za hankavenentake kaguvazana eri fore nehigu, Agrike'za susu huntetane humuse huntetane. Na'ankure vagaore avesizama'amo'a mevava huno vugahie. ⁵ Monafima me'nea zantamima Agra'a antahintahireti'ma tro'ma hunte'nea Anumzamofona susu huta humuse huntetane. Na'ankure vagaore avesizama'amo'a mevava huno vugahie. ⁶ Ama mopama tro huteno, timofo agofetu'ma antegenoma me'nea Anumzamofona susu huta humuse huntetane. Na'ankure

vagaore avesizama'amo'a mevava huno vugahie.
7 Monafima me'nenno remsa nehia tavitamima tro'ma hunte'nea Anumzamofona susu hunteta humuse huntetanune. Na'ankure vagaore avesizama'amo'a mevava huno vugahie.
8 Zagema tro'ma hunte'neana, masama kegavama hu'nenno remsa haniegu tro hunte'ne. Na'ankure vagaore avesizama'amo'a mevava huno vugahie.
9 Ikane hanafi'taminema tro'ma hunte'neana, kenage kegava hune'za, remsa hanazegu tro hunte'ne. Na'ankure Agrama oratreno avesirante vavama nehia zamo'a, vagaore mevava huno vugahie. 10 Isipi vahe'mokizmi agonesa mofavreramima zamahe hana'ma hu'nea Anumzamofona susu hunteta humuse huntetanune. Na'ankure Agrama oratreno avesirante vavama nehia zamo'a, vagaore mevava huno vugahie. 11 Israeli vahera Isipi mopafintira Agra zamavareno atiramige'za e'naze. Na'ankure Agrama oratreno avesirante vavama nehia zamo'a, vagaore mevava huno vugahie. 12 Agra Hankavenentake azanteti rusuteno zamavareno e'ne. Na'ankure Agrama oratreno avesirante vavama nehia zamo'a, vagaore mevava huno vugahie. 13 Koranke hagerima eri rupapama hugantigama hu'nea Anumzamofona susu huta humuse huntetanune. Na'ankure Agrama oratreno avesirante vavama nehia zamo'a, vagaore mevava huno vugahie.
14 Ana'ma huteno'a ana hagerimofu amu'noppi Israeli vahera zamavareno vu'ne. Na'ankure Agrama oratreno avesirante vavama nehia zamo'a, vagaore mevava huno vugahie.

15 Hianagi Ferone sondia vahe'a koranke hagerimpi zamaherege'za tinakri'za fri'naze. Na'ankure Agrama oratreno, avesirante vavama nehia zamo'a vagaore mevava huno vugahie.

16 Agra vahe'ama zamavareno, vahe omani ka'ma kokampima e'nea Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie. 17 Hankave kini vahetmima zamahe hana'ma hu'nea Anumzamofona susu huta humuse huntesanune. Na'ankure Agrama oratareno avesirante vavama nehia zamo'a, vagaore mevava huno vugahie.

18 Zamagimo'ma mareri'nea kini vahetamina zamahe fri vagare'ne. Na'ankure Agrama oratareno avesirante vavama nehia zamo'a, vagaore mevava huno vugahie. 19 Amori vahe kini ne' Sihonina ahe fri'ne. Na'ankure Agrama oratareno avesirante vavama nehia zamo'a, vagaore mevava huno vugahie. 20 Basani vahe kini ne' Oginena ahe fri'ne. Na'ankure Agrama oratreno avesirante vavama nehia zamo'a, vagaore mevava huno vugahie. 21 Ana'ma huteno'a Anumzamo'a ana kini vahe'mokizmi mopa, erisantiharesaze huno Agra vahe'a erizami'ne. Na'ankure Agrama oratareno avesirante vavama nehia zamo'a, vagaore mevava huno vugahie. 22 Agri eri'za vahe Israeli vahe'mo'za ama ana mopa erisanti haregahaze huno zami'ne. Na'ankure Agrama oratreno avesirante vavama nehia zamo'a, vagaore mevava huno vugahie. 23 Tagri hankavemo'ma evuramigetama manuna knafina

Agra aganera kaninoramie. Na'ankure Agrama oratreno avesirante vavama nehia zamo'a, vagaore mevava huno vugahie. ²⁴ Agra tagri ha' vahe'mokizmi zamazampinti tagu'vazino ete neravare. Na'ankure Anumzamo'ma oratareno avesirante vavama nehia zamo'a, vagaore mevava huno vugahie. ²⁵ Anumzamo'a maka vahe'ene zagagafanena ne'zana nezamie. Na'ankure Agrama oratreno avesirante vavama nehia zamo'a, vagaore mevava huno vugahie. ²⁶ Monafinkama nemaniam Anumzamofona susu huta humuse huntesanune. Na'ankure Agrama oratreno avesirante vavama nehia zamo'a, vagaore mevava huno vugahie.

137

Israeli vahe'mo'za ru mopafi mani'neza mopazmigu nentahi'za zavite'naza zagamere

¹ Babilonima me'nea tintamimofa ankenarega mani'neta, Jerusalemi kumakura tagesa nentahita zavira te'none. ² Zavenama neheta zagame'ma nehuna hapuramina, wilo zafaramimpi runtani'none. ³ Na'ankure kinama hurante'naza vahe'mo'za tagrikura, zagame nehinketa antahisune hu'za kazikazi hu'naze. Tatama tami'za tazeri havizama nehaza vahe'mo'za hu'za Saioni agonamofa agirevare zagamera nehinketa musena hamneno hu'za tutu hu'naze. ⁴ Ana hianagi ru vahe mopafima emani'nonana inankna huta Ra Anumzamofa zagamera hugahune? ⁵ Nagrama Jerusalemi kuma'mokagu'ma nagane'ma kanisugeno'a, naza tamaga'amo'ma eri'zama e'neria eri'zana

mago'enena e'origahie. ⁶ Nagrama Jerusalemi kuma'mokagu'ma nagane'ma nekani'na, Jerusalemi kuma'mokagu'ma ugota musezani'a mani'nane hu'nama osanugeno'a, nagefunamo'a marerino navagu'nafare ome rukamaresie. ⁷ Babiloni vahe'mo'zama Jerusalemi kuma'ma ha'ma eme hunte'za eri'za zupama, Idomu vahe'mo'za hu'za, Jerusalemi kumara maka tapage tapagu hutrenkeno havizantfa hinoma hu'za kezama ati'naza zankura, Ra Anumzamoka kaganera okanio. ⁸ Babiloni kuma'moka havizantfa hugahananki kagesa antahio. Tagrite'ma hurante'nana avu'ava zante'ma, nonama hugantesia vahe'mo'a muse hugahie. ⁹ Ana'ma hania vahe'mo'a Babiloni kuma'moka ne'onse mofavre nagaka'a zamazeriteno, haveraminte ruhapakopatino zmahegahie.

138

Ra Anumzamofoma susu hunenteno hu' zagame Deviti asunte'nea zagamere

¹ Ra Anumzamoka nagu'areti susu hu'na humuse hunegantoe. Havi anumzantamimofa zamavufi zagamera nehu'na, kagri kagi'a ahentesga hugahue. ² Ruotagama hu'nea mono nonka'amofa avugama kepri hu'na kagia ahentesga nehu'na, susuma hunegantoana vagaore mevava kavesi zanka'agu anara nehue. Na'ankure Kagrama huvempama hu'nana naneke ka'amo rankagia negamie. ³ Nagrama nunamuma nehugenka nagri nunamuntera nona nehunka, naza hunka nazeri hankavetinke'na hankaveti'na mani'noe. ⁴ Maka ama mopafima

mani'naza kini vahe'mo'za Ra Anumzamoka humuse hu'za susu hugantegahaze. Na'ankure kagri nanekema antahinuza anara hugahaze. ⁵ Ana nehu'za Ra Anumzamoka kagri kavukva zankura zagamepi erinte'za zagame hugahaze. Na'ankure Ra Anumzamoka hihamu masazamo'a rankrerfa hu'ne. ⁶ Ra Anumzamo'a marerisa Anumza mani'neankino, zamavufagama anterami'za maniza vahera kegava hunezmanteanagi, zamavufagama erisga nehaza vahera afeteti ko zamageno antahino nehie. ⁷ Tusi knazamo nazeri kagige'na nemanugenka naza nehane. Ha' vahenimo'za tusi zamarimpa ahenantegahazanagi, Kagra kegava hunantegahane. Kagra tamaga kaziga kazana rusutenka nagu'nevazine. ⁸ Ra Anumzamokama nazano nagri nomani'zampima fore hugahiema hunkama huvempama hu'nana zantamina, eri fore hugahane. Na'ankure Ra Anumzamoka vagaore kavesi zamo'a mevava huno nevie. Kagra kazampinti nagrira nazeri fore hu'nananki kamefira huonamio.

139

Anumzamo'a ko tagrira antahino keno hu'nea huno Deviti asunte'nea zagamere

¹ Ra Anumzamoka nagra inanknahu vahe mani'noe, ko nagri nagu'a rezaganenka ke'nane. ² Nagrama manuampi, otuampi Kagra ko nagenka antahinka nehunka, afete mani'noanagi, Kagra nagri antahi'zana ko keama hu'nane. ³ Kama vano nehufine, navu'ma masofinena Kagra kavua antenka nenagenka, maka navu'nava

zama huana, ko nagenka antahinka hu'nane. ⁴ Maka nanekea osu'nogenka, e'i naneke hugahie hunka Ra Anumzamoka ko antahinka kenka hu'nane. ⁵ Kagra navugane namefi'ene nevunka, kazanteti refite'nante'nane. ⁶ Kagri antahi'zamo'a so'e zantfa huno mareri agatere'neankina, nagra antahi amara osugahue! ⁷ Nagra Kagri Avamura atre'na iga vugahue? Nagra Kagri kvatetira atre'na korora fre'na, iga ome frakigahue? ⁸ Hagi nagrama monafima marerisuana, Kagra ko monafina mani'nane. Nagrama fri'na fri vahe kumapima vanuana, Kagra ko anampina mani'nane. ⁹ Hagi nanterama zahufa zagema nehanatina, nagrama nageko'na huntelige'na hare'na vu'na hagerimofo amu'nompima me'nea mopafi umanuresina, ¹⁰ anantega kegava hunenantenka nazeri ako'na hasine. ¹¹ Hagi tamagerfa hunka hani zamoka eme nazeri fra'nekigeno, zage ferupinagi ame hunka hani zamoka enka eme nazeri kagio hu'nama huresina, ¹² ana hanimo'a Kagri kavurera nazeri frara okiresine. Ana nehigeno hanimo'a, Kagri kavurera masa huno zage ferukna hanigeno, hanimo'ene msamo'enena Kagri kavurera mago zanke hu'na'e. ¹³ Na'ankure maka nagu'a navufga Kagra tro hunante'nane. Ana hutenka antanimofu rimpafima mani'nogenka maka navufga Kagra rehatinante'nane, ¹⁴ Kagrama nagrama tro'ma hunanana, so'e' zantfa hunku tro hunante'naku muse hunegantoe. Kagrama eri'nana eri'zamo'a, knare huno so'e zantfa hu'ne. Ana hu'neanki'na e'i ana zana nagra ke'na antahi'na hu'noe. ¹⁵ Kagri kavurera

frara oki'noanki, maninenka nenagankeno oku'a nenrera arimpafina zaferinani'mo'a eme rekanuhe rekanuhe nehige'na fore hu'noe. ¹⁶ Nenrera'a kase onante'negenka, ko nagrira nagenka antahinka hu'nane. Ama mopafima kasefa'ma hu'na manisania kna'afima tro'ma hanua zana, maka knamo'a ome'negenka maka zana ko avontafepi krente'nane. ¹⁷ Anumzamoka nagriku'ma nentahina antahizamo'a, soe'zantfa huno mareri agetere'ne. Ana hu'neanki'na ana maka zantamina hampari'na kegara osu'noe. ¹⁸ Hagi ana maka zana hampari'na kegahue hu'na hugahuanagi, hagerimofa ankenarega me'nea kaseparamina ana zantamimo'a rugatere'ne. Hagi mase'nofinti'ma omatuana Kagra magoka nagrane mani'nane. ¹⁹ Anumzamoka nagri'ma navenesiana, havi avu'ava zama nehaza vahe'ma zamahe frisanana knare hugahie. Hazenkema eri hakarema huta vahe korama eri neragiza vahe'mota, nagri navatetira atreta afete viho. ²⁰ Ana vahe'mo'za Anumzamoka Kagrira huhaviza hunegante'za, ha'ma renegantaza vahe'mo'za Kagri kagi'a amnene amnene nehaze. ²¹ Ra Anumzamoka Kagri'ma kavesinogantaza vahera nagra navesra hunezmante'na, kagri'ma ha'ma renegantaza vahera zamage henkami atregahue. ²² Nagra tamagerfa hu'na ana vahera tusi narimpa ahenezmante'na, ana vahe'ma nezamage'na nagri ha' vahe mani'naze hu'na nehue. ²³ Anumzamoka nagri nagu'a rezaganenka keama nehunka, antahintahi hakare'ma nehua zana renahenka ko. ²⁴ Anumzamoka krimpa knazama erigami

navu'navazama nagripima me'nesiana refkoku
so'e hunka nenagenka, manivava asimu'ma erino
mani kante navrenka vuo.

140

*Anumzamo'ma kegava huntésigu Deviti hu'nea
nunamu zagamere*

¹ Ra Anumzamoka havi avu'ava zama nehaza
vahe'mokizmi zamazampintira nagu'nevazinka,
hazenke vahe'mo'zama hazenkema namizankura
kegava hunanto. ² Ana vahe'mo'za havi avu'ava
zama hanaza zanke zamagu'afina retro nehu'za,
maka zupa ha' hiho hu'za vahera zamarimpa
revava nehaze. ³ Keagama haza nanekemo'a,
osifavemofó agefunamo'ma asaneankna nehu'za,
ha' osifavemofó avu'atga zamo zamagipina
avite'neanki'za vahera zamazeri haviza hu
keaga nehaze. ⁴ Ra Anumzamoka havi avu'ava
zama nehaza vahe'mo'zama nazeri havizama
hu'zankura kegava hunanto. Hazenkema eri
hakarema nehaza vahe'mo'zama hazenkema
nami'zankura kegava hunanto, na'ankure
nagrira nazeri haviza hunaku oku'a keaga
retro nehaze. ⁵ Zamavufga rama nehaza
vahe'mo'za, nagrima nazerinakura kukona
antenenante'za, kama vano nehufina krifua
anaginentaze. ⁶ Ra Anumzamoka Kagrikura,
nagri Anumza mani'nane hu'na nehuanki,
Ra Anumzamoka kasunku hunantogu'ma
nunamuma nehanugenka, kagesa antenka
nentahinka nunamuni'a antahinamio.
⁷ Anumzana nagri Ra Anumzamoka Kagra
hankavenentake hu'nanankinka nagura
vazinka ete nenavrane. Ha' knafina kagra

hankogna hunka anteso hunenantenka, kegava hunante'nane. ⁸ Ra Anumzamoka havi avu'ava zama nehaza vahe'mo'za nazano erinakura tusiza huno zamave'nesianagi, zamatrege'za anazana e'oriho. Ana nehunka havi avu'ava zama hunaku'ma kema retro'ma hanaza zana eri atregeno, anazana forera osuno. Na'ankure ana'ma osnanke'za zamagra zamavufaga erisga hugahaze. ⁹ Nagri'ma ha'ma renenantaza vahera, zamatregeno nagri'ma nazeri haviza hunaku'ma nanekema retro'ma nehaza zamo'a zamagrite efore huno zamazeri haviza hino. ¹⁰ Kagra teve nefake tankanu'za, atregeno ana vahe agofetura eramino. Ana nehunka ana vahera zamazeri atrege'za tevefi vuge, tinkerifi uramige nehu'za, korora fre'za atioramiho. ¹¹ Havigema nehaza vahera zamatrege'za tagri mopafina manine'za, maka zampina knarera osiho. Hazenkema eri hakarema nehaza vahera, knazamo zamavaririno zamazeri haviza hino. ¹² Hianagi nagra ke'na antahi'na hu'noankino, knama zami'za zamazeri havizama nehaza vahera Ra Anumzamo'a zamaza nehuno, zamunte omane vahera knare huno zamaza nehie. ¹³ Tamagerfa hu'za fatgo avu'ava zama nehaza vahe'mo'za, Anumzamoka kagi'a husga hugantegahaze. Ana nehanage'za Kagri kavukva zama amagemanentaza vahe'mo'za, kagrane magoka manigahaze.

141

Kinagama hu nunamu zagame Deviti hu'nea zagamere

1 Ra Anumzamoka Kagritega kezanetuanki, ame hunka nagritega eno. Kagritega zavi krafama nehuana, nentahinka eme nazahuo. 2 Mana nentake'za insensima kre mna nevazagenka negenka musema nehanaza hunka, nagrama nunamuma nehua nunamuntera muse huo. Zagema unefrege'za kinagama ofama kresramna nehazaza hu'na, nazana erisga nehuanki antahinamio. 3 Ra Anumzamoka keagama hanufina, nagitera kegava hunanto. 4 Natrege'na havi avu'ava zama hu'zantera narimpamo'a oti'otira nosanigeno, havi avu'ava zama nehaza vahera zamage ante'na ana avu'ava zana osa'nenno. Ana nehunka hazenkema nehaza vahe'mo'zama ne'zama nene'za musema hanafina omanisue. 5 Fatgo avu'ava'ma nehia vahe'mo'ma navesinenanteno'ma sefu'ma namino nazeri fatgoma haniana knare hu'ne. E'inahu avu'ava zamo'a vahe'mofo asenire maseve tagino frenteankna hu'neanki'na, i'o hu'na osugahue. Hianagi havi ava'ava zama nehaza vahekura, ana avu'avazamirera nona huzamanto hu'na, nunamuna huvava nehue. 6 Keagama refkoma nehaza kva vahera zamazerite'za matevu zamatresage'za zavenipi uramigahaze. Ana'ma hanage'za ana havi avu'ava zama nehaza vahe'mo'zama ke'za antahi'zama hanazana, nagrama hu'noa nanekegura tamage naneke hu'ne hu'za hugahaze. 7 Mopama reko'neria bulimakao afumo'ma, mopama reko'nerino havema refaragu'ma vaziaza huno, havi avu'ava zama nehaza vahe'mokizmi zaferinamo'a, fri vahe kerimofa avazare ruherafino vuno eno hugahie.

⁸ Hianagi Ra Anumzana, Anumzanimoka kagrite navua kete'na nemanue. Kagrake'za fraki kumani'a mani'nanku, zamatrege'za nahe ofriho. ⁹ Nagri'ma nazerinaku'ma havi avu'ava zama nehaza vahe'mo'zama anaginte'naza krifumo'a, atregeno naze'orino. ¹⁰ Havi avu'ava zama nehaza vahera zamatrege'za, zamagra'ama frakinte'naza kukompi ufrehu. Ana nehanage'na nagrira mago zamo'a nazeri haviza osanige'na, knare hu'na vugahue.

142

Havegampi mani'neni Deviti asunte'nea zagamere

¹ Ra Anumzamofontega ranke hu'na kezanetue. Ana nehu'na Ra Anumzamo asunku hunanteno naza haniegu agritega ranke hu'na nunamuna nehue. ² Anumzamofu avuga knazani'a eri'na ne-ena, knazani'aramina Agri avure eri'na eme nesamue. ³ Nagu'amo'ma tusi knama nehigenka, nagra na'a hugahufi Kagra ko nagenka antahinka hu'nane. Nagrama kama vanoma nehufina vahe'mo'za nagri nazerinakura krifua eme anagi fraki'naze. ⁴ Vahe'mo'zama eme naza hanagu navua omente emente hu'noanagi, mago vahe'mo'e huno eme naza osu'ne. Ana hige'na fra'ma kisanua kumaku hake'noanagi, mago vahe'mo'e huno asunkura hunanteno naza osu'ne. ⁵ Ra Anumzamoka naza huogu Kagritega nunamuna nehuanki, Kagrake'za fra'ma kisanua kumara mani'nane hu'na nehuankinka, ofri'na kase'fama hu'na manisania kna'afina Kagrake'za nomani zanifina manigahane.

⁶ Naza huogu'ma krafagema nehuana, kagesa antenka antahinamio. Na'ankure ranknazamo narefitege'na mani'noanki, nazeri havizama hunaku'ma narotagoma nehaza vahe zamazampintira nagu'vazinka ete navro. Na'ankure zamagri hankavemo'a, nagri hankavea agatere'ne. ⁷ Nagrira kinafintira katufenanto. Ana'ma hananke'na Kagri kagia ahena susu nehu'na humuse hugantegahue. Nagri'ma rama'a knare kavukvama hunantana avu'ava zanku, Kagri kavu'kava zama amage'ma nentaza vahe'mo'za e'za eme nazeri kagigahaze.

143

Anumzamo aza haniegu Deviti nunamu hu'nea zagamere

¹ Ra Anumzamoka nazama hananegu'ma nunamuma nehuana kagesa antenka antahio. Na'ankure Kagra tamage hunka hugahue hunkama nehanaza nehunka, fatgo kavukva'ma nehana Anumzamoka nunamuni'a antahinaminka nona hunanto. ² Nagra Kagri eri'za vahe mani'noanki, refkoa huonanto. Na'ankure mago vahe'mo'e huno Kagri kavurera fatgo huno hazenke'a omane vahera omani'ne. ³ Ha' vahe'nimo'za nagenere'za nazerite'za, nahetrazage'na mopafi mase'noe. Ana hute'za natrazage'na fri' vahe'mo'zama fri' vahe kumapima nemanizaza hu'na hanizampi mani'noe. ⁴ Ana hazageno nagu'amo'a evuramigeno hankaveni'a omane amne hige'na antahintahi hakare nehu'na koro hu'noe. ⁵ Korapa'ma fore'ma hu'nea zankura nagesa

nentahi'na, kagrama tro'ma hunte'nana
 zanku'ene, kzampinti'ma eri fore'ma hu'nana
 zankura nagesa antahintahi nehue. ⁶ Nazana
 erisga hu'na nunamuna kagritega nehue.
 Mopamo'ma hagage huno tinku'ma avesiaza
 hu'na, Kagrikura tusiza huno nave'nesie.
⁷ Ra Anumzamoka nagri nunamuntera ame
 hunka nona hunanto. Na'ankure nagu'mo'a
 evu neramie. Nagrira natrenka kamefira
 huonamio. Ana'ma hananke'na nagra fri'na
 haviza hugahue. ⁸ Natrege'na maka nanterana
 vagaore mevava kavesi'zankura nagesa
 antahigami'nenno. Na'ankure namentintia
 Kagrite nehugu, kama vanua kana naveri huo.
 Na'ankure nagrani'a Kagri kazampi nentoe.
⁹ Ra Anumzamoka ha' vahe'nifintira nagu'vazio.
 Na'ankure kagripinka frakinaku nagare'na neoe.
¹⁰ Rempi hunamige'na kagri kavesi zana amagera
 anta'nenno. Na'ankure nagri Anumza Kagra
 mani'nane. Atregeno Kagri so'e Avamu'mo
 navareno fatgo hu'nesia kante vino. ¹¹ Ra
 Anumzamoka rankagika'agu kagesa nentahinka,
 nagrira ete kegava hunanto. Kagra fatgo kavukva
 nehana Anumza mani'nanku, knazampintira
 naza hunka nazeri atro. ¹² Vagaore mevava kavesi
 zanteti kavesi nante'nananki, ha'ma renenantaza
 vahe'ene, nazeri haviza hunaku'ma nehaza
 vahera zamazeri haviza hugahane. Na'ankure
 nagra Kagri eri'za vahe mani'noe.

144

Deviti'a Ra Anumzamo aza higeno ha'ma

agatere'nea zanku susu hunte'nea zagamere

¹ Ra Anumzamo'a nagri hankave have mani'negu hu'na Agri agi'a husga huntegahue. Agrake'za nazane nazankonena eri hankavenetino, ha'ma hu'zana rempi hunenamie.

² Agra vagaore avesizama'areti avesinenantea Anumza mani'neankino, hankave vihuni'a mani'ne. Agrake'za fraki kumani'a mani'nenon, nagura'vazino ete nenavre. Agra hankoni'a mani'negena, agripinka fraki'na nemanugeno, ru moparega vahetamina zamazeri nagafi atrege'na kegava hunezamantoe. ³ Vahera tagra nankna zaga mani'nonkenka, Ra Anumzamoka kegava hunerantenka, vahetfankura antahintahi hakarea nehane?

⁴ Na'ankure vahe'ma mani'nonana, vahe'mo agonafinti magoke zupa asimu antegenon viankna nehuta, zage rentegenon vahe amema'amo efore huteno ame huno fanane hiaza huno vahe'mota nemanuna knatimo'a ame' huno nevie. ⁵ Ra Anumzamoka anami mona eri ankro hunka eramio. Ana nehunka agonaramintera kazana eme avako hugeno tevegumo'a vemagu vemagu huno marerino.

⁶ Kopasi'na atregeon ruganani huno vunon enon nehuno, Kagri'ma ha'ma renegantaza vahera zamahe panani hino. Kagra keveraminka'a ahentrenka zamazeri koro huge'za freho.

⁷ Anagamu monafinkati kazana antefenka atrenka, tima hagenon eme nazeri nenakrifintira naza hunka nagura nevazinka, ru vahe'mokizmi hankavefintira nagu'vazio. ⁸ Ana vahe'mo'za havi nanekege nehu'za, ana hugahune hu'za huvempa nehazanagi, ana zana osugahaze.

⁹ Anumzamoka kasefa zagame hu'na kagika'a erisga hugahue. Nagra 10ni'a nofi'ma me'nea hapu zavena nehe'na, zagamera hu'na kagika'a ahentesga hugahue. ¹⁰ Kagrake'za kini vahera hankavea zaminke'za, ha' vahe'zamia hara huzamagate nerazagenka, eri'za vaheka'amo'na Deviti'na nagu'vazinke'za ha' vahe'nimo'za bainati kazinura nahe ofri'naze. ¹¹ Ha' vahnimokizmi hankavefintira nagu'vazinka ete navro. Ana vahe'mo'za havi nanekege nehu'za, ana hugahune hu'za huvempa nehazanagi, havige nehaze. ¹² Tagri ne' mofavre naga'mo'za zafamo ame huno hageno mareneriaza hu'za, ame hu'za ra ome hanaze. Mofa'ne nagatimo'za kini vahe'mofo noma vazisgama nehia zafaraminte'ma avasasema hunentaza kna hanaze. ¹³ Ruzahu ruzahu ne'zamo, ne'zama nentona nompina avitiesie. Sipisipi afu kevutimo'za rama'a tauseni'a kasenente'za, rama'a 10 tauseni'a kasentesageno sipisipi afu'ma nentona keginamo'a avitiesiegu nave'nesie. ¹⁴ Hagi bulimakao afutimo'za rama'a zantmi eri'za esaze. Tagri kumamofa have keginafintira ha' vahe'mo'za kama hage'za mareriza vahera zamavare'za kina ome huozmantesaze. Ana hanigeno ran kumatimofa kuma amunompima, knazama fore hige'za zavi krafama nehaza zana omanesie. ¹⁵ Iza'o e'inahu asomu'ma erisania vahe'mo'a muse hugahie. Ana nehanigeno Ra Anumzamo'ma zamagri Anumzama manisia vahe'mo'za muse hugahaze.

Deviti'ma Anumzamofa agima ahentesga hu'nea zagamere

1 Anumzamoka nagri kini mani'nanku hu'na Kagrira husga hugantegahue. Ana nehu'na maka zupa, Kagri kagia ahentesga huvava hugahue. 2 Maka kna Kagrira husga hunegante'na, kagia erisga hu vava hugahue. 3 Ra Anumzamo'a agrake'za tusi'a Anumza mani'neankino, agrake'za ra agia erigara hu'ne. Ana hu'neankino agrake'za tusi'a Anumzana mani'neankita Agrira rezaganeta kegara osu'none. 4 Vahe'ma fore hu anante anante'ma hu'za vanafina, Kagrama hankave eri'zama erifore'ma hu'nana zamofa agenkea zamasami anante anante hu'za nevu'za, kagri hankavegura huama hu'za vahera zmasamigahaze. 5 Kagri hihamu hankavegu'ene, knare'nare eri'zama eri'nana zankura, nagesa antahintahi hugahue. 6 Kagrama hankave eri'zama eri'nana eri'zamofa agenkea vahe'mo'za hugantu hugama hu'za nentahinage'na, tusi'a Anumza mani'nane hu'na vahera huama hu'na zamasamigahue. 7 Rama'a knare'nare kavukvama hu'nana zankura maka vahe'mo'za huge antahige nehu'za, fatgo kavukva zankura zagamera nehu'za musenkase hugahaze. 8 Ra Anumzamo'a knare avu'ava huneranteno asunku hunerantea Anumzankino, ame huno arimpa oheno, vagoore mevava avesi zanteti avesinerantea Anumza mani'ne. 9 Ra Anumzamo'a maka vahera knare avu'avaza hunezamanteno, maka zama tro'ma hunte'nea zantamina asunku hunezamantea Anumza mani'ne. 10 Ra Anumzamoka maka zama tro'ma hunte'nana zantamimo'a Kagrira

humuse hunegantesage'za, kamage'ma nentaza vahe'mo'za Kagri kagi'a husga hugahaze. ¹¹ Ana nehu'za kagrama maka mopama kegava hunana hihamu masa zanka'agura nanekea nehu'za, hanaveka'agura huama hu'za vahera zamasamigahaze. ¹² Kagrama hankave eri'zama eri'nana zamofone, Kagrama kegavama hunana hihamu hankavea maka vahe'mo'za ke'za antahi'za hugahaze. ¹³ Kagrama kini maninka kegavama hunana kuma'mo'a vagaore mevava huno vugahie. Mika knafima forehu anante anante'ma hu'za vanaza vahe'enena kegava huzmantenka vugahane. ¹⁴ Tanafa'ma hu'za masaza vahera Ra Anumzamo'a zamaza nehuno, knazamo'ma rentrakoma nehia vahera zamazeri sga nehie. ¹⁵ Maka zagamo'za kagrite zamavua antete'za amuhara nehu'za mani'nazagenka, kna fatgore ne'zana zaminke'za nenaze. ¹⁶ Maka zagagafamo'za ne'zama nesaza zanku'ma nehazagenka, Kagra kazana rutarenka ne'zana zaminke'za nezamu nehaze. ¹⁷ Maka zama hifina Ra Anumzamo'a fatgo avu'ava zanke nehuno, asunku huranteno ana maka zana hunerante. ¹⁸ Tamage zamagu zamagesa regati'ma Ra Anumzamofonku'ma kezamatiza vahetera, Agra erava'o nehie. ¹⁹ Agri'ma koro'ma hunte'za amage'ma nentaza vahe'mo'zama nazankuro atupa'ma nehaza zana nezamino, zavi krafama nehazana nentahino, zamaza huno zamagu nevazie. ²⁰ Ra Anumzamofoma avesinentaza vahera, Agra kegava hunezamante. Hianagi havi zamavu zamava'ma nehaza vahera, zamazeri havizantfa hugahie. ²¹ Nagra Ra Anumzamof

agi'a ahentesga hugahuanki, maka zantamima agra azampinti'ma tro'ma higeta ama mopafima mani'naza zantamimota, ruotage'ma hu'nea agi'a ahentesga huvava huta vugahaze.

146

Ra Anumzamo'ma zamazama nehia zanku hu'za agi'a ahentesga hu'naza zagamere

¹ Ra Anumzamofona agi'a ahentesga hanune. Nagra maka nagu'areti hu'na Ra Anumzamofona agi'a ahentesga hugahue. ² Nagrama kasefa'ma hu'na manisania kna'afina Ra Anumzamofona agi'a ahentesga hugahue. Nasimu'ma eri'na manisania kna'afina, Anumzanimofontega zagamera hu'na agi'a erintesga hugahue. ³ Ama mopafima mani'naza kva vahe'mo'za taza hugahaze huza amuhara osiho. Na'ankure zamagra amne vahetfa mani'nazanki'za, tamaza hu'za tamagura ovazigahaze. ⁴ Hagi ana vahe'mo'zama frizageno'a zamavufagamo'a mopanese. Anama friza zupa, nazano hugahune hu'za antahintahima retroma hu'naza zamo'a amne zankna nehie. ⁵ Hianagi izano Jekopu Anumzamo'ma azama nehania vahe'mo'a muse nehanigeno, Ra Anumzana Anumzama'arema amuha'ma nehania vahe'mo'a muse hugahie. ⁶ Anumzamo'a monane, mopane, hagerine, maka zantamima anampima me'nea zantamina agrake'za tro hu'ne. Ana hu'neankino nazano hugahuema huno huvempama hu'nea zana huvava huno nevie. ⁷ Vahe'mo'za knama zami'za zamazeri havizama nehaza vahera, fatgo huno refko hunezamanteno, ne'zanku'ma zamaga'ma

netaza vahera ne'zana nezamie. Ana nehuno Ra Anumzamo'a kinafima mani'naza vahera katufe zamantege'za fru hu'za nemanize. ⁸ Zamavu'ma asuhu'nea vahera Ra Anumzamo'a zamavua eri hari nehuno, knazamo'ma zamazeri fenkami atre'nea vahera zamazeri sga nehuno, fatgo avu'ava zama nehaza vahera avesi nezamante. ⁹ Megi'ati ru vahe'ma tagranema enemaniza vahera Ra Anumzamo'a kegava hunezmanteno, kento a'nane zagane megusa mofavre nagara zamaza nehie. Hianagi havi avu'ava zama nehaza vahe'mo'zama nazano hunaku'ma retro'ma haza antahi'zana eri savri nehie. ¹⁰ Ra Anumzamo'a kinia mani vava huno vugahie. Saioni vahe'mota Anumzamo'a fore hunante anante'ma hu'za vanaza vahetera kinia manivava huno vugahianki, agi'a ahentesga hanune.

147

Ra Anumzamofoma ra agima ami'zamofogagamere

¹ Ra Anumzamofona agi'a ahentesga hanune. Anumzantimofoma zagamema huta agi'ama ahentesga hanuna zamo'a knare hu'ne. E'ina hu'neankino agri agima ahentesga hu avu'ava zamo'a so'e huno knare zantfa hu'ne. ² Ra Anumzamo'a Jerusalemi kumara ete eri so'e huno ki'ne. Ana nehuno Israeli vahe'ma zamavare'za ru moparegama ome kinama huzmante'naza vahera ete ome zamavareno eme eritru nehie. ³ Knazamo'ma higeno zamagu'amo'ma havizama hu'nea vahera ete zamazeri so'e nehie. Ana nehuno namuma zamare'nea zana anaki nezamante. ⁴ Anami monafima hanafi tamima me'neana agra ko keno

antahino nehuno, mago mago hanafi'mofona
agi'a amitere hu'ne. ⁵ Tagri Ra Anumzamo'a
ra huno hankavenentake Anumza mani'ne.
Ana hu'neankino Agri antahi'zamo'a mareri
agatereneankita, mago'zantera erinteta, e'ina
hune huta kegara osu'none. ⁶ Zamavufgama
anterami'za nemaniza vahera Ra Anumzamo'a
zamazerisga nehie. Hianagi havi avu'ava
zama nehaza vahera kugusopafi zamazeri
netre. ⁷ Zgame huta Ra Anumzamofona
susu henenteta humuse hunteto. Hapu
zavena neheta zagamera huta, Ra Anumzana
tagri Anumzamofona agi'a ahentesga hiho.
⁸ Anami monafina higeno hampomo'a rufiteno
enevigeno, kora hunteteno ama mopafina
kora runenteteno, agonaramimpina trazamo'a
hageno marenerie. ⁹ Agra afi zagagafa ne'zana
nezamino, kotkoti namamofa anentamo'zama
ne'zanku'ma krafama nehazageno'a ne'zana
nezamie. ¹⁰ Ra Anumzamo'a hosi afu'mofa
hankavegu'ene, mago vahe'mofa hanavegura
antahinomie. ¹¹ Hianagi Agriku'ma koro nehu'za,
vagaore mevava avesi zanku'ma amuha'ma
nehaza vaheku, Ra Anumzamo'a musena
nehie. ¹² Jerusalemi kumapima nemaniza
vahe'mota Ra Anumzamofona agi'a ahentesga
hiho. Saioni agonafima nemaniza vahe'mota,
tamagri Anumzamofona agi'a ahentesga hiho.
¹³ Na'ankure rankumatamimofa kafante'ma eri
rusima nehaza ainia agrake'za eri hankavenetie.
Ana nehuno ana kumapima tamagri mofavre
naga'ma mani'nazana asomu hunezmante.
¹⁴ Tamagri mopamo'ma ometre eme atrema

hu'nerega agrake'za kegava higeta fru huta nemanizageno, knare zantfama hu'nea witia tamigeta neramura nehaze. ¹⁵ Agrama mago zanku'ma ama mopafima keagama hutregeno'a, ame huno ana nanekemo'a ama mopafina eneramie. ¹⁶ Ama mopafina aisia atregeno eramino refinetegeno, tanefa ruherafi atreaza huno aisia ruherafi atregeno mopa refi'nete. ¹⁷ Agra monafintira have komopa ko atregeno eneramie. Anazamo higeno tusi zasi nehiankino, mago vahe'mo'a ana zasipina omanigahie. ¹⁸ Hagi henka keaga nehigeno, keaga'amo ana aisia eri ze'ze hutegeno, zaho huntegeno eno ana tina eme ahesageno vu'ne. ¹⁹ Agra naneke'a eri ama huno Jekopuna nesamino, kasege'ane tra ke'anena Israeli vahera huama huno zamasami'ne. ²⁰ Amanahu avu'ava zama tro'ma huzmante'neana, ruga'a mopafi vahe'ma agri kasegema ontahi'naza vahera anara huozmante'ne. Ra Anumzamofona agi'a ahentesga hanune.

148

Maka'zama monafine mopafinema me'nea zamo'a Anumzamofa agi ahentesga hania zagamere

¹ Ra Anumzamofona agi'a ahentesga hanune. Amenagame monafinkatira Ra Anumzamofona agi'a ahentesga nehinkeno, anami monafintira, Ra Anumzamofa agi'a ahentesga hiho. ² Maka Agri ankeru nagamota Anumzamofa agi'a ahentesga nehanageta, monafima maka Agri sondia vahe'ma nemaniza vahe'mota agi'a

ahentesga hiho. ³ Zagemokane ikamokanena Ra Anumzamofu agi'a ahentesga nehikeno, remsama nehaza hanafi'mota Anumzamofu agi'a ahentesga hiho. ⁴ Anami hampoma agatereno onagame'ma me'nea monaramimo'za Anumzamofu agi'a ahentesga nehanage'za, hampoma agatereno onagame'ma me'nea timo'ena Anumzamofu agi'a ahentesga hugahie. ⁵ Hagi ana zantamimo'za Ra Anumzamofu agi'a ahentesga hiho. Na'ankure agra fore hiho huno hige'za fore hu'za me'naze. ⁶ Agra amare megahaze huno nonkuma'ma huzmantenere manevava hu'za neaze. Ana hu'neankino agrama huama'ma hu'nea kemo'a, mevava huno vugahie. ⁷ Maka ama mopafi zantamimota Ra Anumzamofu agi'a ahentesga nehinkeno, hagerimpima tusinasi zagama nemaniza zagamotane, hagerimofu amefenkamema nemaniza zagamota Ra Anumzamofu agi'a ahentesga hiho. ⁸ Hagi kopasi'namokane komopa ko'mokane, aisimokane ko'mokane, Anumzamofonkea amage anteho. ⁹ Maka ranra agona'motane, ne'onse agona'motane, rgama renentaza zafamotane, maka sida zafa'motane, ¹⁰ afi zagagafamotane, vahe'mo'zama kegava nehaza zagagafamotane, tamasagu regati'ma regraromaheta vanoma nehaza zaga kafamotane, haretu vanoma nehaza nama'motane, ¹¹ ama mopafi kini vahetamine, maka ama mopafi vahe'ene, ugagota kva vahe'motane, keagama refkoma nehaza kva vahe'motane, ¹² nehazave'motane

mofa'nemotane, ozafamotane, ne'onse mofavre nagamotanena Ra Anumzamofa agi'a ahentesga hiho. ¹³ Maka zantamimo'za Ra Anumzamofona agi'a ahentesga hugahaze. Na'ankure agri agimo'a rankrerfa hu'neankino, agri hihamu hankavemo'a monane mopanena agatereno onagame mareri'ne. ¹⁴ Agra vahe'a antahizamino hankavea nezamie. E'inama hige'za agri amage'ma nentaza vahe'mo'za agi'a ahentesga nehaze. Israeli vahe'ma agri tvaonte'ma nemani'naza vahe'mota, Ra Anumzamofona agi'a ahentesga hiho.

149

Musema huno Anumzamofa agima ahentesga hu zagamere

¹ Ra Anumzamofona agi'a ahentesga nehuta, Ra Anumzamofontega kasefa zagame hanune. Agri'ma amage nentaza vahe'motama atruma hanafina zagamera huta Agri agi'a ahentesga hiho. ² Israeli vahe'mota tamagri'ma tro'ma huramante'nea Anumzamofonkura muse huntegahaze. Jerusalemi kumapima nemaniza vahe'mota, kini ne'tamigura muse huntegahaze. ³ Tamagra Agri agia ahentesga huta avoa nehageta, nase'nasepane hapu zavenanena aheho. ⁴ Na'ankure Ra Anumzamo'a vahe'agura tusiza huno muse hunezmanteankino, zamavufagama anterami'za nemaniza vahera zamaza hige'za ha' vahe'zamia hara huzmagate'neraze. ⁵ Anumzamofa amage'ma nentaza vahe'mota, ha'ma hugatemaneraza zankura muse hugahaze. Ana nehu'za

nozamifima mase'naku'ma nehu'za ranke hu'za muse zagamera hugahaze. ⁶ Zamagipintira Anumzamofa agi'a ahentesga nehu'za, tarega kazigama asane'nea bainati kazina zamazampi eri'ne'za, ⁷ maka ama mopafima mani'naza vahera nona hu'za hara hunezamante'za, zamagrama hunenaza zamavu'zmava zantera nona hu'za vahera zamazeri haviza hugahaze. ⁸ Ana nehu'za kini vahezmiya seni nofinu kina renezamante'za, kva vahe'zaminena ainireti tro hu'naza seni nofiteti kina rezmantete'za, ⁹ ke'ma refkohu vahe'mo'zama e'inahu knaza erigahaze huno'ma hu'nea kante amage ante'za, ana vahera knazana zami'za zamazeri haviza hugahaze. Ana hu'neanki'za Anumzamofoma amage'ma nentaza vahe'mo'za, knare zamagi erigahaze. Ra Anumzamofona agi'a ahentesga hanune!

150

Ra Anumzamofa agi'ma ahentesga hu zagamere

¹ Ra Anumzamofona agi'a ahentesga hanune. Ra Anumzamofona Agri noma'afi eta, agi'a ahentesga hanune. Agri hihamu hankavema erinte ama'ma nehia mona kumapina, Agri agi'a ahentesga hiho. ² Agrama hankavenentake eri'zama eri'nea zamo'a, knare huno so'e zantfa hu'neanki' agi'a ahentesga hiho. ³ Ufena nereta Anumzamofa agi'a ahentesga nehuta, laeriema nehaza zavenane hapuema nehaza zavenane neheta, Anumzamofa agi'a ahentesga hiho. ⁴ Nase'nasepa neheta zagame huta avoa nehageta, kita zavena neheta konkenenareta

Anumzamofu agi'a ahentesga hiho. ⁵ Tare kapa tamazampi eri'neta runkasase hinkeno, agasasa neranigeta Anumzamofu agi'a ahentesga hiho. Anazana runkasase'ma hanageno ra agasasama neranigeta, Anumzamofu agi'a ahentesga hiho. ⁶ Maka zagama tamasimu'ma erita nemanisaza zagamota, Ra Anumzamofu agi'a ahentesga hugahaze. Ra Anumzamofu agi'a ahentesga hanune.

cclxxix

Anumzamofu Ruotage Avontafere
The Holy Bible in the Kamano-Kafe language of Papua
New Guinea
Buk Baibel long tokples Kamano-Kafe long Niugini

copyright © 2022 Tyndale Bible Translators

© Tyndale Bible Translators

Language: Kamano-Kafe (Kamano)

Translation by: Tyndale Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-02-08

PDF generated using Haiola and XeLaTeX on 21 Feb 2024 from source files dated 13 Dec 2023

f1057ba4-e8d1-53e3-baf9-315ebf4a8836